

প্রথম প্রেম
শ্রীঅচিন্ত্যকুমার সেনগুপ্ত .

গুরুদাস চট্টোপাধ্যায় এণ্ড্ সন্স
২০৩-১-১ কর্ণওয়ালিস স্ট্রিট
কলিকাতা

এ ই লে খ কে র

বেদে

টুটাফুটা

অমাবস্তা

প্যান্

আকস্মিক

বিবাহের চেয়ে বড়ো

কাক্জ্যোৎস্না

ছিনিমিনি

ইতি

অধিবাস

প্রাচীর ও প্রাস্তর

মুখোমুখি

আকাশ-প্রদীপ

ডাকাতের হাতে

रुद्राक्ष

শ্রীমতী ~~বালিকা~~ নন্দী
জনকর্তা

অবতরণিকা

প্রকাণ্ড বাড়ি,—দক্ষিণে দুর্দমনীয় নদী ভাঙিতে-ভাঙিতে সামনের বাগানের ধারে আসিয়া থামিয়া পড়িয়াছে। বহুদূরবিস্তৃত চর। আগে ছিল ফেনপঙ্কিল লোনা জলের ঢেউ, এখন তৃণহীন শূন্য মাঠের। দক্ষিণের অব্যবহিত দক্ষিণ্য—হাওয়ায় একেবারে উড়াইয়া নেয়।

বার্দ্ধক্যে অতিকায় বাড়িটা জীর্ণ হইয়া আসিলেও তাহার মধ্যে আভিজাত্যের লক্ষণ স্পষ্ট ধরা পড়ে—ফটকে, মণ্ডপে, এমন-কি প্রাচীর-গাত্রে। একদিন এ-বাড়িতে বারো মাসে তেরো পার্বণ লাগিয়া ছিল, দোল-দুর্গোৎসব হইতে শুরু করিয়া যম-পুকুরের ব্রতটি পর্যন্ত বাদ পড়িত না। এখন আর কিছুই নাই। পূজার বরাদ্দ টাকা উমাকান্ত এখন মদে উড়ায়।

বাড়ির মালিক এখন উমাকান্ত—বলিষ্ঠ দেহ, সর্ব অবয়বে উচ্ছ্বসিত দৃঢ়তা! বয়স ত্রিশের কোঠা পার হইয়াছে; অমায়িক প্রফুল্ল মুখ, কিন্তু চোখের দৃষ্টির অন্তরালে কি-একটা গূঢ় অবিশ্বাস ও সন্দেহের সঙ্কেত রহিয়াছে। উগ্রস্বভাব, উচ্ছৃঙ্খল,—পরিণামের প্রতি একটি সর্বল ও দুঃসাহসিক উপেক্ষা।

সংসারে স্ত্রী সুমতি—আর বংশে বাতি দিবার জন্ত নাবালক একটি শিশু। বিরাট পুরীর আনাচে-কানাচে পিসি-মাসির দল ছিটানো রহিয়াছে, উমাকান্তর সে-সব দিকে নজর নাই। সরকার তদারক করে, দাস-দাসীরা ছিনিমিনি খেলে, পিসি-মাসির দল কৌদল করিয়া পাড়া

প্রথম প্রেম

জাঁকায়, আর স্মৃতি শ্রীমতী বধূটির মত রোজ রাতে স্বামীর প্রত্যাবর্তনের প্রতীক্ষায় প্রহর গুনিয়া-গুনিয়া অবশেষে শয্যাপ্রান্তে বিধুর চন্দ্রলেখাটির মত নিস্তেজ হইয়া পড়ে।

উমাকান্ত কোনো কিছুরই তোয়াক্কা রাখে না,—খাও-দাও, পায়ের উপর পা তুলিয়া হাই তোলা—সংসারে কে বা কাহার, কোথায়ই বা কে !
চক্ষু বুজিলেই ফক্কিকার !

অতএব—

উমাকান্ত মদের বোতল লইয়া বাহিরের বৈঠকখানা হইতে একেবারে শুইবার ঘরে আসিয়া হাজির হইল। ঘরে ঢুকিয়া কাণ্ড দেখিয়া স্মৃতির চক্ষু স্থির ! কোনোদিন স্বামীর বিরুদ্ধবাদিনী হয় নাই, শুধু সঙ্গবিমুখ থাকিয়া তাঁহার যথেষ্টাচারিতা হইতে সন্তর্পণে নিজেকে রক্ষা করিয়াছে ; কিন্তু আজ আর সহিল না। সামনে আগাইয়া আসিয়া কটুকণ্ঠে প্রশ্ন করিল : এ সব হচ্ছে কী ?

নিতান্ত নির্লিপ্তের মত উমাকান্ত কহিল,—দেখতেই ত' পাচ্ছ।

স্মৃতি মদের বোতলটা সহসা কাড়িয়া নিয়া কহিল,—এতদিন স্বচক্ষে দেখতে না পেলেও বুঝতে আমার আর কিছু বাকি ছিলো না। কিন্তু সব কিছুরই একটা সীমা থাকা উচিত।

উমাকান্ত হাসিয়া কহিল,—সব কিছুরই সীমা হয়তো একটা আছে, কিন্তু মদ ও মন—দুয়েরই কোনো মাত্রা নেই। দাও, বাইরে যদি চলে, ঘরেও চলবে। বাইরে এত সব ভাগীদার জোটে যে তলানি ছাড়া কিছুই বড়ো আর জিতে ঠেকে না। দাও।

স্মৃতি দুই পা পিছাইয়া গেল : এ ঘর আমার, এর গুচি তা আমি নষ্ট হ'তে দেব না।

প্রথম প্রেম

—কবিত্ব করে' বলছ বটে, কিন্তু দায়ভাগের বিধান অনুসারে আমি স্বচ্ছন্দে তোমার দায় থেকে মুক্ত হ'তে পারি জানো? দাও, দাও, ইয়ার্কি করো না। তোমার ঘরের শুচিতা রাখবার জন্তেই ত' বন্ধুদের আর এখানে নিয়ে আসিনি। তারা এতক্ষণে হয়তো বৈঠকখানাটাকে ইন্দ্রসভা বানিয়ে ফেলেছে।

—যাও না সেখানে, এখানে মরতে এসেছ কেন?

উমাকান্ত গম্ভীর হইয়া উঠিল। কিন্তু পরক্ষণেই সেই উদাসীন স্বরে কহিল,—মরতে ঠিক তোমারই কাছে ফিরে আসবো কি না তার কোনো ঠিকানা নেই। কেন না স্মৃতি আমার হ'বে না কোনোদিন।

কথার সুরে করুণ একটি বেদনাভাসের পরিচয় পাইয়া স্মৃতি নিজের রূঢ় ব্যবহারে ক্ষুণ্ণ হইল। কহিল,—কিন্তু এমন উচ্ছ্বল হ'লে মরবার আর বাকি কী?

—যেটুকু বাকি আছে সেই কটি মুহূর্তকেই ফেনিল করে' পান করে' যাই, স্মৃতি। দাও, তোমার যৌবনের চেয়ে এই রঙিন বোতলটায় বেশি স্বাদ। বলিয়া বোতলটা ছিনাইয়া লইবার জন্ত উমাকান্ত সহস্রা স্ত্রীকে জড়াইয়া ধরিল।

স্মৃতি সেই আলিঙ্গনে বশতা স্বীকার করিল বটে, কিন্তু সামনের খোলা জানালা দিয়া বোতলটা বাহিরের উঠানে ছুঁড়িয়া ফেলিয়া দিল।

উমাকান্ত স্ত্রীকে ছাড়িয়া দিয়া জানালায় ঝুঁকিয়া আর্তনাদ করিয়া উঠিল: আহাহা! মদটার কত দাম জানো? তোমাকে ত্যাগ করে' বছরে তোমাকে ঐ টাকাটায় খোরপোষ দিলে তুমি নেহাৎ অসন্তুষ্ট হ'তে না। কিন্তু তোমাকে ত্যাগ করতে চাই না বলে'ই ত' তোমার শরণ নিয়েছিলাম। কৈ তুমি আমাকে এই পাপ থেকে দূরে সরিয়ে রাখবে,

প্রথম প্রেম

না, আবার তারি দিকে ঠেলে দিচ্ছ। এখন আমার বন্ধুদের মহলে না গিয়ে আর উপায় কি! মদের সঙ্গে তোমার উপদেশ আর পাঞ্চ করে' খাওয়া হ'ল না। কে জানে হয়তো একসময় তোমার উপদেশেই বেশি নেশা লেগে যেত। মদ যেত মিইয়ে।

বলিয়া সে দরজার দিকে অগ্রসর হইয়া আবার ফিরিল : বোতলটা যখন শব্দ করে' ভেঙে গেলো, তখন তার আর্তনাদটা কেমন চমৎকার লেগেছিলো বল ত'। আমি মরে' গেলে তুমি অমনি অকপটে চীৎকার করতে পারবে ?

স্বামী অন্তর্হিত হইয়া গেলে স্মৃতি দুই চোখে আর পথ খুঁজিয়া পাইল না। স্বামীকে সে কি করিয়া ফিরাইবে? উপদেশ শুনিলে উপহাস করেন; স্ত্রীর পক্ষে পরমতম শাসন সহশয়নবিমুখতা— তাহাতেও উমাকান্তর অরুচি নাই। অশ্রুজল? উমাকান্ত প্রবোধ দিয়া বলে : লোনা জলে এমন সোনালি নেশা তুমি মাটি কোরো না, লক্ষ্মীটি। তবে কি স্মৃতি আত্মহত্যা করিবে? তাহাতে উমাকান্ত নামের সঙ্গতি রাখিয়া একেবারে উদ্ভ্রান্ত হইয়া যাইবে আর কি! বরং বিড়ালের ভাগ্যে ছিকে ছিঁড়িবে মাত্র। এই ফাঁকে একটি চারুবর্কনা কিশোরীর মুখমদিরা পান করিয়া ফিকে রাত্রিগুলো সে রঙিন করিয়া তুলিবে মাত্র। স্বামীকে স্মৃতি এইভাবে জিতিতে দিবে না।

দেয়ালের বড়ো আয়নাটাতে ছায়া পড়িতেই স্মৃতি থামিল। সে যে কত সুন্দর এই কথা কোনো পুরুষের মুখে শুনিয়া সে রোমাঞ্চিত হইতে চায় না, নিজেরই রূপে সে অন্তরে-দেহে একটি স্বাদময় স্নিগ্ধ মাদকতা অনুভব করিল। যৌবন আজ আর তাহার বর্ণলীলায় উজ্জল নয়, একটি স্থির শ্যামল সুষমা তাহার যৌবনকে শীতল, শুচিস্মিত

প্রথম প্রেম

করিয়া রাখিয়াছে। প্রগল্ভ প্রাচুর্য্য নয়, একটি অব্যবহিত নিষ্কতা !
মুখমণ্ডল মাতৃস্বমণ্ডিত, পাতিব্রতের দীপ্তি ললাটে বিচ্ছুরিত হইতেছে।
দেহ তাহার লাবণ্যের নদী নয়, লাবণ্যের লেখা !

কিন্তু এই ধীর-নীল প্রশান্ত হৃদে উমাকান্ত অবগাহন করে না ;
সে চায় উত্তরঙ্গ যেনসকুল বিশাল সমুদ্র ! সে চায় আবর্তনময় পরিবর্তন।
সে চায় চঞ্চলতা !

উমাকান্ত আজকাল শুইবার ঘরে বসিয়াই মদ খায়। প্রসাদভোজী
বন্ধুদের সংসর্গ হইতে স্বামীকে সরাইয়া আনিলেও শয়নগৃহ স্মৃতির কাছে
সুখস্বর্গ হইয়া উঠে নাই।

তবু স্বামীকে নিজের কাছে বসাইয়া গ্লাসে মদ ঢালিয়া দিতে সে একটু
নিশ্চিন্ত বোধ করে। প্রতিদিন একটু-একটু করিয়া পরিমাণ কমাইবার
চেষ্টা করে, কিন্তু একটা বোতল কখন সম্পূর্ণ নিঃশেষ হইবে এ সম্বন্ধে
উমাকান্তের অটুট দিব্যজ্ঞান দেখিয়া স্মৃতি হতাশ হয়।

খামখেয়ালি মাতালের নির্লজ্জ আবদার রাখিতে গিয়া স্মৃতি
একেবারে দেউলে হইয়া পড়ে। শালীনতার খোলসটুকুও বিসর্জন
দিতে হয়। তবু স্বামীকে সে বিপণিবীথিকার ক্রেতা হইতে
দিবে না।

উমাকান্ত বলে : এইবার নাচটা শিখতে পারলেই তোমাকে সোনার
ঘুঙুর গড়িয়ে দেব, স্মৃতি ! তোমাদের যে বেহুলা, সেও স্বামীর জন্তে
স্বর্গসভায় গিয়ে নেচেছিলো, খবরটা রাখ ত' ?

স্বামীকে অবশেষে ঘুম পাড়াইয়া অসহায় স্মৃতি ভগবানের কাছে

প্রথম প্রেম

প্রার্থনা করিতে বসে। স্বামীর জন্ত নয়, সন্তানের জন্ত। মানব যেন মানুষ হয়। মানব যেন মায়ের মান রাখিতে পারে।

দিনের পর দিন এই কুৎসিত একঘেয়েমি স্মৃতিকে ক্লান্ত করিয়া ফেলে।

কিন্তু একদিন আর তাহার সহিল না। স্পষ্ট করিয়া প্রথরকণ্ঠে সে কহিল,—মদ আজ আর পাচ্ছ না।

উমাকান্ত বিচলিত হইল না, কোঁচাটা ঝাড়িয়া গৌফের দুই প্রান্তে তা দিতে-দিতে সে খাটের উপর বসিল। মৃদু-মৃদু হাসিয়া কহিল,—আজকে মহারাণীর হঠাৎ এই কার্পণ্য কেন? আমাকে অন্তর থেকে বর্জন করতে গিয়ে একেবারে অন্তর থেকেই তাড়িয়ে দিতে চাও নাকি?

স্মৃতি স্বামীর পায়ের কাছে বসিয়া পড়িয়া কহিল,—তুমি সর্বনাশের শেষ-সীমায় এসে পৌঁছেছ, জানো?

উমাকান্ত হাসিয়া কহিল,—যার সর্ব আছে, তারই সর্বনাশের নেশা করতে সাধ যায়, স্মৃতি। যার কিছুই নেই সেই নেংটি পরে' সন্ন্যাসী সাজে, তাতে তার খর্বতার সমর্থনও সহজেই মিলে যায়। স্বভাবেই যে ক্লীব, সহজেই সে ব্রহ্মচারী!

স্মৃতি দৃঢ়ভঙ্গিতে মাথা নাড়িয়া বলিল,—অতশত আমি বুঝি না। মদের জন্ত তুমি নাকি আজকাল ধার করতে শুরু করেছ?

—আজকাল মানে? বহুদিন থেকে। খবরটা তুমি আজ পেলে বুঝি? তোমার স্বশুরকুলের এত সুবুদ্ধি ছিলো না স্মৃতি, যে, আমার এই রসের জন্তে অপরিচিন্ত রসদ জোগান। কয়েক বিঘে জমি আর এই ঝাড়টুকু! দাম কষে' দেখলে মোটমোট পাঁচ লাখ পেণ্ড মাত্র।

প্রথম প্রেম

দিনে আট দশ পেগ্ সাবাড় করলে কত দিনে সম্পত্তি পটল তোলে একটু হিসেব করে' দেখ না।

সুমতি ভয়ার্তকণ্ঠে অক্ষুট চীৎকার করিয়া উঠিল : তুমি এ বলছ কী ? এমনি করে' তুমি সমস্ত সম্পত্তি উড়িয়ে দিতে বসেছ নাকি ?

উমাকান্ত নির্লিপ্তকণ্ঠে কহিতে লাগিল : তোমার স্বপুত্রের হাতে সম্পত্তিটা উড়ে'ই এসেছিলো। যা উড়ে' আসে তা কখনো জুড়ে' বসে না, সুমতি। প্রজা ঠেঙিয়ে, তাদের পাকা ধানে মই দিয়ে, খাজনা না পেয়ে তার প্রতিবিধানে নারীর অমর্যাদা করে', খুন-খারাপি লুঠ-তরাজ দাঙ্গা-লড়াই—সব কিছু সাবেকি অত্যাচার করে'ই আমার প্রাতঃস্মরণীয় পিতৃদেব এই ঐহিক কীর্তিটি অর্জন করেছিলেন। এ-গ্রামে ভুলে এখনো কেউ তাঁর নাম নিলে তাকে নাকি উপোস করতে হয়। কত লোকের অভিশাপ কুড়িয়ে তাঁর এই সম্পত্তি,—আমার হাতে এর চেয়ে আর কী এমন সদ্যয় হ'তে পারতো ? আমি তাঁরই উপযুক্ত উত্তরাধিকারী— একশত্ৰুস্তমো হস্তি !

বলিয়াই উমাকান্ত অজস্র হাসিতে রুদ্ধশ্বাস ধরের অটল স্তম্ভতাকে চূর্ণ-চূর্ণ করিয়া ফেলিল।

খানিকক্ষণ সুমতি কথা কহিতে পারিল না। অপলকে স্বামীর মুখের দিকে চাহিয়া রহিল,—সে-মুখে চিন্তা বা অনুশোচনার একটিও ক্ষীণ রেখা নাই, অনির্ণীত ভবিষ্যতের দুঃখ-দুর্দশার চির-রাত্রির ছায়া সেই মুখকে স্তান করে নাই—সে-মুখ পাষণ-ফলকে খোদিত রেখামূর্তির মত প্রশান্ত, নিরুদ্ধেগ ! উমাকান্ত স্ত্রীর হাতে একটা ছোট ঠেলা দিয়া অনুনয় করিয়া কহিল,—নিয়ে এসো। বিধাতা নারীদেহলতিকায় যেমন মধু দিয়েছেন তেমনি দ্রাক্ষালতায় দিয়েছেন মদিরা। লগ্ন যে উৎরে যাচ্ছে, সুমতি।

প্রথম প্রেম

সুমতি সরিয়া বসিল ; কহিল,—কিন্তু মানবের কী হ'বে ?

উমাকান্তের সেই উদাসীন কণ্ঠ : যা হ'বার তাই হ'বে। সে-
ভাবনা ভেবে এই সোনার সঙ্ক্যাটা তুমি ঘোলাটে করে' তুলো না।
দাও, চাবিটা আমাকেই দাও না-হয়।

বলিয়া উমাকান্ত সুমতির আঁচল চাপিয়া ধরিল।

সুমতি আঁচলটাকে শিথিলতর করিয়া হঠাৎ দাঁড়াইয়া পড়িল : তুমি
মানুকে পথে বসাতে চাও নাকি ?

উমাকান্ত সহসা গভীর হইয়া কহিল,—যদি নিতান্ত ভয় না পাও,
ত' বলি, মানুকে আমি পথেই বসিয়ে যেতে চাই। যে-টাকা ও নিজে
রোজগার করে নি, অনায়াসে তা লাভ করে' তার বদলে ও যেন ওর
মনুষ্যত্ব খুইয়ে বসে না। ওকে আমি একেবারে গরীব করে' রেখে যেতে
চাই। কিন্তু এ কথাগুলি নেহাৎ শাদা চোখে কইছি বলে' তোমার
কাছে নিশ্চয়ই খুব মাননসই ঠেকছে না, না ? দাও চাবি।

উমাকান্ত শ্ৰুতবন্ধ আঁচলটা আরো জোরে আকর্ষণ করিল।

সুমতি বাঁকিয়া বসিল : কক্খনো দেব না।

—দেবে না মানে ?

—দেব না মানে দেব না। তুমি এমনি মদের গেলাসে সমস্ত সম্পত্তি
ফুঁকে দেবে, মানুকে পথের ভিথিরি করে' ছাড়বে—আর আমিই কি
না পরিমাণ কমানার চেষ্টায় তোমাকে নিজের হাতে মদ ঢেলে দেব !
কক্খনো আর না, মরে' গেলেও না। সরকার-মশায়ের খবরটা ভাসা-
ভাসা করে' পেয়েও তখনো বিশ্বাস করি নি।

উমাকান্ত পিশাচের মত অট্টহাস্য করিয়া উঠিল : শুধু মানু নয়, দয়া
করে' তার মায়ের কথাও মনে রেখো, সুমতি। এই ঐশ্বর্য্য সন্তোষ

প্রথম প্রেম

করবারই বা তোমার কি এমন অধিকার ছিলো ? গরীবের ঘরের মেয়ে, ছ'বেলা পেট পুরে' খাওয়াও জুটতো না সব দিন—গাছের তলাটাই ত' গন্তব্য ছিল ! আঙুল ফুলে যে কলা-গাছ হয় তার এটা মনে রাখা ভালো কলার ফসল একবারের বেশি ফলে না ।

সুমতি দৃপ্ত কণ্ঠে কহিল,—আমার জন্মে তোমাকে কে বলতে এসেছে ? কিন্তু সন্তানের বাপ হ'য়ে তুমি তার ভবিষ্যৎ এমন নষ্ট করে' দিতে চাও—তুমি কি মানুষ ?

উমাকান্ত কহিল,—তোমার কাজ প্রসব করা, প্রস্তুত করা নয় । সে দায়িত্ব আমার, সে আমি বুঝবো ।

—সেই বুঝেই ত' এই সব কীর্তি করে' চলেছ ? লজ্জা করে না ? বাপ সন্তানের চোখে কোথায় একটা ভালো দৃষ্টান্ত ধরে' রাখে, তা নয় এ কী জঘন্য কদাচার !

উমাকান্ত বিদ্রূপ করিয়া হাসিয়া কহিল,—আমার এই ভয়ঙ্কর ব্যর্থতার মতো মহৎ দৃষ্টান্ত পৃথিবীতে আর কী হ'তে পারে ? তুমি মেয়ে-মানুষ,—এর মর্যাদা বোঝবার মতো তোমার মস্তিষ্ক নেই । কিন্তু বৃথা কথা কাটাকাটি করে' ত' কিছু লাভ নেই । আমার অনুরোধ যদি না শোন তবে তোমার কোনো বাধাও আমি মানবো না ।

সুমতি বিস্মৃত আঁচলটাকে বুকের উপর রাশীকৃত করিতে-করিতে স্বামীর কাছে আগাইয়া আসিল । অসহায়ের যে কণ্ঠস্বর সেই অনুনয়ময় ভাষায় সে কহিল,—তুমি কিছুতেই কি এই অভ্যাস ছাড়তে পারো না ?

উমাকান্তর ভাষা নিদারুণ, নিষ্ঠুর : কিছুতেই না, কোনো যুক্তিতেই না । যা আমার ভালো লাগে তাই আমার ধর্ম ! তোমরা যাকে পাপ বলো সেই আমার ভালো লাগে । স্বাস্থ্যের ওজন তোম, বলবো

প্রথম প্রেম

পেট ফেঁপেও টেঁসে যেতে পারি। সমাজহিতের কথা তোল, বলবো যা সম্পূর্ণ আজ, তাই আমার সমাজ। অত কাছে সরে' এসো না। তোমার দৈহিক সান্নিধ্যে এত মাদকতা নেই যে তোমার দেহকেই আমি মদের গ্লাস বলে' চুমুক দেব।

উমাকান্ত সহসা স্ত্রীর হাত চাপিয়া ধরিল : আমাকে বাধা দেবার তোমার অধিকার আছে কি না জানি না, কিন্তু শক্তি নেই। চাবি দাও। পাকস্থলীতে 'লেবার মুভমেন্ট' চলেছে।

সুমতি এক ঝটকায় হাত কাড়িয়া নিয়া দূরে সরিয়া গেল : ককখনো দেব না চাবি। দেখি তুমি কি করতে পারো।

উমাকান্ত কহিল,—অনেক কিছুই করতে পারি। গায়ে হাত তুলতে পারি, ঘাড় ধরে' দেউড়ির বার করে' দিতে পারি, ইচ্ছা করলে টুঁটিটা টিপে ধরে' বোবাও করে' দিতে পারি। কিন্তু দু' পাত্র বেশি খাওয়া ছাড়া কিছুই হয় ত' আমি করবো না। স্নায়ু-গুলোকে অকারণে উত্তেজিত করতে ইচ্ছে নেই। লাভ কি ?

সুমতি ঝঙ্কার দিয়া উঠিল : কিন্তু আমি কি করতে পারি জানো ?

—আফিং খেয়ে বড় জোর জুড়িয়ে যেতে পারো। লাভের মধ্যে মদ তা হ'লে আর জুড়ায় না কোনোদিন।

সুমতি হঠাৎ গস্তীর হইয়া জিজ্ঞাসা করিল,—আমি মরে' গেলে তুমি ফের বিয়ে করবে ত' ?

—বিয়ে করবার ইচ্ছে থাকলে তুমি বেঁচে থাকতেও করতে পারতাম। ওটায় 'বৈচিত্র্য নেই বলে' স্বাদ নেই। তুমি যদি আমার স্ত্রী না হ'য়ে রক্ষিতা হ'তে তবে তোমার সম্পর্কে হয় ত' মাধুর্য্য থাকতো ! তুমি চলে' যাচ্ছ কি রকম ? চাবি দিয়ে যাও।

প্রথম প্রেম

অপস্রিয়মান স্মৃতিকে উমাকান্ত ধরিয় ফেলিল : এই তোমার প্রতিশোধের নমুনা ? মাত্র ঘর ছেড়ে চলে' যাওয়া ? মৌলিক আর কিছুই ভাবতে পারলে না ?

—আমাকে কেটে ফেললেও আমি চাবি দেব না ।

—বেশ, দিয়ো না । বলিয়া স্মৃতিকে ছাড়িয়া দিয়া উমাকান্ত কোনো-দিকেই দৃকপাত না করিয়া একটা কাঠের চেয়ার তুলিয়া আলমারির উপরে জোরে ছুঁড়িয়া মারিল । পুরু কাঁচের দরজা—প্রবল ঘায়ে খান্-খান্ হইয়া গেল । ফাঁকের ভিতরে হাত বাড়াইয়া স্কচ্ ছইঙ্কির বোতলটা বাহির করিতে তাহার দেরি হইল না ।

বোতলের ছিপিটা দাঁতে কামড়াইয়া খুলিতে-খুলিতে উমাকান্ত কহিল,—কাঁচের আলমারি তোমরাও, কিন্তু দেহের অন্তরালে এর মতো তোমাদের আত্মার সম্পদ কোথাও নেই, স্মৃতি । তোমরা অন্তঃসারশূন্য ।

বোতলের মুখটা মুখ-গহ্বরে উমাকান্ত প্রায় উপুড় করিয়া ধরিবে, একটা দুর্দ্ধর্ষ ঈগলের মত স্মৃতি দুই হাত তুলিয়া তাহার গায়ের উপর ঝাঁপাইয়া পড়িল । বোতলটা মেঝের উপর ছিটকাইয়া চুরমার হইয়া গেল, উমাকান্তের জামা-কাপড়ের আর কোনো শ্রী রহিল না । উৎকট উগ্র গন্ধে বাতাস বিষাক্ত হইয়া উঠিয়াছে ।

উমাকান্ত অসংযমী এ কথা কে বলিবে ? স্রিয়মাণ মুখে বোতলটার দিকে চাহিয়া থাকিয়া সে শুধু একটা দীর্ঘশ্বাস ফেলিয়া হাসিয়া কহিল,—ওর দুর্দ্ধর্ষ দেখে আমার খালি একটা উপমা মনে পড়ছে, স্মৃতি । যৌবনে প্রথম প্রেম যখন ব্যর্থ হয় তখন তার বেদনার মূর্তিটা বোধ করি এমনিই । কিন্তু বাইরেই যখন আমাকে ঠেলে দিচ্ছ তখন

প্রথম প্রেম

আমাকেই আবার তোমার একদিন অনুগমন করতে হ'বে। বেশি আর দেরি নেই। হীরালাল মুখুজে শিগ্গিরই আসচে ক্রোক করতে।

উমাকান্ত বাহিরের দরজা দিয়া অন্তর্দ্বান করিতেছিল, স্মৃতি সহসা তাহার পায়ের উপর হুন্ডি খাইয়া পড়িয়া কাতর কাকুতিতে আর্তনাদ করিয়া উঠিল : তুমি যেয়ো না, দাঁড়াও—

উমাকান্ত দাঁড়াইল না।

রাত্রির পুঞ্জীকৃত স্তব্ধতা সরাইয়া অজস্র-বন্যায় বৃষ্টি নামিয়া আসিল।
খোলা জানালায় বসিয়া স্মৃতি কখন এই তামসী রাত্রির সঙ্গে মিতালি
পাতাইয়াছে !

স্বামী কখন ফিরিয়া আসিবে তাহার জন্ত সে পথ চাহিয়া বসিয়া
থাকে নাই, সে প্রতীক্ষা করিতেছে আকাশপ্রান্তে তিমিরাপসরণের প্রথম
রোমাঞ্চময় রঙিন মুহূর্তটিকে !

এই বর্ণচ্ছটাহীন আকাশ তাহার জীবন—এমনি মেঘ-মহুর, বেদনা-
বিহ্বল ; এই করুণাহীন অন্ধকার তাহার স্বামি-সান্নিধ্যের বীভৎস
প্রতিবেশ ; তাহার সন্তান তাহার অসাড় আকাশে অরুণোদয়ের প্রথম-
রোমাঞ্চময় রঙিন মুহূর্ত !

কত কথাই আজ স্মৃতির মনে পড়িতেছিল,—কত দিনের কত
অস্পষ্ট কাহিনী। অতীতের সেই সব মুহূর্তগুলি ত্রিয়মাণ চোখে
তাহার দিকে চাহিয়া আছে। সেই তাহার প্রথম বিবাহ-রাত্রি,
স্তূপীকৃত বসনের অন্তরালে সে সেদিন সর্বক্ষেত্র তারকিনী রাত্রির
সুখাবেশ সম্ভোগ করিয়াছিল ; তাহার পর স্বামীর প্রথম স্পর্শে সে
সহসা প্রতি ধমনীতে রমণী হইয়া উঠিয়াছিল, সেই শিহরণটি প্রত্যহের
অভ্যাসে মলিন হইয়া গিয়াছে ! তাহার পর তাহার প্রথম সন্তান-
সম্ভাবনার গৌরবময় স্বপ্ন ! প্রতি রোমকূপে তাহার অমৃতস্বাদ ! কিন্তু
সেই অমৃত আজ মৃতস্বাদ হইয়া গেছে।

স্মৃতি আর অমিতাচারী ব্যভিচারী স্বামীর স্ত্রী নয়, সন্তানের
মাতা,—একটি স্মহান আবির্ভাবের প্রসূতি। ঋষিকণ্ঠে যেমন সৃষ্টি,
কবিচিত্তে যেমন ধ্যানছায়া, ভারতবর্ষের যেমন স্বাধীনতা—স্মৃতির

প্রথম প্রেম

তেমনি মানব। মানব তাহার মায়ের রচনা, মায়ের ধ্যান, মায়ের উপলব্ধি।

ঘুমের মধ্যে মানব হঠাৎ স্বপ্ন দেখিয়া একটু চঞ্চল হইয়া উঠিতেই স্মৃতি তাড়াতাড়ি বিছানায় উঠিয়া তাহার মাথাটা বুকের মধ্যে আঁকড়াইয়া ধরিল, ডাকিল: মানু!

ঘুমের ঘোরে মানব সাড়া দিতে পারিল না। অতিমলিত গভীর পরিচয়ের সুরে মানুষ যেমন করিয়া দেবতাকে ডাকে, তেমনি ভাবে কানের কাছে মুখ নিয়া স্মৃতি আবার ডাকিল: মানু!

এই ডাকেই স্মৃতির এতদিনের বঞ্চিত প্রার্থনার সাধনা মিলে। এই ডাকটিই তাহার সফল স্বপ্ন! শৃঙ্খলে বন্ধার!

মানু ত' মাত্র এই শ্রাবণে আটের কোঠা ডিঙাইয়াছে। তবু তাহার দুই চোখের বাতায়নের মধ্য দিয়া স্মৃতি অনাবিষ্কৃত উন্মুক্ত আকাশের সন্ধান পায়।

রাত অনেক হইয়াছে, স্মৃতির ঘুম আসিতেছে না। হঠাৎ জানালার বাহিরে মানদাকে এদিকে আসিতে দেখিয়া সে একটু আশ্চর্য হইল। মানদা এ-বাড়ির পুরানো ঝি, বৃকে করিয়া উমাকান্তকে সে মানুষ করিয়াছে। যদি উমাকান্তকে কেহ ধমক দিতে পারিত, তবে সে এই মানদাই। স্মৃতিরও তাহাকে সমিহ করিয়া চলিতে হয়।

মানদা জানলার কাছে আসিয়া স্মৃতিকে ঝাঁঝালো গলায় বকিয়া উঠিল: তুই কেমনতরো মেয়ে শুনি? সোয়ামিকে আবার বাইরে পাঠিয়েছিস?

স্মৃতি ভয় পাইয়া দরজা খুলিয়া দালানে আসিয়া দাঁড়াইল; কহিল,—কেন, কি হয়েছে?

প্রথম প্রথম

—কী হয়েছে ? চুচুরে মাতাল হ'য়ে এসে বাইরের ঘরে ফরাসে গড়াগড়ি যাচ্ছে । বললাম, শুতে চল, উমাকান্ত । ফুঁপিয়ে কেঁদে উঠে উমাকান্ত বললে,—সুমতি আমাকে তাড়িয়ে দিয়েছে, মানি-মা ।

সুমতির বিশ্বয়ের সীমা রহিল না : উনি কেঁদে উঠলেন ? তুমি বল কি, মানি-মা ? তুমি ওঁর চোখে জল দেখলে ?

—দেখলাম না ? স্ত্রী স্বামীকে তাড়িয়ে দরজায় খিল এঁটে দিলে কোন্ স্বামীর না দুঃখ হয় ! তুই হাসছিস কি পোড়ারমুখি ? কোথায় তুই তোর স্বামীকে আঁচলের খুঁটে বেঁধে রাখবি, না, তাকে নিয়ে তুই ঘুড়ি ওড়াচ্ছিস । যা করুক, গায়ে ত' আর তোর হাত তোলে না ! রূপোর খাটে পা রেখে সোনার খাটে শুস্—এত দেমাক তোর কেমন করে' হয় ?

একটু মলিন হাসি সুমতির ঠোঁটের প্রান্তে ভাসিয়া উঠিল : তুমি বললে না কেন মানি-মা, ঐ স্ত্রীর চুলের ঝুঁটি ধরে' এক্ষুনি ওটাকে হিড়-হিড় করে' টেনে কাঁটা-বনে ফেলে দিয়ে এস । ওর সাধ্য কি তোমাকে বাধা দেয় ? ওর সাধ্য কি তোমার মুখের ওপরে দরজা বন্ধ করে' রাখে ?

—বলি নি ? একশো বার বলেছি । তোমারই ত' ঘর-দোর উমাকান্ত, সোনার সংসারে তোমারই ত' সোনার সিংহাসন ।

—উনি কি বললেন ?

—সেই কান্না ! খালি বলছে সুমতি আমাকে ডেকে না নিয়ে গেলে কখনোই আমি শুতে যাবো না, মানি-মা !

কথা শুনিয়া সুমতি একেবারে আকাশ হইতে পড়িল আর-কি : তুমি বলছ কী, মানি-মা ? তুমি এইমাত্র স্বপ্ন দেখে উঠে এলে নাকি ?

প্রথম প্রেম

—স্বপ্ন! মানদা স্মৃতির একটা হাত ধরিয়া তাহাকে সামনের দিকে টানিতে-টানিতে কহিল,—তুই নিজের চোখে দেখবি আয়!

স্মৃতি হাসিয়া কহিল,—নিজের চোখে অনেক দেখেছি, দেখতে-দেখতে চোখ আমার ক্ষয়ে' গেছে।

—কিন্তু তোর জন্মে আজ সে কাঁদছে, দেখবি আয়। এর আগে দেখেছিলাম কোনোদিন?

—আমার জন্মে নয় মানি-মা, মাত্রাটা বোধহয় আজ বেশি হয়েছে।

—তবু বৈঠকখানায় একবার যাবি চল।

—অত লোভ না দেখালেও আমাকে যেতে হ'ত। স্বামী মাতাল হ'য়ে বাইরের ঘরে পড়ে' আছেন, আর আমি তাঁর সেবা করবো না? বমি কাচাবো না? সে আর বলতে! তুমি ততক্ষণ মানুর কাছে একটু বোস, আমি যাই, দেখি গিয়ে নিজের চোখে।

স্মৃতি নিজের অলক্ষিতেই বেশ-বাস বিচ্যুত করিয়া লইল, সর্ব্বাঙ্গে তাহার নূতন ব্রীড়ার মন্থরতা! দালান পার হইয়া তবে বৈঠকখানায় ঢুকিতে হইবে—অনেকটা পথ। এতটা পথ পার হইতে-হইতে সে তাহার স্নায়ু-শিরায় যেন ঝঙ্কার গুণিতেছে! বিবাহের পর প্রথম রাত্রি যাপন করিবার জন্ম সে যেমন কুণ্ঠিতকায়ে লজ্জাবিজড়িত পায় স্বামী-শব্যার সম্মুখীন হইয়াছিল—এ যেন তেমনি! প্রশস্ত ফরাসে স্বামী অসুস্থ শরীরে একা শুইয়া আছেন অর্দ্ধ-অচেতন, ঘরের পুঞ্জিত অন্ধকার যেন স্মৃতিরই প্রতীক্ষার স্বপ্নে মৌনমগ্ন হইয়া আছে!

আকাশে খানিক-খানিক মেঘ করিয়াছে, তন্দ্রা-স্তিমিত চোখে ছ' একটা তারা গাছের শিয়রে জ্বলিতেছে—স্মৃতিকে পরিবেষ্টন করিয়া একটি অনির্বচনীয় স্তব্ধতা—কুমারীর প্রথম প্রেমানুভবের মত! আজিকার

প্রথম প্রেম

এই রাত্রি, মেঘঘন ম্লান মুহূর্ত ক'টি, এই একটি গোপনলালিত ভঙ্গুর আশা—সুমতি সর্বদেহ ঘিরিয়া যৌবনের একটি প্রখর ও স্পন্দমান শিহরণ অনুভব করিল! স্বামী তাহাকে ডাকিয়াছেন—এই তাহার আকাশময় ঐশ্বর্য! মানদা কি আর গায়ে পড়িয়া মিথ্যা কথা বলিতে আসিয়াছিল?

বৈঠকখানার দরজার কাছে আসিয়া সুমতি থামিল। ভিতর হইতে একটা চাপা পরিশ্রান্ত আর্ত স্বর কানে আসিতেছে। সে তাড়াতাড়ি ভেজানো দরজাটা ধাক্কা মারিয়া খুলিয়া দিল।

স্পষ্ট অন্ধকারেও সে সমস্ত দৃশ্যটি একমুহূর্তে আয়ত্ত করিয়া লইল। অত্যন্ত ক্লান্ত ভঙ্গিতে স্বামী ফরাসের উপর লুণ্ঠিত হইয়া আছেন,—অঙ্গ-প্রত্যঙ্গ শিথিল, বসন বিণ্যাসহীন! তবু আজিকার এই শুক্ন রাত্রে কি-একটা নিবিড় আবেশ সুমতিকে ঘিরিয়া ধরিল। খোলা জানালার বাহিরে নিস্পাদপ শূণ্য মাঠ ও তাহার উপরে অতন্দ্র শুক্ন অন্ধকার—একটি ভাবঘন প্রতিবেশে সুমতি সহসা স্বামীর প্রতি কী যে গভীর মায়া অনুভব করিল তাহা আর বলিয়া শেষ করা যায় না।

সুমতি ধীরে স্বামীর শিয়রের কাছে বসিল। রুক্ষ অসংস্কৃত চুল-গুলিতে আঙুল বুলাইতে-বুলাইতে সহসা তাহার দুই চক্ষু ভরিয়া কেন যে জল নামিয়া আসিল, কে জানে!

স্বামীকে কেন যেন তাহার অত্যন্ত দুঃখী, অত্যন্ত বঞ্চিত মনে হইল। কখন তাঁহার মাথাটা কোলের উপর তুলিয়া লইয়া বেদনায় একেবারে অসাড় হইয়া পড়িয়াছে সে-দিকে এতটুকু তাহার খেয়াল ছিল না।

কতক্ষণ পরে উমাকান্ত কথা কহিল: কে, সুমতি?

সুমতি নীরবে স্বামীর কপালে করতলখানি বিসৃত করিয়া রাখিল।

প্রথম প্রেম

একটিও কথা কহিল না, উঠিয়া বাতিটা জ্বালাইলেই এই সুকোমল দৃশ্যটি অসম্পূর্ণ আলোকে যেন একেবারে মাটি হইয়া যাইবে !

উমাকান্তও নিঃশব্দে স্ত্রীর কোলের মধ্যে মুখ গুঁজিয়া একটি সুরক্ষিত দুর্গের আশ্রয়ে বিশ্রামের সুখস্বাদ অনুভব করিতেছিল ।

এই অবিচল স্তব্ধতাতে যেন দুইজনের পরম আত্মীয়তা !

উমাকান্তই আবার কথা কহিল,—তুমি ঘুমুতে যাবে না, সুমতি ?

কথার সুর কেমন করুণ !

সুমতি ফরাসের উপর পা দুইটি তুলিয়া সান্নিধ্যে ঘনতর হইয়া বসিল, কহিল,—খুব বেশি ঘুম পেলে এথেনেই তোমার পাশে শুয়ে পড়ব না-হয় ।

কথার সুরে অঘাচিত করুণা !

হঠাৎ উমাকান্ত দুই হাতে সুমতিকে বুকের কাছে আকর্ষণ করিয়া অত্যন্ত বিমর্ষ কণ্ঠে কহিল,—আমার সঙ্গে তুমি গরীব হ'তে পারবে, সুমতি ? এই দালান-বালাখানা ছেড়ে আমার হাত ধরে' তুমি পথের ধূলায় নেমে আসতে পারবে ? পারবে না ?

নিশীথরাত্রি মন্ত্র জানে । সুমতি স্বামীর বুকের মধ্যে বড় সুখে মুখ গুঁজিয়া গদগদ স্বরে কহিল,—খুব পারব ।

—সত্য-সত্য পথের ধূলায় । মাথার ওপরে ছাত নেই,—রুঢ় রোদ্দ্র, রুক্ষ আকাশ । ঘর ছেড়ে ঝড়, ছায়া ছেড়ে শূন্যতা । শুতে বিছানা পর্য্যন্ত পাবে না ।

স্বামীর প্রসারিত বুকের উপর মাথা এলাইয়া অস্ফুটস্বরে সুমতি বলিল,—এই ত' আমার বিছানা । তোমাকে সত্যিই যদি পাই, পাবার মতোই পাই যদি, তবে দালান আমি বিলিয়ে দিতে পারি । গাছের তলায় তত সুখ ইচ্ছাশীলও কল্পনা করতে পারে না ।

প্রথম প্রেম

উমাকান্ত হাসিয়া বলিল,—তা ইন্দ্রাণীর দুর্ভাগ্য। তোমরা নের্হাৎ সতী হ'বে বলে'ই তোমাদের এই অকস্মণ্য ভাবপ্রবণতাকে ক্ষমা করতে হয়। কিন্তু কথাটা তুমি সত্যিই মন থেকে বলছ, স্মৃতি ?

স্পর্শবিহ্বল হইয়া স্মৃতি বলিয়া বলিল,—মন থেকেই বলছি বৈ কি। ভাগ্য যদি বিকল্প হয়, তবে পথ ছাড়া আর গতি কৈ ? তোমাকে পেলে আমার আর দুঃখ কী !

—আমাকে পাওয়া মানে, আমি মদ ছেড়ে ভালোমানুষটির মতো তোমার আঁচল ধরে' অচপল থাকবো—এই ত' ? অবিকল তাই ত' হ'তে চলেছে। আমার মদ খাবার জন্ত একটা কাণাকড়িও এ-বাড়ির আনাচে-কানাচে আর কোনোদিন মিলবে না, স্মৃতি।

স্মৃতি চমকিয়া উঠিল : ব্যাপার কি ?

—যা তোমাকে এতক্ষণ কবিত্ব করে' বললাম—সেই গাছতলা, সেই আকাশময় আশ্রয়হীনতা, আর এই শূন্য শুষ্ক উদর। ভাষাটা মোলায়েম বলে' অর্থটাও কিন্তু তদনুপাতে রুচিকর নয়।

স্মৃতি ভয় পাইয়া স্বামীকে আঁকড়াইয়া ধরিল : তুমি এ-সব বলছ কী ?

নির্নিপ্তের মত উমাকান্ত বলিতে লাগিল : জীবনের ভীষণতম দুর্ভাগ্যকে খুব নিরাকুল স্নেহ চিত্তে গ্রহণ না করলে সে-দুঃখকে অপমান করা হয়। ছিলাম মস্নদে, এখন নর্দমায়। গাছতলায় মানে ছায়া-বীথিতলে নয়, দস্তুরমতো গাছতলায়।

স্মৃতি আর্তনাদ করিয়া উঠিল : এ-সব তুমি কী বলছ ?

স্মৃতির ঘুমমালিন্য়ময় মুখখানি ধীরে-ধীরে বুকের উপর শোয়াইয়া দিয়া শ্রামসঙ্কেতহীন দূর বিস্তীর্ণ মাঠের দিকে চাহিয়া উমাকান্ত দীর্ঘশ্বাস ফেলিল ; কহিল,—সমস্ত বিষয়-সম্পত্তি কার-কারবার ছ' গ্লাস মদেই

প্রথম প্রেম

ডুবে গেল, স্মৃতি । হীরালালবাবুর কাছে সমস্ত কিছু বন্ধক ছিলো, ধার শোধ করবার ধার দিয়েও যাইনি বলে' সপরিবারে আমি তাঁর বন্ধনে । তিনি হুকুম করলেই তা তামিল করতে আমাদের গাছতলার আশ্রয় নিতে হ'বে । পরোয়ানা এই এসে গেল বলে' । তবু কিছু আমি কেয়ার করি না ।

প্রচণ্ড আঘাতে স্মৃতি তাহার কামনীয় উপাধান হইতে স্থলিত হইয়া পড়িল । সোজা হইয়া বসিয়া ভয়ার্ত্ত বিবর্ণ মুখে সে হাহাকারের মত বলিয়া উঠিল : সত্যি ? সরকার-মহাশয়ের কাছে সেদিন যা শুনছিলাম তার একবর্ণও তা হ'লে মিথ্যা নয় ?

উমাকান্ত শ্লথপদে জানলার কাছে উঠিয়া আসিয়া কহিল,—এক বিন্দু নয় । বরং সর্বনাশের পরিমাণ যে কতোখানি সে-ধারণা তাঁর ছিলো না, সে-ধারণা করবার মতো উদার মনোবৃত্তি সংসারে দুর্লভ, স্মৃতি । এই সর্বনাশের মধ্যেও একটা উগ্র নেশা আছে—ঠিক একটা হাউইর ফেটে যাওয়ার মতো । তুমি ছেলেমানুষের মতো গলে' গিয়ে এতো কাঁদছো কেন ? এতে হয়েছে কী ?

সরিয়া আসিয়া উমাকান্ত স্ত্রীকে নিবিড় সহানুভূতিতে কাছে টানিতে গেল । স্মৃতি এক ঝটকায় উত্তত আলিঙ্গন ঠেলিয়া দিয়া ফুঁপিয়া-ফুঁপিয়া কাঁদিতে লাগিল ।

উমাকান্ত কহিল,—সমস্ত ব্যাপারটার মধ্যে তুমি একটা মজা পাচ্ছ না ? ছিলাম জমিদার, এখন হ'তে চলেছি জমাদার—এর মধ্যে একটা প্রবল রোমাঞ্চ আছে । ভাগ্যের চাকা প্রতি মুহূর্ত্তে ঘুরে' যাচ্ছে—এর জন্তে শোক করার মতো মূর্থতা নেই । জীবনে এই ত' মজা । একেবারে নিঃস্ব হ'য়ে যাওয়ার মতো আনন্দ আর আছে কিসে ?

প্রথম প্রেম

উমাকান্ত আবার স্ত্রীকে নিকটে আকর্ষণ করিয়া কোমল করিয়া কহিল,—আমার সঙ্গে তুমি গরীব হ'তে পারবে না, স্মৃতি ? পথের ধারে ছোট পাতার কুঁড়ে ঘরে আমি আর তুমি মানবকে নিয়ে নতুন জীবন শুরু করবো—এই আরম্ভের আশ্বাদ নিতে তোমার লোভ হয় না একটুও ?

স্মৃতি গভীর ; দুই চোখ দিয়া অশ্রু রেখা নামিয়া আসিয়াছে ।

উমাকান্ত তাহার চুলগুলিতে হাত ডুবাইয়া কহিল,—মানবের জন্তে কিছু তুমি ভেবো না । একমাত্র জন্মের সার্টিফিকেটে হাত পেতেই এতো সহজে আমি যদি এই প্রকাণ্ড সম্পত্তিটা না পেতাম ত' এমন করে' হয় ত' দেহে-মনে ব্যর্থ হ'য়ে যেতাম না । মানব জীবনে বহুতর আঘাত পাক, বহুতর দারিদ্র্যের সঙ্গে সে সংগ্রাম করুক,—মা হ'য়ে এই তাকে আশীর্বাদ কোরো ।

স্মৃতি একেবারে শুক হইয়া গেছে ।

স্বামী তাহার প্রকৃতিস্থ হইয়াছেন কি না তাহাই সে ভাবিয়া পাইতেছে না ।

উমাকান্ত আবার কহিল,—থাকে না, পৈত্রিক সম্পত্তি থাকে না, স্মৃতি । কি করে'ই বা থাকবে ! দরিদ্রদলন করে' তিলে-তিলে যে সম্পত্তি বাবা আহরণ করেছিলেন তার এই যদি সদগতি না হয়, তবে সৃষ্টির যে সামঞ্জস্য থাকে না । তোমার চোখের জলের কোনোই মানে হয় না, স্মৃতি । এই সম্পত্তির জন্ম বাবা ও তাঁর অনুচরের অত্যাচারে কত মেয়ে কত চোখের জল ফেলেছে তার হিসেব আজ আর কেউ রাখে না । কত লোকের মুখের গ্রাস কেড়ে এই প্রাসাদ । তারাও একদিন এমনি কেঁদেছিলো ।

প্রথম প্রেম

সুমতি দুই হাতে মুখ ঢাকিয়া ফুঁপাইয়া উঠিল : এর আগে আমার মরণ হ'ল না কেন ?

উমাকান্ত বিদ্রূপ করিয়া কহিল,—তা হ'লে আমার পথের বোঝাটা আরো একটু হালকা হ'ত। মানবকে একটা অনাথ-আশ্রম-টাশ্রমে ঢুকিয়ে দিয়ে কাছাটা নামিয়ে বন্ ভোলানাথ বলে' সরে' পড়তাম। এই না ? কিন্তু ভাগ্যর কাছে এত আবদার কি খাটে ?

সুমতি জলিয়া উঠিল : যাও না তুমি এফুনি বেরিয়ে। কে তোমাকে ধরে' রাখছে ?

উমাকান্ত সান্ত্বনা দিবার ভাণ করিয়া কহিল,—যে-দুঃখের প্রতিকার নেই তাকে হাসিমুখে স্বীকার করতে না পারলেই দুঃখ, সুমতি। আমি ত' এই দুঃখে একটা নূতনের সূচনা দেখছি। তক্তপোষের নিচে বোতলে আরো খানিকটা মদ ছিলো, দাও না বার করে',—আমার হাত-পা আর নাড়তে ইচ্ছে করছে না।

সুমতি চীৎকার করিয়া উঠিল : তুমি এখনো মদ খাবে ? এততেও তোমার শিক্ষা হ'ল না ?

উমাকান্ত জোরে হাসিয়া উঠিল, কহিল ;—মদ খাব না ত' এই সর্ব-নাশের সুখের স্বাদ বুঝবে কি করে' ? তুমি নেহাৎই সেকেলে। এমন একটা উত্তেজনা জীবনে তুমি কোনদিন অনুভব করেছ ? পাহাড়ের চূড়া থেকে নিচে গড়িয়ে পড়ার মধ্যে অধঃপতনের একটা অত্যাশ্চর্য আনন্দ আছে। তুমি তার কি বুঝবে বলো।

বলিয়া সে নিজেই উবু হইয়া তক্তপোষের তলায় হাত ঢুকাইয়া বোতলটা বাহির করিল। সুমতির আর সহিল না।

অন্য সময় হইলে স্বামীকে হয় ত' একবার বাধা দিত,—বোধহয় এখনো

প্রথম প্রেম

ফিরাইবার সময় ছিল। কিন্তু একটিও কথা না কহিয়া দুয়ার ঠেলিয়া সে বাহির হইয়া গেল।

জনশূন্য সঙ্কীর্ণ একটা ঘর—তাহারই মধ্যে স্মৃতি আসিয়া পড়িয়াছে। নিঃশব্দ-উদ্গত শোকাশ্রু মত রাশি-রাশি অন্ধকার সেই ঘরে ফেনায়িত হইতেছে। সেই স্তব্ধতা এমন স্থূল ও নিরেট যে, কান পাতিয়া তাহার আর্তনাদ শোনা যায়, চক্ষু খুলিয়া তাহার ভয়াবহ বীভৎসতার আর পরিমাপ করা চলে না।

ইহা যেন তাহার প্রত্যাসন্ন ভবিষ্যতের একটা সঙ্কেত!

এই অন্ধকারে স্মৃতি যেন তাহার নিজের মূর্তি দেখিতেছে। সে মেঝের উপর অবসন্ন হইয়া বসিয়া পড়িল।

অর্দ্ধতন্দ্রাচ্ছন্ন অবস্থায় সে যেন গুনিতে পাইল পাশের ঘরে উমাকান্ত মদের বোঁকে উন্মত্ত প্রলাপ শুরু করিয়াছে: অভিশাপ, ভাগ্যের নয় স্মৃতি, শত-শত নির্যাতিত নিরনের। এ-ঘরের প্রত্যেকটি ইঁট তাদের বুকের পঁজর, তোমার-আমার ফুলশয্যায় এদের কামনার কীট। ওদের বিলাপে আমাদের বিলাস, ওদের অপমানে আমাদের অপচয়। অভিশাপ না ফলে' কি পারে? এ যে হ'তেই হ'বে।

অভিশাপ সত্য-সত্যই ফলিল ।

অবশেষে একদিন হীরালালবাবু উমাকান্তের সেই প্রশস্ত ফরাসের উপর তাকিয়ায় ঠেস্ দিয়া বসিয়া প্রসন্ন পরিতৃপ্ত মুখে সটকা টানিতে লাগিলেন ।

পিসি-খুড়ি মাসি-জেঠি—পরিবারে যত কিছু আগাছা ছিল প্রচণ্ড ঝড়ে সব কিছু ছত্রখান হইয়া গেল । দুই হাতে যে যাহা পারিল পৌঁটলা পুঁটলিতে বাঁধিয়া লইয়া উমাকান্তকে মুখে গালি পাড়িতে-পাড়িতে ক্রমশ সরিয়া পড়িল—কেহ কাশী, কেহ বৃন্দাবন, কেহ বা অন্য কোনো আশ্রয়-নীড়ের সন্ধানে । ভিমরুলের চাকে কে যেন একটা প্রকাণ্ড টিল ছুঁড়িল । একটা বিরাট অশ্বখকে মূলচ্যুত করিয়া কে যেন দূরে টানিয়া ফেলিয়া দিয়াছে !

উমাকান্ত ও সুমতি মানবের হাত ধরিয়া দেউড়ি পার হইয়া বাড়ির বাহির হইয়া আসিল । একবস্ত্রে, বিশ্বময় নিঃস্বতার মধ্যে ।

মানদা সঙ্গে যাইতে চাহিয়াছিল, উমাকান্ত তাহাকে ধম্কাইয়া বিদায় করিয়া দিয়াছে ।

উমাকান্ত একবার সেই বিশাল বাড়িটার দিকে চাহিল—এই বাড়ির ঘরে-ঘরে কত দিন ধরিয়া কত বাতি জলিয়াছে, সব সে আজ নিজ হাতে নিবাইয়া দিয়া আসিল । এই বাড়িতে কত জন্ম, কত বিবাহ, কত মৃত্যুর সুগম্ভীর আবির্ভাব—সমস্ত স্মৃতি মন হইতে মুছিয়া ফেলিয়া এই সীমাশূণ্য নিরালোক ভবিষ্যতে তাহাকে ঝাঁপাইয়া পড়িতে হইবে । চমৎকার !

হীরালালবাবুর কাছে আসিয়া উমাকান্ত সবিনয়ে কহিল,—চল্লাম ; নমস্কার !

প্রথম প্রেম

হীরালাল ব্যস্ত হইয়া উঠিলেন : সে কি ? পায়ে হেঁটেই চল্লেন নাকি ? একটা গাড়ি ডেকে দি—ছেলেপিলে নিয়ে—

স্নিগ্ধহাস্তে উমাকান্ত কহিল,—অজস্র ধন্ববাদ । এখন আর গাড়ি নয়, কঠিন পথ । আপনার দয়া চিরকাল মনে থাকবে ।

হীরালাল কহিলেন,—যাচ্ছেন ত' ষ্টেশনে ?

—হ্যাঁ, মাইল দুয়েক মোটে রাস্তা, হেঁটে যেতেই হ'বে কোনোরকমে । সে-জন্তে আপনি ব্যস্ত হ'বেন না । সম্পদের বেলায়ই সহধর্মিনী, দারিদ্র্যের দিনে স্বামীর সঙ্গে ছ' মাইল পথ হাঁটতে পার'বেন না এমন স্ত্রী পাতিব্রত্যের আদর্শরূপিনী বলে' হিন্দুশাস্ত্রে কীর্তিত হয় নি ।

সেই কথা হীরালাল কানেও তুলিলেন না, গলা ছাড়িয়া ডাক পড়িলেন : ওরে বলাই, সোভান্-মিঞাকে বলে' শিগ্গির একটা গাড়ি নিয়ে আয় । ষ্টেশনে পৌঁছে দেবে বাবুকে ।

উমাকান্ত বাধা দিয়া কহিল,—মদ খেতে যখনই আপনার কাছে হাত পেতেছি আপনি স্বচ্ছন্দে আমার হাতে কাঁচা টাকা গুঁজে দিয়েছেন । আপনার দয়া অসীম । কিন্তু দয়া করে' আমাকে আর ধনী করবেন না ।

বলিয়া উত্তরের কোন প্রতীক্ষা না করিয়াই সে পথে অগ্রসর হইল ।

পিছনে স্মৃতি—তাহার হাত ধরিয়া মানব ।

স্মৃতির দুই চক্ষু ছাপাইয়া অজস্র অশ্রুর আকারে অনপনেয় লজ্জা ও অসহনীয় অপমান ঝরিয়া পড়িতে লাগিল । হালদার বাড়ির বৌ রাস্তার বাহির হইয়া কঠিন মাটিতে পা রাখিবে বছর কুড়ি আগে এই কল্পনা পাগলেও করিতে পারিত না—সহরের এই দিক্কার সকল লোক জড়ো হইয়া এই ঘটনা হইতে কত যে নীতিমূলক গবেষণা শুরু করিয়াছে তাহার

প্রথম প্রেম

ইয়ত্তা নাই। সেই সব কথা আগুনের ফুলিঙ্গের মত স্মৃতিকে দগ্ধ করিতেছিল।

উমাকান্ত ব্যস্ত হইয়া কহিল,—পা চালিয়ে চলো একটু, কাঁদবার সময় ঢের পড়ে' আছে। বিকেলের ট্রেন আমাকে ধরতে হ'বে এটুকু কৃপা করে' মনে রেখো।

স্মৃতি পেছন ফিরিয়া আরেকবার বাড়িটার দিকে তাকাইল। বাড়িটা যেন স্নান অসহায় চোখে নীরবে কাকুতি জানাইতেছে। দশ বৎসর আগে স্বামীর অনুগামিনী হইয়া সে যখন প্রথম পিত্রালয় ছাড়িয়াছিল, তখন ঘোড়ার গাড়ির বন্ধ জানলার পাখির ফাঁকে সে তাহার বাবাকে দেখিয়াছিল সিঁড়ির উপর বিরস বিষণ্ণ মুখে কাতর চোখে তাহাকে দেখিতেছেন। সে যেন এমনিই অসহায় মূর্তি, এমনি উদাস। বাড়িটার দিকে চাহিয়া আজ তাহার খালি বাবার কথাই মনে পড়িতেছে। সেই শেষবার স্মৃতি তাহার বাবাকে দেখিয়াছিল। গ্রামে সেই বছর কোথা হইতে যে কলেরার বণ্ডা আসিল, সমস্ত ভাসিয়া-খসিয়া একাকার হইয়া গেল—শ্যামলতা হইল শ্মশান! ভিটে মাটির এক ফোঁটা চিহ্নও কোথাও রহিল না।

গাছ-পাতার অন্তরালে ক্রমশ হালদার-বাড়িটা অপসৃত হইতেছে। সেই বাড়িরই একটি বহুলালোকিত গৃহকোণে যেদিন উমাকান্তর বাসর-শয্যার পাশে শয়ানা সঙ্কোচভীতা নববধূটি প্রিয়তমের প্রথম স্পর্শের প্রতীক্ষা করিতেছিল, তখন কে জানিত তাহাকে একদিন রুক্ষ রাজপথেই সেই শয্যা প্রসারিত করিতে হইবে!

উমাকান্ত তীব্রস্বরে আরেকটা হাঁক পাড়িল।

মানব বাপের হাত ধরিয়া কহিল,—মা অমন কাঁদছে কেন, বাবা ?

প্রথম প্রেম

উমাকান্ত কহিল,—কলকাতায় যাবে শুনে ভয় পাচ্ছে। যাও ত' বাবা, মাকে একটু বোঝাও।

মানব বিস্মিত হইয়া কহিল,—কলকাতায় আবার ভয় কিসের? তুমিই ত' বলছিলে সেখানে সারা রাত ধরে' রাস্তায় রঙ-বেরঙের তুবড়ি জ্বলে—এখানেই অন্ধকারে ত' সাপ-খোপের ভয়। ভূত? মানব হঠাৎ বুক ফুলাইয়া তাহাতে ডান হাতটা ঠেকাইয়া বীরদর্পে কহিল,—রাম লক্ষ্মণ বৃকে আছে, ভয়টা আমার কি? তাহার পর সে হাসিয়া ফেলিল: মা নেহাৎ ছেলেমানুষ, বাবা।

উমাকান্ত হাসিয়া কহিল,—সেই কথাটাই তোমার মাকে একটু বুঝিয়ে বল।

মানব মা'র একটা হাত ধরিয়া তাহাতে ঝাঁকুনি দিতে-দিতে কহিল,— কেন তুমি অমন কাঁদছ? এখন আমরা গিয়ে ট্রেনে চাপবো, অন্ধকার ঠেলে হুস্-হুস্ করতে-করতে এঞ্জিনটা হাউইর মতো ছুটতে থাকবে— ফুর্তিতে সারারাত ত' আমার ঘুমই আসবে না। তার পর ভোরবেলা চাপবো ষ্টিমারে, চারদিকে খালি ঢেউ আর ঢেউ। যদি ঝড় আসে মা, ষ্টিমারটা নাগর দোলার মতো ছলতে থাকবে। নাগর-দোলা চড়তে তোমার ভালো লাগে না?

স্মৃতি বিহ্বলের মত মানবকে পথের মধ্যখানেই বৃকের উপর জড়াইয়া ধরিল।

—ছাড়, ছাড়, লোকে দেখলে বলবে কি? এত বড়ো ধাড়ি ছেলে মা'র কোলে চড়ে' ষ্টেশনে যাচ্ছে। তোমারই বরং হাঁটতে কষ্ট হচ্ছে, না? আমি যদি আরেকটু বড় হ'তাম ত' তোমাকে পাঁজা-কোলে করে' ছোট্ট খুকটির মত নিয়ে যেতাম, মা। কেন তুমি কাঁদছ, কলকাতায় কতো

প্রথম প্রেম

জিনিস তুমি দেখতে পাবে। সেখানে শুনেছি—এক রকম গাড়ি চলে, তাতে ধোঁয়া নেই, ভোঁ নেই—খালি ঠুং ঠুং করে' ঘণ্টা বাজায়। সেই গাড়ি চড়তে তোমার ইচ্ছে করে না? তুমি একেবারে ছেলেমানুষ, মা।

সুমতি ছেলের বিষয়দীপ্ত চোখের দিকে তাকাইয়া করুণ কণ্ঠে কহিল, —এ-বাড়িতে আর ফিরে আসবো না, মান্ন।

মানব ঠোট উল্টাইয়া কহিল,—বয়ে' গেল। কলকাতায় এর চেয়ে অনেক বড়ো-বড়ো বাড়ি আছে, এক-একটার বাড়ির চূড়ো নাকি মেঘের সমান উঠে গেছে। বাবা বলছিলেন নিচের তলায় কি রকম একটা বাস আছে, তার মধ্যে দাঁড়িয়ে কল্ টিপে দিলেই দেখতে-দেখতে পাঁচ-ছ তলায় বাসটা উঠে আসে। ভূগোলে আমেরিকার কথা পড়েছ মা? সেখানে নাকি একরকম বাড়ি আছে—তার তলায় রেলের মতো চাকা, এক জায়গা থেকে গড়িয়ে-গড়িয়ে অন্য জায়গায় গিয়ে হাজির হয়—বলিয়া মানব খিল-খিল করিয়া হাসিয়া উঠিল।

কিন্তু মা'র যে কেন তবু কারা খামে না সে ভাবিয়া পাইল না। কহিল,—বেশ ত', তারপর একদিন এ-বাড়িতে ফিরে এলেই হ'বে।

সুমতি কহিল,—এ-বাড়িতে আর ফিরে আসতে দেবে না।

কপাল কুঁচকাইয়া মানব কহিল,—ফিরে আসতে দেবে না? কে'?

—যারা এখন বাড়ির মালিক;—হীরালাল বাবুরা।

এমন ব্যাপারেও কেহ মুখ ভার করিয়া থাকে? মানব হাসিয়া উঠিল, পরে গম্ভীর হইয়া কহিল,—তুমি একেবারে ছেলেমানুষ, মা। আমরা কলকাতা বেড়াতে যাচ্ছি কি না, তাই বাবা এ কয়দিন হীরালাল-বাবুকে বাড়িটাকে দেখতে বললেন। কেউ পাহারা না দিলে বোসেদের চাকররা এসে পুকুর থেকে সব মাছ চুরি করে' নিয়ে যাবে, বাগানের

প্রথম প্রেম

একটা আমও আর ফিরে এসে খেতে পাবো না। ফিরে আসতে দেবে না কি, মা? আমাদের ঘর-বাড়ি পুকুর-বাগান কা'র সাধ্য কেড়ে রাখে? তা হ'লে হীরালালবাবুর দাড়ি ছিঁড়ে দেব না?

মা'র বিষাদ-স্নান মুখের দিকে চাহিয়া মানব আর উৎসাহ পাইল না। কখন তাহার নিজেরই মুখ ব্যথায় থম্‌থম্‌ করিয়া উঠিল; কহিল,— কলকাতায় যাচ্ছি মা, অথচ না নিলে একটা বাক্স-ট্রাঙ্ক, না বা কিছু খাবার। গাড়িতে কি পেতেই বা শোবে, সেখানে গিয়ে চান্ন করে'ই বা কি পরবো? গাড়ি ছাড়তে ত' এখনো কতো দেরি আছে। কুলির মাথায় করে' তোমার সেই হল্‌দে তোরঙ্গটা নিলেই সব চুকে যেত। বাবাকে এত বললাম, অন্তত আমার প্যাট্রাটা নিই, কিছুতেই তিনি তাতে হাত দিতে দিলেন না। আমার বাঁশি-নাটাই টিনের লাটু বই-খাতা সব পড়ে' রইলো। সেখানে গিয়ে আবার ত' সব কিনতে হ'বে?

স্মৃতি মানবের মুখখানা আবার কোলের কাছে চাপিয়া ধরিল। অশ্রুগদগদস্বরে কহিল,—কিনবার আর আমাদের কিছুই নেই, বাবা। বাক্স-প্যাট্রা খাট-পালঙ সিন্দুক-আলমারি সব—সব হীরালালবাবুদের। আমরা আজ পথের ভিখিরি।

চলিতে চলিতে মানব হঠাৎ থামিয়া পড়িল। এমন একটা কথা বলিলেই হইল? সে হাসিয়া কহিল,—হীরালালবাবুর ত' আচ্ছা আব্দার। দাঁড়াও, বাবাকে জিগ্‌গেস করে' আসি।

কিন্তু উমাকান্তর মুখে স্নেহ বা সহানুভূতির এতটুকু আভাস নাই। বাপের সেই মুখ দেখিয়া ভয়ে মানবের মুখে কথা সরিল না।

মানব ফিরিয়া আসিয়া আবার মা'র হাত ধরিল; কহিল,—এ কখনই হ'তে পারে না, মা। হীরালালবাবুর সাধ্য কি আমাদের বাড়িতে

প্রথম প্রেম

আমাদেরকে ঢুকতে দেবে না ? ঐ বুড়ো আমাদের সঙ্গে পারবে নাকি ? এক ভজুয়াই ত' ওকে আলুর দম বানিয়ে ছাড়বে । আমি দাড়িতে ওর আগুন লাগিয়ে দেব, মা । আমাকে তুমি যে এত হুমুমান বলতে তা এতোদিনে ঠিক হ'বে ।

মাকে এত সে প্রবোধ দিল, তবু কি না তাহার চোখের জলের বিরাম মানিতেছে না । নিতান্ত নিরুপায় হইয়া মানব শেষে মা'র হাতে একটা ঝাঁকুনি দিয়া কহিল,—গরীব হ'লাম বলে' তোমার এত ভাবনা কিসের, মা ? আমার লাটু-নাটাই কিছু চাই না, বিদ্যাসাগরের মতো আমি না-হয় রাস্তার ল্যাম্প-পোস্টের তলায় টুল টেনে বসে' পড়া মুখস্ত করবো । হাত পুড়বে বলে' ভয় পাচ্ছ, মা ? না, না, বিদ্যাসাগরের মতো রান্না করতে আমি না-ই বা পারলাম ; আমি হ'ব পিওন, থাকির প্যাণ্ট পরে' পায়ে ফেটি আর মাথায় পাগড়ি বেঁধে আমি কলকাতায় চিঠি বিলি করবো । গাড়ি-ঘোড়া ঠিক বাঁচিয়ে চলবো দেখো, তোমার কিছু ভয় নেই ।

মা তবু কথা কহে না, আঁচলে চোখ মুছিতে-মুছিতে ক্লান্তপায়ে পথ ভাঙে ।

বিকালের আকাশ ফিকা হইয়া আসে, হাটের পথে গরুর গাড়ি সার বাঁধিয়া টিমাইয়া চলে । মানব গরুর ল্যাজ টানিয়া দেয়, রাস্তা হইতে টিল কুড়াইয়া বাদামগাছের ডালে তন্দ্রাচ্ছন্ন প্যাঁচাটাকে লক্ষ্য করিয়া ছুঁড়িয়া মারে—কখনো বা সামনের পুকুরে ; বিন্দুবৎ জলচক্রটা কেমন করিয়া ক্রমশ বাড়িতে-বাড়িতে অস্পষ্টতর হইতে থাকে তাহাই দাঁড়াইয়া একটু দেখে । বলে : গুল্‌তিটাও সঙ্গে আনলে না মা, ঐ পাখির বাসাটা তা হ'লে ভেঙে দিতাম ।

প্রথম প্রেম

মা কেমন করিয়া যেন চাহিল ।

প্রথমটা মানব একটু কুণ্ঠিত হইয়া পড়িল, কিন্তু কি ভাবিয়া সাহস সংগ্রহ করিয়া কহিল,—ঐ পাজি হীরালাল আমাদের এতো বড়ো বাসা ভেঙে দিলো, আর আমি সামান্য একটা পাখির বাসা ভাঙতে পারবো না ? মারি এই টিলটা, মা । পাখির ছানাগুলো চারদিকে ছড়িয়ে পড়ুক । ওয়ান্, টু—

একটা টিল তুলিয়া মানব টিপ্ করিতেছে, কিন্তু মা'র দুইটি অশ্রুকোমল স্নেহ চক্ষু যেন তাহার উত্তত হাতকে সহসা নিস্তেজ, শিথিল করিয়া ফেলিল । টিলটা ফেলিয়া দিয়া সে আবার মা'র গা ঘেসিয়া চলিতে-চলিতে কহিল,—সব হীরালালবাবুদের হ'য়ে গেল, মা ? আমাদের ধলি-গাইটা পর্য্যন্ত ?

মা স্বচ্ছন্দে ঘাড় হেলাইল ।

—পু'ইশাকের মাচা, কাঁটালগাছের তলায় পি'পড়ের সেই চিপিটা—সব ?

সুমতির বক্ষস্থল বিদীর্ণ করিয়া ভীত অশ্রুট একটি শব্দ বাহির হইল : সব ।

—তুমি বলো কি মা ? আমার সেই দোলনাটায় আর ছলতে পাবো না ? নিজ হাতে সেই যে একটুখানি বেগুনের ক্ষেত করেছিলাম, সে-বেগুন খেতে পাবো না ? বঁড়শি ফেলে পুকুরের বেলে-মাছ ধরলে সে-মাছ হীরালালবাবুদের দিয়ে দিতে হ'বে ? তুমি পাগল হ'লে নাকি, মা ? মানব খামিয়া পড়িল ।

সুমতি মানবের হাত ধরিয়া খালি বলিলেন,—দাঁড়াস্নি মান্ন, চল । উনি কতদূর এগিয়ে গেছেন দেখেছিন্ ? তাড়াতাড়ি না চলতে পারলে ট্রেনে আর চাপতে পাবি না ।

প্রথম প্রেম

মানব বলিল,—তাই বলা, তুমি আমাকে মিছিমিছি ভয় দেখাচ্ছিলে ! এ কখনো হ'তে পারে ? আমি বাড়ি ঢুকতে গেলে ভজুয়া তেড়ে আসবে ভেবেছ, মানিদিদি ভাব্ছ হাত-পা ধুয়ে দিতে আসবে না, আমার ভেলু খুসিতে ল্যাজ না নেড়ে কামড়াতে আসবে ? ভেলু সঙ্গে আসতে চাইছিলো মা, কেন ওকে বাবা শিকল দিয়ে বেঁধে রাখলেন ? ও হয় ত' দাঁত দিয়ে শেকল কাটবার জন্তে কতো মাতামাতি করছে । ওকে খুলে নিয়ে আসবো, মা ? ওরো ত হাফ-টিকিট ।

মা'র হাত ছাড়িয়া মানব খসিয়া পড়িবার সামান্য একটু চেষ্টা করিল হয় ত', কিন্তু সুমতি কিছুতেই বাঁধন আলগা করিল না ।

—গাড়ি ছাড়তে এখনো অনেক দেরি আছে, মা । তিনটে ঘণ্টা দেবে, তবে ছাড়বে । তার মধ্যে ঠিক আমি ভেলুকে ছাড়িয়ে আনতে পারবো । বাবা একমনে এগিয়ে চলেছেন, টেরও পাবেন না । ইস্কুলের ফ্ল্যাট-রেইসে আমি ফাঁপ হয়েছি । রূপোর সেই মেডেলটাও আনা হয় নি । কোর্টের ওপর ঝুলিয়ে রেখে কল্কাতার ছেলোদের তাক লাগিয়ে দেব । যাই না, মা ।

সুমতি ধমক দিয়া উঠিল : না ।

নিষ্ফল অভিমানে ঠোট ফুলাইয়া মানব আপন-মনে বলিতে লাগিল : হঁ ! উনি আমার কুকুর কেড়ে রাখবেন, ওঁর খেঁদি মেয়েটা আমার দোলনায় ছলবে, আর আমি ওঁকে সহজে ছেড়ে দেবো ? ককখনো না । দাঁড়াও না, বড়ো হই একটু,—আমাদের ক্লাবের ক্যাপ্টেন চিন্তাহরণ দাকে চেন, মা ? দাঁত দিয়ে তিন মণ পাথর তোলেন । অমনি আমাকে একবারটি বড়ো হ'তে দাও, দেখে নেব আমার বেগুনের ক্ষেত কে নষ্ট করে ? ছাড় মা, ছাড়—

প্রথম প্রেম

বলিয়া মানব জোর করিয়া হাত ছিনাইয়া লইয়া বুক ফুলাইয়া লম্বা-লম্বা পা ফেলিয়া সোজা আগাইয়া যাইতে লাগিল।

কিছুটা গিয়া আবার ফিরিয়া আসিয়া মা'র গায়ে লাগিয়া বীরের মত কহিল,—তোমাকে পেছনে একলা ফেলে এগিয়ে যাব কী? আমি কাছে না থাকলে তোমার ভয় করবে যে।

রমেশ পোদার ও তাহার ছেলে ফণী হাট হইতে বাজার করিয়া ফিরিতেছে। ফণীর বয়স মানবের চেয়ে কিছু বেশি, গায়ে নতুন একটা কোট উঠিয়াছে। গায়ে পড়িয়া সে জিজ্ঞাসা করিল,—কোথায় যাচ্ছিঁস্ রে মানু ?

কাইজারি ভঙ্গিতে মানব কহিল,—কল্‌কাতা।

ফণী হাসিয়া কহিল,—বাড়ি থেকে ঘাড় ধরে' তাড়িয়ে দিলো বুঝি ? বেশ হয়েছে। আর আমাকে পোদারের পো বলে' খ্যাপাবি ?

মানব কঠোর স্বরে কহিল,—তুই পোদারের পো না ত' কি বামুনের বাচ্চা ? বলবোই ত', একশো বার বলবো, যতক্ষণ না মুখ খসে' পড়ে :

গরু অর্থ গো,

পোদারের পো।

কি করবি তুই ?

ফণী কটুকণ্ঠে কহিল,—কী আর করবো ? আমাদের মা ত' আর পথে বেরোয় না।

মানব হঠাৎ বাঁ-হাতে ফণীর চুলের ঝুঁটি চাপিয়া ধরিয়া ডান-হাতে তাহার গাল-গলা বাড়াইয়া এমন এক চড় মারিল যে, সে অদূরে একটা খাদের মধ্যে ছিটকাইয়া পড়িল। কাদায় তাহার কোটটার কিছু রহিল না।

প্রথম প্রেম

ফণীর হইয়া রমেশ পোদ্দার নিজে একেবারে তাড়িয়া আসিল।

মানব দুই হাত দৃঢ় মুষ্টিবদ্ধ করিয়া এক পা বাড়াইয়া দিয়া কহিল,—
এসো না এগিয়ে, চোখ পাকাছ কি ওখান থেকে? এসো না, দেখি
তোমার কত মুরোদ!

সুমতি তাহার গায়ের উপর ঝাঁপাইয়া পড়িয়া দুই হাতে তাহাকে
ঢাকিয়া ফেলিল। নিচে খাদ হইতে ফণী তখন অশ্রাব্য ভাষায় গালি
পাড়িতেছে ও রমেশের মুখে তাহারই নিভুল প্রতিধ্বনি।

গোলমাল শুনিয়া উমাকান্তও পিছু হটিয়া আসিল। রমেশের পিঠে
ও ফণীর চুলে হাত বুলাইয়া কহিল,—ও আমার গোঁয়ার ছেলে রমেশ,
ওর কথায় রাগ করো না। বাড়ি যা, ফণী।

পরে সুমতির দিকে চাহিয়া কহিল,—ঐটুকু অপমানই এমন মুস্ড়ে
পড়লে চলবে না। এখন আর এমন কি হয়েছে! ঢের পথ পড়ে' আছে
এখনো।

সুমতি মানবের কান মলিয়া দিয়া বকিয়া উঠিল: যত গায়ে পড়ে'
ঝগড়া। কারু সঙ্গে না লেগে আর স্বস্তি নেই। গোঁয়ার, অবাধ্য
কোথাকার।

উমাকান্ত স্ত্রীর হাত ছাড়াইয়া নিয়া কহিল,—তোমার এই-গোঁয়ার
ছেলেকে আশীর্বাদ করো।

মানবের মুখে আর কথা নাই; সামনে দিয়া গরুর গাড়ি চলিয়া
গেলেও গরুর ল্যাজ টানিয়া দিতে সে আর হাত তোলে না; পায়ের
কাছে কাঁচা একটা বাতাবি লেবু পড়িয়া থাকিতে দেখিয়াও তাহার
সাহায্যে তাহার ফুটবল খেলিতে সাধ হয় না,—অন্যমনস্কভাবে ম্লান মুখে
সমানে সে হাঁটিয়া চলিয়াছে!

প্রথম প্রেম

কিন্তু কত দূর যাইতেই চোখের সামনে গাছ-পালার ভিড় সরাইয়া খোলা আকাশ মুখ বাড়াইল। একটা লাল বাড়ি দেখা যাইতেছে— তাহারই একটু দূরে কতগুলি মাল-গাড়ি ঘেঁসাঘেঁসি করিয়া রহিয়াছে। ষ্টেশন আসিয়া পড়িয়াছে বুঝি—মানব লাফাইয়া উঠিল। হ্যাঁ, আর সন্দেহ নাই, রাস্তার উপর ভাঙা নড়বড়ে ছ্যাকড়া গাড়ির গাড়োয়ানরা কোলাহল সুরু করিয়াছে। হঠাৎ কোথায় ঘণ্টা বাজিয়া উঠিল।

মানব ব্যস্ত হইয়া বাবাকে কহিল,—গাড়ি এবার ছাড়বে বুঝি? তাড়াতাড়ি পা চালিয়ে এসো, মা।

উমাকান্ত নীরব হইয়া রহিল। সোজা সে ষ্টেশনের প্ল্যাটফর্মের দিকেই অগ্রসর হইতেছে দেখিয়া স্মৃতির হৃদয় হাহাকার করিয়া উঠিল— তাহার সত্যই তবে একেবারে বিদায় নিয়া চলিয়াছে! মানব ঘাড় বাঁকাইয়া মাকে ঝাঁঝালো গলায় কহিল,—আমার সঙ্গে পর্য্যন্ত পা মিলিয়ে চলতে পারো না, মা। শেষকালে তোমাকে ফেলেই কিন্তু চলে' যাব আমরা।

কিন্তু বাবা প্ল্যাটফর্মে ঢুকিয়াও টিকিট কাটিতে কোনই ব্যস্ততা দেখাইতেছেন না। এ-দিক ও-দিক তাকাইতেছেন শুধু।

মানব অস্থির হইয়া উঠিয়াছে: এঞ্জিনের ঐ ধোঁয়া দিয়েছে, বাবা। ট্রেন ছাড়বার আর দেরি নেই। ইস্কুলের শেষে কতো দিন আমি ট্রেন দেখতে একা-একা চলে' এসেছি এখানে। আমাদের ইস্কুলের ছেলেরা কোথায় কোন্ দাড়ি-ওলা সন্নেসি এলো বা কোথায় কে সাপে-কাটা পড়লো তাই খালি দেখতে যাবে, একবার ট্রেন দেখতে আসবে না। ট্রেন যখন এসে ষ্টেশনে দাঁড়ায় তখন আমার খুব ভালো লাগে। এমন জোরে ঢুকে পড়ে মনে হয় থামবেই না, কিন্তু—ঐ যে ঘণ্টা দিলো, বাবা।

প্রথম প্রেম

আমাদের বুঝি টিকিট লাগবে না? গাড়ির ড্রাইভার বুঝি তোমাকে চেনে?

উমাকান্ত ধমক দিয়া উঠিল: চুপ কর।

মানব চুপ করিতে জানে না: ঐ যে, অজিত ওরাও যাচ্ছে বুঝি। বেশ হ'বে,—কাগজ-পেন্সিল পর্য্যন্ত সঙ্গে আনো নি মা, ষ্টেশনের নামগুলি লিখে রাখতাম যে। বলিয়া সে অজিতের উদ্দেশে ছুটিল: আমরাও এই গাড়িতে কল্কাতা যাচ্ছিু ভাই। আমি আর তুই এক গাড়িতে। বুড়োরা আলাদা!

অজিত বলিল,—আমার সঙ্গে 'স্নেইক্ য্যাণ্ড ল্যাডার' আছে।

মানব খুসি হইয়া তাহার ঘাড় চাপড়াইয়া কহিল,—তা হ'লে ত' একশো মজা। আমাদের গাড়িতে কাউকে উঠতে দেব না। দরজার কাছে কেউ এলেই সোজা বলে' দেব—রিজার্ভড্। তার পর একা দু'জনে খেলবো, ইচ্ছে করলে জান্লায় বসে'-বসে' পাখি দেখবো, মাঠ, নদী, টেলিগ্রাফের থাম,—পথে ব্রিজ্ পড়লে চাকায় কি সুন্দর আওয়াজ হয় বল্ ত'! জানিস্ ভাই, দেড়ে হীরালাল জোর করে' আমাদের বাড়িটা কেড়ে নিয়েছে। নিক্ গে—গাড়ি ঐ এসে গেলো। রেডি, অজিত—

বলিয়াই মানব আবার মা'র কাছে আসিয়া হাজির: ওকি, শিগ্গির চলে' এসো মা। সামনেই ওই মেয়েদের গাড়ি রয়েছে। একটু পা চালিয়ে এগিয়ে এসো লক্ষ্মী, তোমার জন্তে গাড়ি ত' আর এখানে চিরকাল হাঁ করে' দাঁড়িয়ে থাকবে না। তুমি ছেলে হ'লে না কেন মা? চাদরটা দাও গা থেকে ছুঁড়ে। ফের ঘণ্টা দিচ্ছে মা, উঠে পড়ো। বাবা কোথায়? উঠে পড়েছেন বুঝি? তুমি তা হ'লে থাকো দাঁড়িয়ে, আমি উঠলাম—

প্রথম প্রেম

হঠাৎ উমাকান্ত খপু করিয়া তাহার হাত ধরিয়া ফেলিয়া বলিল :
দাড়া ।

মানব খামিয়া গেল । তাহারই বিস্ময়বিমূঢ় দৃষ্টির সামনে দিয়া ট্রেন
তখন ধীরে চলিতে শুরু করিয়াছে । জানুলায় অজিত মুখ বাড়াইয়া দিয়া
তাহাকে ডাকিতেছে বুঝি, ছলছল চোখে মানব চাহিয়া রহিল—
যতদূর ট্রেনটাকে দেখা যায় ।

গাড়ি ক্লিয়ার হইয়া গেলে উমাকান্ত স্টেশন-মাষ্টারকে পাকড়াও করিল। তারিণী তাহার আলাপী—দুইজন একত্র মদ খাইত। কিন্তু তারিণীকে খাটিয়া খাইতে হইত বলিয়া উমাকান্তর মত এত অনায়াসে সে ভাসিতে পারে নাই। রাত্রি বারোটোর সময় তাহাকে আর-একটা প্যাসেঞ্জার ‘পাম্’ করিয়া দিতে হয়। ভোর না হইতেই আবার একটা মাল-গাড়ি আসে। তাই, সে চুমুক দিত বটে, কিন্তু গিলিত না। দলের সবাই তাহাকে বলিত, আর্টিষ্ট।

উমাকান্তকে দেখিয়া ত’ সে অবাক। মামলা-মোকদ্দমার কথা আগেই সে শুনিয়াছিল বটে, কিন্তু উমাকান্তকে এমন সর্বস্বান্তের মত পথে বাহির হইতে হইবে তাহা সে কোনোদিন ভাবে নাই। তাহার মুখ দিয়া কোনো কথাই বাহির হইল না।

উমাকান্ত আগাইয়া আসিয়া তাহার হাত চাপিয়া ধরিয়া কহিল,—
দেখ, কী চমৎকার অধঃপতন! পাহাড়ের চূড়ো থেকে একেবারে অতল পাতালে! আমি তোমারো চেয়ে বড় আর্টিষ্ট, তারিণী!

তারিণী তাহাকে কাছে আকর্ষণ করিয়া কহিল,—কী ব্যাপার?

—অত্যন্ত সরল—জলের মতো পরিষ্কার! তোমার কাছে কিছু ভিক্ষা করতে এসেছি, বন্ধু।

তারিণী তাহার মুখের দিকে ফ্যান্‌ফ্যান্‌ করিয়া চাহিয়া বলিল,—
ভিক্ষা? তুমি কী বলছ এ-সব? সঙ্গে উনি কে?

হাসিয়া উমাকান্ত কহিল,—বল ত’ কে! দেখে তোমার কী মনে হয়?

তারিণী আমতা-আমতা করিয়া কহিল,—তোমার—

প্রথম প্রেম

—হ্যাঁ, আমার স্ত্রী। অনুগামিনী। তোমার খুব আশ্চর্য লাগছে না, তারিণী? কিন্তু চাকা যদি না-ই ঘুরবে তবে চলায় আর মজা কৈ?

তারিণী ব্যস্ত হইয়া উঠিল: ওঁরা ওখানে দাঁড়িয়ে রয়েছেন কেন? ডেকে নিয়ে এসো ওঁদের। আমার বাড়ি ত' এই সামনেই। তোমরা যাচ্ছ নাকি কোথাও?

—যাবার ইচ্ছে ত' তাই ছিলো। কিন্তু ইচ্ছে থাকলেই ত' আর উড়ে' যাওয়া যায় না।

—সে হবে'খন। তুমি এখন ওঁদের নিয়ে এসো দেখি শিগ্গির। আমি বাড়িতে খবর দিচ্ছি। গরীবের ঘরে একটু জিরিয়ে নেবে না-হয়।

উমাকান্ত তাহার হাত ছাড়িল না; কহিল,—তুমি গরীব বলে'ই ত' এত সহজে তোমার কাছে আসতে পারলাম ভাই। বড়লোক বন্ধুও আমার চের ছিলো, কিন্তু সেখানে আর যাই কেন না পেতাম, বিশ্রাম পেতাম না। তুমি গরীব বলে'ই ত' তোমার কাছে হাত পাততে পারবো—

অত্যন্ত সঙ্কুচিত হইয়া তারিণী কহিল,—তোমার সম্পদের দিনে তুমি আমাদের কম উপকার করেছ! ও কি একটা কথা হ'ল? যাও, ওঁদের নিয়ে এসো। সীতাকে পেয়ে গুহক চণ্ডাল কৃতার্থ হ'বে। বলিয়া তারিণী বাড়ির ভিতরে খবরটা পৌঁছাইয়া দিবার জন্ত আগেই চলিয়া গেল।

কিন্তু স্মৃতি কিছুতেই ষ্টেশন-মাষ্টারের আতিথ্য নিতে পারিবে না। সে রেল-লাইনের ধারে কুলিদের মত বরং হোগলার ছাউনি খাটাইয়া স্বামী-পুত্রকে নিয়া দিন কাটাইবে, তবু করুণার অন্ন সে গ্রহণ করিবে না। ইহা যে জীবন-দেবতার একটা বিরাট তামাসা মাত্র, ইহার মধ্যে

প্রথম প্রেম

এতটুকুও যে অসামঞ্জস্য নাই—উমাকান্ত স্মৃতিকে কিছুতেই বুঝাইতে পারিল না।

উমাকান্ত কহিল,—কিন্তু পরের ট্রেন যে সেই রাত বারোটায়।

স্মৃতি কহিল,—বেশ ত'। ততক্ষণ এইখানেই বসে' থাকবো।

—এই ঠাণ্ডায় ?

শুকনো হাসি হাসিয়া স্মৃতি কহিল,—বাড়ি থেকে বেরোবার সময় গায়ে ঠাণ্ডা লাগবে না এমন কোনো কথা ছিলো না।

উমাকান্ত রুক্ষস্বরে কহিল,—কিন্তু কোথাও যেতে হ'লে কিছু রেস্টও ত' চাই। তারো ত' জোগাড় করতে হয়। তারিণী আমার বন্ধু, তার কাছ থেকে হাত পাততে আমার লজ্জা নেই। তোমারো লজ্জা না দেখালেই মানাতো, স্মৃতি।

স্মৃতি কহিল,—তোমার নির্লজ্জতা তোমারই একলার থাক। এতো বড়ো একটা সম্পত্তি মদ খেয়ে উড়িয়ে দিয়ে নিজের স্ত্রী-পুত্র নিয়ে পথে বেরিয়েছ, তোমাকে নিয়ে সহর-শুদ্ধ লোক মিছিল করছে না কেন ?

—তাই করা উচিত ছিলো। কিন্তু তা নিয়ে তর্ক করে' ত' কোনো ফল হ'বে না। চলো, তারিণীর কাছ থেকে সম্পত্তি কিছু ধার করে' বেরিয়ে পড়ি—পরে কোথাও কিছু হিলে একটা হ'বেই। নতুন করে' ফের শুরু করবার জগ্গে আমি একেবারে অস্থির হ'য়ে উঠেছি।

তবুও স্মৃতি রাজি হয় না। বলে : তোমার বন্ধুর কাছ হাত পাতবে, তুমি যাও। আমি এখান থেকে নড়বো না।

উমাকান্ত ঠাট্টা করিয়া প্রশ্ন করিল,—একা যেতে পারবে ?

স্মৃতি দৃঢ়স্বরে উত্তর দিল : দরকার হ'লে তাও পারবো বৈ কি।

মানব বাবার হাত ধরিয়া ঝুঁকিয়া পড়িয়া জিজ্ঞাসা করিল,—

প্রথম প্রেম

এ-গাড়িতে গেলে না কেন বাবা ? সেই রাত দুপুরে ত' ফের ট্রেন ! এখনো তার সাড়ে সাতঘণ্টা বাকি । রাত্রে কিছু দেখা যাবে না যে !

তাহার হাত সরাইয়া দিয়া উমাকান্ত বিরক্ত হইয়া কহিল,— চুপ কর । পরে স্মৃতির দিকে চাহিয়া : এতই যখন পারো, তখন দয়া করে' আর ছ' কদম এগিয়ে এসো না । এতটা পথ হেঁটে এসে নিশ্চয়ই তোমার বেশ খিদে পেয়েছে, ঘুমও পেয়েছে হয় ত'—ট্রেন ত' সেই কখন । খেয়ে-দেয়ে একটু ঘুমিয়ে নিতে পারবে । স্বচ্ছন্দে । তুমি গেলে তারিণী নিশ্চয়ই আর ক্লপণতা করবে না । তোমাকে দেখে নিশ্চয়ই সে বদাণ্ড হ'য়ে উঠবে দেখো ।

কথা শুনিয়া লজ্জায় স্মৃতির মাটির সঙ্গে মিশিয়া যাইতে ইচ্ছা হইল ।

—একটু ব্যবসাদার হ'তে হয়, স্মৃতি । সেইটেই স্বাভাবিক । এতে লজ্জা নেই, দৈন্ত নেই । যখন ছিলো, কুসঙ্গে পড়ে' ফুঁকে দিয়েছি ; এখন নেই, হাত পেতে তাই ভিক্ষা চাই । এর চেয়ে সহজ আর মানুষে কী করে' হ'তে পারে ?

স্মৃতি কটুকণ্ঠে কহিল,—যখন হাত পেতে ভিক্ষা মিলবে না তখন করবে কী ?

উমাকান্ত নির্লিপ্তের মত কহিল,—কেড়ে নেব ।

তারিণী পুনরায় দেখা দিলে উমাকান্ত গম্ভীর হইয়া কহিল,—তোমার বৌদি কিছুতেই তোমাদের বাড়ি যাবেন না ।

তারিণী অপরাধীর মত মুখ করিয়া বিনীতস্বরে করিল,—কেন ?

উমাকান্ত ঠাট্টা করিয়া কহিল, - এতো বড়োলোকের স্ত্রী হ'য়ে তোমাদের মতো গরীবের কুঁড়ে ঘরে পায়ের ধুলো ফেললে যে গুঁর জাত যাবে । স্বামীটি অবশি আর বড়োলোক নেই, তা বলে' স্ত্রী ত' আর তাঁর

প্রথম প্রেম

গর্ভ খোয়াতে পারেন না। ঐশ্বর্য পরোপার্জিত হ'তে পারে, কিন্তু অহঙ্কারটুকু একলা তোমার বোধিদিরই। তার দাম আছে বৈ কি।

সুমতি মনে-মনে তাহার জন্ম-ভাগ্যকে ধিক্কার দিতেছিল, কিন্তু তারিণীর স্ত্রীকে ষ্টেশনের প্ল্যাটফর্মে স্বামীর পিছে-পিছে আসিতে দেখিয়া তাহার সঙ্কল্প আর রহিল না। তারিণীর স্ত্রীকে অনুরোধ করিবার আর কোনো অবসর না দিয়াই সে তাহার হাত ধরিয়া স্নিগ্ধস্বরে কহিল,—
ঐ ত' তোমাদের বাসা, না? খুব সামনে ত' ? চমৎকার ফাঁকা দেখছি, চারধারে মাঠ আর মাঠ। *রাত্রে একা-একা তোমার ভয় করে না?

অপরিচিতা বধুটি সুমতির আপ্যায়নের ক্রটি রাখিল না; কিন্তু সুমতি আঁচলের তলায় হাত গুটাইয়া বসিয়া রহিল—না ধুইল হাত-মুখ, না ছুইল একটুকুরা ফল। বধুটি দুঃখ করিয়া কহিল,—গরীবদের কি আপনি এমনি করে'ই অবজ্ঞা করবেন?

সুমতি সহসা বধুটির দুই হাত সম্মুখে আকর্ষণ করিয়া বলিল,—
আমার চেয়ে গরীব কি আর পৃথিবীতে কেউ আছে ভাই? সংসারে একমাত্র অর্থের অনটনই ত' দারিদ্র্যের পরিচয় নয়। কিন্তু সত্যিই আমি কিছু মুখে তুলতে পারবো না, মিছিমিছি অনুরোধ করে' কিছু লাভ নেই। যদি বাঁচি, তবে তোমার কথা আমার চিরকাল মনে থাকবে।

উমাকান্ত ঘরের দিকে অগ্রসর হইতে-হইতে কহিল,—এতে কিছুমাত্র কুণ্ঠা নেই, বন্ধু। আমার বিপদের দিনে তুমি টাকা ভিক্ষা—হ্যাঁ ভিক্ষা দিচ্ছ—এ আমি বলে'ই স্বচ্ছন্দে গ্রহণ করতে পারলাম। শোধ করতে পারবো কি না এবং কবেই বা পারবো তার যখন ঠিক নেই, তখন তাকে ভিক্ষা বললেই শব্দের যথার্থ অর্থপ্রাপ্তি ঘটে, তারিণী। সুমতি নিতান্ত কুসংস্কারাচ্ছন্ন বলে'ই লজ্জায় অধোবদন হচ্ছে, কিন্তু লক্ষপতি উমাকান্ত

প্রথম প্রেম

হালদারই না যদি গরীব ষ্টেশন-মাষ্টারের থেকে ভিক্ষা নেবে তবে সৃষ্টির মাহাত্ম্য আর রইলো কোথায় ? খালি ভোগ করবো, কোনোদিন পথের ধূলায় হাঁটু গেড়ে বসে' ভিক্ষা করবো না—এতে সৃষ্টির সামঞ্জস্য থাকতো না ।

উমাকান্ত ঘরের মধ্যে আসিয়া মুঠি খুলিয়া তিনখানা দশটাকার নোট দেখাইয়া স্মৃতিকে কহিল,—এখনো জমিদারির কিঞ্চিৎ রেশ আছে—বন্ধুত্বের খাজনা আদায় করেছি । অত ম্লান হ'য়ে যেয়ো না । কলকাতা যাবার মতো আড়াইখানা থার্ডক্লাশটিকিট—মাল-পত্র নেই যে কুলি লাগবে, আর, কলকাতায় পৌঁছে' নিঃসম্বল অবস্থায় দু' চার দিনের খোরাকি—খোরাকি বলতে অবশিষ্ট মুড়ি-মুড়কি । মহাত্মা হ'তে আমাদের আর বাকি নেই । জীবনে এতো বড়ো ঐশ্বর্যের স্বাদ খুব কম লোকেই পেয়ে থাকে, স্মৃতি । আমার ভবিষ্যৎ যে বংশধর—তাকে সর্বস্বান্ত রিক্ত করে' রেখে যেতে পারলাম, আজকের দিনে এই আমার একমাত্র অহঙ্কার ।

উমাকান্ত আর্জুনাদের মত হাসিয়া উঠিল ।

—তুমি এমন একটা সর্বনাশকে উৎসব করে' মহিমাম্বিত করে' তোল । যাত্রাই আমাদের উৎসব । ঘূর্ণ্যমান চাকা স্মৃতি, ঘূর্ণ্যমান চাকাই হচ্ছে নামান্তরে সত্যতা । চোখের জল মুছে সত্য হও । বলিয়া দ্রুতপদে উমাকান্ত অদৃশ্য হইয়া গেল ।

কিন্তু রাত করিয়া যখন সে ফিরিয়া আসিল, দস্তুরমত তাহার পা টলিতেছে । কাছাকাছি ট্রেন আসিবার সম্ভাবনা নাই বলিয়া ষ্টেশনের আলো-গুলি নিবানো রহিয়াছে, কুলিরা কাপড়ের খুঁটে গা মুড়িয়া প্ল্যাটফর্মের উপরেই ঘুমাইয়া আছে । দূরে লাইনের ধারে একটা মাটির টিপির উপর কে-একটা ছেলে শূন্য দৃষ্টিতে দিগন্তের দিকে চাহিয়া—তাহার দুই চোখে অসহনীয় প্রতীক্ষা, কখন ট্রেন আসিবে, কখন দুইটা নিস্তেজ অবসন্ন রেইল্-

প্রথম প্রেম

লাইন চাকার নিষ্পেষণে উচ্চকিত হইয়া উঠিবে ! এমনি একটা প্রত্যাশিত ভয়ঙ্করের আবির্ভাবের আশায় মানবের অবুঝ ভীকু মন ছলিয়া উঠিতেছিল ।

মানবকে উমাকান্ত চিনিতে চাহিল না ।

ষ্টেশন-মাষ্টারের কোয়ার্টারে তখনো বাতি জ্বলিতেছে । স্মৃতি না-ঘুনাইয়া স্বামীরই জন্ত খোলা বারান্দায় চুপ করিয়া বসিয়া ছিল, কিন্তু উমাকান্তর চেহারা দেখিয়া সে দেয়ালে কপাল কুটিবে, না, চীৎকার করিয়া উঠিবে কিছুই বুঝিতে পারিল না । উমাকান্ত আগাইয়া আসিয়া কহিল,—টিকিটের জন্তে তাঁরিণী যা টাকা দিয়েছিলো সব উড়িয়ে দিয়ে এসেছি । ও-ও ভিক্ষার ধন কি না, হাতে রইলো না । মাটি খুঁড়ে না পেলে বুঝি টাকা-পয়সায় মায়া পড়ে না ।

স্মৃতি এক ঝটকায় উঠিয়া দাঁড়াইল, নিশ্চয়ম স্বর্ণায় মুখ দিয়া তাহার কথা বাহির হইল না । উমাকান্ত বারান্দার দেয়ালে ঠেস দিয়া দাঁড়াইয়া কহিল,—তবু আমার শিক্ষা হ'ল না—কল্কাতা যাওয়ার খরচ যা জোগাড় করলাম তাও অবধি ফুঁকে দিয়ে এলাম—এর জন্তে তোমার আফশোষ হচ্ছে ? এ একান্ত আমি বলে'ই পারলাম স্মৃতি, কিন্তু আমি যে আর দাঁড়াতে পারছি না ।

স্মৃতি কর্কশ হইয়া কহিল,—আবার ফিরে এলে কেন ? কে তোমাকে ফিরতে বলেছিলো ?

—না এলে একা-একা কি করে' কল্কাতা যেতে ?

—তোমার ফিরে আসতেই ত' তার অনেক সুবিধে হ'য়ে গেলো ! দুঃসময়ে হাতে যা সম্বল ছিলো তা পর্য্যন্ত উড়িয়ে দিতে তোমার বাধলো না । তুমি যে কতো বড়ো অমানুষ তা তুমি জানো না । তোমার সঙ্গে আর আমাদের সম্পর্ক নেই ।

প্রথম প্রেম

উমাকান্ত বারান্দার এক ধারে বসিয়া পড়িয়াছে। যত্ন একটু হাসিয়া কহিল, —আমি যে কতো বড়ো অমানুষ তা সত্যিই আমি জানি না। আমি পৃথিবীতে কী না করতে পারি! আমার সঙ্গে সম্পর্ক না রাখতে চাইলে অনায়াসে আমি সরে' পড়তে পারি জানো?

সুমতি তীব্রতর কণ্ঠে বলিল, —স্বচ্ছন্দে। তুমি এক্ষুনি এই মুহূর্তে বেরিয়ে যাও না।

—এই মুহূর্তে। কিন্তু আমি খসে' পড়লে তুমি কী করে' যাবে? যাবে বা কোথায়?

—সে-সব ভাবনা নিয়ে তোমাকে মাথা ঘামাতে হ'বে না।

—তবু দেখি না ব্যবসা-বুদ্ধিতে কতো দূর তুমি পেকেছ! তারিণীর কাছে ধার চাইবে ত'? স্বামীকে পাষণ্ড, পাপিষ্ঠ ইত্যাদি বলে' ওর সহানুভূতি উদ্রেক করে' কিছু টাকা ফের খসাতে পারবে? ও, তোমার হাতে এখনো যে সোনার এক জোড়া শাঁখা আছে দেখছি। হীরালাল ওটা বুঝি আর ছুঁতে পারে নি। আইনে বেধেছে। আমারই মুখের ওপর আমার নিন্দে করলে তারিণীর মন নিশ্চয়ই ভিজে উঠবে। দেখব তুমি কেমন অভিনয় করতে পারো। শাঁখা-জোড়া তারিণীকে লুকিয়ে দিতে পারলে দিব্যি ওর কাছে তোমার স্মৃতিচিহ্ন হ'য়ে থাকবে।

সুমতির স্বর কঠিন স্নেহহীন : সে-ব্যবস্থা আমিই সব করতে পারবো। কিন্তু যে-টাকা আমি জোগাড় করবো তাতে তোমার কোনো অধিকার নেই। তুমি তোমার পথ দেখ।

উমাকান্ত হাসিয়া উঠিল : ধন্যবাদ।

এবং দ্বিরুক্তি না করিয়া টলিতে-টলিতে ঘর হইতে সে নিষ্ক্রান্ত হইয়া গেল।

সেই যে উমাকান্ত বাহির হইয়া গেল, আর ফিরিয়া আসিল না।

সংসারে কেহ কাহারও নয়—এই নির্বাণানন্দ অনুভব করিতে-
করিতে উমাকান্তও হয় ত' এক দিন নিবিয়া গেল। কেহ তাহার
খোঁজ রাখে নাই।

জীবনে তাহার যে অমেয় গ্লানি ও স্নানতা—একাই সে তাহার
উত্তরাধিকারী ; তাহার স্বাদ লুইতে সে স্ত্রী-পুত্রকে আহ্বান করিবে না।
এই অধঃপতন তাহার নিজের রচনা। অর্জনে যদি সে একা,
বিসর্জনেও।

আর স্মৃতি ! তাহারও বা কী হইল কে জানে ! যাহাদের খুসি,
ভাবিতে পারো স্মৃতি স্বামি-বিরহে ধীরে-ধীরে দেহক্ষয় করিল, যাহারা
একটা ধর্মমূলক সিদ্ধান্ত পাইলে খুসি হও, তাহারা তাহাকে কোনো
দেবতার মন্দিরে ভক্তি-বিনতা পূজারিণীরূপে কল্পনা করিয়া তাহাকে ধন্য
করিয়ো,—আর যাহারা নিষ্ঠুর ক্ষমাহীন নির্লজ্জ সংসারের রক্ষ বাস্তবতার
সঙ্গে পরিচয় লাভ করিয়াছ, তাহারা ইহাই ভাবিয়ো যে, স্মৃতি
অবনত মানুষের জনতায় আসিয়া বাসা বাঁধিয়াছে—হয় ত' বা দেহ-
পণ্যবিপণির পারে ! যাহার যাহা ইচ্ছা ভাবিয়া লইয়ো, গল্পের পক্ষে
তাহার প্রয়োজন নাই।

মানবের জীবনে তাহার মা'র সেই ব্যথাপাণ্ডুর মুখের ছায়া
পড়িয়াছে। অনাহারশীর্ণ অপমানাহত নিরানন্দ মুখের ছায়া ! কিন্তু
ছায়ার আয়ু কতটুকু !

আরম্ভ

৬

ইহার পর যে-দৃশ্যে উপন্যাসের যবনিকা তুলিলাম—

স্থান : কলিকাতার দক্ষিণাঞ্চল, রসা রোড ; সময় : উমাকান্তর
তিরোধানের বারো বৎসর পর ।

চাকা আবার কখন ঘুরিয়া গেছে ।

ভোর হইতে তখনো খানিকটা বাকি—এইমাত্র বোধকরি রাস্তায় জল
দিয়া গেল । স্নেট-রঙ আকাশে অস্পষ্ট তারার অক্ষরে কাহার
হস্তলিপি লেখা !

মানব তাহার বিছানায় হাঁটু দুইটা বুকের কাছে দুমড়াইয়া তাল-
গোল পাকাইয়া গভীর ঘুমে আচ্ছন্ন ।

দরজা ঠেলিয়া একটি অনতি-বয়স্কা মহিলা ঘরে ঢুকিলেন । আকারে
সেইটুকু মাত্র স্থূলতা যাহা আভিজাত্য নষ্ট করিতে পারে নাই । বেশ-
বিন্যাসে একটি নিশ্চল রুচি, চলায় ও কথায় এমন একটা গাঙ্গৌর্য আছে
যে মাঝে-মাঝে তা নিশ্চমতার নামান্তর হইয়া উঠে ।

সুইচ-বোর্ডে হাত রাখিয়া তিনি ডাকিলেন : ' মান্ন !

শয্যার নিকটবর্তী হইতে হইল । মাথায় আস্তে কয়েকটা ঠেলা
মারিতেই মানব ধড়ফড় করিয়া জাগিয়া উঠিল : কি ব্যাপার ? ডাকাত
পড়েছে ? ঐ—ঐ ঘরে আমার মুগুর !

মানব পাশের ঘরের দিকেই বুঝি ছুটিতেছিল, মহিলাটি তাহাকে

প্রথম প্রেম

বাধা দিলেন: না রে পাগুলা, তোকে একবারটি শেয়ালদা বেতে হ'বে।

—কোথায় ?

বলিয়াই মানব বালিশের তলায় হাত ঢুকাইয়া, মাথা ডুবাইয়া বিস্মৃততর হইয়া শুইয়া পড়িল: পাগল আবার তুমি আমাকে বলো !

তাহার চুলে আঙুল বুলাইতে-বুলাইতে মহিলাটি কহিলেন,—তোকে সেদিন বললাম না আমার বোনু-ঝি এখানে কলেজে পড়তে আসবে—

বালিশের মধ্যে মুখটা বারকয়েক ঘষিয়া মানব বলিল,—কিন্তু ষ্টেশন থেকে তাঁকে উদ্ধার করে' নিয়ে আসতে হ'বে এমন কথা ত' বলো নি কোনোদিন।

—কথা ছিলো উনিই ষ্টেশনে যাবেন, কিন্তু রাত থেকে শরীরটা নাকি ওঁর ভালো নেই। তা ছাড়া মির্জা আজ বাড়ি পালিয়েছে। এই সাত-সকালে গাড়ি কে বার করবে ?

—তবে পায়ে হেঁটেই তোমার বোনু-ঝিকে পার করে' নিয়ে আসবো নাকি ? তোমার বোনু-ঝির আবদার ত' মন্দ নয়। এমন মজার ঘুমটা তুমি মাটি করে' দিলে, মা। প্রথম রাতের অলস কল্পনা আর শেষ রাতের নরম ঘুম—এই দুটিতেই হচ্ছে স্বাস্থ্যের স্বাদ ! আমি তা খোয়াতে রাজি নই। অল্প ব্যবস্থা কর গে যাও।

মা। কিন্তু স্মৃতি নয়। মিসেস্ অনুপমা চ্যাটার্জি।

মানব আরো ভালো করিয়া শুইল। কিন্তু চোখ গিয়া পড়িল জানালার বাইরে, অনুচ্চার ভাষার মত যেখানে দুয়েকটা তারা মৃদু-মৃদু কাঁপিতেছে। মা আবার কি বলেন তাহা শোনা শেষ হইলে পর সে চোখ বুঁজিবে।

প্রথম প্রেম

অনুপমা বলিলেন,—একটুখানি না ঘুমলে আর তুই মাথা ঘুরে পড়বি না।

মানব এক ঝটকায় উঠিয়া বসিল: শুধু ঘুম? সকালে উঠে আমাকে মুগুর ভাঁজতে হয়, তার পর স্নান—সব তুমি শ্রেফ ভুলে গেলে নাকি? বোন্-ঝি কলেজে পড়তে আসছেন—রাতারাতি তোমাদের সব পাখা গজালো আর কি। আছো বেশ।

মানব খাট ছাড়িয়া মেঝেয় নামিয়াছে বা হোক।

অনুপমা বলিলেন,—তাই ত' আগে থেকে জাগলাম। তুই চটপট তৈরি হ'য়ে নে, আমি চা করছি।

ব্যায়াম—তার পর স্নান! খুব তাড়াতাড়ি সমাধা হইল—পঁচিশ মিনিটের জায়গায় আট মিনিট। ঢাকা-মেইলটার এরাইভ্যান্ অত্যন্ত বেয়াড়া টাইমে—ষ্টেশনে একটু আগে পৌঁছনোটা প্রাচীনপন্থী নয়। মাথায় এত জল না ঢালিলেও চলিবে—দস্তুরমত মেঘ করিয়া আসিয়াছে দেখিতেছি। তাড়াতাড়ি! দূরে একটা ট্রেনের ফুঁ শোনা যায়! একদিন নিয়মের একটু ব্যতিক্রম হইলে কী এমন যায়-আসে?

হ্যাঁ, তার পর প্রসাধন—কেশ-বেশ। ষ্টেশনে আবার বেশি আগে থেকে হাঁ করিয়া বসিয়া থাকার চেয়ে এঞ্জিন-ড্রাইভ করা ভালো। জাপানি হেয়ার-ড্রেসারটা চুল মন্দ কাটে নাই বটে। আঃ, কী মিষ্টি গন্ধ এই সেন্টটার! না গো, এত তাড়াতাড়ি না করিলেও চলিবে। ওটা ত' বালিগঞ্জের ট্রেন! ফাঁপা বাসনেই বেশি আওয়াজ!

—তোমার চুল ঠিক করতেই ত' আধঘণ্টা!

অনুপমা চায়ের বাটি ও রুটি-মাখন লইয়া প্রবেশ করিলেন।

দেবরাজ টানিয়া এক মুঠা নোট-টাকা পকেটে লইয়া মানব

প্রথম প্রেম

কহিল,—আমার টাকা-পয়সা রোজ-রোজ এত কমে' যায় কেন বলতে পারো ?

অনুপমা হাসিয়া কহিলেন,—পকেটে অতো বড়ো একটা ফুটো থাকলে টাকা-পয়সার আর দোষ কী ?

পাঞ্জাবির পকেট উল্টাইয়া মানব কহিল,—ফুটো ? কই ?

অনুপমা আবার হাসিলেন : নে, খেয়ে নে শিগ্গির । পকেটের ফুটো তোর চোখে পড়বে না ।

মানব স্বস্তির নিশ্বাস ফেলিয়া কহিল,—ও ! তুমি আলঙ্কারিক ভাষা প্রয়োগ করছ । কিন্তু হাতের মুঠোয় পয়সা যখন পেলাম তখন তাকে পাঁচ আঙুলেই খরচ করতে হয় । তার পর চায়ের কাপে চুমুক দিয়া : তুমি বেশ কিন্তু । তোমার বোর্নি-ঝিকে খুঁজে বার করবো—আমি কি অকাল্টিষ্ট্ নাকি ? নাম কি মেয়েটির ?

—মিলি । টাকা থেকে এক দঙ্গল মেয়ে আসছে—তাদেরই সঙ্গে ।

—ঐ ব্যাহ ভেদ করে' তোমার মিলিকে উদ্ধার করে' নিয়ে আসতে হ'বে । সেই বা আমার সঙ্গে আসবে কেন ?

—বা, তোকে বুঝি সে আর চেনে না ? সেবার টাকায় ফুটবল খেলতে গিয়ে ক্লাবের সেক্রেটারি পরেশবাবুর বাড়িতে এক রাত্তির ছিলি, তোর মনে নেই ? সেই বাড়ি থেকেই ত' মিলি ইডেনে পড়তো । ওটা ওর কাকার বাড়ি যে ।

টোপ্টে কামড় দিয়া চিবাইতে চিবাইতে : কাকার পরে মাসি । তা এক রাত্রেই সে আমার চেহারা মুখস্ত করে' রেখেছে নাকি ? যাক গে । 'বোনাফাইডি' প্রমাণ করতে পারবোই । সিন্ধের রুমালে হাত মুছিতে-মুছিতে : নিতাইকে বলে' ফুল আনিয়ে রেখো, মা । বারান্দায় আসিয়া:

প্রথম প্রেম

অল্প-আই ডেইজি। সিঁড়ি দিয়া নামিতে নামিতে : আমার তিনটে ঘরের একটাও যেন হাতছাড়া না-হয় মা, দেখো। আমি কিন্তু একটুও সঙ্কুচিত হ'তে পারবো না। নিচে সদর দরজা খুলিতে-খুলিতে—ছি, শেষকালে মানব একটু সুর ভাঁজিতে লাগিল নাকি ?

মখমলের মত নরম মোলায়েম ফিকে অন্ধকার। মৃদু মত্ রঙের আকাশ। 'বাতায়নবর্তিনী প্রোষিতভর্তৃকার চক্ষুর মত স্নান একটি তারা।

একটা বাস্ লইলে মানবের ক্ষতি হইত না। এখনো ঢের সময় আছে। কিন্তু খোলা ট্যাক্সিতে প্রচুর হাওয়ায় গা ছাড়িয়া দিতে না পারিলে এত ভোরে ওঠার উদ্দীপনার কোনো মানে নাই।

সন্ধ্যার আকাশে তারা ফোটার মত একটি-একটি করিয়া মানুষ পথে বাহির হইতেছে : দোকানি, মজুর, ভিক্ষুক। জীবন-সমুদ্রে ফেনকণা ! ক্রম-উদ্বেল ! কেহ কাহারও মুখ চিনিয়া রাখে না—যায় আর আসে, আসে আবার ভাঙিয়া পড়ে। কত ক্ষুধা, কত ক্ষোভ, কত প্রত্যাশা। মানব ট্যাক্সির সিটে হেলান্ দিয়া বুক বিস্ফারিত করিয়া নিশ্বাস লইল।

স্টেশন-প্ল্যাটফর্ম। মানব বার-কয়েক এ-প্রান্ত হইতে ও-প্রান্ত পর্যন্ত পাইচারি করিতেই ফিন্ফিনে সিক্কের মত এঞ্জিনের ধোঁয়া দেখা গেল। পকেট হইতে রুমাল বাহির করিয়া ঘাড় না রগড়াইয়া কী করা যায় আর ?

মেয়েদের ইন্টার-ক্লাসটা বোঝাই। কতগুলি খোঁপা আর সিক্কের প্যাটার্ণ। এখান হইতে উঁকি মারিয়া লাভ নাই—আগে উহারা নামুক। এক, দুই, তিন—অনেকগুলি। রোগা, লিঙ্লিকে, সোডার বোতল, দীপশিখা ! মানব একটু দূরে সরিয়া দাঁড়াইল।

প্রথম প্রেম

হস্টেলে যাহারা থাকে তাহারা একসঙ্গে গাড়ি করিবার উদ্যোগ করিতেছে; যাহাদের আত্মীয়-স্বজনের বাড়ি যাইবার কথা, তাহারা কেহ তাহাদের নিতে আসিল কি না তাহারই তালাস করিতেছে হয় ত'। এমন একটি মেয়ের সঙ্গে মানবের হঠাৎ চোখোচোখি হইল।

নির্ভুল সঙ্কেত। মানব মেয়েটির সমীপবর্তী হইয়া গলা একটুও না খাঁখরাইয়া প্রশ্ন করিল: আপনিই কি মিলি?

মেয়েটি সপ্রতিভ; তাহার নাসিকাগ্র দেখিয়াই তাহাকে তীক্ষ্ণধী ভাবা উচিত। এতগুলি মেয়ের মধ্যে এ-ই কেবল এলো খোঁপা বাঁধিয়াছে—ঐ খোঁপাতে যেন ব্যক্তিত্বের আভাস, আর, ব্যক্তিত্ব দীপ্যমান তাহার চিবুকে। একটু চাপা, তাই মনে হয় দৃঢ়। অস্তিত্ব সম্বন্ধে তাহার একটা নিশ্চিত ধারণা আছে।

মেয়েটি কহিল,—ভালো নাম বলতে পারেন?

—ভালো নাম? মানব একটুও ঘাবড়াইল না: ভাল নাম কী হ'তে পারে ভেবে একটা ঠিক করুন না। ঢাকা ও তার পাশাপাশি গাঁ থেকে এক দঙ্গল মেয়ে আসছেন—তাদেরই তিনি সাথী। ডাক-নাম মিলি হ'লে ভালো-নাম মলিনা বা মালিনী এমনিই কিছু একটা ত' হওয়া উচিত। একবারটি সঙ্গিনীদের জিজ্ঞেস করে' দেখুন না কেউ ঐ নামে সাড়া দেন কি না। তার পর নিচের ঠোঁটটা একটু কাঁপাইয়া:

—আপনি ননু তো?

লজ্জায় মেয়েটির চোখের পাতা হয়ত একটু মুইয়া আসিল: না।

—আপনি ননু? খুঁজে বার করে' দিন না। এঁরা সবাই যে জিনিস-পত্র নিয়ে খেপে উঠেছেন।

মেয়েটি পার্শ্ববর্তিনীকে জিজ্ঞাসা করিল: মিলি কে রে?

প্রথম প্রেম

মানব আরেকবার সবগুলি মেয়ের মুখ দেখিয়া লইল, কিন্তু আর কাহাকেও তাহার মিলি বলিয়া পছন্দ হইল না।

পার্শ্ববর্তিনী অহুচ্চস্বরে কহিল,—ও ! আমাদের মঞ্জরী।

এইবার নামধারিণীর হাঁস হইল। এদিকে তাহার দৃষ্টি পড়িতেই, যে-মেয়েটি অতি সহজেই মিলি হইতে পারিত, কহিল,—এই ! ভদ্রলোক তোমাকে খুঁজছেন।

মানব তাহার মুখের দিকে চাহিয়া হতাশ হইয়া গেল : আপনিই মিলি ?

বাঙালি মেয়ের শ্যামবর্ণমাত্রই উত্তম, মিলিও হয় ত' তাই তরিয়া যাইবে ; কিন্তু যে-মেয়েটি অনায়াসেই মিলি হইতে পারিত তাহার চেহারা শুধু লালিত্যই নয়, একটা প্রশান্ত দীপ্তি ছিল। এই মেয়েটি চন্দ্রলেখার অদূরবর্তী তারকাকণার মত বিবর্ণ, ঝাপসা।

সত্যিকারের মিলি উত্তরে একটু হাসিল। হাসিতে তাহার দুইটি জিনিস স্পষ্ট হইয়া উঠিল : ঠোঁটের উপরে ছোট একটি কাটার দাগ, আর উপর-পাটির একটি দাঁত পঙ্কতির সঙ্গে অমিল রাখিয়া একটু বড়ো, একটু উদ্ধত।

মানব আগাইয়া আসিয়া কহিল,—আমি আপনাকে বাড়ি নিয়ে যেতে এসেছি। আমাকে চিনতে পারছেন ত' ?

মিলি হাসিয়া কহিল,—একটু-একটু।

—তা হ'লেই যথেষ্ট। বেশি চেনাটাও প্রত্যেক অমিতাচারের মতোই অস্বাস্থ্যকর। এই আপনার জিনিস ? চলুন। এ আমিই নিয়ে যেতে পারবো—ঐ ত' ঠ্যাণ্ড্। কুলি ডাকছেন কী !

পা বাড়াইবার আগে মিলি সহযাত্রিণীদের থেকে একে-একে বিদায়

প্রথম প্রেম

নিল। যে-মেয়েটি ইচ্ছা করিলেই মিলি হইতে পারিত, সে কহিল,—
একদিন হস্টেলে এসো। মিলি ঘাড় হেলাইল যা হোক।

মানব সেই অপরিচিতার উদ্দেশে নমস্কার করিয়া কহিল,—চল্লাম।

ট্যাক্সি। হাওয়ায় উড়াইয়া নিয়া চলিয়াছে। পার্ক-স্ট্রীট কর্নার পার
হইল। এইবার কথা শুরু হোক :

মানব গম্ভীর হইয়া কহিল,—আপনি এক ডাকেই যে আমার
সঙ্গে চলে' এলেন, আমি যদি আপনাকে গন্তব্যস্থানে পৌঁছে না
দিই ?

মিলি যথেষ্ট দূরত্ব রক্ষা করিয়া সিটের বাঁ প্রান্তে একেবারে মিশিয়া
বসিয়াছে। তাহাতেও হয় ত' তাহার তৃপ্তি ছিল না, মধ্যখানে তাহার
ছোট ব্যাগটা তুলিয়া দিয়াছে। মানবের সেই চাপা স্বর শুনিয়া
মিলি রীতিমত ভয় পাইয়া গেল : পৌঁছে দেবেন না মানে ?

—মানে, ভবানীপুর না গিয়ে সোজা তিল্জলা চলে' যাবো। সেখানে
রেল-লাইন পেরিয়ে ফাঁকা মাঠ। টু' শব্দটি করবার লোক নেই।
কাছাকাছিই আমাদের আড্ডা। কী না করতে পারি ইচ্ছা করলে ?
সঙ্গে কতো টাকা আছে ?

নিদারুণ বিপদের মুখে পড়িয়াও মানুষে হাসে—মিলির মুখে সেই
পাণ্ডুর হাসি। হাঁটু দুইটা আরো সঙ্কুচিত ও বসিবার স্থান আরো সঙ্কীর্ণ
করিয়া সে তরলকণ্ঠে কহিল,—ছাই পারেন। কিন্তু এই কথার
উচ্চারণেই তাহার হৃৎপিণ্ডের দ্রুতধাবনের শব্দ শোনা যায়।

—ছাই পারি ? আচ্ছা। চালাও পায়জি,—বায়ে।

ট্যাক্সি বালিগঞ্জ-সাকুলার রোডে ঢুকিল।

মিলির মুখ শুকাইয়া একেবারে ছাই হইয়া গেছে। জরেখা দুইটি

প্রথম প্রেম

নিশ্চয়, ললাট ক্লিষ্ট। ঠোঁট দুইটির দিকে চাহিলে মায়া করে। অতি শুকনো ভাঙা গলায় মিলি প্রায় চোঁচাইয়া উঠিল: এ কোথায় নিয়ে যাচ্ছেন?

মানব স্বরটা একটু বিকৃত করিয়া বলিল,—ঠিকই নিয়ে যাচ্ছি।

ড্রাইভারকে উদ্দেশ্য করিয়া: হ্যাঁ, ঐ মালেন্‌ স্ট্রিট হ'য়ে চক্রবেড়ে—

মিলি আর্ন্ত অক্ষুটকণ্ঠে হঠাৎ চীৎকার করিয়া উঠিল।

অমনিই মানবের খিন্ খিন্ করিয়া হাসি। হাসি থামিলে: ছি ছি, আপনি দেখছি নিতান্ত ছেলেমানুষ। আমি থাকতে কা'র শরণ নিতে চাচ্ছেন? আমি আছি কি করতে? দু' মাস মুগুর ভেঁজে ফেদার-ওয়েট থেকে লাইট-ওয়েটে প্রমোশান পেয়েছি খবর রাখেন? চ্যাচাবেন কী? হ্যাঁ, হাসুন একটু। ভয়ে যে একেবারে এতটুকু। দেখি আপনার পাল্‌স্-বিট।

অন্য কেহ হইলে হয় ত' দ্বিধা করিত; কিন্তু মানব জানে সুযোগ ঝাঁক বাঁধিয়া আসে না, আসে একাকী, আসে কুণ্ঠিত। যেখানে দ্বিধা, সেখানেই দৌর্বল্য।

মিলি স্বচ্ছন্দে মানবের মুঠির মধ্যে হাত তুলিয়া ধরিল। ভীকু, ভিজা হাত। পায়রার পালকের মত ফুরফুরে আঙুল।

যতটুকু কাল সমীচীন তাহার সামান্য অতিরিক্ত। তাহার পর হাত ছাড়িয়া দিতেই যেন স্পর্শ অর্থবান হইয়া উঠিতে চাহিল। মানব কহিল,—আরো একটু বেড়াবেন, না সটান বাড়ি?

মিলি মানবের দিকে পরিপূর্ণ করিয়া চাহিয়া কহিল,—কেন, আপনার কোথাও আর কাজ আছে?

—হ্যাঁ, কাজই বলুন না তাকে। কবিতাকেও ত' আমি কর্তব্য

প্রথম প্রেম

বলি। আপনি ফুল নিশ্চয়ই ভালোবাসেন। তা হলে চলুন না কিছু ক্রিসেন্থিমাম্ কিনে আনি।

মিলির স্বর মানবের পরিচ্ছন্ন ও প্রথর বেশবিজ্ঞাসের প্রতি সামান্য অবজ্ঞাসূচক : ফুলের বদলে সম্প্রতি এক-পেট খেতে পেলে আমি প্রকৃতিস্থ হ'তাম। সঙ্গে বা খাবার ছিলো কেড়ে-কুড়ে রান্ফুসিরা সব উজার করে' দিয়েছে।

মানব কহিল,—রান্ফুসির দলে একটি রাজকুমারী ছিলেন কি করে'ই বা বিশ্বাস করি বলুন। কিন্তু রুখু চুলেই ফুল বেশি মানায়।

হাসিলে যে মিলির চিবুকের কাছে ছোট একটি টোল পড়ে তাহা এতক্ষণ মানবের চোখে পড়ে নাই। মিলির ঠোঁট সেই উদ্ধত দাঁতটি উত্তীর্ণ হইয়া প্রসারিত হইল : আমি যখন এক-পেট খেয়ে এক-খাট ঘুম দেব তখন না হয় আপনি ফুল নিয়ে আসবেন।

মানব একটু চুপ করিয়া থাকিয়া কহিল,—কিন্তু ঢাকা ছেড়ে কলকাতার পড়তে এলেন কেন ? সেখানেও ত' কলেজ ছিলো।

—ঢাকা আমার ভালো লাগে না।

—ভালো না লাগবার কারণ ?

—অনেক।

—একটা শুনি ?

—সেই একটা আপনিই আন্দাজ করে' নিতে পারবেন।

একটু স্তব্ধতা।

মানব আবার কথা পাড়িল : কোন্ ডিভিসনে ম্যাট্রিক পাশ করেছেন ?

প্রথম প্রেম

মিলিও স্বর অনুকরণ করিয়া কহিল,—আপনার এবার কোন্ ইয়ার ?

মানব স্বচ্ছন্দে কহিল,—ফোর্থ ।

মিলিও হটিবার পাত্র নয় : অনার্স আছে ? কোন্ সাবজেক্ট ?

—ম্যাথামেটিক্‌স্ । তারপর, আর কী জানতে চান ?

—আবার কী জানতে চাইব !

—আমি একজন খুব ভালো বক্সার, ফুটবলে রাইট-হাফ, ট্যাস্
ঠ্যাঙাতে ওস্তাদ—আর কী গুণাবলী চান ? নিজেকে advertise
করতে আমার ভালো লাগে । হ্যাঁ, এবার আপনাকে প্রশ্ন করি ।
ঘাবুড়াবেন না তো ?

একটা উদ্গত হাসি চাপিয়া মিলি নিশ্বাস ফেলিয়া কহিল,—না ।

—বেশ । মানব নড়িয়া-চড়িয়া বসিল : ঠিক ঠিক জবাব দেবেন ।
শুকতো কি করে' রাখি ? চিংড়ি মাছের মালাই-কারিতে কি-কি
মশলা লাগে ?

ছোট-ছোট নুড়ির মাঝখানে নির্ঝরঝরকার খুসির মতো মিলি
খিল্ খিল্ করিয়া হাসিয়া উঠিল ।

ক্ষণিক নীরবতা ।

মিলি কহিল,—আপনাদের বাড়ি কতো দূরে ?

—বা, আমরা ত' বাড়ি কতক্ষণ পেরিয়ে এসেছি । এগন চলেছি ত'
টালিগঞ্জের দিকে । সামনে ঐ ওভার-ব্রিজ দেখছেন ওখান দিয়ে
বজ্বজ্-এর ট্রেন যায় । মাঝেরহাট হ'য়ে আমতলা বেড়িয়ে আসবেন
একদিন ?

—আমতলা ! সে আবার এমন কী জায়গা !

প্রথম প্রেম

—অখ্যাত বলে'ই ত' তার আকর্ষণ ! যাবেন ?

মিলির নাকের দুই পাশে বিরক্তির রেখা ঘন হইয়া উঠিল : বা, আমার বুঝি খিদে পায়নি ! হাওয়া খেলেই বুঝি পেট ভরবে ?

মানবের মুখ অন্তদিকে—স্বর গম্ভীর : একটুখানি উপোস করলেই খিদে পায়, কিন্তু বহুদিন প্রতীক্ষা করে'ও এমন সুযোগ মেলে না।

আবহাওয়াকে মিলি তরল করিতে চাহিল : ভারি সুযোগ। ট্যাঙ্কি করে' ভোর বেলায় ফাঁকা রাস্তায় বেড়ানো। আপনি যেন কোনোদিন আর বেড়ান না ! মানবের চোখ হইতে মিলি নিমেষে কি-যেন পড়িয়া লইল : ও ! আমি আছি বলে' ? এবারের কথা তাহার স্বগত : কিন্তু আমি ত' আর দু' দিনেই পালাচ্ছি না।

—কিন্তু রুগ্নু চুল যে আপনার চিক্ণ কৃষ্ণবর্ণ ধারণ করবে। কপালের ওপর চুলের ঐ ঘুঙরি দুটি তৈলমার্জ্জনা অদৃশ্য হ'বে। অস্থির হইয়া মিলি যেন কি বলিতে যাইতেছিল তাহাকে বাধা দিয়া : দেখুন কবিতার আইডিয়ার মতো একেকটা সান্নিধ্য ঈশ্বরদত্ত।

না, মিলি এইবার সত্যই কাতর কণ্ঠে কহিল,—না, না, এবার ফিরুন।

—বটে ! ফিরে চল পায়জি।

ট্যাঙ্কিটা সত্যই ফিরিল দেখিয়া মিলির স্বর একটু তরল হইল হয় ত' : চলুন না একবার বাড়ি, মেসোমশাইর কাছে নাশিশ করবো।

মানব মুখে আবার কৃত্রিম গাম্ভীর্যের মুখোমুখি টানিয়া দিয়াছে : হ্যাঁ, চলুন না আমাদের আড্ডায়—তিলজলায়। দেখবেন সবাই সেখানে মহিষমশাই। অচেনা লোকের সঙ্গে পথে বেরুলে কী বিপদ হয় টের পাবেন এ-বার।

দক্ষিণ দিকের পাশাপাশি তিনটি ঘরই মানবের এলেকায়—এ-পাশেরটা শোবার—বিশেষত্ব এই, শয্যার দুই প্রান্তে দুইটি প্রকাণ্ড আয়না ; মাঝেরটা পড়ার বা বসিবার, সজ্জাপে আড্ডা দিবার ; শেষেরটাতে অধাঅধি স্নান, সজ্জা ও ব্যায়াম ।

মুক্তহস্তে ব্যয় ও মুক্তবাহুতে ব্যায়াম—মানবের ইহাই ছিল ব্রত ও বিলাস ; আজ তাহার জীবনে নারীর প্রথম অবতরণ ।

এবং এই দিনেই মানবের প্রথম জন্মদিন !

কী-ই বা এমন মেয়ে ! কিন্তু ঐ রুক্ষ চুল, হাওয়ার উড়িয়া-উড়িয়া কপালের কাছে ঘুঙরি করিয়াছে, রাত্রিতে ঘুম না হওয়ার চোখের পাতাতে একটি ফিকে অবসাদ । ডাক-নাম মিলি !

ইচ্ছা করিলে এ মিলি ‘হইতে পারিত’ না, সত্য-সত্যই এ মিলি ।

বায়স্কোপ হইতে মানব ফিরিয়া আসিল । তাহার ঘরে বন্ধুরা তখনো জাঁকাইয়া আড্ডা চালাইতেছে । নিখিলেশ, বিজন আর সুধীর । একজন খাঁটিতেছে বই, একজন ফুঁকিতেছে সিগারেট, সুধীর অগ্ন্যমনস্কের মত জানালা দিয়া চাহিয়া রাস্তায় জন-যানের শব্দ শুনিতেছে । মানবের মোটর-বাইকের আওয়াজ পাইয়া সে সোজা হইয়া উঠিয়া বসিল : এতক্ষণে এলেন ।

মানব ঘরে ঢুকিতেই সবাই হৈ-চৈ করিয়া উঠিল ।

ইতিপূর্বে দুই ক্ষেপ হইয়া গিয়াছে, নিতাই জানিতে চাহিল আর-একবার চা দিবে কি না ।

মানব একটা চেয়ারে পা ছড়াইয়া কহিল,—আন্ ।

প্রথম প্রেম

পরমুহূর্ত্তেই তড়াক্ করিয়া লাফাইয়া উঠিল : ও, তোমার টাকা চাই, না সুধীর ? কতো ?

সুধীর নিতান্ত কুণ্ঠিত হইয়া কহিল,—বা তুমি পারো।

—বা আমি পারি নয়, যা তোমার দরকার।

—এই ধরো গোটা কুড়ি। কলেজের মাইনে ছাড়া দিদিকেও কিছু পাঠাতে হ'বে। কোলের ছেনেটা সেদিন শুন্লাম মারা গেছে—

—ফিরিস্তি দেবার কিছু দরকার দেখছি না। আর, (নিখিলের প্রতি) তোমাদের ম্যাগাজিনের ছাপাখানার বিল কতো হয়েছে ? আছে সঙ্গে ? এক শো বত্রিশ। নিতাই। (নিতাইর আবির্ভাব) দেরাজ থেকে আমার চেক-বইটা নিয়ে আয় ত'। (সুধীরকে) তোমাকে আমি ক্যাশই দিচ্ছি। চাবি নিয়ে যা নিতাই।

বিজনের হয় ত' কিঞ্চিং চক্ষু টাটাইল : তুমি এত স্বচ্ছন্দে ধূলোর মতো টাকা উড়োতে পারো।

মানব চেক কাটিতে-কাটিতে : ধূলো ছাড়া আর কি।

বিজন ঠাট্টার স্বরে : অসীম বৈরাগ্য দেখছি যে।

নিখিলেশ হাত বাড়াইয়া চেকটা গ্রহণ করিল : যার আছে সে-ই যদি না দেবে, তবে চলবে কেন ?

সুধীরের স্বর কিন্তু উচ্ছল : অনেকেরই হয় ত' আছে, কিন্তু এমন দক্ষিণ হাত কারুর নেই।

মানব বিরক্ত হইয়া কহিল,—এইগুলোই তোমাদের শ্রাকামি। আমাকেই বা কে দিলে ? কোথা থেকে উড়ে এসে জুড়ে বসলাম।

সুধীর চেয়ার ছাড়িয়া কহিল,—আমি এবার চলি। আমাকে এখনি গিয়ে আবার ছেলে পড়াতে হ'বে।

প্রথম প্রেম

—এখুনি ? এত রাতে ?

—আর বলো কেন ? এক বেলা না গিয়েছি কি মাইনে কেটে নিয়েছে ।

নিখিলেশও উঠিল : আমিও ফেরার হই । পেমেণ্ট্ করলে পরে প্রেস ডেলিভারি দেবে ।

বিজন রহিয়া গেল ।

নিতাই চা দিয়া গেলে ট্রে হইতে এক কাপ তুলিয়া মুখে ঠেকাইবার আগে বিজন বলিল,—তুমি আরেকটু সংযম অভ্যাস কর, মান্নু ।

কথা বলার ধরন দেখিয়া মনে হয় বন্ধুদের মধ্যে বিজনই বেশি অন্তরঙ্গ, কেননা সে যখন-তখন টাকা চাহে না ।

মানব কহিল,—কিসের ? অর্থ-ব্যয়ের ?

—এ তো ব্যয় নয়, ব্যসন । দোহাত্তা এমনি উড়োতে থাকলে ছ' দিনেই দেউলে—

—হ'ব । মানব হাসিয়া বলিল,—সেই পরমতম সর্কনাশের লগ্নের জন্তেই ত' অপেক্ষা করছি । যতো দিন তা না আসে, নেশা করে' যাই ।

—নেশা ? বিজন ব্যস্ত হইয়া উঠিল : মদ ধরেছ নাকি ?

মানব মৃদু-মৃদু হাসিয়া কহিল,—বোঁয়া পর্য্যন্ত আমি গিলি না । ও-সব খেলো নেশায় আমার মন ওঠে না । এ-বিষয়ে আমার আভিজাত্য আছে ।

—যথা ?

—ধরো, আমার যা মাসহারা তা দিয়ে যথাসাধ্য আমি পরোপকার করছি । অর্থে আর সামর্থ্যে ।

প্রথম প্রেম

—এ অত্যন্ত মামুলি ! কিন্তু যাকে-তাকেই 'না চিনিতে ভালোবাসার মতো' দান করতে হ'বে এমন অধিকার তোমার নেই ।

—আমার কাছে লোকে এসে প্রার্থনা করবে সে-অধিকারো আমার ছিলো নাকি ? এক দিন যদি সব ভেঙে-চুরে উল্টে-পাল্টে ছত্রখান হ'য়ে যায়, যাবে । সে-রোমাঞ্চ সহ্য করবার মতো আমার স্বাস্থ্য আছে । আমি শ্রোত চাই, নিত্য নতুন পরিবর্তনের বেগ । আমার রক্তে কিসের চাঞ্চল্য আছে তা তো আর তোমরা জানো না ।

—কিসের ? বিজনের স্বর একটু cynical ।

—সন্ধানের । সে তুমি হঠাৎ বুঝতে পারবে না । কিন্তু আমাকে দেখে সত্যিই কি তোমার মনে হয় না যে আমি পৃথিবীতে খুব প্রকাণ্ড একটা দুঃখ পেতে এসেছি ? এই বেশে আমাকে মানায় না—আমি হ'ব রাস্তার মজুর, জেলের কয়েদি, খনির কুলি । কিম্বা এখান থেকে অন্য কোথাও, অন্য কোথাও থেকে আরো দূরে—

বিজন গা-ঝাড়া দিয়া উঠিয়া বসিল : তুমি একেবারে গোল্লায় গেছ ।

—তা হয়ত' গেছি, কিন্তু তাতে আমার দুঃখ নেই । যতক্ষণ সেই পরমক্ষণ এসে না পৌঁছয়, মুঠি-মুঠি করে' মুহূর্তগুলি আমি উড়িয়ে দিয়ে যাই ।

সেই সুযোগ একবার মাত্র আসিয়াছিল । ধূসর ভোরবেলায়, ঝর্ঝরে ওভার-ল্যাণ্ডে, বালিগঞ্জ সাকুলার রোড্ হইতে মালেন্-স্ট্রিট্‌এ বাক নিবার সময় ।

তাহার পর বাড়িতে মিলিকে মানব আর চোখ ভরিয়া দেখিতেও পায় নাই । বাঁশের বেড়ার ফাঁকে উঠন্ত রোদের সোনার ঝিকিঝিকির

প্রথম প্রেম

মত টুকরো-টুকরো করিয়া তাহাকে চোখে পড়িয়াছে—ভাঙা-ভাঙা স্বপ্নের মত । বিলীয়মান স্বপ্ন !

ইচ্ছা করিলেই মানব মিলির ঘরের পর্দা ঠেলিয়া আলাপ জমাইতে পারে না—ঈদের প্রথম শশীলেখাটির মত অবসরের আকাশে সোনার স্নযোগের ধ্যান করিতে হয় ।

এইবার সে কোন্ মূর্তি নিয়া আসিবে কে জানে ।

পাশাপাশি দুইটি মুহূর্তের দুই রকম রঙ—একটি সোনালি, অণ্ডটি মেটে ; একই মুখ সাম্না-সামনি দেখিলে অর্থহীন, ‘প্রোফাইলে’ তা সঙ্কেতময়—একই কথা দুপুরের নির্জনতায় অনর্গল বলা যায়, কিন্তু নিশীথরাত্রির স্তব্ধতায় তা ভাবা-ও যায় না ।

মানব অন্তমনস্কের মত বারান্দায় পাইচারি করিতেছিল—যে-বারান্দা মিলির পড়ার ঘর ছুঁইয়া সিঁড়ি দিয়া নামিয়া গেছে—

মিলির ঘরের দরজায়—বারান্দার দিকের দরজায়—সবুজ পর্দা ঝুলিতেছে ; ইচ্ছা করিলেই মানব আর সেই পর্দা সরাইয়া ঘরে ঢুকিতে পারে না । সেই সোনালি মুহূর্তটিতে মর্চে পড়িয়াছে । মানব তাই বারান্দায় পাইচারি করিতে-করিতে মিলির পড়া মুখস্ত করার মত গুন্‌গুনানি শোনে ।

তাহার পায়ের শব্দও ত’ শোনা বাইতেছে—পড়া কি আর একটু থামানো যায় না !

কতক্ষণ পরেই অনুপমার প্রবেশ—এই দিক দিয়া কোথায় কোন্ কাজে বাইতেছিলেন বুঝি । মানব তাঁহাকে পাইয়াই কাহাকে যেন শুনাইয়া বলিয়া উঠিল : আমি কাল রাত্রে রাঁচি যাচ্ছি, মা ।

প্রথম প্রেম

অনুপমা কহিলেন,—তা ত' যাবি, কিন্তু মিলি বলছিলো কালকেই ওকে হস্টেলে রেখে আসতে ।

—কই, আমাকে বলে নি ত' ।

—তোকে বলতে যাবে কেন ? বাড়িতে একা-একা ও হাঁপিয়ে উঠছে ।

—বেরুলেই ত' পারে ।

—কার সঙ্গে যাবে ?

—বেড়াতে বেরুবার জন্তেও সঙ্গী চাই নাকি ? আমাকে কিছুই বলে না কেন ?

পড়া কখন বন্ধ হইয়া যায় ।

এবং কাল রাত্রে যে রাঁচি যাওয়া যায় না তাহাও এই সামান্য স্তরুতায় স্পষ্ট হইয়া উঠে ।

অনুপমা নিচে নামিয়া গেলে মানব এইবার স্বচ্ছন্দে সিন্ধের রুমালে ঝাড় মুছিতে-মুছিতে ঘরে ঢুকিতে পারিত । পড়ার ঘর মিলি কেমন করিয়া সাজাইয়াছে তাহাও এ-পর্যন্ত দেখা হয় নাই । টেবিলটা সে কোথায় পাতিয়াছে বা আলনার নিচে শাড়িগুলি তাহার স্তূপীকৃত হইয়া আছে কি না—এটুকু দেখিলেই তাহার চরিত্র ধরা পড়িত হয় ত' । হাতে তাহার কয় গাছি করিয়া বুরো চুড়ি আছে তাহাও ঈশ্বরই বলিতে পারেন ।

রাঁচি যাইবার জন্য সামান্য স্যুটকেশ্ও কাহাকে গুছাইয়া দিতে হইবে না—নিতাই আছে । ঘর-দোর সব সময়েই ফিট্ফাট্, দেয়াল-মেঝে আয়নার মত ঝকঝক করিতেছে—লোকটা অতিমাত্রায় গোছালো । বই না পড়িয়া সেল্ফে সাজাইয়া রাখিবার এমন একটুও বড়লোকি বাতিক

প্রথম প্রেম

নাই যে ঘরে গিয়া লুকাইয়া পড়িয়া আসিবে, বরং কলেজ হইতে মিলিই কত রাজ্যের বই আনিয়াছে—পড়িতে যাহা স্নায়ু-শিরা ভরপুর হইয়া উঠে। মোটর-সাইকেলের যন্ত্রপাতি বা ডন্ ব্র্যাডম্যান্‌এর কীর্তিকলাপের কাহিনী শুনিতে-শুনিতে মিলিও তাহার কলেজের মেয়েদের দুয়েকটা শ্রাকামি বা দুয়েকটা নাক-সিঁটকানোর সরস উদাহরণ দিতে পারিত।

কিন্তু এই বিরক্তিকর নিঃসঙ্গতার বিরুদ্ধে কোনো নালিশই পেশ না করিয়া আলগোছে সরিয়া পড়িলে লোকে তাহাকে বলিবেই বা কী!

এবং তার পরদিন রাতে ঝড় উঠিল।

এক টুকরা সিক্কের মত আকাশকে কে কুটি-কুটি করিয়া ছিঁড়িয়া ফেলিতেছে। তারাগুলি আঙুনের হাল্কা ফুলকির মত শূণ্ণে উড়িতে-উড়িতে নিবিয়া গেল। অন্ধকারের জোয়ার আসিল।

সেই ঝড়েরই সঙ্গে পাল্লা দিয়া মানব তাহার Triumph ছুটাইয়াছে।

বাড়ি আসিয়া পৌঁছিতে-পৌঁছিতেই বৃষ্টি—প্রথম ঈষদৃষ্ণ, অনেকটা বধূর চুম্বনের মত—এবং ক্রমশ শীতলতর। নিতাই তোয়ালে ও কাপড় নিয়া আসিল। একবার যখন ভিজিয়াছে, ভালো করিয়াই স্নান করিয়া নিবে।

বসিবার ঘরে কেহ নাই—বৃষ্টির জগুই আসিতে পারে নাই বোধহয়। তাহা ছাড়া রাত্রির গাড়িতে মানব রাঁচি যাইবে এমন একটা গুজব কাল সন্ধ্যায় রটিতেছিল।

অতঃপর—শুইবার ঘরে।

আলো নিবানো—ঘর ভরিয়া সুনীল অন্ধকার। পশ্চিমের জানলা দুইটা খোলা, এবং তাহারই মধ্য দিয়া অবাধ্য বৃষ্টির ছাঁট আসিয়া মেঝেটা ভাসাইয়া দিতেছে। কিন্তু এখুনিই জানলা দুইটা বন্ধ করিয়া কোনো লাভ নাই—তাহার বিছানায় কে যেন শুইয়া আছে। হ্যাঁ, তাহারই বিছানায়।

মিলি—মিলি কখন তাহার বিছানার সমুদ্রে ডুবিয়া গিয়া ঘুমের পদ্ম হইয়া ফুটিয়া উঠিয়াছে।

আগের মুহূর্তেও এই অপ্রত্যাশিতের আভাস ছিল না, তবু মানব

প্রথম প্রেম

যেন বহু আগে হইতেই মনে-মনে জানিত। ঝড় মিলিকে ডাকিয়া আনিয়াছে।

মানব খাটের দিকে আগাইয়া আসিল এবং মিলিকে ভালো করিয়া চিনিতে অল্প-একটু মুখ বাড়াইল। অন্ধকারে এমন দেখা ঠিক আত্মায় অনুভব করিবার মত।

কিন্তু এ ত' মিলি নয়—এ তাহার মা'র মতো। স্মৃতির মতো। মুখে তেমনি একটি আভাময় পাণ্ডুরতা—শুইবার ভঙ্গিতে তেমনি যেন শ্রান্তি।

স্পষ্ট ও গভীর অন্ধকারে মিলিকে মনে হয় ট্র্যাভেডির নায়িকা।

মিলিকে মানব স্পর্শ করিবে। ঝড় তাহাকে ডাকিয়া আনিয়াছে—বৃষ্টি আনিয়াছে—ঘুম। স্পর্শ করিয়া তাহার ঘুম ভাঙাইবে। এমন রাতে তাহাকে স্পর্শ না করিবার মতো অতৃপ্তি সে বহন করিতে পারিবে না।

অগত্যা মানব মিলিকে স্পর্শ করিল—আলো! না জ্বালাইয়াই—স্পর্শ করিল দেহে নয়, মুঠি ভরিয়া কতগুলি চুল লইল। এবং জাগিয়া উঠিয়া সমস্ত পৃথিবীতে মিলির আর মরিবার জায়গা রহিল না।

মিলি জাগিয়া উঠিল প্রেস্-ফটোগ্রাফারের ফ্যাশ্‌লাইটের চেয়েও দ্রুত।

মানব দিল আলো জ্বালাইয়া। এবং সেই রুঢ় ইলেক্ট্রিক আলোতেও স্পষ্ট দেখা গেল সামনে যেন তাহার মা বসিয়া। মিলির সর্ব্বাঙ্গ ঘিরিয়া তাহার মা'র স্নান ছায়া নামিয়াছে—গভীর কালো দুই চোখে—মিলির চোখের মণি যে এত কালো তাহা কে কবে জানিত— তাহার দুইটি হাতের তালুতে, কানের পাশ দিয়া চুলের গুচ্ছ পুঞ্জিত

প্রথম প্রেম

হইয়া নামিয়া যাইবার রেখাটিতে ! সেই তাহার দুঃখিনী মায়ের প্রতিমা !

মানবের তন্ময় চোখের সামনে পড়িয়া মিলি স্তূপীকৃত শাড়ি হইতে চাহিল। এবং ভুলক্রমে মানবের বিছানায় একটু ঘুমাইয়া পড়িয়াছিল বলিয়াই—একমাত্র সেই কারণেই এখন আর তাহার ঘর ছাড়িয়া চলিয়া যাইবার কোনো মানে হয় না।

সেই সময়ে একটা বিদ্যৎ বলসিয়া উঠিতেই মিলির সাহস হইল। না-হাসিয়া তাহার আর উপায় ছিল কী : আপনার ঘর দেখতে সাহস করে' ঢুকে পড়েছিলাম—কালই আমি হস্টেলে চলে' যাচ্ছি কিনা—

মানবের মুখে সেই সন্ধিৎসু হাসি যা দৃষ্টিকে রমণীয় করিয়া তোলে : আমিও ত' আজ রাঁচি যাচ্ছিলাম। কিন্তু কী বিচ্ছিরি রাত করে' এলো দেখেছ ! I mean—কী সুন্দর রাত ! চা খাই, কি বলো ? নিতাই !

নিতাই তটস্থ। চা আসিতেছে।

মিলি বলিল,—কেমন করে' যে ঘুমিয়ে পড়লাম বুঝতে পারছি না—

মুখের কথা কাড়িয়া নিয়া মানব : চুল ছড়িয়ে বাঁ কাৎ হ'য়ে—

বাহিরে এমন অজস্র বৃষ্টি ও দুর্দান্ত ঝড় না থাকিলে এই কথা কখনই মানবের মুখ দিয়া বাহির হইতে পারিত না।

—একে শীতের বেলা তায় আসছি লাষ্ট টি প্‌এ—শরীর ভেঙে পড়ছে। ঘরে ঢুকেই দেখি দিব্যি বিছানা পাতা। হাসিতে-হাসিতে মিলি হাত তুলিয়া এলো চুলে একটা ফাঁস বাঁধিতে লাগিল।

ফাঁস বাঁধা হইয়া গেলেও মিলি উঠিল না।

মানব কহিল,—বাহিরে এমন ঝড়, তার মধ্যে তোমার ঘুম এলো ?

—সেই ত' আশ্চর্য্য ! জান্‌লাগুলি বন্ধ করুন না।

প্রথম প্রেম

মানব জান্না বন্ধ করিতে করিতে : তুমি নাকি একা-একা একেবারে
হাঁপিয়ে উঠছ ।

সামান্য একটু লজ্জিত হইয়া মিলি কহিল,—নিশ্চয় । তাই ত'
ভাবছি হস্টেলে চলে' যাবো ।

—ভাবছ ? মনবের কাছে মিলি ধরা পড়িয়া গেছে : কালই যাবে
না তা হ'লে ?

—আপনিও ত' আজ আর রাঁচি যাচ্ছেন না ।

—দেখছ না কী বৃষ্টি !

—বা, বৃষ্টিতেই ত' যেতে মজা ।

মানবের মাথায় চট করিয়া এক আইডিয়া আসিল : চলো না
বেড়াতে বেরুই । আমার মোটর-বাইকে ।

কথাটা আয়ত্ত করিতেই মিলির দেহ রোমাঞ্চিত হইয়া উঠিল ।
একটু থামিয়া ধীরে সে কহিল,—দাঁড়ান্, চা-টা খেয়ে নি ।

চা খাইয়া নিতে-নিতে বৃষ্টি থামিয়া গেল । বর্ষণান্তে ভিজা মলিন
আকাশের মতই ঘোলাটে মিলির হাসি ! মুখ হইতে চায়ের বাটিটা
নামাইয়া রাখিয়া : এই যা ।

—তাতে কি ? বেড়ানোটাই উদ্দেশ্য ।

—মিথ্যে কথা । বৃষ্টিটাই কারণ ।

মানব থামিয়া গেল । ঘনীভূত অন্তরঙ্গতায় শীতল মুহূর্তটিকে তপ্ত
করিবার ইচ্ছায় মানব চেয়ারটা খাটের কাছে টানিয়া আনিল । মিলি
কিন্তু একটুও সরিয়া বসিল না ।

ঠিক, ঠিক তাহার মায়ের মুখ ! মানবকে ঘুম পাড়াইতে-পাড়াইতে
যে-মুখ নিচু হইয়া তাহার চোখের পাতায় চুমা খাইয়াছে । এই সেই

প্রথম প্রেম

মুখ—দুঃখিনী কঙ্কাবতীর গল্প বলিতে-বলিতে যে-মুখে নরম মোমের আলো পড়িয়া বেদনায় কোমল দেখাইত ! এই মুখের দিকে চাহিয়া-চাহিয়া কত রাতে মানবের দেহ ভরিয়া ঘুম আসিয়াছে ।

মিলির দুইটি চক্ষুর জানালায় বসিয়া মা যেন তাহার দিকে ক্ষণে-ক্ষণে উকি মারিতেছেন ।

ষ্টেশনে মিলির মুখকে মনে হইয়াছিল কলিকাতার আকাশের মত সাধারণ, বিরস—এখন মনে হইল সে-মুখে গভীর প্রশান্তি ! সমস্ত মুখ-মণ্ডল পরিব্যাপ্ত করিয়া একটি অন্তরলালিত বেদনার সূক্ষমা ! মিলিও যেন তাহারই মত জীবনে অমিত দুঃখ পাইতে আসিয়াছে ।

ঘন নিঃশব্দতায় অন্ধকার ভারাক্রান্ত হইয়া উঠিতে লাগিল ।

মিলি বসিয়া-বসিয়া হাতের চুড়িগুলি নিয়া মৃদু-মৃদু নাড়া-চাড়া করিতেছে, আর মানব দাঁড়াইয়া-দাঁড়াইয়া অকারণে পকেট হাট্‌কায় ।

বৃষ্টির সঙ্গে-সঙ্গে সে-মুহূর্তটি মিলাইয়া গিয়াছে । সমস্ত আকাশে তাহার একটি কণিকাও আর কোথাও খুঁজিয়া পাওয়া যাইবে না । এখন আবার সেই কঠিন ও করুণ স্তব্ধতা !

মানবের আজ আর রাঁচি যাওয়া হইল না, মিলি হস্টেলে যাইবে কি-না সে-কথা না-হয় পরে ভাবিয়া রাখা যাইবে, তা-ও এক পেয়ালারিয়া উদরস্থ করা গেল—তারপর ? এইবার হাই তুলিতে হইবে নাকি ? এমন করিয়া বৃষ্টি আসার যে কোনোই মানে হয় না—তাহা ত' স্বচক্ষেই দেখা যাইতেছে, পরস্পরকে তাই বলিয়া তাহা মনে করাইয়া দিতে হইবে নাকি ? অতএব মিলি খাট ছাড়িয়া উঠিয়া পড়িল : যাই, আমার এখনো চুল বাঁধা হয় নি ।

বলিয়া ঘর ছাড়িয়া দ্রুতপদে বাহির হইয়া যাইতে তাহাকে দরজার

প্রথম প্রেম

কাছে ক্রণেকের জন্ত দাঁড়াইয়া পড়িতে হইল। বৃষ্টি বন্ধ হইলেও ফুঁ পিয়া-
ফুঁ পিয়া তখনো ঝড় বহিতেছে—চেউয়ের মত উচ্ছ্বসিত হাওয়া হঠাৎ
মিলিকে সর্বান্তে বেষ্টন করিল। তাহার খোঁপা খসিয়া পড়িয়া এক-পিঠ
চুল রাশি-রাশি কালো শিখার মত চারিদিকে বিকীর্ণ হইতে লাগিল;
শাড়িটা গায়ের সঙ্গে সহসা লিপ্ত হইয়া যাইতেই দেহের প্রতিটি রেখা
সূক্ষ্ম ও লীলায়িত হইয়া উঠিল। অবিন্যস্ত বেশ-বাস লইয়া ছুটিয়া পলাইয়া
যাইতে সেই যে মিলি সামান্য একটু বাধা পাইল, তাহাতে তাহাকে কী যে
সুন্দর লাগিল, দুই চোখ ভরিয়া দেখা আর মানবের কুলাইয়া উঠিল না।

মানবের শুইবার ঘর : রাত বারোটা বাজিয়া দশ মিনিট :

মিলিকে দেখিয়া তাহার মা-কে আজ অত্যন্ত কাছে মনে হইতেছে ।
রোগে ক্লশ, নিরাভ, বিমর্ষ মা'র শ্মুখ । আয়নার মত ঠাণ্ডা অন্ধকারটি
যেন মা'র অন্তরঙ্গ উপস্থিতি । মা তাহার আজ কোথায় ? তাহাকে
এই সৌভাগ্যের হাতে পৌছাইয়া দিয়া তিনি কোথায় পথ হারাইলেন ?
কেহ বলিয়াছে কোন্ সালে না-জানি কলিকাতার কোন্-কোন্ বস্তিতে
কলেরা লাগিয়াছিল, সেই যে তিনি হাঁসপাতালে গেলেন, আর ফিরেন
নাই ; কেহ ইহার চেয়েও জঘন্যতর কথা বলে । মানব তাহা বিশ্বাস
করিতে চায় না, বরং তিনি চলন্ত ট্রেনের তলায় পড়িয়া খণ্ড-বিখণ্ড হইয়া
গিয়াছেন ভাবিতে তাহার স্বস্তিবোধ হয় ।

সেই মা-কে মানব বহুবার ভাঙা-চোরা চাঁদের মত বহু জনের মুখে
ভাসিয়া উঠিতে দেখিয়াছে, কিন্তু মিলির মাঝেই সে তাঁহাকে আজ
ঘনিষ্ঠ ও সম্পূর্ণতম করিয়া দেখিল,—প্রতিটি গতিরেখায় উল্লসিত,
প্রতিটি দৃষ্টিপাতে সমাহিত, সৌম্য ! এই প্রচুর ও প্রগল্ভ চাকচিক্যের
অন্তরালে মা'র উপবাসধির দুঃখী মুখখানি সে ভুলিতে পারে না ।

মিলির শুইবার ঘর : রাত বারোটা বাজিয়া দশ মিনিট :

পাশের বাড়ির ছাতে একটা বাতি দেখা যাইতেছে বোধহয়—
তাই দেখিবার জন্ম মিলি মানবের বিছানায় সামান্য-একটু গা এলাইয়া-
ছিল । একেবারে আধখানা কাৎ না হইলে বাতিটা চোখে পড়ে
না ; কিন্তু বাতি দেখিতে-দেখিতে মিলি মেঘ দেখিল । সেই মেঘ
ক্রমশ ধোয়ার মত কুণ্ডলী পাকাইতে-পাকাইতে আকাশ-ময় ছড়াইয়া

প্রথম প্রেম

পড়িতে লাগিল—অন্ধকার মাটির মত ঠাণ্ডা ও ব্যথার মত নিবিড় হইয়া উঠিল এবং বৃষ্টি আসিবার আগেই কখন যে তাহার চক্ষু ভরিয়া ঘুম নামিয়া আসিল কে বলিবে।

জাগিয়া দেখিল চারিদিকে ঝড় আর জল—সামনে মানব; আর সে কিনা এতক্ষণ কিছুই টের পায় নাই। মানব তাহাকে না জানি কী ভাবিয়া বসিয়াছে!

কিন্তু ঘুমাইয়া যখন পড়িয়াছিলই, তখন না-জাগিলেই ত' পারিত। কেন যে সে জাগিয়াছে মিলি যেন স্বপ্নে তাহার ইসারা পাইয়াছে। কিন্তু মানবের সেই স্পর্শে মিলির মনে আরেকটি মুখ জাগিয়া উঠিল—সে তাহার খেলার সাথী, নাম নরেন। দুইজনে কলাই-শাকের ক্ষেতে ছাগল তাড়াইয়া কত ছুটাছুটি করিয়াছে, পেয়ারা গাছের ডালে নারকেলের দড়ি বাঁধিয়া বালিশ ভাঁজ করিয়া বসিয়া কত দোল খাইয়াছে, কত ছপুর্বে বোতলের গুঁড়া করিয়া গাবের আঠার সঙ্গে সূতায় মাঞ্জা দিয়া তাহারা দুইজনে ঘুড়ি উড়াইয়াছে।

রাত্রির এই মলিন ও ভিজা কয়েকটি মুহূর্ত সেই কিশোর-নরেনের স্মৃতিতে ভরিয়া উঠে।

গর্জমান ভাঙন-নদী,—বান দেখিবার জন্ত নরেন ছপুর্বে বেলায় কখন না-জানি একা-একা চলিয়া আসিয়াছে। আগের দিন মিলিকে লইয়া মড়া-পোড়া দেখিবার জন্ত সে কাহাকেও না বলিয়া শ্মশান-বাটে চলিয়া গিয়াছিল বলিয়া মিলির বাবা নরেনকে ঠাসিয়া বকিয়া দিয়াছিলেন, সেই জন্তই সে রাগ করিয়া মিলিকে সঙ্গে লয় নাই। সঙ্গে লইলে মিলি নিশ্চয়ই নদীর পারে একাকী তালগাছটার তলায় নরেনের গা ঘেসিয়া দাঁড়াইত—এক ঝাঁক গাউ-শালিকের মত দূর হইতে কখন

প্রথম প্রেম

বান আসে তাহাই দেখিবার আগ্রহে মিলিও নিশ্চয় নরেনের মতই টের পাইত না পায়ের তলে কখন প্রকাণ্ড চিড় ধরিয়া তালগাছ-শুষ্ক জমিটা আল্গা হইয়া আসিয়াছে। তাহা হইলে সেও নিশ্চয় নরেনের মতই চেউয়ে ভাসিতে-ভাসিত্তে কোথায় অদৃশ হইয়া যাইত কে জানে।

কত দিন ধরিয়া কত খোঁজ করা হইল, রাফুসি নদী নরেনকে কিছুতেই ফিরাইয়া দিল না।

মানবের স্পর্শে আজ তাহার জীবনের প্রথম বেদনার কথাটি মনে হইতেছে।

সেই নরেন আজ যৌবনে বলদৃপ্ত হইয়া উঠিয়াছে। পুরুষের সৌন্দর্য্য বাহতে, নারীর যেমন করতলে। নারীর যদি গ্রীবায়, পুরুষের স্কন্ধে।

সেই নরেন চেউ ভাঙিয়া সমুদ্র ডিঙাইয়া মিলির জীবনে আজ কুল পাইল নাকি।

এই সংসারে মানবের এই আকস্মিক প্রতিষ্ঠার নানা-রকম কাহিনী শুনিয়া সে এখানে আসিবার আগে হইতেই মানবের প্রতি একটা ঘণার ভাব পোষণ করিতে চেষ্টা করিয়াছিল। কিন্তু যাহা কিছু চেষ্টার তাহা ইচ্ছার কাছে অবশেষে হার মানিয়া যায়।

যে-বসন্ত অরণ্যে মুখর, তরঙ্গে ফেনায়িত, আকাশে সুনীল—সেই বসন্তই মিলির দেহে রেখাসঙ্কুল ও আত্মায় অনুভবময় হইয়া উঠে। মিলি বুকের উপর দুই হাত উপুড় করিয়া রাখিয়া একমনে সমস্ত দেহের রক্ত-চলাচল শুনিত থাকে।

মাঝখানে মাত্র এক দেয়ালের ব্যবধান।

বহু স্তব্ধতার, বহু প্রতীক্ষার, অনেক অনুনয়ের।

মানব চুল ব্রাশ্ করিতে-করিতে এই ঘর থেকে : তোমার হ'ল ?

মিলি কাঁধের কাছে ব্রোচ্ আঁটিতে-আঁটিতে—ও-ঘর থেকে : প্রায় ।

দুই জনে নিচে নামিয়া আসিল । মিলির পরনে সিন্ধের মোলায়েম শাড়ি—উদয়াস্তের আকাশের মত লাল ! অতিমাত্রায় প্রখর ও প্রকাশিত হইতে না পারিলে মিলির বুকি লজ্জার আর অন্ত থাকিত না । এই শাড়ির আবরণে সে নিজের কুণ্ঠাকে লুকাইয়া রাখিয়াছে ।

মানব কহিল,—সাইড্-কারটা আর চলে না এখন । পেছনে বসতে পারবে না ?

মিলি ভয় পাইয়া কহিল,—যদি ছিট্কে পড়ে' বাই !

—পড়্বে কেন ? ভয় করলে স্বচ্ছন্দে আমার কাঁধ ধরবে ।

মিলি হাসিয়া ফেলিল : তা হ'লে আপনাকে শুদ্ধু । আর ভয় নেই ।

বুক বিস্ফারিত করিয়া মানব হাওয়ায় চুল ও শাটের চওড়া কলারটা উড়াইতে-উড়াইতে প্রায় উড়িয়া চলিয়াছে । পাশে মিলি স্তব্ধ ও সঙ্কুচিত । শুধু দুই তিনটি চুল ধোঁয়ার কুণ্ডলীর মত ভুরুর কাছে কখনো বা চোখের পাতার উপর ঘুরিয়া-ঘুরিয়া খেলা করিতেছে ; এমন ভাবে জড়সড় হইয়া বসিয়া আছে যে দেখিলে মায়া হয় ।

মিলি না বলিয়া পারিল না : আরেকটু আস্তে চালালে কি ক্ষতি হ'ত ?

মানব মিলির দিকে দৃকপাত না করিয়াই কহিল,—সাড়ে ছ'টা এই বাজলো । এখুনি ঘর অন্ধকার হ'য়ে যাবে ।

আরেকটু হইলে ঐ বিয়ুইকটার সঙ্গে ধাক্কা লাগিয়াছিল আর কি !

প্রথম প্রেম

এক চুলের জন্তু বাঁচিয়া গেছে। মিলি দুই হাতে চোখ ঢাকিয়া চোঁচাইয়া উঠিয়াছিল।

মানব হাসিয়া কহিল,—তুমি নিতান্ত ভীতু। ধাক্কা লেগে চুরমার হ'য়ে যেতে তোমার ভালো লাগে না? বলিয়া লিঙসে ঝিটে সে বাঁক নিল।

মিলির ঠোঁটে হাসি—হাসিলে আবার চিবুকের ডান দিকে ছোট একটি টোল পড়ে: সব চেয়ে ভালো লাগতো যদি দয়া করে' আমাকে ফুটপাতে নামিয়ে দেন্। আমি একটা রিক্সা ডেকে বাড়ি ফিরি।

মানব কহিল,—বেশ ত', দু'জনে একদিন না-হয় রিক্সা চড়ে'ই বেড়ানো যাবে। এ যেন তুমি অনেক দূরে বসে' আছ।

কথাটা মিলির মানবের ছোঁয়ার মতই মনোরম লাগিল।

সিনেমায় পিছনের দুইটা গদি-আঁটা চেয়ারে দুইজনে বসিয়াছে—মাঝে একটা হাতলের মাত্র ব্যবধান। মিলি কনুইটা আঁচলের তলায় গুটাইয়া নিল।

পদ্দা কথা কহিতেছে বটে, কিন্তু পরস্পরের সান্নিধ্যে অভিভূত হইয়া দুইজনে স্তব্ধ হইয়া বোধকরি একটি প্রত্যাশিত স্পর্শের প্রতীক্ষা করিতেছিল। সমস্ত ঘর ভরিয়া মধুর ও সুগন্ধময় অন্ধকার!

মানব হাত বাড়াইয়া মিলির হাতের নাগাল পাইল,—সে-হাত ধরা দিবার জন্তই উৎকণ্ঠিত হইয়া আছে। মানব মিলির হাতখানি মুঠার মধ্যে তুলিয়া লইল। আবেগে যে-বাণী অর্ধফুট, আবেশে যে-দৃষ্টি অর্ধনিমীল—ঠিক তাহাদেরই অনুরূপ এই স্পর্শকুণ্ঠ হাতখানি—পায়রার বুকের মত ভীক! মানবের মুঠির মধ্যে মিলি তাহার হাতখানি যেন ঢালিয়া দিল—মানব এই স্পর্শের মধ্য দিয়া মিলির হৃৎস্পন্দন শুনিতোছে।

প্রথম প্রেম

এই স্পর্শের মধ্য দিয়া মিলি তাহার আত্মাকে অব্যাহত করিয়া দিয়াছে। মানবের সমস্ত চেতনা অনুভবের ঠ ভীরতায় আচ্ছন্ন হইয়া উঠে।

তার পর দিন প্রিন্সেপ্‌স্ ঘাট :

সন্ধ্যার আকাশে মৃত সূর্যের ঐশ্বর্য্য, মুখর নগরের চলমান শোভাযাত্রা দেখিতে মেঘের বাতায়নে ঐ দূর প্রবাসিনী তারাটির সলজ্জ দৃষ্টি, সমুদ্রের ঢেউ ভাঙিয়া পারহীন পরিধিহীন নিরুদ্দেশের পানে যাত্রা করিতে কী যে সে উন্মাদনা, নিয়মিত ও পরিমিত জীবনের ছোট সুখ লইয়া দিন-কাটানোর চেয়ে দুই বিশাল ও শক্তিশালী পাখা ঝঞ্জা-বিদীর্ণ আকাশে বিস্তারিত করিয়া দিতে কী যে সে রোমাঞ্চ, অভ্যাস নয়, বৈচিত্র্য—গতানুগমন নয়, অগ্রগতি—এই সব কথার শেষে :

মিলি বলে,—‘ঐ একটা নৌকা করে’ একটু বেড়িয়ে এলে কেমন হয় ?

মানব তক্ষুনি নৌকা ঠিক করিয়া ফেলে। মানব পাটাতনের উপর লাফাইয়া উঠিয়া হাত বাড়াইয়া মিলিকে পার হইতে তুলিয়া আনে। শ্রোতের ফুলের মত হাল্কা নৌকাটা ঢেউয়ের গায়ে-গায়ে ছলিয়া-ছলিয়া চলে।

মানব বলে,—এই যেমন তুমি। আমার জীবনে অভ্যুদয় তোমার নবীন—সমস্ত পুরোনো খোলস আমি খসিয়ে এসেছি।

মিলি হাঁটুর উপর গাল পাতিয়া ঢেউয়ের ছলছলানি শুনিতো-শুনিতো তন্ময় হইয়া বলে,—আর আমার জীবনে আপনার অভ্যুদয় প্রথম—এখান থেকেই হয় ত’ আমার জীবনের সত্যিকারের সূচনা।

প্রথম প্রেম

রাত্রি একটু-একটু করিয়া ঘনাইয়া আসে—নদীর জলের উপরের স্নান ও শীতল স্তব্ধতাটি অন্তরঙ্গ হইয়া উঠে। মানব মিলির কথা—বাড়ির কথা, শৈশবের কথা সব খুঁটিয়া-খুঁটিয়া জানিতে চায়।

মিলি উৎসাহিত হইয়া বলে : পুরোনো বাড়ি বেচিয়া তাহারা কবে নূতন বাড়িতে উঠিয়া আসিয়াছে, দক্ষিণে নদী শুকাইয়া প্রকাণ্ড চর পড়িয়াছে, একটু-একটু করিয়া এখন আবার ভাঙিতেছে নাকি—তিন বৎসর হইল তাহার মা মারা গিয়াছেন, সেই হইতে বাবা কেমন উদাস হইয়া পড়িয়াছেন, নিরালায় বসিয়া খালি সেতার বাজান—একবার ছুটিতে সে দেশের বাড়িতে বেড়াইতে যাইবে—সে এতকাল ঢাকায় পড়িতেছিল, কিন্তু কলিকাতায় না আসিলে তাহার জীবনে সত্যকারের রঙ ফুটিবে না বলিয়াই এখানে কলেজে সে পড়িতে আসিয়াছে।

একটা ফেরি-ষ্টিমার এ-দিক দিয়া আসিতেছে।

মানব কহিল,—ছেলেবেলায় তোমার জীবনে একটাও কোনো স্মরণীয় ঘটনা ঘটেনি? বলা না একটা।

মিলির মনে নরেন্দ্র-দার মৃত্যুর কথাই জাগে—উহা ছাড়া এমন আর কী ঘটিয়াছে বাহা মনে করিতে আজো তাহার চোখ ছলছল করিয়া উঠে, চোখ বুজিয়া তাহার মুখ মনে করিতে গেলে খালি সেই-রাঙ্কুসি নদীর কথাই মনে পড়ে—সে-মুখ জলের মধ্যে কোথার তলাইয়া গেছে।

প্রথমতম দুঃখানুভবের কথা বলিতে-বলিতে মিলির চোখ রাতের নদীর মত নিঃশব্দ হইয়া উঠে; সেই চোখের দিকে তাকাইয়া থাকিতে-থাকিতে মানবের আবার মা'র কথা মনে পড়ে।

মিলি বলে,—আপনার কথাও কিছু বলুন না—

প্রথম প্রেম

কিন্তু হঠাৎ দুর্বল নোকাটা ভীষণভাবে তুলিয়া উঠিল ; নদী আর নিজ্জীব নয়, ঢেউগুলি ক্ষেপিয়া উঠিয়াছে—নোকাটা বুঝি এইবার উল্টাইবে।

মিলি চোখের পলকে মানবের কাছে সরিয়া আসিয়া দুই হাত দিয়া তাহাকে জড়াইয়া ধরিল। উঁচু ডালের পাতার মত মিলির বুক কাঁপিতেছে, শরীরে যতখানি ভয় ততখানি স্নেহ—নরেন্দার সঙ্গে এইবার তাহাকেও বুঝি জলের তলায় বাসা নিতে হইল ! নরেন্দা তাহাকে সেই চির-বিশ্বতির দেশে ডাকিয়া নিতে আসিয়াছে।

মানব মিলির পিঠে হাত বুলাইয়া দিতে লাগিল : ভয় নেই। ষ্টিমারটা পাশ দিয়ে চলে' গেল কি না, তাই নোকাটা টান্ সামলাতে পারে নি। মাঝিরা বেশ হুঁসিয়ার।

নদী ফের প্রকৃতিস্থ হইয়া আসিতেছে, তবু সেই স্পর্শসান্নিধ্য হইতে তৎক্ষণাৎ নিজেকে সরাইয়া নিতে মিলির কেমন বেন ইচ্ছা হয় না। সর্ব্বাঙ্গ দিয়া একটা নিবিড় উত্তাপের স্বাদ পাইতে থাকে। বলে,—পারে নোকা ফিরিয়ে নিয়ে যেতে বলা।

কপালের উপর হইতে তাহার কয়েকটি চুল কানের পিঠের দিকে তুলিয়া দিতে-দিতে মানব বলিল,—তুমি নিতান্তই মেয়ে, মিলি। বেশ ত', এক সঙ্গে না-হয় ডুবেই যেতাম।

মিলির মুখে এইবার হাসি ফুটিয়াছে : পারের কাছে এসে পড়েছি কি না, তাই এখন যতো বীরত্ব ! ষ্টিমারের চাকার তলায় পড়লে তখন বোঝা যেত আপনিও নিতান্ত ছেলে কিনা। আপনিও ত' কম কাঁপছিলেন না।

মানব হাসিয়া কহিল,—সে কি ভয়ে নাকি ? তোমাকে নিয়ে মরবার চমৎকার সম্ভাবনায়। তুমি কিচ্ছু বোঝ না।

প্রথম প্রেম

—দরকার নেই বুঝে। বুঝতে গেলেই ফর্সা। তার চেয়ে দয়া করে' বাড়ি নিয়ে চলুন।

—বাড়ি ফিরবার পথও বিশেষ সমতল নয়। জলে যদি নৌকো, ডাঙায় তেমনি মোটর। মরতে তোমার এতো ভয় ?

—এতো ভয় ! চোখ বুজে রাম-নাম জপতে-জপতে যদি কোনো-রকমে এবার তরে' যাই, তবে বিছানা ভরে' গা ছড়িয়ে ঘুমিয়ে সে যে কী আরাম পাবো, আপনার সঙ্গে মরে' তার এককণাও পাওয়া যাবে না। ঐ ত' ঘাট, না ? বাঁচলাম।

এক নিশ্বাসে পথ ফুরাইয়া গেল। কাপড়-চোপড় ছাড়িয়া মিলি মুখে কিছু গুঁজিল কি না-গুঁজিল, তারপর বকের পাথার মত নরম তক্তকে বিছানা !

বলা-কহা নাই, কেনই বা যে পাশ দিয়া ষ্টিমার ছুটিয়া আসে, নৌকা বেসামাল হইয়া উঠে, মাঝিরা হিম্-সিম্ খায়—সমস্ত দৃশ্যজগৎ আড়াল করিয়া মুহূর্তের জন্ত মৃত্যু ঘন হইয়া আসে।

কেন এমন হয় !

খোলা জানালা দিয়া শীতের ধোঁয়াটে আকাশের দিকে মিলি একদৃষ্টে চাহিয়া থাকে—সারা আকাশে কোথাও এতটুকু উত্তর লেখা নাই।

তার পর ফিরপোতে—একতলায় :

মুখোমুখি চেয়ারে মিলি আর মানব—টেবিলের উপর রাশীকৃত খাণ্ড। মিলি কোনোদিন তাহাদের নামও শোনে নাই ; দাম জানিয়া এইবার সে দস্তরমত রাগ করিল।

কহিল,—এমনি করে' আপনি খালি টাকা উড়োন কেন ?

প্রথম প্রেম

চিবাঁইবার শব্দ করিতে-করিতে মানব নির্লিপ্তের মত কহিল,—টাকা আছে বলে' ।

—আছে বলে'ই কি এমনি অপব্যয় করতে হ'বে নাকি ?

—অপব্যয় হচ্ছে অজস্রতার প্রমাণ । হাতে যা আছে—তা ত্যাগ করতে না পারলে আমি মুক্তি পাই না ।

কাঁটা-চাম্চেয় মৃদু-মৃদু শব্দ করিতে-করিতে মিলি বলিল,—মেসোমশাই আপনাকে এতো টাকাও দেন ।

ঘাড় হেলাইয়া মানব কহিল,—দেন । ফুরোলে যদি ফের হাত পাতি, সে-প্রার্থনাও অপূর্ণ থাকে না । কা'র জন্তেই বা এতো টাকা জমাচ্ছেন তিনি ? একদিন আমার হাতেই ত' এসে পড়বে । তবে যৌবনের এ কয়টা দিনকে দীপ্ত ও তপ্ত করে' যাই না কেন !

মিলি কি বলিতে যাইতেছিল তাহাতে বাধা দিয়া : পূর্ব-পুরুষের সঞ্চিত টাকা উত্তরাধিকারীরা সাধারণত যে-রকম করে' ভোগ করে সেই প্রথাটা বড় পুরোনো হ'য়ে গেছে । তার মধ্যে বিন্দুমাত্র আভিজাত্য নেই । মদ বা তার আনুষঙ্গিক অনুপানগুলিতে না আছে স্বাদ, না বা মাদকতা । জীবনকে ভোগ করা অর্থ নিজেকে ক্ষয় করা নয় । আমার আদর্শ মহত্তর ।

বিশ্বাসগভীর আয়ত দুইটি চোখ তুলিয়া মিলি কহিল,—যথা ?

—আমার ভোগ করার আদর্শ নিজেকে চতুর্দিকে ছড়িয়ে দেওয়া—কর্মে, প্রচেষ্টায়, অনুধাবনে । এ তুমি আমার কী ব্যয় দেখছ ? আমি নিজেকে কতোদূর পর্যন্ত উজাড় করে' দিতে পারি তা তুমি জানো না । কিন্তু খেতে আর ভালো লাগছে না, না ?

মিলি স্বচ্ছন্দে খাবারের প্লেটটা ঠেলিয়া দিয়া কহিল,—একটুও না ।

প্রথম প্রেম

—তবে চলো, এবার পালানাই।

বিল্ দেখিয়া মিলির চক্ষু স্থির : সাড়ে বাইশ টাকা ?

মানব পকেট হইতে নোটের তাড়া বাহির করিতে-করিতে হাসিয়া কহিল,—তাই শুধু নয়, ওয়েটারকে আড়াইটে টাকা বক্শিস্ দিতে হ'বে।

—আড়াই টাকা ? মিলি আকাশ হইতে পড়িল : কিন্তু কী বা আপনি খেলেন !

—এ ত' খাওয়ার জন্তে নয়, তোমাকে নিয়ে খাওয়ার জন্তে।

—এমনি করে' ধূলো-মাটির মত ছু' হাতে টাকা উড়োতে থাকলে আপনার আর ছড়িয়ে পড়বারই বা বাকি কি ? ছু'দিনেই সম্পত্তি যাবে উবে, একটি বৃহদাকার শূণ্য আপনার মূলধন।

মানব মিলির মুখের দিকে চাহিতে পারিল না : সে-শূণ্য আমার জমার ঘরেরই শূণ্য, মিলি। তুমি কাছে থাকলে সেই শূণ্যই আমার ঐশ্বর্য্য হ'য়ে উঠবে।

এ-সব কথা শুনিতে মিলিরো ভালো লাগে।

মানব চেয়ার ছাড়িয়া উঠিয়া পড়িল : চলো, বেরুই।

রাস্তার ও-ধারে মির্জা গাড়ি নিয়া দাঁড়াইয়া ছিল—মিলির সঙ্গে গাড়িতে একটু আলস্যসুখ ভোগ করিবার জন্তই মানব মির্জাকে নিয়া আসিয়াছে ; কিন্তু এখন আর গাড়ি নয়। মানব কহিল,—চলো, মাঠে একটু হাঁটি।

নিশ্বাস ভরিয়া শিশিরার্দ্র অন্ধকারের গন্ধ নিতে-নিতে মানব কহিল,—আমার রক্তের মাঝে এক বৈরাগীর বাসা আছে, মিলি। সে আমাকে এক মুহূর্তও বিশ্রাম করতে দেয় না। এইখানে এসো একটু বসি।

প্রথম প্রেম

মিলি আর মানব মুখোমুখি বসিল। দুই জনকে ঘিরিয়া একটি মধুর অনির্বচনীয় স্তব্ধতা রাশীকৃত হইয়া উঠিতে লাগিল। এই নিঃশব্দতাকে মিলির কেমন যেন ভয় করিতেছে। সে যেন নিমেষে আত্মার এই অপার নিঃশব্দতায় তাহার অস্তিত্ববোধকে হারাইয়া ফেলিয়াছে।

হঠাৎ দুইজনে তাহারা এমন করিয়া চুপ করিয়া গেল কেন? ও-পারে চৌরঙ্গিতে সারি-সারি আলো ও কোলাহলের টুকরা—এ-পারে একটি অনিমেষ প্রতীক্ষা—কে কখন আগে সম্বোধন করে!

মানবই কথা কহিল,—তোমাকে দেখে খালি আমার মা'র কথা মনে পড়ে, মিলি।

বলিতে-বলিতে গভীর স্নেহে মানব মিলির বাঁ-হাতখানি হাতের মুঠায় তুলিয়া লইল। সেই স্পর্শে তাহার মা'র সাস্বনাটি অম্লান হইয়া আছে। হাতখানি কখনো ছাড়িয়া দেয়, আবার কখনো গ্রহণ করে, কখনো কপালের উপর রাখে, কখনো বা নিচু হইয়া তাহাতে মুখ ঢাকে। মিলির দেহ অন্ধকারের মত নিঃশব্দস্পন্দিত হইতে থাকে।

মিলি কহিল,—আপনার মা এখন কোথায় আছেন কিছুই জানেন না?

—আছেনই বা কি না তাই বা কে জানে। আমার বাবা সন্ন্যাসী, মা গৃহত্যাগিনী—একজনের উচ্ছৃঙ্খলতা ও আরেকজনের দুঃখ, একজনের ঔজ্জ্বল্য ও আরেকজনের গভীরতা—আমার দিন-রাত্রি এই দুই সুরে বাঁধা আছে। আমি নিজের কথা খুব বেশি বলতে চাই—আমার বিষয় আমি নিজেই—

—বেশ ত' বলুন না। আপনার মা'র কথা আমার এতো জানতে ইচ্ছা করে।

প্রথম প্রেম

—আমারো। কিন্তু কী ক’রেই বা জানুবো বলো।

—কী করে’ এ-বাড়িতে আপনারা এলেন, কেনই বা তিনি চলে’
গেলেন—

মানব উদাসীনের মত কুহিল,—সব এখন অস্পষ্ট হ’য়ে এসেছে।
কিন্তু তোমার মুখ দেখে আমার ভয় হয় মিলি, মা’র হয় ত’ আর দেখা
পাবো না। এই বলিয়া মানব মিলিকে নিজের কাছে আকর্ষণ করিল।

মিলি টলিল না, কহিল,—সতীশবাবু আপনাকে তা হ’লে পোষ
নেন নি? তবে—

—না। এ-সব কথা এ-সময়ের জন্তে নয়। এবার উঠবে?

—না, আরো একটু বসি।

কিন্তু যে-দিনের কথা বলিতেছিলাম :

মিলি মোটর-সাইকেলে মানবের পিছনেই বসিয়াছে—ভয় করিতেছে
বটে, কিন্তু এই বেগের আনন্দ তাহার দেহের প্রতিটি রেখায় উচ্ছলিত।
পরনে সাদাসিধে শাড়ি—আঁচলটা দড়ির মত পাকাইয়া কোমরে বাঁধা,
তাহাতে সমস্ত শরীরে একটি ক্ষিপ্ততা আসিয়াছে। একটা এলো খোঁপা
বাঁধিয়া আসিয়াছিল, গাড়ির ঝাঁকুনিতে খোঁপা কখন খুলিয়া গিয়া
পিঠময় চুল ছড়াইয়া পড়িয়াছে। হাত তুলিয়া হাওয়াকে শাসন করিবার
যো নাই।

একটা মোটরকে পাশ কাটাইয়া মানব কহিল,—একটা দুর্ঘটনা
ঘটলে কেমন হয়?

মিলি বলিল,—চমৎকার। আমার আর ভয় নেই।

—ভয় নেই?

প্রথম প্রেম

—না। চাই-ই এমন দ্রুত ছোট্ট আর দ্রুত পদস্বলন। তার জন্তে আমি তৈরি হ'য়ে আছি। মিলি খিলখিল করিয়া হাসিয়া উঠিল।

বালিগঞ্জ এভিনিউ হইয়া গড়িয়াহাট রোডে দু'-তিন চক্র দিতেই সন্ধ্যা হইয়া গেল। রাস্তার পাশে গাড়ি রাখিয়া দুইজনে ঘাসের উপর বসিল। পথে লোকজন বেশি চলাফিরা করিতেছে না।

মানব বলিতে লাগিল: দু'দিন বাবার প্রতীক্ষায় সেই স্টেশন-মাষ্টারের কোয়ার্টারে থেকে গেলাম, কিন্তু একবার যখন সরেছেন তখন আর যে তিনি ফিরবেন না—মা'র এই সন্দেহ কিছুতেই দূর হচ্ছিল না। অত্যাঁয় যদিও বা তিনি করেন ত' অনুতাপ করতে শেখেন নি। নিশ্চিত মুক্তির কাছে স্ত্রী-পুত্র তাঁর কাছে একান্তই তুচ্ছ মনে হয়েছিলো। বাবাকে আমি দোষ দিতে পারি না, মিলি।

মিলি বিস্মিত হইল: এই নিষ্ঠুরতাকে আপনি সমর্থন করেন?

বুক ভরিয়া নিশ্বাস নিয়া মানব কহিল,—করি। জীবনের বিরুদ্ধে যুদ্ধ করতে দাঁড়িয়ে নিষ্ঠুর না হ'লে চলে কী করে? আমি আর মা তাঁর উচ্ছ্বলতার বাধা ছিলাম—আত্মবিকাশের বাধা। কারু-কারু আত্মবিকাশ অধঃপতনের মধ্য দিয়েই ঘটে—তাকে বাধা দিয়ে থর্ক করে' রাখলে তার জীবনের প্রবলতম সম্ভাবনাকেই নষ্ট করে' দেওয়া হয়। বাবা যে মিথ্যা মোহে পড়ে' নিজের চরিত্রকে কর্তব্য বা দায়িত্বের বাঁধনে বেঁধে পঙ্গু করে' ফেলেন নি, সে-জন্তে আমি তাঁকে প্রণাম করি। সবাই আমার বাবাকে ভিলেইন্ বলে' নাক কুঁচকায়, কিন্তু তাঁর উত্তরাধিকারী হ'য়ে আমি তাঁকে ধন্যবাদ না দিয়ে পারি না।

মিলি কহিল,—এ আপনার পক্ষপাতিত্ব ছাড়া আর কিছু নয়।

—বরং তাঁর ছেলে বলে'ই ত' আমার তাঁকে ক্ষমা করা উচিত ছিলো

প্রথম প্রেম

না। তাঁর জন্মেই যে মা পরমতম দুঃখের পথে হারিয়ে গেছেন, সে আমি ছাড়া আর কে বেশি অনুভব করে বলা? ভাগ্য না ভোজবাজি খেললে বাবার অপরাধে আমি সমাজের কোন্ আন্তাকুঁড়ে গিয়ে পড়তাম তা কল্পনা করলেও তুমি শিউরে উঠবে। তবুও এতো সবের কোথাও নিশ্চয়ই প্রয়োজন ছিলো। বাবার চরিত্রের এই মহত্ব আমাকে খুব একটা নাড়া দেয়, মিলি।

—কিছু মনে করবেন না, কিন্তু নিশ্চিত মৃত্যুর সামনে অসহায় স্ত্রী-পুত্রকে ঠেলে দিয়ে পালানোকে মহত্ব বলতে মন সরে না।

মানব জোর দিয়া কহিল,—তোমাদের মনে যে মর্চে পড়ে' আছে। ধর্মের জন্মে স্ত্রী-পুত্রকে কেউ তুচ্ছ করলে তোমরা দু' হাত তুলে স্বস্তিবাচন করবে, কিন্তু জেনো ধর্মও আত্মবিকাশই।

মিলি হাসিয়া কহিল,—আপনার এ-সব মতগুলিকে আমার ভয় করে।

—যাই বলা, পৃথিবীতে দারিদ্র্যই একমাত্র দুঃখ নয়—সে-দুঃখ উত্তীর্ণ হ'য়ে একদিন বাবার এই দৃষ্টান্তকে আমি সম্মান করতে পারবো এ-আশা তিনি করেছিলেন নিশ্চয়। আমার রক্তে এমনি একটি বন্ধনমোচনের সুর আছে। তোমার আমাকে ভয় করে, মিলি?

মানবের হাতের মধ্যে নিঃশঙ্ক স্নেহে হাত দুইখানি সমর্পণ করিয়া মিলি কহিল,—আপনার মা'র কথা বলুন। সেদিন বলতে-বলতে থেমে গেলেন—

—শেষটা আমি জানি না। গোড়ার পরিচ্ছেদগুলি অতিমাত্রায় দীর্ঘ ও করুণ। তা শুনলে বাঙালি মেয়ের চোখে জল এসে পড়বে। পরের দুঃখে অকারণ অশ্রুবর্ষণ করে' লাভ নেই। সেই সব দুঃখের রাত

প্রথম প্রেম

কাটিয়ে যেদিন আমার মা'র প্রথম সূত্রভাত হ'ল সেদিন আমরা এ-বাড়িতে আশ্রয় পেয়েছি মাত্র । সেদিন এ-বাড়িতে তোমার মাসিমা'র বিয়ে হচ্ছে ।

একটু শীত-শীত করিতেছিল বলিয়া আঁচলটা পিঠের উপর দিয়া পুরু করিয়া টানিয়া লইয়া মিলি কহিল,—ঠিক সেই দিনই ?

—হ্যাঁ, বড়লোকের বাড়িতে উৎসব দেখে মা'র হাত ধরে' ঢুকে পড়লাম । তিনদিন তখন খেতে পাইনি কিছু, নেমস্তন্ন-বাড়িতে ঠাই হ'য়ে গেল । কিন্তু সেই থেকে যে কী করে' এ-বাড়িতে শিকড় গেড়ে বসলাম ভাবতে আমি একেবারে শুরু হ'য়ে যাই, মিলি । মা'র দৈন্তের মালিগা তাঁর চেহারার সে স্বাভাবিক আভিজাত্যটুকুকে নষ্ট করতে পারে নি । তোমার মেসোমশাই সতীশবাবু তা বুঝতে পেরেছিলেন ।

একটু থামিয়া : সতীশবাবু মাকে আশ্রয় দিলেন । মা নিচের ঘরেই পড়ে' রইলেন বটে, আমি এক-এক ধাপ ডিঙিয়ে ক্রমশ ওপরে উঠতে লাগলাম । জানোই ত' তোমার মাসিমা তৃতীয় পক্ষ । প্রথম স্ত্রী শুনেছি নাকি সম্মানবতী হ'তে পারে নি বলে' শাশুড়ির বাক্য-যন্ত্রণা সহিতে না পেরে গলায় দড়ি বেঁধে ঝুলে' পড়েছিলো—দ্বিতীয়টি নাকি এখনো পিত্রালয়ে বর্তমান আছেন । তা, তোমার মাসিমারো ত' এই দশ বৎসর পুরতে চল্লো । কিন্তু আমাকে পেয়েই তোমার মেসোমশাই নিবৃত্ত হ'লেন—কিন্তু কেন যে তিনি আমাকে ছেলের চেয়েও বেশি স্নেহ করতে শুরু করলেন সেইটেই আমার কাছে রহস্য থেকে গেল । পোষ্য নেবার প্রয়োজন বোধ করলেন না—তাঁর পিতৃহৃদয় আমার জন্যে উন্মুক্ত করে' দিলেন একেবারে ।

প্রথম প্রেম

মিলি ব্যস্ত হইয়া কহিল,—মাসিমাও আপনাকে কি তেমনি করে' নিতে পেরেছেন ?

—তাঁর স্বামী যেখানে সদাব্রত, সেখানে তাঁর ক্লপণতাকে আমি কেয়ার করি না। কিন্তু ছেলে হ'বার সময় তাঁর এতোদিনে পেরিয়ে গেছে মনে করে' তিনিও ইদানি আমার প্রতি সদয় হ'য়ে উঠছেন। কিন্তু আমি কোথাকার কে বলো ত'—কী অসাধ্যসাধন না করছি! এতো সব দেখে তোমার সত্যিই কি সন্দেহ হয় না মিলি, যে সত্যিই আমি জীবনে সুখ পেতে আসিনি ?

—কিন্তু আপনার মা'র কী হ'ল ?

দীর্ঘনিশ্বাস দমন করিয়া মানব কহিল,—আমাকে এ-বাড়ির দোতলায় পৌঁছে দিয়েই তিনি অন্তর্দ্বান করলেন। কোথায় তিনি গেলেন—কেউ কিছু বলতে পারলো না।

মিলি মানবের হাতের উপর হাত বুলাইতে-বুলাইতে কহিল,—হয় ত' তিনি স্বামীরই খোঁজে বেরিয়ে পড়েছেন।

—বাবার প্রতি মা'র সেই মিথ্যা অনুরাগ ছিলো না, মিলি। সংসারে এমন কোন্ অত্যাচার তাঁকে সহিতে হ'ল যে আমাকে পর্যন্ত তিনি হারিয়ে যেতে দিলেন ? আমার জীবনে অন্তত লুকিয়ে উকি দিতেও তিনি এলেন না—

মিলির দুইটি সাস্বনাসিক্ত চোখের দিকে চাহিয়া, তাহাকে দেহের কাছে একটু আকর্ষণ করিয়া : শুধু তোমার এ দু'টি চক্ষু ছাড়া !

ইহার পর আরো একদিন আছে। প্রায় এক বৎসর পরে।

দিন নয়—রাত্রি। খাওয়া-দাওয়া কখন চুকিয়াছে—যে-যার ঘরে ঘুমাইবার কথা।

মিলি তাহার ঘরে টেবিলের কাছে বসিয়া কি-একটা বই পড়িতে চেষ্টা করিতেছে, হঠাৎ চোখ ফিরাইয়া দেখিল পর্দা ঠেলিয়া মানব ঘরে ঢুকিল, একটু হাসিল—কোনো কথা না কহিয়া সেল্ফ হইতে একটা ছবির পত্রিকা লইয়া একেবারে বিছানার উপর গড়াইয়া পড়িল।

কাংজের পৃষ্ঠা উল্টাইতে-উল্টাইতে : তুমি পড়ায় এত মনোযোগী হ'য়ে উঠলে কবে থেকে ?

মিলি ঘাড় না ফিরাইয়াই কহিল,—খেয়ে-দেয়ে তক্ষুনি শুতে নেই।

—কিন্তু বিছানায় আসতে কিছু দোষ আছে ?

—তুমিই বরং চেয়ারটা টেনে পাশে এসে বোস না।

—তার পর ?

—খুব খানিকটা আড্ডা দেওয়া যাবে। পশু' ছুটি—তুমি যাচ্ছ ত' আমার সঙ্গে ?

—কোথায় ?

—বা, সেই কবে থেকেই ত' নাচ্ছ যে পূজোর ছুটি হ'লে আমাকে সঙ্গে করে' আমাদের দেশের বাড়িতে যাবে।

—আরো অনেক দেশ আছে, মিলি। তাদের এক-আধটার নাম শুনলে দস্তুরমতো তুমি লাফাতে শুরু করবে।

মিলি চেয়ারটা ঘুরাইয়া বসিল : যথা ?

—যথা, ধরো নিউইয়র্ক। ঐ পুঁচকে পদ্মা নয়, বিরাট আটলান্টিক।

প্রথম প্রেম

মিলি নিচের ঠোঁটটা সামান্য উল্টাইয়া ফুঃ করিল।

বালিশ দুইটাতে বুকের ভর রাখিয়া মানব কহিল,—তুমি বিশ্বাস করছ না বুঝি? সত্যি বলছি চলো না, ভেসে পড়ি। নিউইয়র্ক পছন্দ না হয়, ভেনিসে গিয়ে না-হয় বাসা বাঁধবো। বাসা বাঁধতে হ'লে অবশিষ্ট ইটালিতেই—

মিলি পায়ের উপর পা তুলিয়া দিয়া কহিল,—সেখানে আমাকে সঙ্গে করে' নিয়ে গিয়ে শেষকালে য্যাড্রিয়াটিকে ভাসিয়ে দাও আর কি। তখন বুঝি আর আমার মুখের দিকে তাকাবে ভেবেছ! আমি ত' তখন তোমার কাছে নেহাৎই বাঙলা-দেশের নরম তুলসী-পাতা। তার চেয়ে কায়ক্লেশে এখানেই থেকে যাও না-হয়।

উত্তেজনায় মানব বালিশ ছাড়িয়া দুই কনুইয়ের উপর ভর রাখিয়া একটু সোজা হইল: না, না, সুযোগ পেলে ছাড়তে নেই। আমি তোমার মেসোমশায়কে সেদিন বলেছিলাম, তিনি টাকা দিতে প্রস্তুত। তোমার প্যাসেজ্ আমি নিজেই জোগাড় করে' নিতে পারবো। কিসের তোমার এই বোঁটানি, কিসের বা ইলিসিট্ মাইনর্। চলো, মোটা-মোটা স্যুটকেস্ সাজিয়ে দু'জনে পড়ি বেরিয়ে। বাধা যদি বা কিছু থাকে, থাক্। কোথাও কিছু একটা বাধা না থাকলে ভালো লাগে না।

মিলি চেয়ার ছাড়িয়া ধীরে-ধীরে বিছানার একটি ধারে আসিয়া বসিল। স্নিগ্ধস্বরে কহিল,—কেমন-যেন খুব সহজ লাগে। সহজ লাগলেই নিজেকে কেমন যেন দুর্বল মনে হয়। বলিতে-বলিতে পা দুইটি গুঁটাইয়া মিলি সেতার বাজাইবার ভঙ্গিতে বসিল।

মানব কহিল,—অস্তুরের বাধা কবে সে পার হ'য়ে এলাম। আজ

প্রথম প্রেম

ছ-মাসের ওপরে তোমার মাসিমা তাঁর বাপের বাড়িতে আছেন—কেন আছেন বলতে পারো ?

—কি করে' বলবো ?

—তাই অন্তঃপুরেরো সমস্ত বাধা শিথিল ছিলো। তোমার মেসোমশাই সারা দিন-রাত্রি সাধু-সন্ন্যাসী নিয়েই মশ্গুন্—আমরা কে কোথায় কি করছি চোখ ফেরাবারো তাঁর সময় নেই।

মিলি একটা বালিশ লইয়া তাহাতে সামান্য একটু কাং হইল— বাঁ-হাতের তালুর উপর এলো খোঁপাটা আলগোছে নোয়ানো : কিন্তু ছেলেবেলায় শুনেছিলাম যে তিনি দারুণ ডাকসাইট অত্যাচারী ছিলেন। প্রথম স্ত্রী ত' আত্মহত্যা করতেই বাধ্য হ'ল, দ্বিতীয় স্ত্রীকে নাকি লাথি মেরে বাড়ির বা'র করে' দিয়েছিলেন। তবু তাঁর সম্মান চাই—তাই আবার তাঁর সহধর্মিণীর প্রয়োজন ঘটলো। আজকাল নেহাৎ ধর্ম্মে-কর্ম্মে মন দিয়েছেন বলে'ই এখানে আসতে দিতে কাকীরা আর আপত্তি করলে না। নইলে ত' বোর্ডিংএই চলে' যেতাম।

এইবার মানব মিলির ডান-হাত ধরিল : বাও না।

মিলি হাসিয়া কহিল,—তুমি বোর্ডিংএর দারোয়ান থাকবে বলো, ঠিক যাবো।

—কিন্তু রাত্রে তোমার বিছানায় ঠিক শুতে দেবে ?

মিলি মানবের হাতের কব্জিতে জোরে এক চিম্টি কাটিয়া বসিল।

মানব কহিল,—তুমি মেয়ে হয়েছ বলে'ই যে তোমার গায়ে হাত তোলা যাবে না এটা নারীর সমানাধিকারের দিনে মেনে চললে তোমাদের অসম্মান করা হ'বে ; অতএব—

নিটোল বাহু দুইটির কি সুন্দর ডোল,—মানব দুই হাত দিয়া

প্রথম প্রেম

মিলির দুই বাছ মুঠি করিয়া ধরিয়া একেবারে তাহাকে কাছে লইয়া আসিল।

মিলি তাড়াতাড়ি দুইটা আঙুল দিয়া মানবের ঠোঁট চাপিয়া ধরিল, দরজার পর্দার দিকে সভয়ে দৃষ্টি ফেলিয়া চাপা গলায় কহিল,—চুপ্! দেখছে।

মানব ভয় পাইয়া আকর্ষণ শিথিল করিয়া প্রশ্ন করিল,—কে?

মিলি তক্ষুনি ছাড়া পাইয়া এলো খোঁপাটা আঁট করিয়া বাঁধিতে-বাঁধিতে ইলেকট্রিক বাল্বটার দিকে চাহিয়া হাসিয়া কহিল,—আলো।

মানব তৎক্ষণাৎ টুপ্ করিয়া সুইচটা অফ করিয়া দিল।

তীর অতিক্রম করিয়া সমুদ্রের যেমন ঢেউ আসে, তেমনি করিয়া অন্ধকারে ঘর ভরিয়া উঠিল। সেই অন্ধকার ক্রমশ একটু তরল হইতেই মানবের মনে হইল এই বিছানাটা যেন হৃদ, আর মিলি যেন একটা রাজহংস।

দেহের প্রতিটি রেখা স্বচ্ছ, প্রতিটি ভঙ্গি সুস্বপ্ন, প্রতিটি লীলা লঘু।

অনেকক্ষণ কেহ কোনো কথা কহিল না। শুধু, রাত্রি যে গভীর, নীরবতা যে নিদ্রাচ্ছন্ন এবং অন্ধকারে সমস্ত অন্তরাল যে অপমৃত—দুইজনে নিশ্বাস নিতে-নিতে তাই কেবল অনুভব করিতে লাগিল।

মানব মিলির কোলের উপর মাথা রাখিয়া আশ্তে কহিল,—চলো, নতুন বাড়িতেই যাই।

মানবের কপালে ডান-হাতখানি পাতিয়া মিলি কহিল,—চলো। বাবা তোমাকে দেখে নিশ্চয়ই খুব সুখী হ'বেন।

—কিন্তু প্রস্তাব শুনে হ'বেন কি?

প্রথম প্রেম

কপাল হইতে হাত গালের উপর নামিয়া আসিয়াছে : আপত্তি করবার কোনোই ত' কারণ দেখছি না ।

—আপত্তি একটু করলে ভালো হ'ত, মিলি ।

হাত পাঞ্জাবির তলা দিয়া বুকের কাছে লুকাইয়াছে : আপত্তি করলে কে আর শুনছে বলো । আমাদের ভেনিস্ ত' পড়ে'ই আছে ।

দুই হাত দিয়া মিলির কটি বেষ্টন করিয়া জাহুর উপর মুখ রাখিয়া মানব তৃষার্ত্ত কণ্ঠে কহিল,—হ্যাঁ, বাধা কোথাও পেলে লাভ করবার মধ্যে বেশ একটা উন্মাদনা পাই । আচ্ছা, এক-হিসেবে তুমি ত' আমার মাসতুতো বোন—তোমার বাবা বা কাকারা কেউ আপত্তি করবেন না ?

মানবের ঘাড়ের কাছের চুলগুলিতে আঙুল বুলাইতে-বুলাইতে মিলি কহিল,—বাইরের ঐ-সব কৃত্রিম বাধাকেই তুমি বড়ো করে' দেখ নাকি ? আমরা যদি এমনিভাবে ঘনিষ্ঠ হ'য়েই উঠি কোনোদিন, তবে সে-ই ত' আমাদের বড়ো পরিচয় ।

—সেই আমাদের বড়ো পরিচয়, না মিলু ?

মানব মিলির রাশীভূত কাপড়ের মধ্যে মুখ গুঁজিয়া তাহার সর্বাঙ্গের স্রাণ নিতে লাগিল ।

কতক্ষণ কেহই কোনো কথা কহিল না ।

মুখ না তুলিয়াই মানব কহিল,—তবু কোনো বাধার বিরুদ্ধে সংগ্রাম না করে' কাউকে পাবার মধ্যে পরিপূর্ণ তৃপ্তি নেই, মিলি । প্রেয়সীর জন্মে যদি জীবন ভরে' আঘাতের স্বাদ না পাই, তবে সে যে মৃত্যুর চেয়েও প্রিয়তরা এ-কথা বুঝি কি করে' ?

মিলি এই স্পর্শবন্তোচ্ছ্বাস হইতে হঠাৎ নিজেকে নির্লিপ্ত করিয়া

প্রথম প্রেম

লইল। অভিমানে করুণ করিয়া বলিল,—ধরো, আমার অনিচ্ছাই যদি সেই বাধা হয় ?

মানব অবাক হইয়া শূন্যদৃষ্টিতে খানিকক্ষণ অন্ধকারের দিকে চাহিয়া রহিল। তাহার এই স্পর্শবিরহিত অস্তিত্ব যেন সে সহিতে পারিবে না। তাড়াতাড়ি বিছানার উপর উঠিয়া বসিয়া সে অসহায়ের মত প্রশ্ন করিল,—তোমার অনিচ্ছা মানে ?

মিলি তখন বিছানার অগ্ৰ প্রান্তে সরিয়া গিয়াছে : ধরো একদিন যদি আমি বুঝি যে এ শুধু উদ্বেগ, ভালোবাসা নয়—এতে খালি দাহ আছে, সুখা নেই—অর্থাৎ আমার ইচ্ছা বা বাসনা যাই বলো, যদি একদিন মিলিয়ে যায় আর সমস্ত প্রতীক্ষার উপরে ধীরে-ধীরে উপেক্ষা নেমে আসে—

—সেই তোমার বাধা, মিলি ? সেই বাধাকে আমি জয় করতে পারবো না ভাবছ ?

বলিয়া মানব দুই হাত বাড়াইয়া মিলিকে বুকের মধ্যে গ্রাস করিয়া ফেলিল। ডাকিল,—মিলি !

মিলি মানবের বুকের মধ্যে এতটুকু হইয়া গেছে। অর্ধক্ষুণ্ট কণ্ঠে উত্তর করিল,—বলো।

—যে-দেহে দাহ নেই সে-দেহে স্বাদও নেই।

মিলিকে ঘনতর স্পর্শে আরো সন্নিহিত করিয়া মানব কহিল,—আমাদের প্রেমে সেই ভঙ্গুর ভাব-প্রবণতা নেই, মিলি। আমরা পরস্পরের কাছে প্রথররূপে প্রকাশিত।

মানবের দুই অধর মিলির চক্ষুর কাছে অবতীর্ণ হইয়াছে।

মিলি কথা না কহিয়া মানবের কাঁধের মধ্যে মুখ গুঁজিয়া দিল।

প্রথম প্রেম

মানব হাত বাড়াইয়া সুইচটা টানিয়া দিয়া কহিল,—এমন দৃশ্য চোখ ভরে' না দেখে আর পারছি না।

কিন্তু আলো জ্বালিতেই চোখের পলকে কী যে হইয়া গেল মানব বুঝিতে পারিল না। মিলি হঠাৎ দুই হাতে সবলে সমস্ত স্পর্শের চেউ ঠেলিয়া দিয়া উঠিয়া পড়িল। একেবারে টেবিলের ধারে চেয়ারে গিয়া বসিল। তাহার মুখ দেখা যাইতেছে না। হাত তুলিয়া চুল ঠিক করিয়া কাপড়ের আঁচলটা পিঠের উপর দিয়া প্রসারিত করিয়া দুই কাঁধ ও বাহু ঢাকিয়া হঠাৎ সে বই নিয়া মনোযোগী হইয়া উঠিল।

উগ্র আলোক মানবের চোখেও সহিতেছে না।

কিন্তু পলাতক মুহূর্ত্ত কি আর ফিরিয়া আসে ?

তবুও মানব আরেকবার আলোটা নিভাইয়া দিল।

মিলির স্বরে স্পষ্ট বিরক্তি : বা, আমাকে পড়তে দাও।

—কাল পড়ো।

—না।

—বেশ, কালকেও পড়ো না। কালকে রাতে তা হ'লে—

—সত্যি বলছি আমাকে পড়তে দাও। তোমার না-হয় চাকরি না করলে চলবে, কিন্তু আমার একটা ইস্কুল-মাষ্টারি ত' অন্তত চাই।

মানব হাসিয়া উঠিল : তোমাকে আমি অনায়াসে অল্প চাকরি দিতে পারবো। এখন একবারটি উঠে এস দিকি।

—না, তুমি আলো জ্বালো।

—জান্বে, তুমি আমার দিকে মুখ করে' বসবে বলো ?

মিলি এইবার মামুলি ব্রহ্মাস্ত্র হানিল : দরজা খোলা আছে জানো ? ঘর অন্ধকার করে' বসে' আছি, যদি কেউ দেখে ফেলে ?

প্রথম প্রেম

—যদি কেউ দেখে ফেলে, সেই জন্তে ত' তাকে ভালো করে'ই দেখতে দেওয়া উচিত। অন্ধকার ঘরে এই কৃত্রিম দূরত্ব রেখে আমাদের নিজস্ব মতো বসে' থাকাই ত' অস্বাভাবিক। অথচ দরজা বন্ধ করলেই আমরা পরস্পরের কাছে অত্যন্ত কুণ্ঠিত হ'য়ে পড়বো। তার চেয়ে চলো না একটু বেড়িয়ে আসি।

মিলির স্বরে সেই ঔদাসীন্য : না, আমার এখন মুড় নেই।

মানব এইবার বিছানা ছাড়িয়া দাঁড়াইল ; কহিল,—আলো জ্বালতেই বুঝি টের পেলে যে দরজা খোলা আছে। আর দরজা খোলা পেয়ে রাশি-রাশি লজ্জা আর ভীকৃত্য বুঝি তোমাকে গ্রাস করলো। বুঝতে পারছি তোমার এই লজ্জাই হচ্ছে আমার প্রেমের বাধা। তাকে কি আমি জয় করতে পারবো না ?

বলিয়া মানব নুইয়া পড়িয়া মিলির গালের উপর নিশ্বাস ফেলিল।

একটি মুহূর্ত বিস্তীর্ণ সমুদ্রের মত মিলির সমস্ত চেতনা আচ্ছন্ন করিয়া দিয়াছে। প্রতীক্ষার তীক্ষ্ণ অনুভূতিতে স্নায়ু-শিরাগুলি অভিভূত, ক্রান্ত হইয়া আসিল।

কিন্তু মানব কহিল,—আজ থাক।

বলিয়া ফের সুইচটা টানিয়া দিয়া ঘর আলো করিয়া সে কহিল,—
তুমি বরং পড়ো।

তারপর বাহির হইয়া গেল।

রাস্তায় একটা মোটর-বাইকের ঝকঝকানি শুরু হইয়াছে। মিলি তবুও জানলা দিয়া মুখ বাড়াইয়া একটিবার দেখিল না। ঘড়িতে একবার নজর পড়িল। এখন না-পড়িয়া শুইতে পারিলে সে বাঁচে। বিছানাটার দুর্দশা দেখিয়া তাহার শুইতেও ইচ্ছা হইল না।

প্রথম প্রেম

বারান্দায় বাহির হইয়া আসিল। পরে ফের ঘরে গেল। আলো নিভাইল। এবং চেয়ারে বসিয়া টেবিলের উপর হাতের মধ্যে মাথা গুঁজিয়া পড়িয়া রহিল। ঘুমের জগ্ন নয়, কখন আবার মানব ফিরিয়া আসে!

অনেকক্ষণ পরে।

সিঁড়িতে ও-কাহার জুতার শব্দ মিলিকে বলিয়া দিতে হইবে না। মিলি চট্ করিয়া আলো জালিয়া আবার তেমনি মাথা হেঁট করিয়া বসিল। ঘরে আলো দেখিয়া যদি সে একবার আসিয়া প্রশ্ন করে— এখনো পড়া শেষ হয় নাই? কিম্বা অসাবধানে ঘুমাইয়া পড়িয়াছে বলিয়া যদি একবার ছোঁয়!

মিলি একমনে ঘড়ির কাঁটার শব্দ অনুধাবন করিতে লাগিল।

কিন্তু মানব হয় ত' জানিত আজ রাত্রে মিলির ঘুম না আসিবারই কথা।

অনেক দিন সূধীরের দেখা নাই, তাই মানব তাহার খোঁজ নিতে বাহির হইয়াছে ।

ক্রিক্‌ রো পার হইতেই টিপি-টিপি বৃষ্টি শুরু হইল এবং শাঁখারিটোলা লেইনে ঢুকিতে-না-ঢুকিতেই মুষলধারে । এই গলিরই গা হইতে অপরিমিত সঙ্কীর্ণ একফালি রাস্তা বাহির হইয়া গিয়াছে—তাহারই শেষ প্রান্তে সূধীরদের বাড়ী—টিনের চাল ও মাটির দেয়াল ।

মানব সজোরে দরজায় আঘাত করিতে লাগিল ।

ভিতর হইতে নারীকণ্ঠের সাড়া আসিল : আরেক ধাক্কা দিলেই কষ্ট করে' দরজা আর আমাকে খুলতে হ'বে না । বৃষ্টিতে কে-ই বা তোমাকে বেরুতে বলেছিলো শুনি ?

দরজা খুলিতেই মানব অপ্রস্তুত হইবার ভাণ করিয়া কহিল,—এই যে আশা । সূধীর বুঝি বাড়ি নেই ?

আশা সঙ্কুচিত হইয়া কহিল,—না । আসুন ।

ভিতরে একখানা মাত্র ঘর—এককোণে একটা তক্তপোষ পাতা । তক্তপোষের উপরেই কেরোসিন কাঁঠের একটা সেল্‌ফ্‌, তাহাতে বই, চায়ের বাসন ও দাবার কতগুলি ঘুঁটি ছত্রখান হইয়া আছে । ছেঁড়া ময়লা বিছানাটা একপাশে তুলিয়া রাখাতেই তাহার দীনতা আরো বাস্তব হইয়া উঠিয়াছে । নিচে মাদুর বিছাইয়া সূধীরের বৃদ্ধা মা একটা কাঁসার বাটিতে করিয়া মুড়ির সঙ্গে মুলো কামড়াইয়া খাইতেছেন—আর আশা হয় ত' ঐ কাঁথাটাই সেলাই করিতেছিল ।

সেই অর্ধ-অন্ধকারাচ্ছন্ন ঘরে মানব একটা রুঢ় অট্টহাস্যের মত আবিভূত হইল । চোখ মেলিয়া ঘরের এই নিদারুণ কদর্যতা দেখিয়া

প্রথম প্রেম

আশা কথা না कहিয়া পারিল না : এই বৃষ্টিতে বেরুলে আপনার দামি চাদরখানা একেবারে কাঁথা হ'য়ে যাবে ।

মানব উদাসীনের মত कहিল,—একখানা চাদর নষ্ট হ'লে বিশেষ কিছু ক্ষতি হ'বে না ।

আশা সামান্য একটু হাসিয়া कहিল,—কিন্তু চলে' গেলে মা'র বোধকরি একটু অসুবিধে হ'বে ।

—সেই জন্তেই ত' খবরটা জেনে যেতে চাইছি ।

মা মেয়েকে ধমক দিয়া উঠিলেন : তুই যা দিকি, বাসনগুলো মেজে ফেল এবার ।

আশা যাইবার জন্ত পা বাড়াইয়াছে : উলের আসনখানা বের করে' দিয়ে যাই । ঐ শুকনো কাঠে বসতে গুঁর অসুবিধে হচ্ছে ।

অগত্যা মানবকে আবার শুকনো কাঠেই বসিতে হইল ।

সামনের নিচু দাওয়ায় আশা এক-পাঁজা এঁটো বাসন লইয়া বসিয়া বাঁ হাতে কাক তাড়াইতে লাগিল । মাথার উপর একটা তিজা গামছা চাপাইয়া সে অনর্থক বৃষ্টির আক্রমণ হইতে আত্মরক্ষা করিতে চায়—দেখিতে-দেখিতে সর্বাঙ্গ সিক্ত হইয়া উঠিল—খোলা জানুলা দিয়া হঠাৎ একটু নজর পড়িতেই মানবের কেমন-বেন মনে হইল এই অযাচিত বর্ষার শ্যামশ্রীর সঙ্গে আশার এই কমনীয়তাটুকু না মিশিলে কোথায় বোধহয় অসঙ্গতি থাকিত ।

মা কথাটা কিছুতেই পাড়িতে পারেন না ।

মা'র কথার লক্ষ্য কি মানব তাহা জানিত । তাই সে উস্কাইয়া দিল : সুধীরের সেই টিউশানিটা বুঝি গেছে ? আমার কাছে কিছু টাকা চেয়েছিলো—কতো তার চাই ?

প্রথম প্রেম

মা'র রুদ্ধস্বর এইবারে অনর্গল হইয়া উঠিল : চাকরিটা গেছে ত' সেই কবে । তারপর একটা কুটোও জোগাড় করতে পারে নি । কিন্তু তা ত' নয় । তার চেয়েও বড়ো বিপদে পড়েছি, বাবা ।

মানব প্রস্তুত । ঘরের বাইরে বাসন-মাজার আওয়াজও যেন ক্ষীণতর হইয়া আসিল ।

মানবের মুখে সহানুভূতির আভাস পাইয়া মা বলিয়া চলিলেন,— মেয়েও আমার গলায় পা দিয়ে দাঁড়িয়েছে । আগুনের মতো হু-হু করে' বয়েস বেড়ে গেল—মাথার উপরে কেউ নেই যে একটা পাত্র জুটিয়ে দেয় । তা সুধীরই আজ দু'মাস ধরে' হাঁটাহাঁটি করে' একটি সম্বন্ধ জোগাড় করেছে । বামন হ'য়ে চাঁদে হাত দেবার দুঃসাহস ত' আর আমাদের মানাবে না, বাবা—'অদেষ্ঠ যেমন করে' এসেছি তেমনি ত হ'বে ।

মানবের সামান্য একটু কৌতূহল হইল : ছেলেটি কি করে ?

—শ্যামপুকুরে নাকি মনিহারি দোকান আছে । দোকান শুনছি : ভালোই চলছে । তবে ছেলেটির বয়েস কিছু বেশি—প্রথম স্ত্রী এই বৈশাখে মারা গেছে । ছেলেপুলে হয় নি—এমন মন্দ কি বলো ?

মানব মুক্তকণ্ঠে সায় দিল : না, মন্দ কি ! তা, ছেলের পছন্দ হয়েছে ত' ?

কথাটা আশাকে শুনাইয়া বলে মানবের ইচ্ছা ছিল না ; তবু হঠাৎ বাসন-মাজার শব্দ একেবারে বন্ধ হইয়া গেল দেখিয়া সে ঠিক স্বস্তি বোধ করিল না ।

—হ্যাঁ বাবা, ছেলে নিজে এসেই দেখে গেছে । যতোকণ সে দেখছিলো ততোকণ দম বন্ধ করে' ইষ্টমন্ত্র জপ করেছি—এই যাত্রায় মেয়ে যেন আমার পাশ্ করে । আর-আর যে-কয়জন এর আগে মেয়ে দেখতে

প্রথম প্রেম

এসেছিলো, তারা কেউ ঘর-দোরের হাল-চাল দেখে কেউ বা মেয়ের রঙ ময়লা দেখে নাক সিঁটকে চলে' গেছে! কিন্তু নেহাৎ কপালজোরেই বলতে হ'বে যে মেয়েকে আমার তার চোখে ধরলো। পাত্র এর চেয়ে ভালো আর কী আশা করতে পারি?

মানব রুমাল দিয়া গলা ও গাল রগুড়াইতে-রগুড়াইতে কহিল,—
না, দিবি পাত্র। দোকান-পাট আছে, স্ত্রীকে ভরণপোষণ করবার জন্তে কারু কাছে হাত পাততে হ'বে না—পায়ের-দাঁড়ানো ছেলে, কলেজের ছোকরাদের চেয়ে ঢের ভালো। আর দেরি নয়, লাগিয়ে দিন্তা হ'লে। এই দুর্দিনে কোথায় কে ফ্যা-ফ্যা করত, তার চেয়ে করে'-কস্মে' স্বচ্ছন্দে সংসার চালিয়ে নিতে পারবে।

কথাটা আশাকে মর্ষমূল পর্য্যন্ত বি'ধিল।

বসা অবস্থাতেই মা প্রায় মানবের পারের কাছে আগাইয়া আসিলেন; স্বর নামাইয়া কহিলেন,—কিন্তু বিপদ জুটেছে অতদিক থেকে। ছেলে পাঁচশো টাকা পণ না পেলে কিছুতেই বিয়ে করবে না। সাধাসাধনা করতে সুধীর আর কিছু বাকি রাখে নি বাবা, কিন্তু বড়ো জোর সে পঞ্চাশ টাকা পর্য্যন্ত ছাড়তে পারে বলে' শেষ কথা দিয়েছে—

টোক গিলিয়া মা আরো কি বলিতে বাইতেছিলেন মানব নির্নিপ্তের মত কহিল,—তা পণ ত' সে চাইবেই।

কথাটা মানব সমাজতত্ত্বের একটা স্বতঃসিদ্ধ সূত্র ধরিয়াই বলিয়া ফেলিয়াছে, কিন্তু দরজার অন্তরালে দাঁড়াইয়া এই কথা শুনিয়া আশার মুখ-চোখ নিদারুণ অপমানে জ্বালা করিয়া উঠিল। সে ভাবিল মানব বুঝি তাহারই রূপহীনতার প্রতি কঠিন শ্লেষ করিয়া এমন নির্ধুর কথা উচ্চারণ করিয়াছে। কিন্তু সত্য কথা বলিতে কি, মানবের তাহাতে

প্রথম প্রেম

কিছু যায় আসে না। এই তাহার দৃঢ় বিশ্বাস যে যতদিন পর্য্যন্ত নরনারী স্বেচ্ছায় ও আত্মপ্রেরণায় না মিলিত হইবে ততদিন এই পণপ্রথাকে কিছুতেই দূর করা যাইবে না। একমাত্র প্রেমই পণ্য নয়।

মা'র পাংশুমুখের রুক্ষ রেখাগুলি একটু কোমল হইয়া আসিল। তিনি কহিলেন,—অতো টাকা কোথা থেকে দিই বলো? টাকার জন্মেই ত' দিন পিছিয়ে যাচ্ছে।

এতটুকু দ্বিধা নাই, না বা এতটুকু লজ্জা—মানব উচ্ছ্বসিত হইয়া কহিল,—সুধীর আমাকে এতোদিন একথা বলে নি কেন? কতো আগেই তা হ'লে আমি দিয়ে দিতে পারতাম। পাত্র হাতে এসে পড়লে কি আর ছেড়ে দিতে আছে? ওদের সময় দিতে গেলেই তখন আবার ওরা নানান রকম খুঁৎ ব'রি করে' বসবে। তা, কত টাকা আপনাদের এখন চাই?

আহ্লাদে মা'র সারা দেহ যেন কেমন করিয়া উঠিল; এই ঘর-দুয়ার বিছানা-বালিশ কিছুই যেন আর তাঁহার আয়ত্তের মধ্যে রহিল না। নিষ্পলক চোখে মানবের মুখের দিকে চাহিয়া থাকিয়া তিনি কহিলেন,—সব শুদ্ধু ছ'শো টাকা ত' লাগবেই, বাবা। তুমিই কি সব দিতে পারবে?

মানব চাপা ঠোঁটে সামান্য একটু হাসিয়া কহিল,—কেন পারবো না? ছ'শো ত' মাত্র টাকা। হাতে যখন আছেই তখন পরের একটা উপকারেই না-হয় ব্যয় করে' যাই। কী যায় আসে।

এ কী দয়া না উপেক্ষা, উপকার না ঔদ্ধত্য—বাহিরে দাঁড়াইয়া আশা থর-থর করিয়া কাঁপিতে লাগিল। দরজা দিয়া উঁকি মারিয়া দেখিল মা একেবারে মানবের পায়ের কাছ ঘেঁষিয়া বসিয়াছেন, আর

প্রথম প্রেম

তাহার সমস্ত শায়ু-শিরা কুণ্ডলী পাকাইয়া উঠিল—বাহিরে যে প্রচুরপ্রবাহে বৃষ্টি হইতেছে সে-কথাও তাহার মনে রহিল না। কিছু টাকা ফেলিয়া বাহির হইয়া পড়িলেই হয়। সঙ্গে চেক-বইটা সে লইয়া আসিয়াছে।

মানবকে দেখিয়া স্ত্রীীরের মা অভিভূতের মত মুলোটা দাঁত দিয়া কামড়াইয়াই রহিলেন ; কথা কহিল আশা :

—একেবারে ভিজ্জে গেছেন দেখছি, বসুন। একটা তোয়ালে এনে দি।

মানব দাঁড়াইয়াই রহিল : না, বসবো না। স্ত্রীীরের সঙ্গে একটা কথা ছিলো। কোথায় গেছে ?

আশা কহিল,—কাজ তাঁর চব্বিশঘণ্টা, অথচ একটা কাজ আজ পর্য্যন্ত তাঁকে পেতে দেখলুম না। আপনি দাঁড়িয়ে রইলেন কেন ? বসুন না। এই তক্তপোষে বসতে বুঝি আপনার ঘেন্না হচ্ছে ?

মা-ও এইবারে সায় দিলেন : বোস বাবা। গরিবের ঘরে তোমার যোগ্য অভ্যর্থনা কী করে' করবো বলো ? সেই তোর উলের আসনখানা বের করে' পেতে দে না, আশা। এই জলে কোথায় আবার বেরুবে ? (নিম্নস্বরে) তোমার সঙ্গে আমার একটু দরকার ছিলো।

নিতান্ত সঙ্কুচিত হইয়া তক্তপোষের একধারে মানব বসিল। একটা কুৎসিত আবহাওয়ার মাঝে পড়িয়া সে যেন নরকযন্ত্রণা সহ করিতেছে। এইবার আবার তাহাকে এক সবিস্তার দুঃখের কাহিনী গিলিতে হইবে। চলিয়া যাইতেই বা তাহার পা উঠিতেছে না কেন ?

কারণ খুঁজিতে গিয়া আশার দিকে চাহিতেই দেখিল সে হাতে করিয়া একখানা তোয়ালে নিয়া সামনে আসিয়া দাঁড়াইয়াছে।

—যদি বসলেন-ই, তবে ভিজ্জে মাথাটা মুছে ফেলুন।

প্রথম প্রেম

—না, দরকার নেই। বলিয়া মানব পকেট হইতে প্রকাণ্ড একটা গরদের রুমাল বাহির করিয়া প্রথমে কপাল ও পরে ঘাড়ের খানিকটা মুছিল। চুলে হাত ঠেকাইল না। রুমালটা বিস্তৃত করিতেই একটা সতেজ, প্রগল্ভ গন্ধ ঘরের কুণ্ডিত শুকতাকে আচ্ছন্ন করিয়া ধরিল।

আশা কহিল,—তোয়ালেটা কিন্তু ফর্সাই ছিলো। আজ সকালে কেচেছিলাম।

বিদ্রূপের খোঁচায় মানবের চোখ ফুটিল। আশাকে সে ইহার আগে আরো অনেকবার দেখিয়াছে—নিতান্ত মামুলি দু'য়েকটা আলাপও যে না হইয়াছে তাহা নয়, তবু এমন মুখোমুখি হইয়া কোনোদিন সে দেখে নাই। ময়লা সেমিজের উপর ততোধিক ময়লা একখানি শাড়ি পরিয়া আছে—সজ্জা-উপকরণ গাত্রবর্ণের সঙ্গে চমৎকার সামঞ্জস্য রাখিয়াছে বটে,—চুলগুলি রুম্ম, রিক্ত হাতে ও সক্রমণ ধৈর্যশীল মুখে অবিচল একটি কাঠিন্য। তাহাতে আকৃষ্ট হইবার মত কোন সঙ্কেতই মানব খুঁজিয়া পাইল না। যুবতী সে নিশ্চয়ই, কিন্তু যৌবন অর্থ ত' শুধু ষোলোটি বৎসরের ভারে আক্রান্ত হওয়া নয়; যৌবন অর্থ সেই লীলা বা ছটা, যা অঙ্গপ্রত্যঙ্গের উন্মিচ্ছদায় বিচ্ছুরিত হইয়া পড়ে—যৌবন অর্থ লাভণ্যের চঞ্চল নির্ঝরলেখা! না গতিচাপল্যে উজ্জীবিত, না লীলাবিভ্রমে কোতুকময়ী—সমস্ত অবয়ব ঘিরিয়া একটি গাঢ় সহিষ্ণুতা—মানব তাহাতে উন্মাদনা পাইবে কেন?

আশার উপস্থিতি সম্পূর্ণ উপেক্ষা করিয়া মানব স্তম্ভীরের মাকে প্রশ্ন করিল,—কী কথা ছিলো বলুন। আমার বেশি সময় নেই। বলিয়া মানব উঠিয়া দাঁড়াইল—মাটির দেয়াল হইতে কেমন একটা চাপা অস্বাস্থ্যকর দুর্গন্ধ তাহার নিশ্বাস চাপিয়া ধরিতেছে।

প্রথম প্রথম

মানব পকেট হইতে ব্যাঙ্কের চেক-বই বাহির করিয়া মোটা ফাউন্টেন-পেন্‌এ তাহাতে দস্তখৎ করিতেছে।

আশা ভিজা-গায়েই ঘরের মধ্যে ঢুকিয়া পড়িল। সৌজন্যলেশহীন রুক্ষস্বরে কহিল,—আপনার বৃষ্টি যে কখন থেমে গেছে তার বুঝি খেয়াল নেই? এই বিচ্ছিরি নোংরা ঘরে বসে' অনর্থক সময় নষ্ট করছেন কেন? একটা ট্যাক্সি ডাকিয়ে আন্বো?

সই-র একটা টান দিবার মুখে মানব থামিয়া পড়িল।

আশার এই মূর্তি দেখিয়া মা-ও ভড়কাইয়া গেলেন। চুল ঝুঁটি করিয়া বাঁধা, ভিজা গামছাটা কোমরে ভাঁট করিয়া বাঁধিয়াছে—চোখে যেন তাঁহার ধাঁধা লাগিয়া গেল, একবার মনে হইল সামান্য দোকানির দোকান আলো না করিয়া কোনো হাকিমের পার্শ্ববর্তিনী হইয়া একত্র মোটর হাঁকাইলে নিতান্ত বেমানান হইত না।

তবু মেয়েকে তাঁহার শাসন করিতে হইল। তিনি ব্যস্ত হইয়া কহিলেন,—তুই কেন তোর কাজ ফেলে এখানে কর্তৃত্ব করতে এলি? যা, কাপড়টা ছেড়ে আয় শিগ্গির করে'।

আশা তবু নড়িল না। কথায় প্যাচ দিয়া কহিল,—সময়ের দামও ত' ঔঁর কম নয়—

মানব হাসিয়া কহিল,—কিন্তু এই মিনিটটির দাম ছ'শো টাকা। তোমাকে পার করার মাশুল দিয়ে যাচ্ছি।

আশা সহসা জলিয়া উঠিল; কান দুইটা লাল করিয়া কহিল,—কি?

মা কহিলেন,—কী আবার? তোর এতে মাথা গলাবার কী হয়েছে? তুই যা না এখান থেকে।

প্রথম প্রেম

আশা মাকে নির্ভুর দৃষ্টির আঘাত করিল; এক পা আগাইয়া আসিয়া কহিল,—তুমি বুঝি আবার এঁর কাছ থেকে ভিক্ষা চাইছ? এমনি করে' কি তুমি দাদার সমস্ত প্রচেষ্টার মহত্বকে ধ্বংস করবে নাকি?

মা কহিলেন,—তুমি ওর কথায় কান দিয়ো না, মান্ন। লেখাটুকু শেষ করে' ফেল।

মানব আবার কলম তুলিল।

মানবের দিকে ফিরিয়া আশা প্রশ্ন করিল,—কী আপনার স্পর্ধা যে এমনি করে' সবাইকে আপনি অপমান করতে সাহস পান? আমরা গরিব হয়েছি বলে'ই কি আপনার এই অত্যাচার সহ্য হ'বে নাকি?

মা কাতরকণ্ঠে শোক করিতে লাগিলেন,—তুই একে অত্যাচার বলিস নাকি হতভাগী? তুমি ওর কথায় কিছু মনে করো না বাবা, দুঃখে-তাপে মাথা-মুণ্ডু কিছু আর ওর ঠিক নেই। তুমি ঐটুকুন লিখে ফেল।

মানব সহঁ করিয়া চেকটা নিতান্ত অবহেলায় আশারই দিকে ছুঁড়িয়া উঠিয়া পড়িল। মাকে লক্ষ্য করিয়া কহিল,—দিন-ক্ষণ এবার ঠিক করে' ফেলুন। গয়না বা ছু' একখানা লাগবে মাকে বলে' আমিই পরে দিয়ে দিতে পারবো।

আশা মেঝে থেকে চেকটা কুড়াইয়া লইয়া গভীর হইয়া কহিল,—কিন্তু আপনার এই দানের মর্যাদা আমরা রাখতে পারলাম না। দয়া করে' ফিরিয়ে নিয়ে যান।

মা কথা ঘুরাইলেন: সুধীর তোমাকে রাত্রে বাড়িতে গিয়ে পাবে ত' ? এতোক্ষণে ও হাঁপ ছেড়ে বাঁচবে।

প্রথম প্রেম

—পাবে। মানব দরজার কাছে পৌঁছবার আগেই আশা পথ আটকাইয়াছে।

মানব কহিল,—সরো।

—আপনার এই চেক আপনি ফিরিয়ে নিন্।

—এ কি তোমার আদেশ নাকি ?

—নিশ্চয়ই।

—কিন্তু এ-চেক ত' আমি তোমাকে দিই নি। পড়তে জানো ? দেখ ত' কার নাম।

—কিন্তু আমাকে উদ্দেশ করে'ই ত' দিয়েছেন। আমি বেঁচে থাকতে এ-অপমান আমি নিতে পারবো না। নিন্ ফিরিয়ে।

মা এইবার মেয়ের প্রতি রুখিয়া আসিলেন : তুই এ-সবের কী বুদ্ধিস লো হতভাগী ? ছাড়্ দরজা। দিন-দিন যতোই ধিক্কা হচ্চে ততোই ওর বুদ্ধি খুলছে। তুমি ওর কথা গ্রাহ্যের মধ্যেই এনো না, মান্ন।

মানব মুক্কিয়ানার হাসি হাসিল : না, না, সে আবার একটা কথা ! বিয়ের কথা শুনে সবাইরই একটু বুদ্ধি যুলোয়।

মা ফের ধমক দিলেন : সরে' দাঁড়া বল্ছি।

আশা তবু অধোবদনে দাঁড়াইয়া রহিল। অত্যন্ত নম্র ও ধীর স্বরে কহিল,—আপনি যান্, কিন্তু এই চেক আমি ছিঁড়ে ফেলবো।

মা উদ্যস্ত হইয়া উঠিলেন : ছিঁড়ে ফেলবি কি ? তবে বিয়ে না করে' আমাদের মুখ পোড়াবি নাকি ?

আশা কহিল,—তার জন্তে একজনের অসংযত ও উদ্ধত দান আমি গ্রহণ করতে পারবো না, মা।

এমন দৃঢ় সতেজ ও সহজ কণ্ঠে মেয়ে তাঁহার কথা কহিতে পারে মা

প্রথম প্রেম

শূন্যমনেও কখনো তাহা চিন্তা করেন নাই ; মানবও অবাক হইয়া গেল । এমন যাহার তেজ সে কিনা অপ্রতিবাদে যাহার-তাহার সঙ্গেই আঁচলের গিঁট বাঁধিয়া বনবাসে বাহির হইয়া পড়িবে ।

তাই সে টিপ্পনি কাটিয়া কঁহিল,—কিন্তু চেকটা যদি ছিঁড়ে ফেল তা হ'লে এ-যাত্রায় আদর্শ পতিব্রতা হ'বার সুযোগ আর মিলবে না দেখছি ।

—সে-সুযোগ আপনার টাকা দিয়ে কিনতে চাই না ।

—কিন্তু এই টাকারই জন্মে ত' সেই সুযোগ এতদিন পিছিয়ে ছিলো ।

—তা হ'লে তা চিরদিনের জন্মেই পিছিয়ে থাক্ । বলিয়া আশা সহসা ক্ষিপ্তের মত সেই কাগজের ফালিটা টুকরা-টুকরা করিয়া ছিঁড়িয়া ফেলিল ।

আর এক মুহূর্তও সে সেখানে দাঁড়াইল না ।

শুধু চলিয়া যাইবার সময় তাহার পিঠের উপর চুলের স্তূপটা ভাঙিয়া কীর্ণ-বিকীর্ণ হইয়া পড়িতেই তাহাকে নিমেষে একটা অপস্রিয়মানা ঝটিকার মত মনে হইল । অন্ধকারের সে-দীপ্তি মানবের দুই চক্ষু বলসাইয়া দিল ।

মা খানিকক্ষণ অভিভূতের মত দাঁড়াইয়া রহিলেন, এবং অবশেষে মানবকেও চলিয়া যাইতে দেখিয়া সেই পরিত্যক্ত কাঁসার বাটটা ভুলিয়া লইয়া কপালে আঘাত করিতে লাগিলেন ।

হরীতকীবাগান লেইন্‌এ মেয়েদের যে হস্টেল ছিল মিলি সেখানে বেড়াইতে আসিয়াছে। পরিয়াছে আগুনের মত লাল সিল্কের শাড়ি— তাহার গায়ের শ্যামল রঙের সঙ্গে একটা অনির্বচনীয় ছন্দ লাভ করিয়াছে—যেন অপরাহ্নে একটি বিষণ্ণ ও ক্ষীণাঙ্গী নদীর জলে সূর্যাস্ত হইতেছে। মোনা লিসার হাসির মত দুইটি রঙের এই অতীন্দ্রিয় সৌহার্দ্যটুকু যদি কেহ তুলিকায় ধরিয়া রাখিতে পারিত, তাহা হইলে তাহাকে অনসংস্থান করিতে আর দ্বিতীয় ছবি আঁকিতে হইত না।

ভিজিটাস রুম পার হইতেই প্রথমে মিলির সেই মেয়েটির সঙ্গে দেখা হইল যে শেয়ালদা ষ্টেশনের প্ল্যাটফর্মে মানবের প্রথম কল্পনায় সহজেই মিলি হইতে পারিত। নাম তাহার শোভনা। হস্টেলের ছাত্রীদের সেই এক রকম কর্ত্রী—ধোপাবাড়িতে শাড়ি-সেমিজ পাঠাইবার তদারক করিতেছে।

বিধুর গোধূলিবেলায় একটি দীর্ঘ রশ্মিরেখার মত মিলির আবির্ভাবে সমস্ত বাড়ি-ঘর-দোর সহসা ঝলমল করিয়া উঠিল।

তাহার দিকে চাহিয়া শোভনা বলিল,—ঘরে হঠাৎ আগুন লাগলো কোথেকে ?

ধরিত্রী বলিল,—ঘরে কোথায়, দেখছিস না ওর শরীরে।

নিধূম অগ্নিশিখার মত মিলির দেহ কাঁপিয়া উঠিল। নিচে যতগুলি মেয়ে ছিল তাহাদের সঙ্গে পাল্লা দিয়া সিঁড়ি ভাঙিয়া মিলি উপরে উঠিয়া আসিল ; ধরিত্রীর হাত ধরিয়া কহিল,—সত্যিই ভাই, শরীরে আগুন লেগেছে।

প্রথম প্রেম

মিলি এই বোর্ডিঙবাসিনীদের থেকে ভিন্ন কলেজে পড়িত, তাই তাহার সম্বন্ধে সামান্য কানাঘুসা ছাড়া তেমন কোনো মারাত্মক খবর তাহারা পায় নাই। তেমন কানাঘুসা কোন্ কৈশোরোত্তীর্ণা বোর্ডিঙবাসিনীর সম্বন্ধে না শুনা গিয়াছে! পুরুষের সংস্পর্শ-রূপ অবশ্যস্তাবী দুর্ঘটনা এড়াইয়া একে-একে এতগুলি বৎসর অতিক্রম করাই ত' অস্বাভাবিক। কিন্তু সেই সংস্পর্শে যে শরীরে আগুন জাগিয়া উঠিবে ও সেই রোমাঞ্চময় দহনানুভূতি যে সমস্ত জীবনে সঞ্চারিত, পরিব্যাপ্ত হইয়া পড়িবে তাহারই চমৎকার অভিজ্ঞতা কয়টা মেয়ে লাভ করিয়াছে শুনি?

তাই মিলির এই একটি সামান্য কথার শব্দ পাইয়া সমস্ত মেয়ের মুখ দীপ্ত হইয়া উঠিল। এক নিমেষেই তাহারা বুঝিল এ ঠিক প্লিপার বা ব্লাউজের প্যাটার্নের মত প্রেমের ফ্যাসান্ নয়—এ নিতান্ত একটা সমুচ্ছ্বসিত আনন্দের বৃদ্ধুদ।

সবাই মিলিকে ছাকিয়া ধরিল। মিলির মনের কাছাকাছি হইবার আশায় উষা কহিল,—কে এই আগুন লাগালো?

—তোরা সবাই তাকে দেখেছিস্।

—আমরা দেখেছি? এমন ভাগ্যবান কে? কোথায়?

—শেয়ালদা ষ্টেশনে—সাত নম্বর প্ল্যাটফর্মে। ভোরবেলায়। ঢাকা মেইল যখন ইন্ করলো। সূর্য্য ওঠবার আগে। মানে, আকাশে আর আমার মনে একসঙ্গে যখন সূর্য্য উঠলো।

ধরিত্রী চিনিয়াছে, বুলা চিনিয়াছে, শোভনাও নিচে থেকে আসিয়া চিনিবে।

আরো একটি মেয়ে হয় ত' চিনিল—নাম অগ্নিমা—সাঁওতালি

প্রথম প্রেম

ঝুম্‌ঝুম্‌কার ঝালরগুলি গালের আধখানায় আসিয়া টিক্ টিক্ করিতেছে—
কহিল,—ও ! সেই গুণ্ডাটা ?

এক পশলা হাসির শিলাবৃষ্টি হইয়া গেল ।

মিলি কহিল,—তোমরা এখন হাস বা তার পর কাঁদ, আমাকে
খাওয়াও শিগ্গির ।

শোভনা পেছন-মোড়া নাগুরাটাকে চটি-জুতায় রূপান্তরিত করিয়াছে,
দুই পায়ে তাহাই ফট্-ফট্ করিতে-করিতে উপরে উঠিয়া আসিল ।

—শোভা-দি, খাওয়াও আমাকে ।

উষা কহিল,—ও প্রেমে পড়েছে শোভা-দি, অতএব কিছুকাল ও
হাওয়া আর হাবুডুবু খাচ্ছে । এর পর কিছু ক্যান্টর অয়েল্ খাইয়ে ওকে
ছেড়ে দাও ।

শোভনা বয়সে একটু ভারি বলিয়া সবাই তাহাকে একটু সমিহ
করিয়া চলে । সে দুই হাতে ভিড় সরাইয়া দিয়া কহিল,—কী তোরা
ফাজ্লামো করছিস্ । (মিলির হাত ধরিয়া) আয় মঞ্জু, আমার
ঘরে ।

দল বাঁধিয়া সবাই আবার শোভনার ঘর আক্রমণ করিল । নিচু
তক্তপোষে, টেবিলের উপর থেকে বই সরাইয়া, ট্রান্স-স্ক্র্যটকেস্‌এর উপর
যে যেখানে পারিল বসিয়া পড়িল । ধোপাকে কাল আসিতে বলিয়া
দেওয়া হইয়াছে ।

শোভনা মিলির বাঁ-হাতখানি নিজের কোলের উপর প্রসারিত করিয়া
কহিল,—কলেজ ছুটি হচ্ছে কবে ? এখানেই থাকবি, না—

ধরিত্রী দুই হাঁটুর উপর দুই কনুইয়ের ভর রাখিয়া সামনের দিকে
ঝুঁকিয়া বসিয়াছিল, সে তড়াক্ করিয়া লাফাইয়া উঠিল : এ-সব বাজে

প্রথম প্রেম

কথা. কী জিগ্গেস করছ, শোভা-দি? বলো, কবে ও পিঁড়িতে চড়ে মূর্তিমানের চার পাশে সাত-পাক ঘুরবে?

শোভনা ম্লান হাসি হাসিয়া বলিল,—এত দূর গড়িয়েছে নাকি?

শোভনা সেই জাতের মেয়ে যার মাত্র পালিশই আছে, ধার নাই—আঙুলের নখ থেকে ললাট-ফলক পর্যন্ত পাংলা আয়নার মতো ঝক-ঝক করিতেছে; তার গাঙ্গীর্যাটা মেকি—জীবনের কোনোদিন ভাবাকুল হইতে পারে নাই বলিয়াই তাহার এই সারশূন্য কঠিনতা। সে নিজেকে সবার থেকে যে একটু দূরে সরাইয়া রাখে সে তার মিথ্যা প্রাধাত্যবোধের দোষে। তার ভাবখানা এই: সে ভাবের শোতে পড়িয়াও সোনার মত ভাসে, অন্ধের মত আচ্ছন্ন হয় না। অর্থাৎ দেহের সবল স্বাস্থ্যে ও প্রাণের সতেজ প্রাচুর্য্যে নিজেকেও বিকীর্ণ করিতে পারে না বলিয়াই বয়োধর্ম্মের এই স্বাভাবিক উচ্ছ্বাসের প্রতি উহার কপট বিতৃষ্ণা আছে। ইহাই এক ধরনের অস্বাস্থ্য, এবং এমন অসুস্থ মেয়ের সংখ্যা দিন-দিন বাড়িতেছে।

মিলি কথা না কহিয়া মূহ-মূহ হাসিতেছে দেখিয়া শোভনা কিঞ্চিৎ শাসনের সুরে কহিল,—সত্যিই এত দূর গড়িয়েছিস্ নাকি?

মিলি পা দুইটা ঈষৎ দুলাইতে-দুলাইতে কহিল,—আমরা ত' আর 'বিবাহের চেয়ে বড়ো'তে বিশ্বাস করি না। খালি বাবার একটা ফর্ম্যান্ মতের অপেক্ষা করছি। খবরটা নিজে গা করে' দিতে এলাম।

শোভনার মুখ-চোখের এমন একটা ভয়াবহ অবস্থা হইল যেন কি একটা সর্বনাশের খবর শুনিয়াছে। এখনো কি মিলিকে রক্ষা করা যায় না?

প্রথম প্রেম

অনিমা সামনে সরিয়া আসিয়া কহিল,—একেবারে শেষ কথা দিয়ে ফেলেছিঁস্ ?

মিলি হাসিয়া বলিল,—ব্যাকরণ ঠিক করে' শুদ্ধ ভাষায় এতে আবার কোনো কথা দিতে হয় নাকি ?

উষা টিপ্পনি কাটিয়া বলিল,—এক্ষেত্রে মুখই একমাত্র নীরব, অথচ শরীরের সমস্ত নায়ু-শিরা মুখর হ'য়ে ওঠে ।

শোভনা মুখের উপর সেই কৃত্রিম গান্ধীর্যের পরদা টানিয়া কহিল,—
কথা দিলেই বা কি ! ফিরিয়ে নিতে কতোক্ষণ !

মিলি অবাক হইয়া তাহার মুখের দিকে চাহিয়া রহিল । তলাইয়া বুঝিবার সময় তাহার নাই । সে চঞ্চল হইয়া কহিল,—এখনি আবার হয় ত' রাস্তায় আমার জন্তে হর্ন বেজে উঠবে । কিছু জিনিস পত্র কিনতে হ'বে তারপর । বাবার মত্ নিতে কালই আমরা চিটাগং মেইলে বেরিয়ে পড়বো ।

—কাল-ই ? বাবা যে তোর মত্ দেবেন তুই ঠিক জানিস্ ?

মিলি মুখ টিপিয়া হাসিল : বাবার অমত্ করবার কিছুই নেই । আমি ত' আর অপাত্র খুঁজিনি । আর যদি মত্ না-ই দেন, সেই তবে আমাদের বাধা । কোনো বাধার বিরুদ্ধে লড়তে না পারলে 'জেষ্ট্' থাকে না ।

অনিমা এক পাশে এতক্ষণ চুপ করিয়া বসিয়াছিল । সে নাকটা ঈষৎ একটু কুঞ্চিত করিয়া কহিল,—না, অপাত্র আর কিসে ! হু' হাতে টাকা উড়ায়—শুন্ছি নাকি শিগ্গিরই বিলেত যাবে—

কথার বস্তায় অনিমার নিশ্বাসরোধ করিয়া মিলি একেবারে উথলিয়া উঠিল : এবার আর ওঁর একা বেরুনো হচ্ছে না । আমিও সঙ্গে থাকবো ।

প্রথম প্রেম

আর, আমিও সঙ্গে থাকবো বলেই নীল সমুদ্র অতো উত্তাল হ'য়ে উঠতে পারবে। ভেনিসে গিয়ে বাসা বেঁধে থাকবো—সেই ত' আমাদের আইডিয়া। চাষ করবো দু'জনে।

শোভনার শুকনো ঠোঁটে নিরাভ একটু হাসি ফুটিয়া উঠিল। হাসির অর্থখানা এই : হে বিধাতা, স্বপ্নবিলাসিনীকে ক্ষমা করিয়ো। নির্বোধ বালিকা জানিতেছে না যে ও কী করিতেছে।

অগ্নিমার কথা তখনো শেষ হয় নাই : কিন্তু চরিত্রখানা কী—

প্রেমের ব্যাপারে চরিত্র লইয়া আলোচনাটা অবিবাহিতা মেয়েদের কাছে অত্যন্ত মুখরোচক।

শোভনা আচার্য্যার মত মাথা নাড়িয়া কহিল,—না, না, সে-কথা কেন ?

—সে-কথা নয়-ই বা কেন, শোভা-দি ? অগ্নিমাও অপগতমোহ বিংশশতাব্দীর মেয়ে—প্রেমে অবিশ্বাসী হওয়াই তার ফ্যাশান্ : এখনো মঞ্জুকে সাবধান করে' দেবার সময় আছে।

মিলি খিল-খিল করিয়া হাসিয়া উঠিল : আমাকে সাবধান করবে কী অগ্নি-দি ? আমি কি আর ফিরবো ভেবেছ ? একেবারে ভেনিস্—

অগ্নিমার নাসাকুঞ্চন অধরে ও চিবুকে সংক্রামিত হইল : আস্তাকুঁড়ে। পুরুষমানুষকে ত' জানিস্ না। দু' দিন নেড়ে-চেড়ে নর্দমায় ছুঁড়ে ফেলে দেবে। তখন মুখ দেখাবি কাকে ? মোটর-বাইকের পেছনে বসে' হাওয়া খাচ্ছি, ভাবছি, একেবারে উড়ে' গেলাম ! কয়েকদিন উড়ে' পরে দেখবি নিখাসের জন্তে হাওয়া গেছে ফুরিয়ে।

মিলি হাসিয়া কহিল,—তখনকার কথা তখন। যাক্, ঐ হর্ন বাজলো। আমি চললাম, শোভা-দি।

প্রথম প্রেম

হর্ন কোথায় একটা বাজিল বটে, কিন্তু গাড়ি কোনো ছয়ারে দাঁড়াইল না।

ফের ঘুরিয়া দাঁড়াইয়া কহিল,—পুরুষের নামে অকারণ দুর্নাম করা-ই তোমার ব্যবসা, অণু-দি। দয়া করে' চুপ করো, এ-সব কথা আমি শুনতে চাই নে।

শোভনা সেই ঘোলাটে মুখে—মিলির শাড়ির আঁচলটা পাট করিতে-করিতে কহিল,—চটিস্ নে। তোর ভালোর জন্মেই বলছে। ও-ছেলের বাজারে খুব নাম-ডাক নেই। শেষকালে তোকে নিয়ে একটা কাণ্ড হোক এ আমরা সহ্যে পারবো না। পুরুষমাত্রেই নিতান্ত 'শ্যালো'—তাই ছ' দিন রঙিন ফাল্গুস উড়িয়েই নেয় ছুটি। ফাল্গুস যায় ফেটে, চুপসে।

বেলিঙ ধরিয়া নিচে ঝুঁকিয়া পড়িয়া মিলি কহিল,—যাক, কিন্তু এখনো আসছে না কি রকম!

অনিমা টিপ্পনি কাটিয়া কহিল,—আর আসেই কি না ঙ্খাথ।

—কিন্তু আমিও ত' যেতে পারি। বলিয়া মিলি সত্য-সত্যই চলিবার জন্ত পা বাড়াইল।

শোভনা কহিল,—দাঁড়া। ঠাট্টা নয়, মিলি। তোর ভালোর জন্মেই বলছিলাম। একেবারে তলিয়ে না গিয়ে চোখ তুলে চারদিক একবার চেয়ে দেখিস্।

মিলি গভীর স্বরে কহিল,—বিচার-বিশ্লেষণ করে' ভালোবাসতে পারি না। সম্পূর্ণ মানুষকেই যখন গ্রহণ করবো, তখন তার সমস্ত অসম্পূর্ণতাও স্বীকার করে' নেব বই কি। তলিয়ে যেতেই আমি চাই—নিঃশেষে নিমগ্ন না হ'তে পারলে আমার স্বস্তি নেই।

প্রথম প্রেম

—একেবারে কি ঠিক করে' ফেলেছি' ?

গাঢ় নিশ্বাস ফেলিয়া মিলি বলিল,—সম্পূর্ণ ।

—কিন্তু মানব যদি এখন তোকে প্রত্যাখ্যান করে ?

অগ্নিমার চোখে-মুখে ঐকটা হিংস্র দীপ্তি ভাসিয়া উঠিল । সেই দৃষ্টিকে নিশ্চিন্ত করিতে মিলি কহিল,—সে-স্বাধীনতা তার নিশ্চয় আছে, কিন্তু সাধ্য হয় ত' নেই । তবু যদি সে প্রত্যাখ্যান করে, করবে—আমি তবু মিথ্যা সন্দেহে বা অবিশ্বাসে এই উন্মাদনাকে গ্লান করে' দেব না, শোভা-দি । তেমন ব্যর্থতা আমাদের জীবনের ঐশ্বর্য্য । ব্যর্থ হবার মাঝেও ঐকটা গভীর আনন্দ আছে ।

শোভনার ঠোঁটের কিনারে আবার সেই কৃষ্ণপক্ষের ডুবন্ত চাঁদের হাসি ভাসিয়া উঠিল যাহার অর্থ : হে বিধাতা, এই অবোধ অনভিজ্ঞ শিশুকে দয়া করিয়া আঘাত করিয়ো না । মুখ ভারি করিয়া কহিল,—কিন্তু তোর বাবাই যেন এ-বিয়েতে বাধা দেন—

—তাই আশীর্বাদ করো, শোভা-দি । কঠিন বাধার বিরুদ্ধে যুদ্ধ করে' যেন প্রেমকে আরো সহিষ্ণু ও সবল করে' তুলতে পারি । যুদ্ধে যদি হেরেও যাই, তবু সে-পরাজয়কে আমি ক্ষুণ্ণ করবো না ছাখো ।

অগ্নিমার অস্ত্র তখনো ফুরায় নাই । সে কণ্ঠস্বরটাকে বিকৃত করিয়া কহিল,—দেখিস্ যুদ্ধে শেষকালে সূৰ্পগথা সেজে বসিস্ নে ।

মিলি স্বচ্ছ হাসিতে মুখ উদ্ভাসিত করিয়া কহিল,—তবু যুদ্ধ করবার রোমাঞ্চ থেকে নিজেকে বঞ্চিত রাখবো না । নিশ্চিত সৰ্বনাশ জেনেও,—যখন একবার পাখা মেলেছি—ঝাপিয়ে আমি পড়বোই ।

আর কি সতর্ক বাণী উচ্চারণ করা যায় শোভনা হয় ত' তাহাই ভাবিতেছিল, এমন সময় একথানা মিষ্টি লইয়া উষা আসিয়া হাজির ।

প্রথম প্রেম

—আয় শিগ্গির মিলি, আমাদের ঘরে । কিছু মিষ্টিমুখ করে' যা পোড়ারমুখি ।

এই বিস্তী আবহাওয়া থেকে ছাড়া পাইয়া মিলি বাঁচিল । অণু আর শোভনা নীরবে খানিকক্ষণ দাঁড়াইয়া রহিল । তাহাদের পরস্পরের মধ্যে এখন আর কোনো কথা নাই ; বিমর্ষমুখে চুপ করিয়া দাঁড়াইয়া থাকা ছাড়া কোনো কথা আর থাকিতেও পারে না । কে কাহাকে অন্ধকারে একা ফেলিয়া আগে অন্তর্দান করিবে মনে-মনে দুইজনে বোধকরি তাহাই ভাবিতেছে ।

হিড়-হিড় করিয়া মিলিকে ঘরে টানিয়া আনিয়া বিছানায় বসাইয়া দিয়া কহিল,—কতো খেতে পারিস, খা ।

ধরিত্রী আর বুলারও নিমন্ত্রণ হইয়াছে । তাহারাও হাত লাগাইল ।

উষা বলিল,—কিন্তু আমাদের মিষ্টিমুখ হচ্ছে কবে ?

—তারিখ এখনো ঠিক হয়নি । কিন্তু তোদের মিষ্টিমুখের আবার তারিখ কি ! যে কোনো দিন ।

বুলা কহিল,—ভেনিস্‌এ যাবার আগে দেখা করো ভাই ।

তাহার কথা-বলার ধরন দেখিয়া মিলি হাসিয়া গড়াইয়া পড়িল : ভেনিস ততোদিন ভূপৃষ্ঠে অবস্থান করলে হয় ।

জল খাইতে-খাইতে হঠাৎ খামিয়া ঢোক নিয়া : ঐ এলো আমার ডাক । আমি এবার চলি ।

উষা মধুর অন্তরঙ্গতার সুরে কহিল,—শোভাদি-দের ঐ সব বাজে কথায় মন খারাপ করিস্ নে । পরের নিন্দা করতে পারলেই ওদের হ'ল ।

নিচে হর্ন আবার বাজিয়া উঠিল ।

প্রথম প্রেম

সিঁড়ি দিয়া নামিতে-নামিতে মিলি হঠাৎ খামিয়া পড়িল। গলা তুলিয়া অন্ধকারকে উদ্দেশ করিয়া কহিল,—চল্লাম, শোভা-দি। নেমস্তম্ভ করলে যেয়ো কিন্তু তোমরা।

অন্ধকার নিরুত্তর।

আরো এক ধাপ নামিয়া : ভীষণ কোনো ব্যর্থতাও যদি জীবনে আসে তার ভয়ে আমি এ-আনন্দকে ত্যাগ করতে পারবো না। অতোটা সঙ্কীর্ণতা আমার সহিবে না কখনো।

ধরিত্রী, উষা আর বুলা মিলির পিছে-পিছে নামিয়া আসিয়াছে— তাহাকে বিদায় দিবার ছলে একেবারে সামনের রোয়াকটুকুতে। ইচ্ছা, মানবকে একবার দেখিয়া লয়—তাহাদের যে পরিচিতা, তাহার জীবনে এ কোন্ জ্যোতির্ময় সূর্য্যোদয় হইল! আশা, কবে আবার তাহারা মিলির মত এতখানি অহঙ্কারে জীবনের ব্যর্থতাকে পরাভূত করিবার প্রতিজ্ঞা করিতে পারিবে।

বারান্দার রেলিঙ ধরিয়া অণু ও শোভনাও কিঞ্চিৎ ঝুঁকিয়া পড়িল। মানবকে ভালো করিয়া দেখা গেল না।

মোটরটা অদৃশ্য হইলে অণিমা কহিল,—এই মেয়েটাও মারা পড়লো। দুর্বল, ভীকস্বরে শোভনা কহিল,—আলোর পোকা!

ষ্টিমারের নাম টাইফুন।

নদীর জল ঝিঝি-ঝিঝি করিয়া কাঁপিতেছে ; রূপোর চুম্বকি-বসানো শিল্পের শাড়ি রোদে শুকাইতে দেওয়া হইয়াছে—জায়গায়-জায়গায় কুঁচকানো।

ফার্ট' ক্লাশের ডেকএ বেতের সোফায় বসিয়া মানব সকালবেলাকার খবরের কাগজটা নিয়া নাড়াচাড়া করিতেছিল। মিলি রেলিঙ ধরিয়া দাঁড়াইয়া একটা চাষার ছেলের মাছ-ধরা দেখিতেছে।

মানব কহিল,—স্নান করে' নাও না।

—ষ্টিমারটা আগে ছাড়ুক।

—এই ছাড়লো বলে'। কী খাবে তার পর? ভাত?

—নিশ্চয়।

—সুখানিকে তা হ'লে বলি।

—ব্যস্ত হ'বার দরকার নেই। এ-দিকে এসো এগিয়ে। দেখ, দেখ, কী সুন্দর!

মানব মিলির গা ঘেসিয়া দাঁড়াইল। রোদে হাওয়া একটু তাতিয়া উঠিয়াছে ; মিলির বেণী-ছেঁড়া কয়েক টুকরা চুল মানবের গালে মৃদু-মৃদু লাগিতেছে। মানব কহিল,—কোথায়?

মিলি কহিল,—চার দিকে।

—আমি ত' দেখছি আমার পাশেই।

মিলি আরো ঘেসিয়া আসিল : আমার কিন্তু ট্রেনের চেয়ে ষ্টিমার বেশি ভালো লাগে। ঢেউ দেখলেই মন আমার উথলে ওঠে। বেশ একটু ভয়-ভয় করে কি না—তাই।

প্রথম প্রেম

মানব জিজ্ঞাসা করিল,—ঐ হাঙ্গা ডিঙিটা করে' নদী পাড়ি দিতে পারে ?

—পারি, যদি তুমি সঙ্গে থাকো ।

—আমি সঙ্গে থাকলে আর কী এগোবে ?

—যদি ডিঙিটা নেহাৎ ডোবে-ই, তোমাকে আঁকড়ে ধরতে পারবো ত' ? জানি তুমি আমাকে নদীতে ফেলে রেখেই পারে উঠবে, তবু—

গালে গাল লাগাইয়া মানব কহিল,—তোমাকে ফেলে উঠে পড়বো কী করে' বুঝলে ? তোমার ওজন কতো ? বলিয়া মিলির কোমরে হাত দিয়া তাহাকে শূন্যে তুলিয়া তখুনিই নামাইয়া দিয়া কহিল,—কুঃ । আমার রেইন্-কোর্টটার চেয়ে হাঙ্গা । আমার মাথার পালকের বালিশ মাত্র । দিব্যি মাথায় করে' তুলে আনবো ।

এমনি সময় ভেঁা দিয়া ষ্টিমার পার হইতে সরিয়া আসিতে লাগিল, ক্রমশ ঘুরিয়া গেল—মিলির চোখের সমুখে নূতন দৃশ্য । তীরে গ্রামের ছেলে-মেয়েরা দাঁড়াইয়া আছে, পেছনে পাতার কুটির—ঘন কলাগাছের বেড়ার সীমায় ছায়া-নিবিড় । বিধবার সিঁথির মত শাদা পায়ে-চলা পথ । ঐ বুঝি ঘেঁটু ফুল ফুটিয়া আছে !

মিলি কহিল,—তোমার ও-রকম পাতার ঘরে থাকতে ইচ্ছা করে না ?

মানব হাসিয়া কহিল,—মনে-মনে করে বৈ কি ।

—আমি যদি সঙ্গে থাকি ?

—তুমি থাকবে বলে'ই ত । দু' দিন অন্তর ফিরপোতে ডিনার খেতে কলকাতায় চলে' আসি সটান ।

—না না, একেবারে এখানকার বাসিন্দা হ'য়ে যাবো । তুমি লাঙল

প্রথম প্রেম

হাতে নিয়ে চাষ করবে, আর আমি কুলো নাচিয়ে ধান ঝাড়বো। তুমি কাঠ ফাড়াবে, আর আমি কুড়োব শুকনো পাতা।

—কিন্তু ঐ নৌকায় থাকতে তোমার আপত্তি হবে? আমি মাঝি হয়ে দিন-রাত দাঁড় বাইবো, আর তুমি ছইয়ের ভেতরে বসে' রান্না করবে। জাল পেতে আমি ধরবো মাছ, তুমি কুটেবে কুটনো।

—রাত্রি বেলা?

—পারে কোথায় নৌকো লাগিয়ে জলে পা ডুবিয়ে দু'জনে বসে'-বসে' গল্প করবো।

—কিসের গল্প?

—এই, এখানে আর ভালো লাগে না। নিউ-এম্পায়ারে নতুন যে রাশিয়ান নর্তকী নাচছে, তা চলো একবার দেখে আসি। মোটর-বাটিকে লেইকটা বার-কতক চক্কর মারি। চীনে-হোটেলের হাম্ কিন্ত অনেক দিন খাই নি।

মিলি খিল-খিল করিয়া হাসিয়া উঠিল; কহিল,—বাই বলো, তুমি নিতান্ত সহরে। সহর তোমার কাছে মদের মতো।

—আর গ্রাম বুদ্ধি তোমার কাছে পাথরের গ্লাশে মিছরির পান। দু' দিনেই ঠাণ্ডা। টেম্পারেচার পঁচানব্বুয়েরো নিচে।

মিলি গাঢ় গভীর স্বরে কহিল,—বাই বলো আমি হয় ত' কিঞ্চিৎ কবি হয়ে উঠেছি। পৃথিবীকে সুন্দর বলে' অনুভব করাই ত' কবি হওয়া, না?

—কিন্তু আমরা সে-ষ্টেইজ্ পার হয়ে এসেছি। আমরা পৃথিবীকে সুন্দরী বলে' অনুভব করি বলে'ই তাকে জয় করতে চাই। কী বলো?

প্রথম প্রথম

বলিয়া মিলিকে সে ধীরে আকর্ষণ করিল। মিলি সেই স্পর্শের মাঝে নিজেকে ছাড়িয়া দিয়া কহিল,—যাই, চুলটা খুলি।

—দেখি আমি তোমার বেণীর বন্ধন মোচন করতে পারি কি না।

মানবের উৎসুক হাত হাতের মুঠির মধ্যে টানিয়া নিয়া মিলি বলিল,—আমি চান্ করতে গেলে তুমি ভাতের কথা বলে' দিয়ো। খিদে পেয়েছে বেশ।

তবু মিলির মুক্ত হইবার চেষ্টা দেখা যায় না।

কে-একটি তৃতীয়-শ্রেণীর যাত্রী ভুল করিয়া এ দিকে ঢুকিয়া পড়িয়াছিল; তাহার প্রথমে টেব পায় নাই। পরে সেই যাত্রীটি তাহার বন্ধুদের এই মনোরম দৃশ্যটি দেখাইবার জন্ত কখন ছয়ারের বাহিরে জড়ো করিয়াছে। অসাবধানে কে-একজন একটা আওয়াজ করিয়া উঠিতেই মিলির প্রথমে নজর পড়িল। অমনি সবাই চম্পট।

মিলি কহিল,—না, বেলা বেড়ে চল্লো। বাথরুমে জল আছে ত' ?

হাঁটু গাড়িয়া নিচু হইয়া ডেকের উপর বসিয়া মিলি স্যুটকেস খুলিয়া কাপড় সেমিজ ব্লাউজ পেটিকোট তোয়ালে তেল সাবান খোলস ইত্যাদি বাহির করিতে লাগিল। শীর্ণ শুকনো বেণী দুইটা দুই কাঁধের উপর দিয়া বুকের উপর নামিয়া আসিয়াছে—আঁচলটা এলোমেলো, পায়ের ছম্ড়ানো পাতা দুইটি নদীর ফেনার মত শাদা।

মিলি স্নানের ঘরে প্রচুর জল লইয়া একটা বড় মাছের মত খল্বল করিতেছে,—স্টিমারের ঢেউ-ভাঙার শব্দ ভাঙিয়া সেই সুর জলতরঙ্গের মত মানবের কানে লাগে।

মিলি বলে : নদীর ওপর কি-কি দৃশ্য দেখছ আমাকে বঞ্চিত করে'—শিগ্গির বলো।

প্রথম প্রেম

মানব বলে : আমি সম্প্রতি খবরের কাগজের বিজ্ঞাপন পড়ছি ।

ঘরের ভিতর হইতে কথা আসে : বলো কি ? প্রতি মুহূর্তে নদীর নূতন রূপ—প্রথম-প্রেমে-পড়া কিশোরীর মতো ।

—আমি ত' দেখছি জল আর জল । মুখে দিলে নোন্তা, চোখে অত্যন্ত ঘোলা । পান করবার যেটুকু, সেটুকু তোমার ঠোঁটে । তুমি নেহাৎ অদৃশ্য বলে'ই কথাটা বলতে পারলাম । অপরাধ মার্জনা কোরো ।

একটুখানি পরে আবার কথা আসে : আমি হ'লে নদীর বা তীরের এক কণা সৌন্দর্য্যও হারাতে দিতাম না । এ-জায়গাটা কি খুব ফাঁকা ?

—না, এখানে দিব্যি চর জেগেছে—নতুন চর । উড়ি ঘাস ; ছ' চারটে বক দেখা যাচ্ছে ।

প্রায় কান্নার সুরে : বা, আমি যে কিছু দেখতে পাচ্ছি না ।

—তোমার ঘরে জান্না নেই ?

—আছে একটা, কিন্তু পাখি-তোলা । এঁটে বসেছে । কী হ'বে ? ওদের থামতে বলো ।

—মাঝিরা চরে জাল শুকোচ্ছে । ছ'টো বক এই উড়লো । এখানে রাজ্যের কচুরি-পানার ভিড় ।

—তারপর ?

—দাঁড়াও । টিকিট-চেকার এসেছে ।

কতক্ষণ বাদে : গেছে ?

—হ্যাঁ ।

—বাবাঃ, মরেছিলাম আরেকটু হ'লে ।

—কেন ?

প্রথম প্রেম

—কচুরি-পানা দেখতে ভিজ্জে গায়েই বেরিয়ে পড়েছিলাম ! বড়ো জোর বেঁচে গেছি ।

—কিন্তু এখনো অনেক জিনিস দেখবার আছে । এই একটু বাদেই মিলিয়ে যাবে । যদি দেখতে চাও ত' বেরিয়ে এসো । জীবন ক্ষণস্থায়ী, দৃশ্যপট নিয়ত-পরিবর্তনশীল ।

—কব্জেরি ভাষায় কথা কইছ যে । কী এমন দৃশ্য ?

—একটা কুমীর ডাঙায় উঠে রোদ পোহাচ্ছে ।

মিলি হাসিয়া বলে : মিথ্যা কথা ।

—আচ্ছা, বেশ । দেখ, দেখ, কী প্রকাণ্ড হাঁ ।

—জু-তে ঢের দেখেছি ।

—এই দেখ একটা হাঁকা ডিঙি ষ্টিমারের মুখে পড়ে' উল্টে গেল আর-কি ।

—উল্টে যায় নি ত' ?

—যায় নি বটে, কিন্তু ঢেউর বাড়ি খেয়ে একেবারে নাজেহাল হ'য়ে পড়েছে ।

—ও-রকম ত' আমাদের নৌকোও একবার হয়েছিলো । গঙ্গায় । তোমার মনে নেই ? এ তেমন নতুন কী !

মানব তবু আশা হারায় না : কিন্তু গাঙ-শালিক তুমি দেখেছ কোথাও ? ঝাঁক বেঁধে ষ্টিমারের রেলিঙে এসে বসেছে ।

—কই দেখি ।

মিলি দরজা ঠেলিয়া শুকনো কাপড়ে হাসিতে-হাসিতে বাহির হইয়া আসিল ।

—কোথায় গেলো তোমার গাঙ-শালিক ?

প্রথম প্রেম

মানব হাসিয়া বলিল,—তোমাকে বেরিয়ে আসতে দেখে পালিয়ে গেছে।

খাওয়া-দাওয়া শেষ করিয়া দুইজনে সামনের ডেক্‌এ চেয়ার টানিয়া বসিয়াছে; হাওয়ার জোয়ারে চুল আঁচল খবরের কাগজ উড়িয়া পড়িতেছে। তৃপ্ত চোখে রোদ্র-মদীর নদীর লাবণ্য দেখিতে-দেখিতে হঠাৎ মিলি কহিল,—এসো, খানিকটা ড্র-বিজ্ খোল।

বেতের একটা টিপয় দুইয়ের মাঝে রাখিয়া মানব তাস ডিল্ করিতে বসিল। তাস না তুলিয়াই ডাক পাড়িল : ফোর্ নো-ট্রাম্পস্।

মিলি হাসিয়া বলিল,—ষ্টেইক্ রেখে খেলতে হ'বে।

—যুধিষ্ঠিরের মতো দ্রৌপদীকে পণ রেখে ?

—দ্রৌপদীকে নিয়ে আমি কী করবো ?

—তবে এই মনি-ব্যাগটা ?

—ওটা ত' ফাঁকা—টাকার পুঁটলি ত' তোমার বাক্সে।

—তবে এই আংটিটা ?

—ওটা অমনিই পরিয়ে দাও না।

মানব বলিল,—তুমি যেমন ভাবে কথা বলছ তাতে মনে হচ্ছে আমি যেন রাশি-রাশি ডাউন দিয়ে বসে' আছি। কিন্তু মহারাণী যদি হারেন, তিনি কী দেবেন ?

হাতের তাস গুছাইতে-গুছাইতে মিলি বলিল,—মহারাণী হারতে বসেন নি।

—কিন্তু যদিই দয়া করে' হারেন, কী পাওয়া যাবে ?

—কী আবার ! ফলের বুড়ির ছাড়ানো খোসাগুলি।

প্রথম প্রেম

—এ মোটেই সমান-সমান হ'ল না। তুমি তোমার হাতের চুড়িগুলো।

—আর, এই বুঝি সমান ভাগ হ'ল? তার চেয়ে অল্প হিসেব করা যাক এসো।

—আমারো মাথায় এসেছে কিন্তু।

লজ্জায় রাঙা হইয়া মিলি বলিল,—আমারো।

কিন্তু পরক্ষণেই হাতের সমস্ত তাস উল্টাইয়া দিয়া কহিল,—বাবাঃ, এই হাতে ভদ্রলোক খেলতে পারে? হেরে ভূত হ'য়ে যেতাম।

মানব তাড়াতাড়ি দুই হাত বাড়াইয়া টিপয়ের বাধা ডিঙাইয়া মিলিকে বুকের মধ্যে টানিয়া নিয়া কহিল,—আমার হাতের তাস নিয়ে খেলে জ্বিতেই বা তোমার ভূত-হ'তে বাকি থাকতো কী!

মুখখানি নিজের বাহর মধ্যে লুকাইয়া মিলি মানবকে মৃদু-মৃদু বাধা দিতে লাগিল। এই মধুর বাধাটুকুর বোধকরি তুলনা নাই! মানব মিলির মাথাটা কাঁধের তলায় ধীরে-ধীরে শোয়াইয়া কানের পিঠের চুলগুলি নিয়া আশু-আশু আদর করিতে লাগিল।

ডান-হাতের মধ্যমায় কখন মানব তাহার আংটিটি পরাইয়া দিয়াছে।

মিলি হঠাৎ মাথা তুলিয়া কহিল,—এখন এক পেয়ালা করে' চা খেলে হ'ত।

মানব কহিল,—এ নিতাস্তই তোমার কথা পাড়বার ছল মাত্র। বেলা দুটোয় তুমি চা খাও?

দুই চোখে টল্টলে খুসি নিয়া মিলি কহিল,—আজ সব দিক থেকেই অনিয়ম করতে ইচ্ছে হচ্ছে। ঐ একটা স্টেশন এলো বুঝি। এখানে স্ট্রিমার থামবে। বলিয়া মিলি চেয়ার ছাড়িয়া রেলিঙ ধরিতে ছুটিল।

প্রথম প্রেম

মানব স্থিত হাশ্বে মিলির এই দ্রুত পলায়নটি উপভোগ করিল।

অথচ ইচ্ছা করিলেই মিলিকে সে বাহর মধ্যে ধরিয়া রাখিতে পারিত। ইচ্ছা করিয়াই ছাড়িয়া দিয়াছে। ইচ্ছার উপর এই অপ্রতিহত প্রভুত্ব খাটানোর মতো বিলাস আর কী হইতে পারে! হাতের মুঠোয় ব্যয় করিবার মতো জিনিস পাইলেই মানব তাহা অনায়াসে উড়াইয়া দিয়া বসিয়াছে—হাতের মুঠাও তাহার কোনোকালে তাই শূন্য থাকে নাই। কিন্তু মিলিকে সে অনন্তকালের জমার ঘরে রাখিয়া দিতে চায়,—কোথাও এতটুকু ব্যয়ের ক্ষতি যেন তাহার সহিবে না। কেন-জানি এই কেবল তাহার মনে হয়, মিলি তাহার সঙ্কীর্ণ অস্তিত্বটুকু দিয়া মানবের জীবনব্যাপী অবকাশের আকাশ পূর্ণ করিয়া রাখিয়াছে—সে-পূর্ণতাকে সে কৃপণের মত সঞ্চয় করিয়া রাখিবে। মিলির দিকে চাহিয়া তাহার বড় মায়াকরে—ইচ্ছা করে উহাকে কোলে করিয়া জাগিয়া-জাগিয়া দুঃখের রাত ও পোহাইয়া দেয়!

মিলি যেন তেমন বাতি নয় যাহা উস্কাইয়া দিলে বেগে জ্বলিয়া উঠিবে। মিলি যেন সেই দূরের তারা—সমস্ত রাত্রি ভরিয়া যাহার স্তিমিত দ্যুতি!

মিলি বলিল,—এই ষ্টেশনে অনেক লোক উঠবে। ঐ দেখ, জলে নেমে আঁকসি তুলে দোতলার প্যাসেঞ্জারদের থেকে ভিক্ষা চাইছে। চলো, ডেক্টা একবার ঘুরে আসি।

মিলি যেন ছুটির দিনে দুপুর-বেলায় বাড়িতেই আছে—তাহার তেমনি বেশ। গায়ে সেমিজ—ব্লাউজের হুক না আটকাইয়াই ইঞ্জি-ভাঙা মচমচে আঁচলটা কাঁধের উপর তুলিয়া দিয়াছে; প্রান্তমূলে চাবির গোছার ভার রহিয়াছে বলিয়াই হাওয়ায় যা-হোক স্থলিত হইতেছে না। চুলগুলি

প্রথম প্রেম

এলো,—তেলে কুচকুচ করিতেছে—পিঠে-বুকে একাকার হইয়া আছে।
পায়ে অয়েল-ক্লথের চটি। মুখে পথ-ভ্রমণের এতটুকু মালিগ নাহি।
সমুখের ডেকএ বাহির হইয়া আসিতেই অগণিত যাত্রীর সমবেত দৃষ্টি
তাহার মুখে পড়িল। অগত্যা আঁচলটা সামলাইয়া মাথার উপর একটা
ঘোমটার মতো করিয়া টানিয়া দেওয়া ছাড়া উপায় ছিল না।

মিলি বায়না ধরিল : কিছু পাত-ক্ষীর কেন'। চায়ের সঙ্গে খাওয়া
যাবে।

মানব ঠাট্টা করিয়া বলিল,—কিছু গরম দুধও কিনে রাখ। হাঁড়ির
চমৎকার গন্ধ বেরুচ্ছে।

—কলা ? এই অমৃতসাগর কলা কত করে' ?

মিলি দস্তুরমতো দরদস্তুর শুরু করিয়াছে।

মানব বলিল,—আঁচলটা বিছোও দিকি। কিছু চিড়েও কিনে
নিই। কামিনীভোগ চিড়ে।

মিনি মানবের কথায় কান দিবে না। সে পাত-ক্ষীর ও কলা
কিনিল। কহিল,—তুমি এখানে দাঁড়াও, আমি এগুলো রেখে আসি।
পরে নিচে নাম্বো একবার।

এক হাতে কলার কাঁদি ও অন্য হাতে কলাপাতায় বাঁধা শুকনো
ক্ষীর লইয়া মিলি যাত্রীদের প্রসারিত পাদপদ্মের অরণ্য ভেদ করিয়া
অন্তর্হিত হইল। এইবার যখন সে ফিরিয়া আসিল তখন তাহার
কেশ-বেশের আশ্চর্য্য পরিবর্তন ঘটিয়াছে।

বেমজবুত কাঠের সিঁড়ি দিয়া উঠা-নামা করিতে যাত্রীরা নাকাল
হইতেছিল। মানব আর মিলি নিচে নামিয়া আসিল—এঞ্জিনের পাশে।
জায়গাটা ভীষণ গরম। ভয়ে মিলির গায়ে ঘাম দিল। তাঁতের

প্রথম প্রেম

মাকুর মত দুইটা বিশাল লৌহদণ্ড এমন বেগে ঘুরিয়া-ঘুরিয়া ওঠা-নামা করিতেছে—মিলির মনে হইল কখন নির্দিষ্ট পথ হইতে ছিটকাইয়া পড়িয়া তাহাকেই গ্রাস করিয়া ফেলে বৃষ্টি ।

মিলি ব্যস্ত হইয়া বলিল,—শিগগির ওপরে চল । দৈত্যের পাকস্থলী আর দেখতে চাইনে ।

জায়গাটা জল পড়িয়া পিছল হইয়াছে ; তাড়াতাড়ি মিলির হাতটা ধরিয়া ফেলিয়া মানব কহিল,—পাকস্থলীর ক্রিয়া ঠিকমতো না চললেই ত' মৃত্যু ।

—তবু পাকস্থলীর চেয়ে বাইরের স্বাস্থ্যটাই আমরা কামনা করি । পাকস্থলী নিয়ে মাথা ঘামাই না ।

—যেমন তোমার রূপ । যেমন তুমি । কোথায় এমনি কল-কজার সোরগোল চলেছে খবর রাখি না । তোমার চোখের অন্তরালে কোন স্নায়ুর কি কাজ—জানতে আমার বয়ে' গেছে ।

উপরে আসিয়া হাওয়া পাইয়া মিলি বাঁচিল । খোঁপাটা খুলিয়া পিঠের উপর চুল ছাড়িয়া দিয়া, বুকের কাপড় আলাগা করিয়া সে গভীর নিশ্বাস ফেলিল । ট্রে সাজাইয়া বয় চা দিয়া গিয়াছে ।

গরম চায়ের বাটিতে—হ্যাঁ, বাটিই বটে—ঠোট ডুবাইয়া তক্ষুনি মুখ সরাইয়া আনিয়া মিলি জিভ উল্টাইয়া মৃদু-মৃদু ঘসিতে-ঘসিতে উপর-ঠোটটা ঠাণ্ডা করিয়া কহিল,—চাঁদপুর কতোক্ষণে পৌঁছব ?

—রাত সাড়ে-আটটা হ'বে । ষ্টিমার কিছু লেইট আছে ।

—বাড়ি পৌঁছতে প্রায় ভোর, না ? আমাদের নতুন বাড়িটা কতোদিন আমি দেখিনি । সামনে বিরাট নদী—এখন নাকি শুকিয়ে এসেছে । ধু-ধু মাঠও আমার ভালো লাগে ।

প্রথম প্রেম

—প্রকাণ্ড কিছু-একটা মুক্তির চেহারা দেখলে আমিও অত্যন্ত তৃপ্তি বোধ করি।

—ওটা আমাদের সাবেক বাড়ি নয়। কয়েক বছর আগে ওর position দেখে বাবার আঁরি ভালো লাগে। ওটা উনি কিনেছেন। এতোদিন ত' ওটা মালি-মজুরের জিন্মাতে থেকে ভেঙে-ধ্বসে' একসা হ'য়ে যাচ্ছিলো। বাবার সখ হ'লো ওটাতে উনি কায়েমি হ'য়ে বসবেন। তাই ওটার গায়ে শুনছি নতুন করে' চূণ-বালি উঠেছে। বাড়িটা বিশাল—সামনে সমুদ্রের মতো মাঠ।

মানব টোপ্টে ছুরি দিয়া মাখন মাখাইতে-মাখাইতে কহিল,—বাড়িতে আর কে আছেন ?

—আর, আমার এক বিধবা পিসিমা ; গোরাও আছে নিশ্চয়।

—কে গোরা ?

এই সব অত্যাশঙ্কীয় খবর মানব আগে লয় নাই কেন ?

মিলি কলার খোসা ছাড়াইতে-ছাড়াইতে কহিল,—পিসিমা'র ছেলে। এই বোধহয় ন'য়ে পড়েছে। পুঁটি-মাছের মত চঞ্চল। ঐ ছেলেকেই পেটে নিয়ে পিসিমা বিধবা হ'ন। স্বামী মারা যাবার পর স্বশুরবাড়িতে গুর স্থান হ'লো না। বাবা-কাকাদের ঐ একটিমাত্র বোন—সবাইর ছোট। বাবাই তাঁর ছোট বোনকে আগলে ফিরছেন।

কলায় একটা কামড় দিয়া : দেখবে আমার পিসিমাকে। যেমন নিষ্ঠা তেমনি ধৈর্য্য। পিসিমাকে পেয়ে মায়ের দুঃখ আমি ভুলে আছি।

প্রত্যেকটি শব্দ মেহে ভিজাইয়া মানব কহিল,—মাকে তোমার মনে পড়ে ?

প্রথম প্রেম

চিবোনো বন্ধ করিয়া মিলি বলিল,—মনে পড়তে পারে না বটে, তবু আমি মনে-মনে মায়ের মুখ রচনা করি। বাবার জীবনে মায়ের যে দীর্ঘ ছায়া পড়েছে তার থেকে আমি তাঁর একটা শান্ত ও সুন্দর পরিচয় পাই।

বেলা এখন পড়িয়া আসিয়াছে, গাছের তলাগুলি মায়ের কোলের মতো ঠাণ্ডা। মানব কহিল,—তোমার বাবাকে আমার দেখতে ইচ্ছা করে।

মিলির হাসি কোণের সেই উদ্ধত দাঁতটি ছুঁইয়া ধীরে-ধীরে মিলাইয়া আসিল।

—ইচ্ছে ত' করে, কিন্তু যুগলমূর্তি দেখে তিনি যদি ঠ্যাঙা নিয়ে তেড়ে আসেন ?

মানব না-হাসিয়া মুখ গভীর করিয়া কহিল,—না, তিনি উপদ্রবই করতে পারেন না। রাত থাকতে উঠে যিনি সেতার বাজিয়ে উপাসনা করেন, তাঁর মনে নিশ্চয়ই এমনি একটি উদার শান্তি আছে যা আমাদের মিলনের পক্ষে অনুকূল বায়ুসঞ্চারণ করবে। স্ত্রীর বিরহ যার জীবনে এমন লাভণ্য বিস্তার করেছে তিনি কখনোই স্বয়ম্বুতা মেয়ের বিরুদ্ধে দাঁড়াবেন না।

চা-টা এইবার ঠাণ্ডা হইয়াছে; নিশ্চিন্ত হইয়া ঠোঁট ডুবাইয়া মিলি কহিল,—কিন্তু ষ্টিমারের ঐ পাকস্থলীটা ত' দেখলে? আমি কিন্তু তাতে বেশি জোর দিই না। আমি ভাবছি—

মিলি ষ্টোটে কামড় দিয়া ঠোঁট ও নাক ঢাকিয়া মানবের দিকে কেমন করিয়া চাহিল।

মানব কহিল,—তা ছাড়া কী আবার ভাববার আছে। তোমার

প্রথম প্রেম

বাবার কর্তৃত্ব ছাড়া আর-কিছু আমি মান্তই করবো না। তোমার বাবার বিরুদ্ধে যুদ্ধ করতে হ'লে বরং তাতে কিছু শ্রী থাকবে, অন্তে কেউ এতে মাথা গলাতে এলেই তা নির্বিবাদে গুঁড়ো হ'য়ে যাবে। আমি তখন দুঃশাসন।

তেমনি করিয়া চাহিয়া মিলি বলিল,—কিন্তু তার চেয়েও দুঃসহ দুঃখের কারণ ঘটতে পারে।

মানব প্রথমে কিছুই ভাবিয়া পাইল না; একেবারে জলে পড়িয়া ফ্যান্-ফ্যান্ করিয়া চাহিয়া রহিল। পরে কি-একটা কথা ভাবিয়া লইয়া উত্তেজনায় চায়ের তলানিটা ডেকের উপর ছুঁড়িয়া ফেলিয়া জোর-গলায় কহিল,—আর কিছুই ঘটতে পারে না।

ভীত, বিমর্ষকণ্ঠে মিলি কহিল,—তুমি যদি ঐ চায়ের তলানির মতো অমনি আমাকে ছুঁড়ে ফেলে দাও?

পীড়িতমুখে মানব কহিল,—তেমন কোনো সূচনা তুমি দেখেছ নাকি?

মানবের মুখ দেখিয়া মিলির কষ্ট হইতে লাগিল। তবু দৃঢ় হইবার ভাগ করিয়া বলিল,—আমার মাঝে আকৃষ্ট হ'বার কী-বা থাকতে পারে আমি ভেবে পাই নে। বাইরের জৌলুস যে-টুকুন আছে তা মিলিয়ে যেতে কতোক্ষণ!

—তুমি কি খালি বিধাতার সৃষ্টি নাকি,—আমার নও? আমি ত' আমার প্রতিমাকে বিসর্জন দেবার জন্তে তৈরি করি নি।

কেহ আর অনেকক্ষণ কথা কহিল না। ষ্টিমার সমানে চলিয়াছে। দুইজনের চোখের সামনে দিনের আলো তরল হইয়া আসিতেছে। পাখিদের দল বাধিয়া বিদায় নিবার সময় আসিল।

মানবের কাছে মিলি মাত্র সামান্ত নারী নয়—যে-নারীকে এতদিন

প্রথম প্রেম

সে ভাবিত ঝকঝকে গয়না আর চক্চকে শাড়ি। মিলি তাহার কাছে মূর্তিমতী প্রেম—পৃথিবীর আদিম নরের কাছে পরিধিহীন আকাশ। ঐ ভঙ্গুর মৃন্ময় দেহটি মানবের কাছে সমুদ্রের মত পরমতম বিষয়। যে নামহীন বিধাতা এতদিন অগোচরে কাল কাটাইতেছিলেন, তিনি সহসা মিলির দেহে বাসা নিলেন। নদীর উপরে এই ঘনায়মান সন্ধ্যা পার হইয়া মানব যেন বহুবিস্তীর্ণ পৃথিবী অতিক্রম করিয়া একা-একা কোথায় যাত্রা করিয়াছে!

মিলির হাতের উপর ধীরে-ধীরে হাত বুলাইতে-বুলাইতে মানব কহিল,—এই সন্ধ্যা হ'লো। অল্প-অল্প মেঘ জমছে। পূবে হাওয়া দিয়েছে। ঝড় না ওঠে।

মিলি কথা না কহিয়া সর্ব্বাঙ্গে সন্ধ্যার এই কোমল মুহূর্তটির খাস অনুভব করিতে লাগিল।

মানব বলিল,—সময়টা ভারি ভালো লাগছে। এই দুর্লভ সোনার সন্ধ্যাটি আমার মনে চিরকাল অক্ষয় হ'য়ে থাকবে। এমন বিশ্রাম জীবনে আর কোনোদিন পাইনি, মিলি।

আবহাওয়াকে সহজ ও সরল করিবার সুযোগ আসিয়াছে। মিলি কহিল,—তুমি যে দেখছি হঠাৎ বুড়িয়ে গেলে। এ কী কথা শুনি আজ 'মহুরের' মুখে! তুমি বিশ্রামের ভক্ত!

—আমরা আজকের দিনে প্রতিমুহূর্তে রোমাঞ্চ চাই বলে'ই প্রতিমুহূর্তে শ্রান্ত হচ্ছি। বিশ্রামের ক্ষণগুলিকে উপভোগ করার আর্ট ভুলে গেছি বলে'ই আমরা জগৎ জুড়ে নিরুদ্দেশ গতির ঝড় ভুলে দিয়েছি। কিন্তু তোমার কি মনে হয় না যে আজকের দিনে এরোপ্লেনে আল্পস্ ডিঙিয়েও আমরা গরুর গাড়ির যুগের চেয়ে বেশি সুখ পাই নি।

প্রথম প্রেম

মিলি মজা পাইয়া কহিল,—তোমার হঠাৎ এই পক্ষাঘাত শুরু হ'লো ? .

মানব তন্ময় হইয়া বলিয়া চলিল : যতোই আমরা ছোট্টার নেশায় ধূমকেতু সাজি না কেন, আমাদের মন আজো ছন্দের অনুবর্তী, মিলি । আমার কেন-জানি না এখন খালি এই কথাই মনে হচ্ছে, আমাকে হাউই-এর মতো মঙ্গলগ্রহের দিকে ছুঁড়ে দিলেও এই গা এলিয়ে বসে' থাকার চেয়ে বেশি রোমাঞ্চ আমি পাবো না । পুরাকালে পরীরা—যেমন ধরো Daphne—য়্যাপোলোর ভয়ে কেমন দিশেহারা হ'য়ে ছুটতো, খবর রাখো ত' ? আমরাও তেমনি ছুটছি—জীবনকে অবসন্ন হ'তে দেব না ভেবে । একটু খামতে পারলে হয় ত' দেখতাম Daphne'র মতো আমরাও পালিয়ে বেঁচে কখন ফুল হ'য়ে ফুটে উঠেছি । উদ্দাম ছোট্টার চেয়ে একটি গাঢ়তম মন্থরতম মুহূর্ত চের সুখের ।

—আপাততো নয় । মিলি বলিল,—বেশ ভালো করে'ই মেঘ জমছে । ঝড় উঠবে । যা ষ্টিমারের নাম ! আমায় ভয় করছে । যদি ষ্টিমার ডুবে যায় ।

—পাগল ! এ-ষ্টিমারের সারেঙ খুব ওস্তাদ সারেঙ । অনেক ঝড়কে সে হালের বাড়ি মেরে তাড়িয়ে দিয়েছে । ওঠ, একটু বেড়াই ।

—চাঁদপুর পৌঁছতে আর কতোকক্ষণ ?

ঘড়ির দিকে চাহিয়া : ঘণ্টা দেড়েক হয় ত' ।

—তা হ'লেই হয়েছে । বাবার মত নেবার আগেই এ-যাত্রা সমাধা হ'বে । ভগবানে বিশ্বাস কর ত' তুমি ? আমার মোটেই আসে না ।

মানব হাসিয়া উঠিল : ভগবান যে এতো বেরসিক নন সে-বিষয়ে তুমি নিশ্চিত থাকো ।

প্রথম প্রেম

—মরতে আমার সত্যিই গা কাঁটা দিয়ে ওঠে। আমাদের ইটালি যাওয়া বাকি আছে। যাবে ত' ?

মানব মিলির কতগুলি চুল মুঠির মধ্যে চাপিয়া ধরিয়া কহিল,—
মেঘনার ওপরে সামান্য মেঘ দেখেই তুমি শিউরে উঠছ !

—দাঁড়াও, চুলটা বাঁধি। বাঁধাগুলি এলো—গুছোতে হ'বে না ?
হোল্ড-অল্টা তখন শুধু-শুধু মেললে। বাঁধো এবার।

—এখনো দেরি আছে। দাঁড়াও, একটা মজা দেখ।

মিলি ফিরিল।

মানব তাসগুলি হাওয়ার মুখে ছুঁড়িয়া দিল। মনে হইল এক
ঝাঁক উড়ন্ত পাখি।

মুখ টিপিয়া মিলি হাসিল। কহিল,—তোমার পুঁটলি থেকে
নোটগুলি বের করে' অমনি ছুঁড়ে দি।

তারপর বৃষ্টি নামিল। অন্ধকারের চেউয়ের উপরে দূরে-দূরে ছুয়েকটি
বাতির কণা ছলিতেছে।

মানব কহিল,—বৃষ্টি দেখে ভয় পাবার কিছু নেই। বৃষ্টি না এলে
মেঘনা সর্বান্ধসুন্দরী হ'তে পারে না। দেখ, কতো দূর পর্য্যন্ত সার্চ-লাইট
পড়েছে।

মিলি আর কথা কয় না। নদীর সীমা আর দেখা যায় না। মনের
সঙ্গে মিলিয়া নদীও বুঝি তট হারাইয়াছে।

খুব কাছে মুখ সরাইয়া আনিয়া মানব কহিল,—ভয় করছে ?

মিলি আবদারের সুরে ভেঙচাইয়া কহিল,—খিদে পাচ্ছে ? চোখ
চুলছে ? দেখ না তোমার ঘড়িটা ? দিনে এতোখানি স্নো যায়—
কলকাতার থাকতে সারিয়ে আনোনি কেন ?

প্রথম প্রেম

কখন আবার দেখিতে-দেখিতে বৃষ্টি খামিয়া গেল। সঙ্গে-সঙ্গেই
টিমার যেন আনন্দে বাঁশি বাজাইল।

—এই, এসে গেছে চাঁদপুর!

মানব কহিল,—না, এখনো দেরি আছে।

—ছাই দেরি। শিগ্গির জিনিস-পত্র গুছিয়ে ফেলো বলছি। সঙ্গে
আবার চালু করে' এই লাঠিটা এনেছ কেন?

—বৃষ্টি তাড়াবার জন্ত।

—না, আমাকে তাড়াতে?

মানব মিলিকে ধরিয়া ফেলিল। বৃষ্টির কাছটিতে ঘন করিয়া টানিয়া
আনিয়া কি যেন বলিতে গেল, কিন্তু কিছুই বলা হইল না।

মিলি কহিল,—থাক, হয়েছে। ছাড়ে।

মানব তাহাকে আস্তে ছাড়িয়া দিল।

নোয়াখালিতে ট্রেন আসিয়া দাঁড়াইল—তখনো বেশ অন্ধকার আছে ।
গাড়ি দাঁড়াইতেই বুড়া চাকর ভীম প্রত্যেকটি কামরার জান্নায় মুখ
বাড়াইয়া মিলিকে খুঁজিয়া ফিরিতে লাগিল ।

মিলি তখনো ঘুমাইতেছে ; তাহার গায়ে ঠেলা মারিয়া মানব কহিল,
—গাড়ি এইখানেই থতম্ । নামতে হ'বে না ? ওঠ, পাততাড়ি গুটোও ।
দেখি, তোমাকে নিতে কেউ এলো কি না ।

জান্না তুলিয়া মানব মুখ বাড়াইল ।

—তুমি এ-দেশের কাকে চিন্বে ? বলিয়া মিলিও মানবের পাশে
মুখ বাড়াইল । তারপরে ঈষৎ গাল ফিরাইয়া : আমাদের কেউ এখন
একটা স্যাপ্ নেয় না ? ঠিক টুরিষ্টের মতো লাগছে ।

ভীম নিরাশ হইয়া লণ্ঠন হাতে করিয়া ফিরিয়া যাইতেছিল ; মিলি
গাড়ি হইতে নামিয়া আসিয়া কহিল,—এ কেমন ধারা হ'লো ? বাবা
কাউকেও পাঠালেন না ?

মানব কুলির মাথায় স্যুটকেস দুইটা চাপাইয়া দিতে-দিতে কহিল,—
পা দিতে-না-দিতেই অভ্যর্থনার চমৎকার আভাস পাচ্ছ । আমি সঙ্গে
আসছি এ-কথা সখ করে' লিখতে গেলে কেন ?

চারদিকে চাহিতে-চাহিতে মিলি বলিল,—এ ককখনো হ'তে পারে
না । বাবা অন্তত গাড়ি পাঠিয়ে দিয়েছেন ।

—এখনিই গিয়ে লাভ নেই । অন্তত ভোর হ'লে ব্যাপারটা পরিষ্কার
করে' বুঝিয়ে বলতে পারবে । সন্ধ্যা ঘুম থেকে উঠেছেন, এখন ঝুঁকে
বিরক্ত করাটা ঠিক হ'বে না । বরং ওয়েটিং-রুমে—ইজিচেয়ার আছে ত' ?
—যে রোথো স্টেশন ! এ কোন্ ভূতের দেশে নিয়ে এলে ? বরং

প্রথম প্রেম

চলো ওয়েটিং-রুমে,—মশার সঙ্গে-সঙ্গে আমরাও খানিকক্ষণ গুঞ্জন করি।

কুলিকে উদ্দেশ্য করিয়া মিলি কহিল,—ষ্টেশনে গাড়ি আছে রে ?

একটা গাড়োয়ানই ঝাঁপী পাকড়াইতে এদিকে আসিতেছে দেখা গেল। হাতে তাহার চাবুক—অর্থাৎ মেহেদি গাছের লিকলিকে একটা ডাল ; কিন্তু কুলি বলিল, ও হাঁকায় গরুর গাড়ি, বাবুদের নেহাৎই ছুরদৃষ্ট।

মানব উৎফুল্ল হইয়া বলিল,—আপ্-টু-ডেইট্ হও, মিলি। গরুর গাড়িই সই। বিছানা বিছিয়ে একটু ঘুমোনোও যাবে, আর বাড়ি যেতে-যেতে ফর্সা। এক ঢিলে দুই পাখি।

অগত্যা মিলি গরুর গাড়ির গাড়োয়ানকেই ডাকিয়া জিজ্ঞাসা করিল,—হীরালাল বাবুর বাড়ি চেন ?

এতক্ষণে বুঝি ভীমচন্দ্রের লুঁস হইল। সে এতক্ষণ লণ্ঠন উচাইয়া মিলিকেই দেখিতেছিল— তাহার দিদিমণি যে রাতারাতি মেমসাহেব হইয়া উঠিয়াছে বুড়া চক্ষু কচলাইয়াও তাহা বিশ্বাস করিতে পারে নাই। তাহা ছাড়া সঙ্গে এ কোন নবাবজাদা আসিয়াছেন, দিদিমণি স্বচ্ছন্দে তাঁহার হাতে একটা ঝটকা টান মারিয়া কহিল,—চলো গরুর গাড়িতেই।

কর্তার নাম শুনিয়া ভীমের সন্দেহ ঘুচিল। আগাইয়া আসিয়া কহিল,—আমিই ত' এসেছি।

—এতোক্ষণ ঘুমুচ্ছিলে বুঝি ? মিলির মুখ খুসিতে ভরিয়া উঠিল : বাঁচলাম। আরো আগে আসতে পারো নি ?

—কতো আগেই ত' এসেছিলাম। কিন্তু আপনি যে ফাষ্টো কেলাসে আছেন তা কে জানতো ? সোভান্ মিঞা গাড়ি নিয়ে বসে' আছে।

প্রথম প্রেম

মানব তখনো গরুর গাড়িতে উঠিবারই সরঞ্জাম করিতেছিল। তাহাকে ডাকিয়া মিলি বলিল,—লোক পেয়েছি। চলে' এসো। গাড়ির আর দরকার নেই।

মানব কয়েক পা ফিরিয়া আসিয়া কহিল,—এ ত' গাড়ি নয়, রথ। চলো, একশো বছর আগে পিছিয়ে যাই একটু। সেই ত' আধুনিক হওয়া।

—কিন্তু বাবা যে গাড়ি পাঠিয়ে দিয়েছেন।

—ঐ গাড়ি চড়ে' মাল-পত্র নিয়ে তোমার লোক আগে বেরিয়ে যাক, আমরা পরে যাচ্ছি। নদীতে চোখের সামনে সন্ধ্যা দেখেছিলে, এবার দেখবে ভোর।

প্রস্তাবটায় নবীনতার উন্মাদনা আছে বটে, কিন্তু বাবাকে যত তাড়াতাড়ি পারে দেখিবার জন্য মিলির চোখের দৃষ্টি এখন ব্যাকুল, উধাও। সে কহিল,—না। বাবা গাড়ি পাঠিয়ে দিয়েছেন, সেই গাড়িতেই যাবো। গরুর গাড়িতে ধুঁকতে-ধুঁকতে আমি যেতে পারবো না। গিঁটে-গিঁটে ব্যথা ধরে' যাক! চলে' এসো। মালগুলি তুলে ফেলো, ভীম।

মিলি তাহার চেনা মাটিতে পা দিয়াছে—তাই তাহার কথায় আদেশের সামান্য একটু তেজ আছে। মানবের প্রভুত্ববোধে অলক্ষিতে যেন একটু ঘা লাগিল। একবার বলিতে ইচ্ছা হইল: তোমরা যাও, আমি আসছি পিছে। কিন্তু বিছানা পাতিয়া মিলি আসিয়া পাশে না বসিলে এই অভিনব অভিযানের অর্থ কী! কথাটা বলিলে নেহাৎই একটা খেলো অভিমানের মতো শোনাইবে। অথচ এতো সহজে হারিতে তাহার ইচ্ছা হইল না।

প্রথম দেখাতে মানবের প্রতি ভীমের মন ভক্তি-গদগদ হইয়া উঠে

প্রথম প্রেম

নাই—ঐ লোকটিই তাহার দিদিমণিকে আড়াল করিয়া রাখিয়াছিল।
ফাটো কেলাসে আসিয়া এখন কি-না গরুর গাড়িতে চড়বে! নিম্নস্বরে
কহিল,—সঙ্গে উনি কে, দিদিমণি?

মানব কহিল,—দয়া করে' দাদা বলে' পরিচয় দিয়ো না।

মিলি গায়ের উপর আঁচলটা ঘন করিয়া টানিয়া দিয়া কহিল,—শীত
পড়ে' গেছে দেখছি এখানে। মাল উঠেছে সব? আর মায়া বাড়িয়ে
কী হ'বে? চলো।

পরিচয় দিবার কুণ্ডলটুকু ভীমের কেমন অদ্ভুত ঠেকিল। লণ্ঠনটা
সে নিভাইয়া দিয়া কহিল,—সব শুদ্ধু সাতটা উঠেছে। আর কিছু
নেই ত'?

চলিতে-চলিতে হঠাৎ ঘুরিয়া দাঁড়াইয়া মিলি কহিল,—আমার
আংটি! আংটিটা কোথায় পড়ে' গেছে।

—কিসের আংটি?

—সেই যে তুমি ষ্টিমারে পরিয়ে দিয়েছিলে। এই আঙুলটাতে।

—পড়ে' গেছে?

মানবের মুখ বিবর্ণ হইয়া উঠিল। সেই বিবর্ণতা ধরা পড়িল
তাহার কণ্ঠস্বরে।

মিলি কহিল,—লণ্ঠনটা ফের আলাও, ভীম। দেখি গাড়িতে কোথাও
পড়েছে নাকি। তখনই ভেবেছিলাম বুড়ো আঙুল ছাড়া ও-আংটি
কোথাও বসবে না। যে মোটা-মোটা আঙুল। কেন যে সখ করে'
পরিয়ে দিতে গেলে!

লণ্ঠন লইয়া গাড়ির আনাচ-কানাচ তন্ন-তন্ন করিয়া খোঁজা হইল।
ঐ দিকে আবার সোভান মিঞা হাঁক পাড়িতেছে।

প্রথম প্রেম

—দাঁড়াতে বল না একটু। কারুরই যেন তর্ক সয়না। কেন যে সঃ করে' আংটি পরিয়ে দেওয়া! গেলো হারিয়ে।

ফিরিয়া আসিয়া ম্লান-মুখে মিলি কহিল,—পাওয়া গেলো না।

—আমি তা জান্তাম।

রিক্ত আঙুলটাতে ডান-হাতের আঙুল বুলাইতে-বুলাইতে মিলি কহিল,—কত দাম আংটিটার?

ততোধিক ঔদাসীন্নে মানব বলিল,—ষৎসামান্য। টাকা ষাট হ'বে।

স্বস্তির নিশ্বাস ফেলিয়া মিলি কহিল,—মোটো? অমন কতো ষাট টাকা তুমি জলে ফেলে দিয়েছ।

—অনেক।

দুইজনে ঘোড়ার গাড়িতে গিয়া উঠিল। মিলি বসিল মানবের মুখোমুখি সিটটাতে।

কাদার রাস্তায় গাড়ির চাকা বসিয়া যাইতেছে,—ঘোড়া দুইটার পিঠে চাবুক মারিবার জায়গা না-ই বা থাকিল; তবুও গাড়োয়ান রেহাই দিতেছে না। রাত্রে বৃষ্টি হইয়া গিয়াছে বলিয়া ব্যাঙেরা চারদিক থেকে মহা সোরগোল সুরু করিয়াছে—রাস্তার পারে করবী-গাছের ঝোপে অসংখ্য জোনাকি। ঝিঁ-ঝিঁর আওয়াজে কানে তালা লাগে। কেহ কোনই কথা কয় না—গাড়ির খোলা দরজা দিয়া ভিজা অন্ধকারে অস্পষ্ট গাছ-পালার দিকে তাকাইয়া আছে।

কত দূর আসিতেই একটা পাঁউরুটির দোকানে কুপি জলিতে দেখা গেল।

এইবার মিলি কথা কহিতে পারিবে। মানব কতক্ষণ চুপ করিয়া থাকিতে পারে সে অস্থির হইয়া তাহাই এতক্ষণ পরীক্ষা করিতেছিল।

প্রথম প্রেম

তাড়াতাড়ি সে সামনের সিট ছাড়িয়া মানবের পাশে প্রায় তাহার কোলের উপরই বসিয়া পড়িল। নিঃশব্দে কহিল,—আংটিটা হারিয়ে ফেলেছি বলে' তোমার লাগছে ?

তেমনি উদাসীন হইয়া বাহিরের দিকে চাহিয়া থাকিয়া মানব কহিল,—না, কী বা ওটার দাম! অমনি কতো টাকা আমি জলে ফেলেছি।

মিলি বিমর্ষ হইয়া কহিল,—আমাকে কি শকুন্তলার মতো আংটি দেখিয়ে পরিচয় দিতে হ'বে নাকি যে ওটার শোকে মুখ গোমরা করে' বসে' থাকবো ?

—মুখ গোমরা করে' কে বসে' আছে ?

—তুমি। আমার চেয়ে তোমার ঐ আংটিটাই বড়ো হ'লো নাকি ?

কোলের উপর মিলি মানবের বাঁ-হাতখানি টানিয়া লইল।

হাতের স্পর্শটি শিথিল হইয়া আসিতেছিল। মানব তাড়াতাড়ি মিলির অভিমানী হাতখানা দুই হাতের মধ্যে নিবিড় করিয়া ধরিয়া স্তব্ধ হইয়া রহিল।

পথ আর ফুরায় না। কোথা দিয়া যে কোথায় নিয়া চলিয়াছে দিশা পাওয়া ভার। অন্ধকারে সমস্ত কিছু ঝাপসা।

একটা বাঁক নিতেই ছ-ছ করিয়া হাওয়া ঢেউর মতো তাহাদের ডুবাইয়া ফেলিল। সামনেটা হঠাৎ যেন প্রকাণ্ড একটা আকাশ হইয়া গিয়াছে। কোথাও এতটুকু গাছ-পালার চিহ্ন নাই—একেবারে ফাঁকা।

দুইজনে চোখোচোখি হইল।

মানব কহিল,—এই বুঝি নদী ?

মিলি কহিল,—চর। জলের আর চিহ্ন নেই। নদী এখন বাঁয়ে

প্রথম প্রেম

বঁকে গেছে। জোয়ারের সময় ঝিল-ঝিল করে' জল আসে শুনেছি।
পায়ের পাতা ডোবে মাত্র। দুয়েকটি নতুন ঘর উঠেছে দেখছি।

শুকনো নদীর সঙ্গে-সঙ্গে কি-একটা বিশ্বত ব্যথার সুর মানবকে ঘিরিয়া
ধরিল। কিন্তু স্পষ্ট করিয়া ভাবিবার তাহার অবসর নাই। সহসা
তাহার গায়ে ঠেলা মারিয়া মিলি কহিল,—ঐ, ঐ আমাদের বাড়ি দেখা
যাচ্ছে। আমি ও-বাড়িতে একবার মাত্র এসেছিলাম খুব ছেলে-বেলায়।
কী প্রকাণ্ড একেকটা কোঠা, আমরা দস্তুরমতো লুকোচুরি খেলতে
পারবো। দেখতে পাচ্ছ ?

ঘননিবিষ্ট কতগুলি গাছের ফাঁকে আব্ছা করিয়া বাড়ি একটা দেখা
যায় বটে। কিন্তু কোথা দিয়া যে সে কোথায় চলিয়াছে মানব কিছুই
আয়ত্ত করিতে পারিল না।

শেষকালে গাড়িটা বাড়িরই সিংহ-দরজায় আসিয়া থামিল।

অন্ধকারে মনে হয় যেন রূপ-কথার বিশাল রহস্যপুরী। গাড়ি হইতে
নামিয়া মানব একদৃষ্টে বাড়িটার দিকে চাহিয়া রহিল। রাত থাকিতে
এমন সময় কোনো দিন সে বিছানা ছাড়িয়া আকাশের নিচে দাঁড়ায়
নাই—তাই যেন সে কিছুই ধারণা করিতে পারিল না। শুধু একটা
অকারণ বেদনা তাহার মনকে ক্লান্ত করিয়া তুলিয়াছে।

সামনের কম্পাউণ্ডে হীরালালবাবু চটি-পায়ে পাইচারি করিতেছিলেন।

মিলি আসিয়া পায়ের উপর গড় হইতেই হীরালালবাবু তাহাকে বুকে
টানিয়া লইলেন। পিঠে হাত বুলাইতে-বুলাইতে কহিলেন,—রাস্তায়
কোনো কষ্ট হয় নি ?

—বিকলে আকাশে ভীষণ মেঘ করেছিলো। ভাবলাম হ'ল বৃষ্টি
কাণ্ড। পিসিমা কোথায় ? এখানে কবে বাগান করলে, বাবা ?

প্রথম প্রেম

দেখাদেখি মানবকেও প্রণাম করিতে হইল ।

হীরালালবাবু তাহার মাথায় আশীর্বাদ-হস্ত রাখিয়া কহিলেন,— একেবারে ভেতরে চলে' যাও । সোজা শুয়ে পড়ো গিয়ে । তোমাদের জন্তে বিছানা তৈরি ।* ঘর দেখিয়ে দে, ভীম । এক ফোঁটাও যে ঘুমুতে পারোনি মুখের চেহারা দেখেই বুঝতে পারছি । এখনো দিব্য রাত আছে—বেশ একটু গড়িয়ে নিতে পারবে ।

মিলি কহিল,—আমরা এখন চা খাবো, বাবা ।

—বিছানায় বসে' বসে'ই খাবে'খন । নিরু সব ঠিকঠাক করে' রেখেছে । বাইরে দাঁড়িয়ে থেকে আর হিম লাগিয়ো না । নিয়ে যা, ভীম । আলোটা জালিয়েছিস্ ?

—আর তুমি ?

—আমি আরো একটু বেড়াবো ।

ভীম পথ দেখাইয়া নিয়া চলিল ।

মিলি মানবের পাশে আসিয়া কহিল,—কেমন লাগছে ?

মানবের প্রেতাঙ্গা যেন উত্তর দিল : ঠিক কিছু বুঝতে পারছি না ।

বারান্দা পার হইয়া ভিতরের দালানে পা দিতেই দেখা গেল পিসিমা কাঠের একটা বড়ো টেবিলের উপর ঠোঁড় ধরাইয়াছেন । পেছনে পায়ের শব্দ শুনিতেই খুসিতে উজ্জল হইয়া তিনি ঘুরিয়া দাঁড়াইলেন । মিলি প্রণাম করিয়া কহিল,—তুমি এতো সকালেই উঠেছ ? বাবাকে লুকিয়ে ছু' পেয়লা চা চট্ করে' দিতে পারবে আমাদের ?

মানবও যজ্ঞচালিতের মতো প্রণাম করিয়া উঠিল ।

পিসিমা হাসিয়া কহিলেন,—ভীম এখন গিয়ে গরু বের করবে ।

প্রথম প্রেম

টাটকা দুধে তবে চা হ'বে। তোমরা ততোক্ষণ গড়িয়ে নাও একটু। এই হ'ল বলে'।

—একটু র' পেলেই বা মন্দ হ'ত কী। কী বলো ?

মানব কিছুই বলিতে পারিল না। শূন্যদৃষ্টিতে কোন্ দিকে যেন চাহিয়া আছে।

মানবের কাছ থেকে সাড়া না পাইয়া মিলি কহিল,—গোরা ঘুমিয়ে আছে বুঝি ? ওর জন্তে এয়ার-গান্ এনেছি একটা। খবরটা ওকে দিয়ে আসি।

ষ্টোভের উপর কেটলি চাপাইয়া পিসিমা কহিলেন,—খবর পেলে তোকে আর ও শুতে দেবে না। কেরোসিন কাঠের বাক্সে প্রকাণ্ড এক মিউজিয়ম বানিয়েছে, তাই নিয়ে এখুনি হুলস্থূল বাধাবে। আরেকটু সবুর কর। ভোর হোক।

মিলি একটা চেয়ারে বসিয়া জুতার ঝ্যাপ্ খুলিতে-খুলিতে কহিল,—আমার কোন ঘর ? কোণেরটা ? ওঁর ?

প্রত্নতাত্ত্বিকের মতো সূক্ষ্ম দৃষ্টিতে মানব ঘরের দেয়াল পর্য্যবেক্ষণ করিতেছে।

—ভীম দেখিয়ে দেবে'খন। কোথায় গেল ও ? তুমি এসো আমার সঙ্গে। এই দিকে।

মানবকে বলিয়া দিতে হইবে না।

বাহির হইতে দরজা ভেজাইয়া পিসিমা অদৃশ্য হইলেন ।

প্রকাণ্ড ঘর—মধ্যখানে স্প্রিঙের খাট পাতা । বলক-দেওয়া দুধের মতো ধবধবে বিছানা—শিয়রে ছোট একটা টিপয়ের উপর বাতির একটা ষ্ট্যাণ্ড । বাতিটা সজোজাত শিশুর চোখের মতো মিটমিট করিতেছে । নূতন চুনকামে দেয়ালগুলি অতিমাত্রায় পরিচ্ছন্ন—হাত ঠেকাইলেই যেন শিহরিয়া উঠিবে ।

ঘরের মধ্যে আসিয়া সে বিমূঢ়ের মতো দাঁড়াইয়া পড়িল । আর এক পা-ও চলিবার তাহার ক্ষমতা নাই । সে শুইবে, না, বাতিটা জোর করিয়া নিভাইয়া দিবে, না, দরজা ঠেলিয়া উর্দ্ধ্বাশ্বাসে ছুটিয়া বাহির হইয়া যাইবে—কিছুই ঠিক করিতে পারিল না । হঠাৎ নজরে পড়িল ও-পাশের জান্না একটা খোলা—অন্ধকার ফিকে হইয়া আসিতেছে । বাহিরের আলো সে সহ করিতে পারিবে না । খেয়াল হইল জান্নাটা বন্ধ করিতে হইবে ।

কিন্তু জান্না বন্ধ করিতে আগাইতে তাহার সাহস হয় না । ভয় করে । স্পষ্ট মনে হয় কে যেন জান্নার বাহিরে তাহার জন্ম দাঁড়াইয়া আছে । স্পষ্ট । তাড়াতাড়ি সে দেয়ালের কাছে সরিয়া আসিল । দেয়ালটা ঠাণ্ডা । কাহার চোখের জল দিয়া তৈরি । উঃ, কী হাওয়া । হ্যাঁ, সত্যিই ত', কে যেন কাঁদিতেছে ।

দুই হাতে মুখ ঢাকিয়া মানব বিছানার উপর লুটাইয়া পড়িল । বালিশে মুখ ডুবাইয়া উপুড় হইয়া শুইয়া তাহার চোখের দৃষ্টি অন্ধ করিয়া ফেলিল । মনে হইল মৃত্যুবিবর্ণ চোখে শিয়রের বাতিটা তাহাকে লক্ষ্য করিয়া ব্যঙ্গ করিতেছে । হাত তুলিয়া বাতিটা নিভাইতে যাইতেই ধাক্কা লাগিয়া মেঝেতে পড়িয়া সেটা চুরমার হইয়া গেল ।

প্রথম প্রেম

ঘরের ভিতর কে যেন ঢুকিয়াছে ।

বালিশে মুখ ডুবাইয়াই রুদ্ধ ভীত স্বরে মানব প্রায় চেঁচাইয়া উঠিল :
কে ?

—আমি পিসিমা । বাতিটা পড়ে' ভেঙে গেলো বুঝি ?
মানব আশ্বস্ত হইল ।

—তা যাক্ । তুমি ঘুমোও । আমি বাঁটা এনে কাঁচগুলি জড়ো
করে' রাখছি । না, না, তোমার উঠতে হ'বে না ।

পিসিমা চলিয়া গেলে মানবের আবার ভয় করিতে লাগিল । বালিশ
হইতে কিছুতেই সে মুখ তুলিতে পারিল না ।

একমনে মায়ের মুখ স্মরণ করিতে-করিতে আস্তে-আস্তে শরীরের
কঠিনতা শিথিল হইয়া আসিল । পিসিমাকে আগেই বলিয়াছিল : জান্‌লাটা
বন্ধ করে' দিন্ । হাওয়া ত' নয়, তুফান । বাহিরে কোথায় ভোর
হইতেছে জানিয়া কাজ নাই । মানব যেন নিমেষে পূর্বজন্মলোকের
অন্ধকারে অবতীর্ণ হইয়াছে ।

মিলি একটুখানি শুইতে-না-শুইতেই উঠিয়া পড়িয়াছে ।

—পিসিমা, চা ?

একমাথা রুক্ষ চুল ও এক-গা এলো শাড়ি লইয়া মিলি দালানে
ছুটিয়া আসিল ।

পিসিমা কহিলেন,—এই তোর ঘুম হ'ল ?

—চা না খেলে কি ঘুম হয় ? দাঁও শিগ্গির । এটা শুধু ফাউ হচ্ছে ।
চান করে' এসে রিয়েন্ চা খাবো ।

পিসিমা! কাপ্‌এ চা ঢালিতে লাগিলেন : মানব এখনো ওঠে নি বুঝি ?

—ওঠাই গিয়ে ।

প্রথম প্রেম

—না, না, যুচ্ছে।

চারে চুমুক দিয়াই কাপুটা নামাইয়া রাখিয়া মিলি কহিল,—যাই, গোরাকে তুলে আনি।

গোরা নিজেই আসিয়া হাজির। লজ্জায় ও খুসিতে লাল হইয়া মিলির ডান-হাতটা টানিয়া ধরিয়া কহিল,—আমাকে এতোকণ জাগাও নি কেন? ভীমের সঙ্গে ষ্টেশনে যাবো বললাম, মা কিছুতেই যেতে দিলো না।

হাতে একটা কাঁকুনি দিয়া মিলি কহিল,—তোমার জন্তে একটা জিনিস এনেছি, গোরা। কী বল দিকি?

গোরা হাসিয়া বলিল,—লজেন্স্‌এর শিশি নয় ত'? তোমার যেমন বুদ্ধি, হয় ত' এক পাত জলছবি, নয় ত' একটা হাফ-প্যান্ট্‌ সেলাই করে' এনেছ।

—না রে, দুষ্টু। একটা বন্দুক।

—বন্দুক? গোরার চোখ দুইটা বড় হইয়া উঠিল : সত্যি কি আর! খেলনা, না?

—সত্যিকারের বন্দুক দিয়ে তুই কী করবি?

—বা, আমাদের পুকুর-পারে দস্তুরমতো সেদিন নেকড়ে-বাঘ এসেছিলো। শেয়ালগুলো ত' উঠানের ওপর এসেই হল্লা করে। তারপর পাখি! পাখির মাংস কোনোদিন খেলাম না, মেজ-দি। যাই হোক, বার করে শিগ্গির। শব্দ হ'বে ত'?

গোরা মিলির আঁচল ধরিয়া টানাটানি শুরু করিল।

তাহার মা ধমক দিয়া উঠিলেন : আগে মুখ ধুয়ে আয় বলছি। এক-বাটি গরম দুধ খেয়ে তবে কথা। রোজ সকালবেলা দুধের বাটি নিয়ে আমাকে আনায়।

প্রথম প্রেম

—আসছি মুখ ধুয়ে। মোটে ত' এক বাটি দুধ। সত্যিকারের বন্দুক পেলে কড়া-শুকু খেয়ে ফেলতে পারি।

রোদ উঠিয়াছে। হীরালালবাবু বাগান তদারক করিতে বাহির হইয়াছেন। বাগানের মালীকে ডাকিয়া কহিলেন,—জেলে ডেকে আনো জলদি। কিছু মাছ ধরাতে হ'বে। যুগলের বাচ্চা নিশ্চয়ই এখন বড়ো হয়েছে। পেঁপে কিছু পাকলো কি না দেখি গে।

গোরার মিউজিয়ম দেখা সারা হইল। যত রাজ্যের বিষ্ণুক, কড়ি, শামুক, লাট্টু, ভাঙা কাঁচ, পাঁচ-ফলা ছুরি, শ্মশান থেকে কুড়াইয়া আনা হাড়ের টুকরো। সমস্ত কিছুর সঙ্গেই গোরা একটা করিয়া গল্পের লেজুড় জুড়িয়াছে—তাহাতে যেমন কল্পনার বিভীষিকা আছে, তেমনি আছে মজা।

—এই যে ঘোড়ার খুর দেখছ মেজ-দি, ওটা হচ্ছে চৈতকের। প্রতাপাদিত্য যে একসময় ঐ বালির রাস্তা ধরে' বেড়াতে এসেছিলেন। আর এই যে পেতলের আংটিটা দেখছ ওটা সতীর বাঁ-পায়ের কড়ে' আঙুলে ছিলো। বিষ্ণু যখন তার চক্র দিয়ে সতীকে কেটে ফেললেন, আংটিটা পড়লো এসে আমাদের কলাবাগানের ঝোপে। ওখানে একটা মন্দির করা উচিত—

এমনি সব গল্প।

কে-এক পাড়ার সাথী গোরাকে ডাকিতে আসিয়াছে। পেয়ারা গাছের ডাল কাটিয়া ডাং বানাইতে হইবে। এয়ার-গান্টা লইয়া লাফাইতে-লাফাইতে গোরা বাহির হইয়া গেল।

এ কেমন ধারা ঘুম! অব্যবহিত মাঠের উপর এমন সূর্য্যোদয় সে কবে দেখিয়াছে? রাতের আকাশের তারার মতো কতো পাখির কতো

প্রথম প্রেম

রকম স্বর ! মোটর-বাইকের ঝকঝকানি শুনিতে-শুনিতেই ত' কান দুইটা ঝালাপালা হইয়া গেল । বিশ্রামেও একটা শ্রী থাকা উচিত !

ঘাটনার কাছে হিঞ্জে শাকের ভিড় জমিয়াছে । নিচের ধাপে বসিয়া দুই পায়ে মিলি তাহা সরাইয়া দিতে লাগিল । অনেক দিন সে সাঁতার কাটে নাই । সে যে ডুব-সাঁতারে পুকুরটা পার হইয়া যাইতে পারে আর সবাইর চক্ষু এড়াইয়া মানব তাহা দেখিয়া গেলে পারিত । কিন্তু জলে বেশিক্ষণ থাকিতে তাহার ইচ্ছা হইল না ।

দরজা এখনো খোলে নাই । চুল না আঁচড়াইয়াই মেঝের উপর ভিজা পায়ের দাগ ফেলিতে-ফেলিতে মিলি নিঃশব্দে দুয়ার ঠেলিয়া ভিতরে প্রবেশ করিল । ক্লান্ত একটা পশুর মতো মানব তখনো ঘুমাইতেছে ।

ঘরে এতক্ষণ রোদ আসে নাই বলিয়াই । মিলি জান্না দুইটা খুলিয়া মানবের দিকে তাকাইল । তবু সে একটু চঞ্চল হইয়া উঠিল না ।

মিলি নিঃশব্দে তাহার শিয়রে আসিয়া বসিল । বালিশের উপর রোদের ও-দিকে মুখ তাহার কাৎ হইয়া আছে,—মিলি নিচু হইল,—গাঢ় নিশ্বাসের শব্দে সে মাঝপথে হঠাৎ স্তব্ধ হইয়া গেল । ঘুমে মানুষের মুখ এমন করুণ ও অসহায় দেখায় নাকি ? মানব বোধহয় এখন কোনো দুঃখের স্বপ্ন দেখিতেছে । একান্ত মমতায় মিলি তাহার কপালে হাত রাখিল ।

স্পর্শে জাছু আছে । মানব চোখ মেলিয়াছে ।

মোমের মতো পরিষ্কার বিছানা—সাবানের মতো নরম । জান্নার ওপরে ঐ বুঝি সেই সিঁদুরে আমগাছটা দেখা যায়—ঝড়ের সন্ধ্যায় যাহার তলায় সে মায়ের সঙ্গে আম কুড়াইয়াছে । সেই বুড়া নারকেল

প্রথম প্রেম

গাছটা বয়সের ভারে বাঁকা হইয়া এখনো বাঁচিয়া আছে। শিয়রে কে বসিয়া? মা নয় ত'?

না, মিলি। মা হয় ত' কোনো সকালবেলা তাহাকে জাগাইতে আসিয়া এমনি শিয়রে বসিয়া তাহার কপালে হাত বুলাইয়া থাকিবেন। স্পষ্ট তাহার মনে পড়ে না বটে, কিন্তু এমন ঘটনা ঘটে নাই-ই বা কে বলিল?

মানব ধড়মড় করিয়া উঠিয়া পড়িল : অনেক বেলা হ'য়ে গেছে যে।

মিলি হাসিয়া কহিল,—না, তোমার জন্ম বসে' আছে।

—তুমিও এতোক্ষণ ঘুমুচ্ছিলে নাকি? আমাকে জাগাতে পারো নি?

—জাগাবো কি? তোমার স্বাস্থ্যের যে ব্যাঘাত হ'বে। আমিই বরং সাত-সকালে পুকুরে নেমে স্বাস্থ্যক্ষয় করলাম।

মানব বিছানা হইতে এক লাফে নামিয়া পড়িয়া বাহিরে চলিয়া আসিল।

সেই! অবিকল! অতীতের স্মৃতির অন্ধকারে আর তাহাকে হাতড়াইয়া ফিরিতে হইবে না। ভিতরের বারান্দায় কড়িকাঠের ফাঁকে-ফাঁকে খড়কুটা গুঁজিয়া সার বাঁধিয়া সেই চডুই-পাখিদের বাসা। অগণিত সন্ততির ভিড়। সব সেই—খালি পেন্সিলের রেখার উপর রঙ বুলানো হইয়াছে। রান্নাঘরের সেই বাঁধানো দাওয়া—ঐখানটার মেঝে খুঁড়িয়া সে মার্কেল-খেলার গাঝু করিয়াছিল—সেটা এখনো অটুট আছে। ঐ থামটায় ঠেস দিয়া না বসিলে তাহার খাওয়া হইত না—এই ডালিম-গাছটার তলায় সে একবার পড়িয়া গিয়া বিছানায় সাত দিন শুইয়া ছিল। তাহারই মত কে-একটি ছেলে—এই বোধকরি গোরা—পেয়ারা গাছটায় দোল খাইতেছে। সেই ভেলু কুকুরটা এখন নিশ্চয় আর বাঁচিয়া নাই।

প্রথম প্রথম

এই বাড়ি হইতেই এক দিন সে মায়ের হাত ধরিয়া বাবার সঙ্গে শূন্য হাতে বাহির হইয়া পড়িয়াছিল। ঐ সেই রাস্তা—সাদা মাটির রাস্তা—কতদূর গিয়া নদীর চরের সঙ্গে সমতল হইয়া গিয়াছে।

হীরালাল—হ্যাঁ, তাহার দাড়ি ছিল—নামটা মনে পড়ে বটে। নোয়াখালি—বাঙলার মানচিত্রে নয়, মনেরই কোথায় যেন নামটা লুকাইয়া ছিল। অথচ ছ'য়ে মিলিয়া যে এমন চেহারা নিয়া দাঁড়াইবে কে জানিত।

মিলি ডাকিয়া বলিল,—তুমি এখনি বেরছ কি-রকম? চা খাবে না?

স্নান হাসিয়া মানব কহিল,—একটু মর্নিং-ওয়াক করে' আসি।

—না, না, রোদে আর মর্নিং-ওয়াক নয়। কোঁচড় ভরিয়া একগাদা ফুল লইয়া হীরালালবাবু পথের মাঝখানে বাধা দিলেন : স্নান করে' নাও আগে। এসো। সামনের এক ভদ্রলোককে উদ্দেশ্য করিয়া বলিলেন,—বেটারা মাছ কিছুই পেলো না হে বিপিন। ছ' চারটে শোল্ আর পুঁটি। বাজারটা একবার ঘুরে এসো।

হীরালালবাবুকে দেখিতে প্রায় ঋষির মত। দাড়িগুলি পাকিয়া বৃকের উপর ঝুলিয়া আছে। কণ্ঠস্বরটি অকারণে কোমল। দেখিয়া ভক্তি হইবারই কথা। কিন্তু মানবের মন গোঁ ধরিয়া বাঁকিয়া বসিল। তাঁহার সঙ্গে একটা সজ্জ্ব তাহাকে বাধাইয়া তুলিতেই হইবে।

তাই বাড়ির মুখে পা না বাড়াইয়াই সে কহিল,—নতুন সहरটা একবার ঘুরে আসি।

—এ আবার সहर! নদীতে কিছু আর এর রেখেছে? সেই দীঘিই বা কই, সেই সব ঝাউগাছের সারই বা কোথায়? এসো, এসো, সहर হবে 'খন।

প্রথম প্রেম

মানব তবু অবাধ্যতা করিতে চায় ।

কিন্তু দুয়ারের পাশে দাঁড়ানো মিলির দুইটি চক্ষু তাহাকে বাধা দেয় ।
কী ভাবিয়া মন তাহার খুসি হইয়া উঠে ।

চা খাইতে-খাইতে মানব মিলিকে বলিল,—ভারি সুন্দর বাড়ি ।
আমার এখানে থেকে যেতে ইচ্ছে করছে ।

হীরালালবাবু কহিলেন,—থাকো না যদি খুসি । কিন্তু এ-বাড়ির
কী চেহারা যে ছিলো আগে ! বহু পুরোনো আমলের বাড়ি—আমিই
কিনে নিয়ে এর ভোল্ ফিরিয়েছি ।

মানবের গা আবার জ্বলিতে থাকে । সে গম্ভীর হইয়া কহিল,—
পুরোনো আমলের বাড়িকে পুরোনো করে'ই রাখা উচিত । সংস্কার
করে' তার মর্যাদাহানি করা পাপ ।

কথায় একটা রুচতা আছে । কিন্তু বৃদ্ধ প্রসন্ন হাসিতে ললাট ও
চোখ উদ্ভাসিত করিয়া বলিলেন,—তা হ'লে এ-বাড়িতে বাস করতাম
কি করে' ?

—বাস করবেন কেন ? বাস করতে কে বলেছে ?

মিলি কহিল—সামান্য একটু বিরক্ত হইয়াই কহিল,—পয়সা দিয়ে
কিনে তা হ'লে শুধু-শুধু বাড়িটাকে খাড়া করে' রাখা হ'বে ?

—না, না, তা বলছি না । মানব চায়ের কাপ্‌এ মুখ ডুবাইল ।

হীরালালবাবু হাসিয়া উঠিলেন ।

আবার কথা উঠিল কলিকাতার জীবনযাত্রা নিয়া । তাহার কল-
কারখানা, কুশ্রিতা-কোলাহল—সব কিছুর উপর হীরালালবাবুর অমানুষিক
বিরক্তি ।

মানব জোর গলায় কহিল,—সহরে দিবারাত্র যে উদ্দাম শক্তির ঝড়

প্রথম প্রেম

বইছে তা আপনাদের বুড়ো হাড়ে সহবে কেন ? যারা অকর্মণ্য হচ্ছে, তারাই চায় শান্তি ।

উত্তর দিল মিলি—সুরে কোথায় একটি প্রচ্ছন্ন ব্যঙ্গ আছে : এই না ষ্টিমারে আসতে-আসতে তুমি এরোপ্লেন ছেড়ে গরুর গাড়ির ভক্ত হ'য়ে উঠছিলে । ষ্টেশনে নেমে বাবা, উনি এক গরুর গাড়ি ঠিক করে' বসলেন । নামানো মুঞ্চিল ।

হীরালালবাবু আবার হাসিয়া উঠিলেন ।

মানব এই বৃদ্ধের সঙ্গে সজ্বর্ষের সুযোগ কামনা করে,—মিলির সঙ্গে সে তর্ক করিতে বসে নাই । হীরালালবাবুর মনে কোথায় এতটুকু জ্বালা নাই, স্বভাবে নাই বিন্দুমাত্র অস্থিরতা । সব-কিছুর প্রতি তাঁহার নিরুদ্বেগ প্রশান্ত দৃষ্টি ।

নহিলে—তাঁহার মেয়ের সঙ্গে এমন ঘনিষ্ঠ হইয়া এত দীর্ঘ পথ সে স্বচ্ছন্দে চলিয়া আসিল, তিনি এতটুকু আপত্তি তুলিলেন না । চাকরকে দিয়া বিছানা পাতাইয়া রাখিলেন । ঘরে আসিয়া পা দিতে-না-দিতেই অভ্যর্থনার ঘটা শুরু হইয়া গেল । তাঁহার মেয়ের এই অন্তরঙ্গতার প্রতি তিনি এতটুকু ক্রকুটি করিলেন না ।

হীরালালবাবু কহিলেন,—বেশ ত', গরুর গাড়ি চড়ে' একদিন সোনাপুর বেড়িয়ে এস । তুইও যাবি নাকি মিলি ?

মুহু হাসিয়া মিলি কহিল,—তার চেয়ে গোরার কাঠের বাকের গাড়ি চড়ে' গেলেই হয় !

হীরালালবাবুর হাসির বিরাম নাই ।

ঘাটের পথটুকু চলিতে-চলিতে মানব কহিল,—বিয়ের পর আমরা এ-বাড়িতে এসে কয়েকদিন থাকবো । কি বলো ?

প্রথম প্রেম

সর্বদা বেঠন করিয়া মিলি গভীর সুখস্বাদ অনুভব করিল।
কহিল,—কেন, ভেনিস্ ?

—এখানে থেকে-থেকে যখন শান্ত হ'য়ে উঠবো তখন। তোমার
সঙ্গে-সঙ্গে আমি এ-বাড়িটারো প্রেমে পড়ে' গেছি।

মিলি কহিল,—চমৎকার বাড়ি।

—সত্যি, চমৎকার। তোমার বাবার কাছে কথাটা আজ রাত্রেই
আমি পাড়ি।

দুষ্ট হাসিয়া মিলি বলিল,—এখানে থাকবার কথা ত' ?

—কায়েমি হ'য়ে থাকবার কথা। কিন্তু এমন হেঁয়ালি করে' নয়।
সোজা স্পষ্ট কথায়।

—না, না, সে ভারি বিস্ত্রী হ'বে। মিলি কহিল,—তুমি অমন ব্যস্ত
হ'য়ে কিছু তাঁকে বলতে যেয়ো না। তাঁকে বুঝতে দাও। তিনি নিজের
থেকেই বলবেন একদিন।

মানব আপত্তি করিল : নিজের থেকে বলবার মতো অসহিষ্ণু তিনি
হ'বেনই না কোনোদিন।

মিলি গভীর হইয়া কহিল,—আমরাও না-হয় একটু সহিষ্ণু হ'লাম।
উপন্যাসের প্রথম পরিচ্ছেদটা একটু দীর্ঘ হ'লে ক্ষতি কি। বাবাকে
আরো খানিকটা বুঝতে দিয়ে মত চাইলেই ব্যাপারটায় আর বিষয়
থাকবে না। এ-বাড়িতে থাকতে চাও, থাকো—যদি মন চায়।

বিকলে মানব বলিল,—চলো, গাঁয়ের পথে বেড়িয়ে আসি একটু।

মিলি কহিল,—তুমি যাও একা। রাত্রে আমি রান্না করবো ভাবছি।

হীরালালবাবু কহিলেন,—আয় না একটু বেড়িয়ে। অন্ধকার হ'বার
আগে ফিরে এলেই চলবে।

প্রথম প্রেম

—তা আমি যেতে পারি। দাঁড়াও। জুতো পরে' আসি।
আসিয়া দেখিল, বাবার কথা উপেক্ষা করিয়াই মানব চলিয়া
গিয়াছে।

মানব যখন ফিরিল তখন রাত অনেক। শ্মশান হইতে মড়া পুড়াইয়া
আসিবার মতো চেহারা। ঘর-দোর সব বন্ধ, কোথাও একটা আলো
জ্বলিতেছে না। বাড়িটা যেন একটা বিরাটকায় দৈত্যের মৃতদেহ।
চাহিয়া থাকিতে ভয় করে।

মানব অন্তরের উঠান পার হইয়া বারান্দায় উঠিয়া দরজায় করাঘাত
করিয়া ডাকিল : মিলি।

মিলি দরজা খুলিয়া দিল। বিছানায় উপুড় হইয়া শুইয়া গায়ে একটা
চাদর টানিয়া দিয়া মোমের আলোতে এতক্ষণ সে বই পড়িতেছিল।
ঘরের কোণে একটা লণ্ঠনও নিবু-নিবু করিতেছে।

মিলির কণ্ঠস্বরে ঈষৎ বিরক্তি : এ কি তুমি কলকাতার রাত
পেয়েছ ?

—মোটো নয়টা। এরি মধ্যে রান্নাবান্না খাওয়া-দাওয়া সব চুকে
গেছে ?

—চুকে গেছে মানে ? সবাইর এখন একঘুমের পর পাশ ফেরবার
সময়। চলে' এসো রান্নাঘরে। তোমার জন্তে এখনো আমার খাওয়া
হয় নি।

হাত-পা ধুইয়া পিঁড়েতে বসিয়া মানব কহিল,—তুমিও আমারই সঙ্গে
একই থালায় বসে' যাও না।

মিলি মুখোমুখি বসিয়া বলিল,—ও আমার অভ্যেস নেই। এতোকণ
কোথায় ছিলে ?

প্রথম প্রেম

—কোথায় আবার থাকবো। রাস্তায়-রাস্তায় ঘুরে বেড়াচ্ছিলাম। খুব ভালো লাগছিলো।

—চেহারাখানা ত' 'গাবুরের' মতো হয়েছে।

—চেহারা দেখে কী আর বোঝা যায় বলো। এই বাড়ির চেহারা দেখেই কি বোঝা যায় এর পেছনে কান্নার কী করুণ ইতিহাস আছে ?

দুই গরম্ মুখে তুলিয়াই থালাটা ঠেলিয়া দিয়া মানব কহিল,—আমার খিদে নেই, মিলি।

—খিদে নেই মানে ?

—শরীরটা ভালো লাগছে না।

—কলকাতায় ত' তোমার এই ফ্যাসান ছিলো না।

—সত্যি বলছি, উল্টে আসছে।

মুখ নামাইয়া করুণ স্বরে মিলি কহিল,—আমি রান্না করেছি কি না, তাই।

—তুমি রান্না করেছ নাকি ? শ্লান হাসিয়া মানব ভাতের থালাটা ফের টানিয়া আনিল।

—কী করবে, গরিবের বাড়িতে অভ্যর্থনার ত্রুটি কিছু ঘটবেই।

—বিনয়ে তুমি মহাজন।

মানব খাইতে চেষ্টা করিতে লাগিল।

কোথায় যেন তাল কাটিয়া গিয়াছে। আলাপ আর জমিতে চায় না।

ভাতগুলি থালার চারদিকে ছিটাইয়া ফেলিতে-ফেলিতে মিলিও উঠিয়া পড়িল।

প্রথম প্রেম

তোলা-জলে আঁচানো সাজ করিয়া মানব কহিল,—অন্ধকারে মাঠে একটু বেড়াবে, মিলি ?

—আমার ভীষণ ঘুম পাচ্ছে। আর দাঁড়াতে পারছি না। বলিয়াই সে দ্রুত পায়ে ঘরে গিয়া বিছানায় ডুব মারিল। যেমন খাওয়া, তেমনি ঘুম।

মানব বারান্দায় পাইচারি করিতেছে। ঘরে আসিয়া যে একটু গল্প করিবে তাহাও তাহাকে আজ মনে করাইয়া দিতে হইবে নাকি ? মোম জ্বলাইয়া আবার সে পড়িতে চেষ্টা করিল। সারি-সারি অন্ধরে সে কান পাতিয়া খালি মানবের পদশব্দ শোনে।

বিছানা ছাড়িয়া শেষে তাহাকে হার মানিতে হইল। বাহিরে আসিয়া মানবকে লক্ষ্য করিয়া কহিল,—ঘুমুতে যাবে না ? কিন্তু ভালো করিয়া তাহার চোখের দিকে চাহিতেই মিলি অবাক হইয়া গেল।

শুকনো, রুক্ষ চুল। মুখাভাসে কঠিন পাণ্ডুরতা। চেহারা দেখিয়া তাহাকে অত্যন্ত পীড়িত ও পরিশ্রান্ত বলিয়া মনে হয়।

মানব তাহার কাছে একটু আগাইয়া আসিয়া কহিল,—তোমাদের এ-বাড়িতে ভূত আছে, মিলি ?

—ভূত ! মিলি হাসিবে না ভয় পাইবে কিছু বুদ্ধিতে পারিল না।

মানব বিমর্ষমুখে কহিল,—আমরা এ-বাড়ি ছেড়ে অন্য কোথাও চলে' যাই এসো।

—কেন, এই না তুমি এ-বাড়ির প্রশংসায় পঞ্চমুখ হ'য়ে উঠেছিলে।

—না, না, এই বিস্তী জায়গায় একা-একা কতো দিন থাকা যায় বলা।

—একা-একা নাকি ?

—প্রায়। আমার ঘরটা ত' ও-দিকে, না ?

প্রথম প্রেম

—তুমি এখনিই শুতে যাবে নাকি ?

—তোমার ত' ভীষণ ঘুম পাচ্ছে । দাঁড়িয়ে আছো কি করে' ?

—না, এবার শোব ।

মিলি দরজা বন্ধ করিয়া দিল ।

আবার সেই ঘরে মানবকে রাত্রিযাপন করিতে হইবে । চারিপাশের দেয়ালের চাপে দম বন্ধ হইয়া আসে । দুই চক্ষু মেলিয়া ধরিয়া সে অন্ধকার দেখে ।

শেষ রাত্রে বাহিরের বারান্দায় বসিয়া হীরামালবাবু সেতার বাজান । মানবের ঘুমের মধ্যে স্বরটা মিশিয়া যায় । ঘুমের মধ্যেই মনে হয় তাহার মা যেন এই বাড়ির কক্ষে-কক্ষে কাঁদিয়া ফিরিতেছেন ।

মানব পাঁচ দিনের বেশি টিকিতে পারিল না। এই পাঁচ দিনে সে শুকাইয়া গিয়াছে—কাল রাত থেকে জ্বর-ভাব। ইহার আগে কোনোদিন তাহার শরীর খারাপ হইয়াছে বলিয়া মনে পড়ে না। মিলিকে সে কহিল,—এদিকে-ওদিকে আমার জামা-কাপড় জিনিস-পত্র সব ছড়িয়ে আছে। একটু গুছিয়ে দাও দয়া করে’।

—কেন ?

—আজকেই আমি এখান থেকে পালাবো। আমার ভালো লাগছে না।

—কী ভালো লাগছে না ? মিলি কুণ্ঠিতস্বরে কহিল,—আমাকে ?

—তোমাকে খুব বেশি ভালো লাগছে বলেই ত’ পালানো। শরীরটাই এখানে ভালো থাকলো না।

—তুমি এ ক’দিন যে অনিয়ম করেছ।

মানব হাসিয়া কহিল,—বেশি-রকম নিয়মে থেকে। কলকাতায় গিয়ে দু’দিন মোটর-বাইক হাঁকালেই সেরে যাবে।

মিলি মানবের কাছে একটু সরিয়া আসিয়া কহিল,—কলকাতায় গিয়ে ভালোই থাকবে তা হ’লে।

—আশা করি। হ্যাঁ,—আমার স্মেলিঙ-সল্টের শিশিটা খুঁজে পাচ্ছি না। গোরা সেদিন ওটা চাইছিলো। হয় ত’ ওটা ওর মিউজিয়মে জমা হয়েছে।

—দেখি।

মিলি অনেকক্ষণ আর দেখা দিল না।

কথাটা হীরালালবাবুর কানে উঠিল। তিনি কহিলেন,—জোর করে’

প্রথম প্রেম

তোমাকে এখানে বেঁধে রাখি কী করে' ? তোমার এখানে যে নিত্য-নূতন অসুবিধা হচ্ছে তা ত' নিজের চোখেই দেখতে পাচ্ছি ।

মানব মুখের উপরেই কহিল,—সে-কথা সত্যি । তবে অসুবিধেটা যে নিতান্তই শারীরিক আমার কপালে হাত দিয়ে বুঝতে পারবেন ।

হীরালালবাবু তাহার কপালে হাত রাখিয়া বলিলেন,—এ কী ! তোমার দেখছি দিব্যি জ্বর হয়েছে । তুমি বাবে কি-রকম ?

কি-একটা কাজে মিলি এই দিকে আসিয়াছিল ; হঠাৎ মানবের চোখে পড়িয়া যাইতে সে ভ্রক্ষেপ না করিয়া চলিয়া যাইতেছিল, হীরালালবাবু তাহাকে ডাকিয়া কহিলেন,—মানবের জিনিস-পত্র আর গুছিয়ে দিতে হ'বে না । একেবারে ওকে বিছানায় চালানু করে' দে । দিব্যি জ্বর হয়েছে দেখছি ।

মানব হাসিয়া কহিল,—সেই জগ্গেই ত' বিছানা-পত্র নিয়ে পাড়ি দিচ্ছি । রোগে ভুগে অসুবিধের চূড়ান্ত হোক আর-কি ।

মিলি চলিয়া যাইতে-যাইতে রুক্ষস্বরে কহিল,—অসুখ করলে এখানে ঔর যোগ্য চিকিৎসা হ'বে নাকি ? ঔকে দেখবার মতো এখানে ডাক্তার আছে ?

মানব কহিল,—চিকিৎসা করবার ডাক্তার আছে কি না জানি না, কিন্তু সেবা করবার একটিও নার্স এখানে পাওয়া যাবে না । সে-বিষয়ে তুমি নিশ্চিত থাকো ।

হীরালালবাবুও আর পিড়াপিড়ি করিলেন না । বড়লোকের বংশধরকে লইয়া পরে বিপদে পড়িতে হয় মিলির কথায় সেই আভাস পাইয়া তিনি থামিয়া গেলেন ।

মানব অনেকক্ষণ ধরিয়া মিলিকে খুঁজিয়া ফিরিতেছে, নিভূতে সে

প্রথম প্রেম

একটিবারো ধরা দিতেছে না। কাপড় কুঁচাইয়া আলনাতে মাজাইয়া রাখিয়া এখন সে পিসিমার সঙ্গে তরকারি কুটিতে বসিল। সেখানেই গল্পের আসর জমাইতে মানব আসিয়া জলচৌকির উপর বসিতেই মিলি উঠিয়া পড়িল : যাই, চুলটা বেঁধে আসি গে।

মনে-মনে মানব খুসি হইল। সে কলিকাতা যাইবে—এই বেগের মুখেই তাহার মন হাওয়ার মুখে তুলার মতো উড়িয়া চলিয়াছে। ভয়াবহ দুঃস্বপ্নের মতো এই বাড়িটা যে এতদিন তাহার বুকে চাপিয়া বসিয়াছিল, মুহূর্তে তাহা তাসের বাসার মতো ঝরিয়া পড়িল। ইহার জন্ত তাহার মায়া নাই,—পচা জায়গায় নদীর শ্মশান বুকে লইয়া চিরকাল জাগিয়া থাকুক! এইখানে কোনোদিনই সে আর মরিতে আসিবে না। কতো বাসা ছাড়িয়া কতো নূতন নীড়ের সন্ধান তাহার বেগ-চপল ডানা প্রসারিত করিয়া দিতে হইবে—মাটি কামড়াইয়া গাছের শিকড়ের মতো পড়িয়া থাকিতে ত' সে আসে নাই।

মানব উঠিয়া পড়িয়া কহিল,—আমাকেও তা হ'লে উঠতে হ'ল, পিসিমা।

মুহূ হাসিয়া পিসিমা বলিলেন,—জানি।

পূর্বের দিকের কোণের ঘরটায় জানলার কাছে মেঝের উপর মিলি বসিয়া আছে। হাতে একটা চিরুনি আছে বটে, কিন্তু চুলগুলি পিঠের উপর ছড়ানো। সন্ধ্যার আকাশ তাহার আয়না।

মানব কাছে আসিয়া বসিল—এত কাছে বসিয়াও স্পর্শ না করাটি মানবের ভারি ভালো লাগে।

মানব কহিল,—আমি চলে' যাচ্ছি বলে' তোমার কষ্ট হচ্ছে ?

মিলি হাসিয়া উঠিল : ভীষণ। বুকেটা কেটে যাচ্ছে একেবারে।

প্রথম প্রেম

—তা যাচ্ছে না জানি। কিন্তু আমাকে থাকতেও ত' একটিবার বলছ না।

—যে-অনুরোধ তুমি রাখবে না আমি তা করতে যাবো কেন ?

—কি করে' তুমি জানো যে তোমার অনুরোধ আমি রাখতাম না ?

—সে আমি জানি। আমাকে আর তা বলে' দিতে হয় না।

—তুমিও আমার সঙ্গে চলো না।

—বয়ে' গেছে। আমি দেওঘরে ছোটমামার বাড়িতে যাবো ভাবছি। এখানে একা-একা আমরা মন টিকবে কি করে' ? বাকি ছুটিটা সেখানেই কাটাবো কোনোরকমে।

—কিন্তু তোমাকে ছেড়ে যাবো বলে' আমার মন ভালো লাগছে না।

ঠোট উল্টাইয়া নিতান্ত তাচ্ছিল্যের সঙ্গে মিলি কহিল,—ছাই !

মিলির চুলে হাত রাখিয়া মানব কহিল,—সোনা। তোমার জন্তে আমার আরো বড়ো দুঃখ সহ্য করতে সাধ হয়, মিলি। তোমার বাবাকে কথাটা আজ বলে'ই ফেলি যা হোক করে'। আপত্তি যদি তোলেন, তবে অন্ধকারে গা ঢেকে ছ'জনেই না-হয় বেরিয়ে পড়বো।

—বাবা বাধা দেবেন না—বাধা দেবার কিছু নেই।

—তাই যদি হয় মিলি,—মানব কী করিবে কিছু বুঝিতে পারিল না।

—তাই যদি হয়,—মিলি তাহার দিকে পরিপূর্ণ দৃষ্টি তুলিয়া কহিল,

—তুমি আরো দু'টো দিন এখানে থাকো। ছোট খোকর মতো আমার কোলের কাছে চুপচাপ শুয়ে থাকো, আমি তোমাকে দু' দিনে ভালো করে' দেবো।

মিনতির সুরে মানব কহিল,—কিন্তু কলকাতার ডাক আমাকে অস্থির করে' তুলেছে।

প্রথম প্রেম

মিলি আবার চুপ করিয়া গেল।

মানব তাহার পায়ের পাতাটি মুঠির মধ্যে তুলিয়া লইয়া কহিল,—এই সঁগাতসেঁতে জায়গাটা আমাকে আর পোষাচ্ছে না। পুকুরে স্নান করে' শেষকালে ম্যালেরিয়া ধরুক, তুমি এই চাও ?

মিলি বলিল,—আর আমাদেরই কি-না গণ্ডারের চামড়া ! মশা কিছুতেই ছল ফোটাতে পারে না !

—কে তোমাকে থাকতে বলছে ? চলো না আমার সঙ্গে। এই নির্জনতায় তুমি যে হাঁপিয়ে উঠবে।

—এই না তুমি বলতে আমরা এখানে এসে বসবাস করবো।

—কোন্ হুঃখে ?

—তবে কোথায় ?

—ইউরোপে। কাজ করতে হ'বে ত' !

—কী কাজ ?

—সে পরে ভেবে নেব। ভীমকে একবার বলে' রাখো না গাড়ি-ওলাকে বলে' আসবে।

—তুমি যেন এখনি বেরিয়ে পড়তে পারলে বাঁচো।

—যাবার একবার নাম করলে আমি আর বসে' থাকতে পারি না।

—তুমি আমার কাছে একটা ধাঁধা। কখন কী যে তুমি চাও, কী যে তুমি চাও না, বোঝা দায়।

—তবে এটা ঠিক মিলি, এই গ্রাম্য নির্জনতা আমি চাই না। এ ত' শান্তি নয়, স্থবিরতা। এখনো এতো শ্রান্ত হইনি যে পাখা গুটিয়ে বসে' থাকবো।

মিলি ঠোঁটের প্রান্তটা একটু কুঁচকাইল। কহিল,—ছাড়ো, উঠি,

প্রথম প্রেম

বাবার জন্তে রাতের খাবার তৈরি করতে হ'বে। আমাকে হয় ত' খুঁজছেন।

—হ্যাঁ, আমিও ভীমচন্দ্রের শরণাপন্ন হই।

মানবের এই বেগের ক্ষুধাই মিলিকে সম্প্রতি সন্দিহান করিয়া তুলিয়াছে। কলিকাতা সেই প্রথরভাষিণী বিলাসিনী নর্তকী—মানব যাহাকে লইয়া মুগ্ধ দিন-রাত্রি ভরিয়া আপনাকে বিকীর্ণ করিতে চায়। মিলিকেও সে হয় ত' এই একটি বিশেষ বেশেই সাজাইতে চাহিয়াছে। কিন্তু তাহার জীবনে যে এই দূরবিস্তৃত মাঠের একটি গভীর প্রশান্তি আছে তাহা হয় ত' তাহার চোখে পড়ে নাই।

তাই মানবকে মিলির মনে হয় অস্থিরচিত্ত, দুর্বীর :

আর মিলিকে মানবের মনে হয় লঘু, ভীকু ও সংশয়ী।

কেনই বা আসা, দুই রাত্রি না পোহাইতেই দৌড়! এই, 'চমৎকার বাড়ি', এই আবার দম বন্ধ হইয়া উঠে! এই, 'মহুরতম মুহূর্ত', তক্ষুনি আবার ঝড়ের সন্ধ্যায় দুই পাখা বিস্তার করিয়া ছোটা! মানব চায় বর্ণের ঔজ্জ্বল্য, বেগের আবর্ত, প্রকাশের প্রথরতা। মিলি শিহরিয়া উঠে। প্রাচুর্য্যে ও প্রগল্ভতায় কেহ ফের মানবকে আচ্ছন্ন করিয়া দিলেই তাহার অতল-শয়ন! ইউরোপে গেলে—ইউরোপে একদিন সে যাইবেই—মিলি কোথায় পড়িয়া থাকিবে! কী তাহার আছে! দুইটি মাত্র কালো চোখ ও দুইটি মাত্র ভীকু করতল!

এইখানে আসিয়া বসিয়া-বসিয়া তাহার তরকারি কোটা ও খাটের উপর হামাগুড়ি দিতে-দিতে বিছানা পাতা! কাল সে আবার ময়লা ঝাকড়া দিয়া কালি-পড়া লণ্ঠন সাফ করিয়াছে। মানব ভাবে, মাছের

প্রথম প্রেম

ঝোলে তাহার নূনের পরিমাণ ঠিক হইয়াছে কি না দেখিবার জগ্গই কি সে এখানে আসিয়াছিল নাকি ? মিলি যেন কোমল লতা, নিকটের আশ্রয়প্রার্থিনী—নিদারুণ সর্বনাশের আনন্দে দগ্ধ হইবার তার প্রাণ নাই। সে বড় বেশি পরিমিত, তাহার শরীরে অধিকমাত্রায় মাটির কমনীয়তা !

তবুও বিদায় নিবার আগে দরজার কাছে নিভূতে যখন দুই জনের শেষবার দেখা হইল, মনে হইল এত সুন্দর করিয়া কেহ কাহাকেও ইহার আগে কোনোদিন যেন দেখে নাই। দুই জনের মাঝখানে করুণ ও ক্ষীণ একটি বিচ্ছেদের নদী বহিতে সুরু করিয়াছে,—সমস্ত পরিচয় অতিক্রম করিয়া একটি অজানা ইসারা !

মানব কহিল,—যাই। তোমার এশ্রাজ আমি গিয়েই পাঠিয়ে দেবো।

মিলির চোখে বেদনার নয় সুসমা : আমি দেওঘরে গেলে একবার এসো। ছোটমামা হয় ত' কুমিল্লা থেকে শিগ্গির আসবেন।

—কবে যাবে জানিয়ে।

—তার আগে জানিয়ে তুমি কেমন আছো। গিয়েই চিঠি লিখো কিন্তু। বুঝলে ?

—হ্যাঁ গো।

—কী বুঝলে ?

—গিয়েই যেন দেখি তোমার চিঠি আগে থেকে হাজির !

—সত্যি, না, চিঠি লিখো। আমাকে ভাবিয়ে না। তোমার প্রথম চিঠি পেতে আমি উৎসুক হ'য়ে থাকবো।

—বানান্ ভুল ধরো না যেন। আমি কিন্তু কাঠখোটা।

—নিতান্তই। তাই ত' যাবার আগে—

প্রথম প্রেম

মিলির চোখের পাতা লজ্জায় কাঁপিয়া-কাঁপিয়া বুঁজিয়া আসিল ।
মানব কহিল,—তুমিই বা কোন্ যাবার আগে—
—আচ্ছা ।

মিলি তাড়াতাড়ি নিচু হইয়া মানবের পা ছুঁইয়া প্রণাম করিতে
যাইতেই মানব তাহাকে দুই হাতে তুলিয়া বুকের কাছে সাপটিয়া ধরিল ।
মুখের কাছে মুখ আনিয়া কহিল,—তুমি বড় বেশি পবিত্র, মিলি ।
ম্যাডোনার চেয়ে সুন্দর তোমার মুখ ।

—এ-মুখ তুমি আরো সুন্দর করো ।

এমন সময় হীরালালবাবু বাহিরের বারান্দা হইতে এ-দিকে আসিতে
আসিতে কহিলেন,—গাড়োয়ানটা ডাকাডাকি লাগিয়েছে ।

তার পর ধরে ঢুকিয়া : তোমার শরীর কেমন বুঝছ ?

—ভালোই । বিবর্ণ মুখে মানব বাহির হইয়া গেল ।

গাড়িতে উঠিয়া খোলা দরজা দিয়া বাড়ির সাম্নেকার প্রাঙ্গণ ও
বাগান, তারপর বারান্দা ও জানুলা তন্ন-তন্ন করিয়া খুঁজিল,—মিলির সেই
প্রার্থনাকাতর ভর-ভর চক্ষু দুইটি আর দেখা গেল না ।

মূর্ত্তিমান বিভীষিকার মতো বাড়িটা দাঁড়াইয়া আছে ।

তারপর

১৮

ষ্টেশনে এত আগে না আসিলেও চলিত। গাড়োয়ানটার এত তাড়া দিবার কী ছিল! সেই দোহল্যমান মুহূর্তটিতেই বা হীরালালবাবুর আবির্ভাব হয় কেন—ভাগ্যের কোন্ বিধানানুসারে! মুহূর্তে একটা প্রকাণ্ড রাজ্যপতন হইয়া গেল।

তাহার গায়ে এখনো মিলির গায়ের গন্ধটি লাগিয়া আছে। চোখ দুইটিতে সলজ্জ ও সাগ্রহ একটি প্রতীক্ষা কুয়াসার মত ছলিতেছিল। তাহার প্রণাম করিবার ভঙ্গিটিতে কী সুন্দর ছন্দ! আকস্মিক ছন্দ-পতনের মধ্যেও কবিত্ব কম ছিল না।

তাহাকে একটুও আদর করা হইল না। কত কথা অনর্গল বলিবার ছিল! এঞ্জিনটা খালি তখন হইতে ফুঁসিতেছে—ছাড়িবার নাম নাই। নামিয়া পড়িলে কেমন হয়? মিলি হয় ত'—হয় ত' কেন, নিশ্চয়ই,—এতক্ষণে ঘুমাইয়া পড়িয়াছে। একলা শুইতে তাহার ভয়-ভয় করিতেছে কি না কে জানে! মাল-পত্র ষ্টেশন-মাষ্টারের জিন্মায় রাখিয়া এই পথটুকু সে অনায়াসে হাঁটিয়াই পার হইতে পারিবে। গাড়ি না পাইলে ত' তাহার বহিয়া গেল। বরং এই ফাঁকে রাতই আরো একটু গভীর হইবে। চুপি-চুপি সে মিলির দরজায় গিয়া টোকা মারিবে। মিলি জানে যে রাত করিয়া ফিরিয়া আসার তার অভ্যাস আছে। দরজা খুলিয়া দিতে সে দ্বিধা করিবে না। তারপর—

প্রথম প্রেম

মানব সর্বক্ষেত্রে ঘুমের মতো গাঢ় একটি স্খামবেশ অনুভব করিতে লাগিল। কিন্তু সত্যিই নামিয়া পড়িবে কি-না—বা নামিয়া পড়িবার আগে কুলি একটা ডাকিতে হইবে কি-না ঠিক করিবার আগেই গাড়িতে টান দিয়াছে।

মিলির ঘরে এখনো আলো জ্বলিতেছে। পিসিমা ঘরে ঢুকিয়া কহিলেন,—
—ঘুমুতে যাস নি এখনো ?

তাড়াতাড়ি বালিশের তলা হইতে একটা বই বাহির করিয়া হাঁটুর উপরে উল্টা করিয়া পাতিয়া তক্ষুনি ফের সোজা করিয়া ধরিয়া, সে কহিল,—বইটা শেষ করে' এই যাচ্ছি।

অথচ বিছানার উপরেই দেয়ালে পিঠ দিয়া সে বসিয়া ছিল। কোমর অবধি একটা চাদর দিয়া ঢাকা। চুল বাঁধিতে সময় পায় নাই বলিয়া বুকের উপর এলোমেলো হইয়া আছে।

পিসিমা কহিলেন,—চুলও বাঁধিস্নি দেখছি। ফিতে-কাঁটা নিয়ে আয় শিগ্গির।

—রক্ষে করো। আমি এই শুলাম। বলিয়া বইটা খাটের এক প্রান্তে ছুঁড়িয়া ফেলিয়া আলোটা হাতের খাবড়ায় ফন্ করিয়া নিভাইয়া দিল। তাহার পর চাদরটা মাথা অবধি টানিয়া দিয়া সটান্। মুখ বা'র না করিয়াই কহিল,—বাইরের দিকের দরজাটা এঁটে দিয়ে তুমিও গিয়ে শুয়ে পড়ো, পিসিমা।

পিসিমা অন্ধকারে সেইখানে অনেকক্ষণ দাঁড়াইয়া রহিলেন। তাঁহার এই নীরব উপস্থিতির অর্থ হইতেছে এই যে তিনি ব্যাপারটা বুঝিয়াছেন। মিলি তবুও চাদরটা মুখ হইতে সরাইল না দেখিয়া তিনি দরজাটা

প্রথম প্রেম

টানিয়া দিয়া নিঃশব্দে চলিয়া গেলেন। এই নিঃশব্দে যাওয়ার অর্থ হইতেছে এই যে মিলির প্রতি সহানুভূতির তাঁহার সীমা নাই।

এতক্ষণ মোমের আলোয় চোখ চাহিয়া মিলি কী যে ঠিক ভাবিতেছিল বলা কঠিন। এই বাড়িটা সম্বন্ধে কেনই যে তাহার এ অহৈতুক কৌতূহল—এই বাড়িটার চারিদিকের দেয়াল নাকি তাহার গায়ে সমস্তক্ষণ দীর্ঘনিশ্বাস ফেলে; অথচ এই বাড়িতে আসিতে ও আসিয়া থাকিতে গোড়ায় তাহার আগ্রহের অন্ত ছিল না। সামান্য একটা বাড়ি সম্বন্ধেই সে অকারণে ঘন-ঘন মত বদলায়। এখন তাহার কাছে এই সহরটা সঁাতসেঁতে ও মাঠের হাওয়া অত্যন্ত জোলো—এমন-কি তাহার জ্বর হইয়া গেল, অথচ গাঁয়ের পথ ধরিয়া শ্মশানে ও সহরের পথ ধরিয়া ষ্টেশনে তাহার আনাগোনা লাগিয়াই ছিল। ঘরে যে কেউ নিরুপায় হইয়া অবশেষে তরকারি কুটিতে মন দিয়াছে, সে-কথা কে বোঝে?

কিন্তু অন্ধকারে এখন চোখ বুঁজিতেই ট্রেনের শব্দ আসিয়া মিলির কানে লাগিল। এইমাত্র গাড়ি ছাড়িল বলিয়া এখনো পর্য্যন্ত মানব কামরার জান্না দিয়া মুখ বাড়াইয়া বাহিরে চাহিয়া আছে। অন্ধকারে খালি ঝাঁ-ঝাঁর ডাক; কোনো একটা ষ্টেশনে আসিয়া থামিলে এদিকে-ওদিকে দুয়েকটা ভাঙা-চোরা শব্দ। গাড়িটা নিবুম হইয়া দাঁড়াইয়া থাকে। ট্রেনটা যে কখনো আবার ছাড়িবে এমন মনে হয় না। নাই হোক, গদির বেঞ্চিতে নরম বিছানায় শুইয়া সে পরম আরামে ঘুমাইতেছে। গার্ডকে বলা আছে, লাক্সাম আসিলে যেন জাগাইয়া দেয়।

মিলিকে কাহারো জাগাইতে হইবে না।

রাত্রিটা একেবারে সাদা—এক বিন্দু ঘুম নাই।

প্রথম প্রেম

লাকসাম হইতে গাড়ি ছাড়িয়াছে। প্রায় শেষ রাত্রি। তন্ত্রার মতো আবেশ আসে, কিন্তু মিলির সেই উৎকর্ষ মুখখানির কথা মনে করিয়া চোখ তাহার জ্বালা করিতে থাকে। সে কি না এই ক'টা দিন তুচ্ছ একটা বাড়ি লইয়া মনে-মনে মাতামাতি করিল। যা একদিন সেখানে ছিলেন এই যদি তাহার মূল্য হয়, মিলিও তেমনি সেখানে আছে। একদিন সেই বাড়ি ছাড়িতে হইয়াছিল যেমন সত্য, তেমনিই ত' সে আবার নূতন করিয়া সেখানে গৃহপ্রবেশ করিবে। অন্তর্কমে আর বিচ্যুতি ঘটবে না।

এবং সে কি না এই ক'দিন উদ্ভ্রাস্তের মতো ফিরিয়াছে। সেই কথা ভাবিয়া হাসিতে গিয়া মানব টের পাইল চোখে তাহার জল জমিতেছে। মিলিকে সে উপেক্ষা করিয়াছে বুঝি।

কিন্তু ছুঁইতে গেলেই বুঝি মিলির ব্যথা করিয়া উঠিবে। সে-রূঢ়তা তাহার সহিবে না, তাই গাঢ় ও নিবিড় একটি অনুভূতিময় সান্নিধ্যে তাহাকে ডুবাইয়া রাখিতে ইচ্ছা করে। ইচ্ছা করে, কীটস যেমন সমস্ত রাত জাগিয়া বর্ষা-রাতে ফুল-ফোটা দেখিত, তেমনি এই সান্নিধ্যের উত্তাপে মিলির দেহে সে কামনার ফুল ফুটিতে দেখিবে। দেহেরই লীলায়িত বৃন্তে, আপনারই অনুভবের রঙে, আপনাকে বিকীর্ণ করিবার সৌরভে। নদীর তরঙ্গের মত সে উছলিয়া পড়িবে—আপনারই প্রাচুর্যের দুঃসাহসে।

মানব জোর করিয়া তাহাকে জাগাইতে চায় না। তাহার এই আধ-ঘুম আধ-জাগরণটিতে গোধূলি-আকাশের স্নিগ্ধতা। একটি করিয়া তারা জাগিতেছে।

চাঁদপুর আসিয়া গেল বুঝি।

প্রথম প্রেম

মিলির যখন ঘুম ভাঙিল তখন এক-গা বেলা ।

বাহিরের টাটকা আলোর দিকে চাহিয়া মনে হইল নদীর জল ।
মনে হইল কচুরি-পানা দুলাইয়া ষ্টিমার চলিয়াছে ।

কিন্তু আজ কাছে থাকিলে নিশ্চয়ই একটা গরুর গাড়ি জোগাড় করিয়া কোন্ ভোরে দুইজনে বাহির হইয়া পড়িত । রাত্রে পিসিমা দক্ষিণের জান্নাটা বন্ধ করিয়া গিয়াছিলেন বটে, কিন্তু স্পষ্ট সে মাঠ দেখিতেছে । তাহাদের গাড়ি এতক্ষণে সেইখানে গিয়া পৌঁছিয়াছে যাহা এখন হইতে দিগন্ত বলিয়া মনে হয় । কী যে তাহারা কহিতেছে মিলি ভাবিয়া পায় না—কথা না কহিলেই বা কী !

কতো টুকুরো জিনিসই যে ফেলিয়া গিয়াছে । টাইম টেবল,— টাইম টেবল ছাড়া চলিবেই বা কি করিয়া ; রেইন্ কোট—এটি ভূতের মত তা'র ঝঞ্জে চাপিয়াই আছে ; ও-মা, দাড়িতে সাবান মাখাইবার ব্রাস্‌টা পর্য্যন্ত । ষ্টিমারে বসিয়া আর কামানো চলিবে না । কী মজা ! স্মাণ্ডেল্‌এর ষ্টিয়াপ্ একটা খুলিয়া গিয়াছে বলিয়া সেটাকেও ফেলিয়া গেছে । বড়লোক !

গোরাকে গিয়া শুধায় : তোকে কী দিয়ে গেলো ?

মিউজিয়মে জিনিস-পত্র রোজ একবার করিয়া তাহার ওলোট-পালোট করা চাই । কাল যে-দুইটা জিনিস পাশাপাশি কাটাইয়াছে আজ তাহাদের স্থান-পরিবর্তন করিতে হইবে ।

গোরা বলে : এক জোড়া ডায়েল । বুরুস-সাহেবের দীঘির পারে যে নতুন দোকান হয়েছে একটা । হাত মুঠো করে' ধরলে আমি ওঁর আঙুলগুলো টেনে-টেনে কিছুতেই খুলতে পারিনে । কিন্তু শেষে লাগাই

প্রথম প্রেম

এক চিঠি,—তিন-রকম চিঠি আছে—রাম, সীতা আর হনুমান ।
মুঠোর সঙ্গে-সঙ্গে মুখখানাও হাঁ হ'য়ে যায়—

মিলি চলিয়া যাইতে পা বাড়ায়, গোরা বলে : তোমাকে কী দিলো ?
সাজি করবার জন্তে সিগারেটের ছবি ? না,—কী দিলো বলো না ?

—আমাকে আবার কী দেবে ? কিছুই না ।

—না, কিছুই না । বললেই হ'লো । ঔকে আবার কিছুই দেন্ নি ।

দুপুরের রোদ ঝাঁ-ঝাঁ করে ।

সেই ফাষ্ট'-ক্লাশের ডেক, বেতের চেয়ার, হাওয়ায়-ওড়া খবরের কাগজ ।
নদীর জল ছুরির ফলার মতো ধারালো—দৃষ্টিকে বেঁধে । মিলির নিজেরই
চোখ তাতিয়া উঠে, নিজেই চোখ বোঁজে ।

তার পর সন্ধ্যা । এইবার আরেকটু ঘনাইয়া আসিলেই হয় ।

মিলি দুই হাতে মিনিট-সেকেন্ডের ভিড় সরাইতে থাকে ।

আর কথা নাই । শেয়ালদা আসিয়া গিয়াছে ।

মিলিরই সর্ব্বাঙ্গে রোমাঞ্চ শুরু হয় ।

এখন আর তাহাকে পায় কে ।

এই ! ট্যান্ডি !

জিনিস-পত্র উঠিল কি, না উঠিল, খেয়াল নাই—চালাও, ভবানীপুর,
জলদি । মুখে তিনটি মাত্র কথা । শব্দ তিনটা মিলি যেন মানবের পাশে
বসিয়া গুলিল ।

এতক্ষণে বাড়ি পৌঁছিয়া গেছে । নিতাইকে একশো গুণা হুকুম
আর সাতশো গুণা ধমক । তার পড়ার ঘরের নীল পর্দাটা তেমনি
ঝুলিতেছে । বারান্দা দিয়া যাইবার সময়—পর্দাটা তখন বায়ে পড়িবে—

প্রথম প্রেম

বাঁ-হাতে সেটা সরাইয়া একটু উঁকি মারিয়া দেখিল। শূন্য চেয়ার আর অগোছাল টেবিল। তারপর দিল পর্দাটা ছাড়িয়া। পর্দাটা হাওয়ায় মৃদু-মৃদু হুলিতেছে।

তারপর স্নান।

তারপর—মিলিকে আর অনুমান করিতে হইবে না—স্পষ্ট সে মোটর-সাইকেলের ঝকঝকানি শুনিতেছে।

কিন্তু এ কী! তাহাদেরই বাড়ির উঠানে নাকি?

না, পিসিমা ষ্টোভ ধরাইয়াছেন।

কলিকাতায় পৌছিয়া মানব যেন ছাড়া পাইল ।

রাস্তায় ট্যাক্সিটা দাঁড়াইতেই মানব চেঁচাইয়া উঠিল : নিতাই, নিতাই ।

কাহারো সাড়া-শব্দ নাই । নিচেটা অন্ধকার । অগত্যা নিজেই মোটরটা নামাইয়া ট্যাক্সি-ড্রাইভারকে ভাড়া চুকাইয়া দিল ।

ভিতরে ঢুকিয়া সামনে পড়িল কালু—খোদ কর্তার পোষাকি চাকর । গড়গড়ার জল বদলাইতে নিচে নামিয়াছে ।

—তোদের ডাকলে যে সাড়া দিস্ না, ব্যাপারখানা কী ?

উত্তর না পাইতেই নিতাই-মহাপ্রভুর আবির্ভাব । হস্ত-দস্ত হইয়া কোথায় চলিয়াছে ।

—এতোক্ষণ গাঁজায় দম দিচ্ছিলি নাকি ব্যাটা ?

—মা'র জন্তে দোকানে সন্দেশ আনতে যাচ্ছি ।

—মা ? এসেছেন নাকি ? কবে ?

নিমেষে রাগ জল হইয়া গেল । নহিলে নিতাইর ঐ-রকম নির্বিষকার ও নিরপেক্ষ উক্তির উত্তরে সে হয় ত' তাহার গাল বাড়াইয়া এক চড় মারিয়া বসিত ।

—মা এসেছেন নাকি ?

সিঁড়িতে জুতার প্রচুর শব্দ করিতে-করিতে মানব উপরে উঠিয়া গেল ।

উপরে উঠিয়াই বাঁ-দিকের বারান্দা ঘেঁসিয়া প্রথমেই মিলির ঘর— তাহার পর তার মায়ের এবং তাহারই গায়ে-গায়ে পর-পর দুই খানি তাহার । ডান-দিকের ঘরগুলি কখন যে কে ব্যবহার করে মানব

প্রথম প্রেম

কোনোদিন খোঁজ রাখে নাই। কর্তা থাকেন তেতলার ঘরে—
নিরিবিলিতে।

উপরে উঠিয়াই বায়ুর বারান্দায় দেখা গেল একটি স্যাংলো-ইণ্ডিয়ান
মেয়ে দাঁড়াইয়া আছে। মানব খমকিয়া গেল। চেহারা দেখিয়া
মনে হয়, নাস'। কাহারো অসুখ করিয়াছে বুঝি।

—মা, মা।

স্যাংলো-ইণ্ডিয়ান মেয়েটি বিরক্ত হইয়া তাহার দিকে চাহিল।
অনুপমা বাহির হইয়া আসিলেন—পার্টনায় সাত মাস কাটাইয়া আসিয়া
তাঁহার চেহারা—ফিরিবার নাম নাই, আরো কাহিল হইয়া গিয়াছে।
কেমন-যেন ধস্কা চেহারা, হাত-পা হইতে গুঁড়া-গুঁড়া চামড়া উঠিতেছে।

মানব তাঁহাকে প্রণাম করিতে অগ্রসর হইল।

—তোমার অসুখ নাকি মা, বড্ড শুকিয়ে গেছো দেখছি।

—না, ভালোই আছি বেশ। তুমি গুঁর সঙ্গে গিয়ে দেখা করো।

—করবো 'খন। আগে স্নান-টান্ সারি। উনি ভালো আছেন ত' ?
না হয়েছে একরত্তি ঘুম, না খেয়েছি একটুকরো ফল। খিদেয় গেলাম।
ঠাকুরটাকে বলো না, শিগ্গির করে' কিছু দিক্।

বলিয়া মানব তাহার শুইবার ঘরের উদ্দেশে পা বাড়াইল।

অনুপমা বাধা দিয়া কহিলেন,—ওখানে নয়। তোমার ঘর হয়েছে
ও-দিকে।

—তার মানে ?

অনুপমা শাস্ত হইয়া কহিলেন,—এ-ঘরে উনি থাকবেন। বলিয়া সেই
স্যাংলো-ইণ্ডিয়ান মেয়েটির দিকে দৃষ্টিপাত করিলেন। স্যাংলো-ইণ্ডিয়ান
মেয়েটি গটুগটু করিতে-করিতে ঘরে ঢুকিয়া দরজার পর্দা টানিয়া দিল।

প্রথম প্রেম

মানব চটিয়া উঠিল : কে উনি ? ওঁকে ও-দিকের ঘরে চালান করলেই হ'ত ।

—হ'ত না । অনুপমার কণ্ঠস্বর কঠিন, উদ্বেগশূন্য : যাও, এই কালু, বাবুকে তাঁর ঘর দেখিয়ে দে ত' ।

মানব ধাঁধায় পড়িল । তাহার ঘরের বুলানো পর্দাটার দিকে রুক্ষ চোখে তাকাইয়া সে কহিল,—আমার ঘরটার জাত যে মরে' গেলো, মা । ওঁকে তোমার এমন-কী দরকার পড়লো ? ওঁকে আমি না তাড়িয়েছি ত' কী ! আমার খাট-ফাট সব সরিয়ে ফেলেছ নাকি ? আল্‌মারিটাও ?

—না, আল্‌মারিটা ওঁর লাগবে ।

—ওঁর লাগবে মানে ? আবদার যে উপচে পড়ছে । দাঁড়াও—পর্দাকে লক্ষ্য করিয়া সে কহিল,—দাঁড়াও, দু'টি দিন মাত্র ।

—কা'র দু'টি দিন বলছ ! ভদ্রলোকের মতো কথা বলতে শেখো । উনি ভাসা-ভাসা বাঙলা জানেন । অনুপমা কাঁঝালো কণ্ঠে বলিলেন ।

—এবার চোস্ত করে'ই শিখতে হ'বে ।

মানব তাহার বসিবার ঘরের দিকে পা বাড়াইল ।

—ও-দিকে কোথায় যাচ্ছ ? অনুপমা বাধা দিলেন ।

—আমার বসবার ঘরে । কেন, সেটাও লোপাট হ'য়ে গেছে নাকি ?

—ও-ঘরটা আমার কাজে লাগবে ।

—এতোদিন ত' লাগতো না ।

—দু'হাতে টাকা উড়োনো ছাড়া তুমিই বা এতোদিন আমাদের কোন্ কাজে লাগতে ?

মানব থামিয়া গেল । স্নান হাসিয়া কহিল,—ব্যাপারটা কিছুই বুঝতে পারছি না, মা ।

প্রথম প্রেম

অনুপমা কহিলেন,—বোঝবার কিছু নেই এতে ।

তিনিও ঘরের মধ্যে অন্তর্দান করিলেন । মানব বোকার মতো ফ্যান্-ফ্যান্ করিয়া চাহিয়া রহিল । কালু তামাকের জল বদলাইয়া এক ফাঁকে তেতলায় রাখিয়া আসিয়াছে । এ-দিক পানে চাহিতেই কালু কহিল,—আম্বন এ-দিকে ।

এ-দিকের ঘরগুলির অবস্থান মানবের ঠিক মুখস্ত ছিল না ; একেবারে কোণে এমনি যে একটা সঙ্কীর্ণ ঘর তাহার জন্ত ওৎ পাতিয়া বসিয়া ছিল, ইহা সে স্বপ্নেও কোনো দিন ভাবে নাই । দরজাটা ঠেলা মারিয়া খুলিয়া ফেলিয়া কালু বলিল,—এই ঘর ।

—এই ঘর ! মানব যেন চোখের সামনে স্পষ্ট ভূত দেখিতেছে : বলিস্ কিরে ? আমার সঙ্গে সবাইর ঠাট্টা ? বলিয়া সুইচ্ টানিল, কিন্তু আলো জ্বলিল না । বাল্‌ব্‌টা কোথায় খারাপ হইয়াছে । এই ঘরে আগে হয় ত' চাকররা শুইত,—কিন্তু এত দিন হয় ত' চামচিকে আর ইঁদুরেরা এই ঘরে নিয়মিত দোড়-ঝাঁপ করিয়া বংশানুক্রমে স্বাস্থ্যবর্দ্ধন করিয়া আসিয়াছে ।

মানব রীতিমত চেষ্টামিচি শুরু করিল,—এই ঘরে কোন্ ভদ্রলোক মাথা গুঁজতে পারে ? আমার জিনিস-পত্র সব টান্ করে' ফেলা হ'য়েছে । কী-সব ভেঙে-চুরে খান্-খান্ হ'য়ে গেলো সে-দিকে কারুর নজর নেই । ডাক্ নিতাই-হারামজাদাকে । বসে'-বসে' ব্যাটা এর জন্তে মাইনে গুনবে ?

কালু মানবের এলেকার চাকর নয় বলিয়া কোনো গালাগালই তাহাকে লাগিতে পারে না ।

মানব একবার ঘরের ভিতরে ঢোকে, আবার বাহিরে আসিয়া চেষ্টামিচি আরম্ভ করে : এমন ঘরে দু'দিন থাকলেই যে আমার

প্রথম প্রেম

থাইসিস্। পশ্চিম পূব একেবারে বন্ধ। জিনিস দিয়ে জাঁতা।
ও-গুলো বৃষ্টি আর অন্ত ঘরে রাখা যেতো না? কেন, কেন আমার ঘরে
এসে অন্ত লোক থাকবে? ঘাড় ধরে' বার করে' দিতে পারি না?

মানব আবার অনুপমার ঘরের দিকে অগ্রসর হইল।

—ঐ ঘরে কী করে' থাকা যায়? ঐ ঘর গুছিয়ে রাখা হয়নি কেন?
চাকর-বাকর সবাই যেন মাথায় উঠেছে। কাল সারা রাত আমার ঘুম
হয়নি—অমন নোংরা চাপা ঘরে কোনো ভদ্রলোকের ঘুম আসে?

অনুপমা বাহির হইয়া আসিলেন। কহিলেন,—কী চেষ্টামিচি
লাগিয়েছ শুনি?

—চেষ্টামিচি করবো না? তোমার অতিথিকে ঐ ঘরের খাঁচায়
পুর্তে পার্তে না? কালকেই আমার ঘর ছেড়ে দিতে হ'বে বলে'
রাখছি।

মুখ বাঁকাইয়া অনুপমা কহিলেন,—কথাটা কে বলছে শুনি?

—আমি বলছি। ঔকে পোরবার মতো বাড়িতে আর ঘর ছিলো
না নাকি?

—অসভ্যের মতো গলা ফাটিয়ে চীৎকার করো না। ঘর পছন্দ না
হয়, বাইরে চলে' যাও। রাস্তা আছে।

বলিতে-না-বলিতেই অনুপমার তিরোধান। দরজাটা তাহার মুখের
উপর সশব্দে বন্ধ হইয়া গেল।

কী করিবে মানব ঠিক কিছু বৃষ্টিতে পারিল না। বাইক্ নিয়া
রাস্তায়-রাস্তায় খানিকক্ষণ টহল দেওয়া ছাড়া আর পথ দেখিল না।
কিন্তু বারান্দাটা পার হইবার আগে মিলির ঘরের দরজাটায় ঠেলা মারিয়া
দেখিতে ইচ্ছা হইল।

প্রথম প্রেম

ঠেলা মারিতেই ভেজানো দরজাটা খুলিয়া গেল। উকি মারিয়া দেখিল ঘরে কেহ নাই—সমস্ত ঘর জুড়িয়া শুধু মিলির অনুপস্থিতিটুকু বিরাজ করিতেছে। মানব ঘরের মধ্যে চলিয়া আসিল; সুইচটা টিপিয়া আলো করিয়া তক্ষুনি আবার নিবাইয়া দিল। মিলির ব্যগ্র দুই বাহুর মতো অন্ধকার সহসা ছুটিয়া আসিয়া তাহাকে ঘিরিয়া ধরিল।

এ কয়দিন আর বাঁট পড়ে নাই। টেবিলের উপর বই-খাতাগুলি ছড়াইয়া আছে। মানব তাই নিয়া কতক্ষণ নাড়াচাড়া করিতে লাগিল। শ্রান্তিতে শরীর তাহার ভাঙিয়া পড়িতেছে। মিলির খাটের উপর শুকনা জাজিমটা খালি পড়িয়া আছে। মানব তাহারই উপর বসিয়া পড়িল।

মিলি তাহার মাথার এত কাছে আসিয়া বসিয়া আছে, তবু সে তাহাকে দেখিতে পাইতেছে না!

কী যে ব্যাপার ঘটিয়াছে মানব ভাবিয়া-ভাবিয়া কিছুই কূল-কিনারা পাইল না। তেতলায় উঠিয়া সতীশবাবুর শরণাপন্ন হইলে ইহার একটা বিহিত হইতে পারে বটে, কিন্তু নিজের প্রভুত্ব সঙ্কুচিত করিতে হইবে ভাবিয়া তাহার আত্মসম্মানে ঘা লাগিল। ঘরে মেম-সাহেব আনিয়া মা'র মেজাজও সহসা ফিরিঙ্গি হইয়া উঠিল কেন? তাহাকে কি-না বলা—সোজা রাস্তা পড়িয়া আছে!

অন্ধকারে মানব চুপ করিয়া শূন্যমানে বসিয়া রহিল।

সহসা কোথা থেকে শিশু একটা ট্যা করিয়া উঠিয়াছে। পাশের ঘরেই। য্যাংলো-ইণ্ডিয়ান মেয়েটা বিকৃত সুর-ভঙ্গিতে তাহাকে প্রবোধ দিতেছে। মুজা মন্দ নয়। একা নয়, বোঝার উপর শাকের আঁটিটি পর্যন্ত নিয়া আসিয়াছে। কেন যে এই উপদ্রব আসিয়া জুটিল, কি

প্রথম প্রেম

করিয়া এখনি ইহার প্রতিবিধান করা যায় সম্প্রতি তাহাতে একটুও মন না দিয়া মানব তেমনি বসিয়াই রহিল ।

বাহির থেকে নিতাই কহিল,—আপনাকে কর্তাবাবু ডাকছেন ।

—কর্তাবাবু ডাকছেন ! মানব খেঁকাইয়া উঠিল : নদের চাঁদ এতো-
ক্ষণ কোথায় ছিলে ? আমার ঘর-দোর গুছিয়ে রাখতে পারিস্ নি,
হারামজাদা ? যা ব্যাটা, যাবো না আমি ।

—আপনি যে আজ আসবেন জানুবো কী করে' ?

—তাই ঘর-দোর অমনি একহাঁটু করে' রাখবি ? দাঁড়া—

—এখনি সব গুছিয়ে ফেল্ছি আমি । আপনি একবারটি তেতলায়
যান্ ।

মানবের কোনো ব্যস্ততা দেখা গেল না । শরীরটা যেন থামিয়া আছে,
ম্যাজ্-ম্যাজ্ করিতেছে—স্নান না করিলে কিছুতেই তাহার রাগ পড়িবে
না । তেতলায় উঠিলে এখনই সব-কিছুর সমাধান হয়, তবু এ-জায়গাটি
ছাড়িয়া উঠিতে তাহার ইচ্ছা করে না ।

নিতাই আবার তাড়া দিয়া গেল।

সতীশবাবুর অস্তিত্বের কথা মানব একরকম ভুলিয়াই ছিল ; তেতলার থেকে তিনি বড় একটা নামিতেন না, শামুকের খোলার মত ঐ ঘরটিই তাঁহাকে আবৃত করিয়া রাখিত। মানবের অবাধ ও উদ্দাম ধাওয়ার মুখে পড়িয়া তাহার সঙ্গে তাঁহার কোনোদিন ঠোকাঠুকি হয় নাই। মানবের মনি-ব্যাগটা শূন্য হইলে তিনি তাহা আবার ভরিয়া দিয়াছেন। তখনই হাসিয়া এক-বার বলিতেন : ছ'মাসে আর মুখ দেখিয়ো না। কিন্তু ছ'মাস পার হইবার আগে নিজেই তাহার ঘরে উকি মারিয়া য়ুছ হাসিয়া বলিয়াছেন : তোমার মনি-ব্যাগের স্বাস্থ্য ভালো আছে ত' ? মানব হাসিয়া বলিয়াছে : হাওয়ার বেড়িয়ে সম্প্রতি কিছু কাহিল্ হ'য়ে পড়েছে।

তা ছাড়া কোনো কাজেই সতীশবাবুর দরবারে তাহার ডাক পড়ে নাই। আজই তাহাকে নিয়া তাঁহার কী দরকার পড়িল ভাবিয়া সে দিশা পাইল না।

সিঁড়ি দিয়া উপরে উঠিতে-উঠিতে তাঁহার ভয় করিতে লাগিল।

দরজাটা বিস্তৃত করিয়া খোলা—প্রকাণ্ড টেবিলের উপর এক-রাশ কাগজ-পত্র লইয়া সতীশবাবু ভীষণ ব্যস্ত হইয়া উঠিয়াছেন। টেব্ল-ল্যাম্পের তীক্ষ্ণ আলোয় স্পষ্ট চোখে পড়িল তাহার মুখে চিন্তার কুটিল রেখা পড়িয়াছে। অনেক দিনের অনিদ্রায় চোখ দুইটা কাঁচের মতো কঠিন দেখায়।

দরজার কাছে একটা ছায়া পড়িল। সতীশবাবু কাগজের আশ্রিত থেকে মুখ ভুলিয়া স্মিতহাস্তে কহিলেন,—এসো, মামু। তুমি এখনো জামা-কাপড় ছাড়ো নি ? কী নিয়ে গোলমাল হচ্ছিলো ?

প্রথম প্রেম

মানব কহিল,—আমার দু'দুটো ঘর হাত-ছাড়া হ'য়ে গেছে । কে একটা মেম্ এসে সেখানে আস্তানা গেড়েছে ।'

—হঁ ! কাগজ-পত্রে চোখ ডুবাইয়া সতীশবাবু মাত্র এই সজ্জিগু শব্দ করিলেন ।

মানব কহিল,—ওকে কেন আমার ঘর দেওয়া হ'লো ? আমাকে থাকতে দেওয়া হয়েছে কি না ঐ কোণের আস্তাকুঁড়ে । না আছে জান্না, না বা আলো । গা ছড়ানো যায় না ।

—আচ্ছা, সে আমি দেখছি । তুমি ততোক্ষণে স্নান করে' নাও । নিচে যাবার দরকার নেই, আমারই বাথরুমে জল আছে । এখন আর কোথাও বেরিয়ো না । তোমার সঙ্গে আমার কথা আছে ।

শুধু 'কথা আছে' ! মানব সহসা এই সংসারের চোখে এত অকিঞ্চিৎকর হইয়া গেল । স্নান করাটা হয় ত' ঠিক হইল না । তবু না করিয়াই বা কী করা যায় ! নিতাই কাপড়-তোয়ালে আয়না-ব্রাস্ লইয়া হাজির । কহিল,—এই জুতো এনে রেখেছি । দেখুন এসে আপনার নতুন ঘর-দোরের কেমন ভোল্ ফিরে গেছে ।

—তুই থাকিস্ ও-ঘরে । আমার কাজ নেই ।

ঘরে ঢুকিতেই সতীশবাবু কহিলেন,—বোস । তোমার খাবারটা এখানেই দিয়ে যাবে'খন । যা ত' নিতাই, ঠাকুরকে বলে' আয় ।

—না, না, সে পরে হ'বে । মানব আপত্তি করিল : এখনো আমার খিদে পায় নি । কথাটা আগে সেরে নিন্ ।

—কথাটা আগে সেরে নেব ? সতীশবাবু স্মিতহাস্তে কহিলেন,—চেয়ারে বেশ টাইট হ'য়ে বসেছ ত' ?

—এচেয়ার থেকে ছিটকে মাটিতে পড়ে' যেতেও আমার আপত্তি

প্রথম প্রেম

নেই। বলুন। যা ত' আমাকে সোজা রাস্তা দেখতেই উপদেশ দিয়েছেন।

—বটে? সতীশবাবুর মুখ গম্ভীর হইয়া উঠিল: আমি বলি কি জানো, মানু?

—কি? টেবিলের উপর দুই কনুইয়ের ভর রাখিয়া মানব জানিতে চাহিল।

—তোমাকে আমি টাকা দিচ্ছি, তুমি কোথাও দিন কয়েক বেড়িয়ে এসো।

কথাটা মানব আয়ত্ত করিতে পারিল না। সতীশবাবুর মুখের দিকে হতভম্বের মত চাহিয়া থাকিয়া বলিল,—বেড়াতে যাবো কী! আমাদের কলেজ খুলতে আর কতো দিন!

—এই পচা ইউনিভার্সিটিতে আর পড়ে না। সোজা বিলেত চলে' যাও। ব্যারিষ্টার হ'য়ে এসো। কিম্বা অন্য কোনো টেকনিক্যাল বিদ্যা। রঙের কাজ, ব্লকের কাজ, এঞ্জিনিয়ারিং—যাতে তোমার হাত খোলে। যতো দিন তোমার খুসি।

মানব ব্যঙ্গসূচক হাসি হাসিয়া কহিল,—আমাকে তাড়াবার জন্তে হঠাৎ আপনারা সবাই ক্ষেপে উঠলেন কেন?

পীড়িত মুখে সতীশবাবু কহিলেন;—তোমাকে তাড়াব কী, মানু? সত্যিকারের মানুষ হ'য়ে নিজের পায়ে দাঁড়াবার জন্তে তোমাকে ইউরোপ পাঠাচ্ছি। তুমি যদি উত্তর-মেরু জয় করবার জন্তেও আকাশে বেরোতে চাও, আমি তোমাকে সাহায্য করবো।

—কিন্তু বি. এ. পাস্ করে' যাবো বলে'ই ত' ঠিক ছিলো।

—দুস্তোর বি. এ. পাস্! সতীশবাবু টেবিলে এক কিল

প্রথম প্রেম

মারিলেন : খামোকা দেরি করে' লাভ কী ! তুমি ত' চলতে পারলে
খামো না ।

মুহুর্তের মধ্যে মানব হাঁপাইয়া উঠিল ; কহিল,—কিন্তু ব্যাপারটা কী
স্পষ্ট করে' আমাকে বলুন ।

গলা খাঁখরাইয়া সতীশবাবু কহিলেন,—হ্যাঁ, স্পষ্ট করে'ই বলছি ।
তুমি এর মাঝে খেয়ে নিলে পারতে ।

—সে হ'বে'খন । আপনি বলুন ।

একটুখানি চুপচাপ । মাঝে-মাঝে নিচে হইতে সেই শিশুর তারস্বর
কানে আসিতেছে ।

সতীশবাবু শুরু করিলেন : ঐ আওয়াজটা কানে আসছে, মালু ?

—কিসের ?

—কে যেন কাঁদছে না ?

—সেই ফিরিস্টি-মেয়েটার বাচ্চা হয় ত' ।

সতীশবাবুর গৌফ-জোড়া ঈষৎ ফুরিত হইল । চেয়ারে হেলানু দিয়া
তিনি কহিলেন,—খবরটা এখনো তা হ'লে পাওনি ? ও তোমারি
ভাই । অর্থাৎ—

মানব বসিয়া পড়িল । ষড়যন্ত্রের সমস্ত জটিলতা এখন তাহার কাছে
পরিষ্কার হইয়া উঠিয়াছে ।

—অর্থাৎ—সতীশবাবু প্রসন্নমুখে কহিতে লাগিলেন,—বৃদ্ধ বয়সে
একটি পুত্র-সন্তান লাভ করেছি । এর পরিণাম কী ভাবে
পারো ?

মানবের স্বর ফুটিতেছিল না, কঠিন দুইটা হাতে তাহার গলাটা কে
নির্দ্বন্দ্ব জোরে চাপিয়া ধরিয়াছে । স্বর যাহা ফুটিল, শুনাইল ঠিক কান্নার

প্রথম প্রেম

মতো : আমার পক্ষে পরিণাম কী, তাই ভাবতে বলছেন ? মা ত' সে-কথা আগেই বলে' দিয়েছেন—রাস্তা ।

—নিশ্চয়ই নয় । সতীশবাবু মানবের হাত দুইটা চাপিয়া ধরিয়া কহিলেন,—তোমাকে আমি বঞ্চিত করবো এত বড় নিষ্ঠুর আমি কখনোই হ'তে পারবো না । এই দেখ, আমি কী উইল করে' রেখেছি ।

সতীশবাবু ড্রয়ার টানিয়া কি-একটা কাগজ বাহির করিলেন ।

শুকনো গলায় মানব কহিল,—শুনে আমার দরকার নেই । দয়া করে' ওটা ছিঁড়ে ফেলুন ।

সতীশবাবু কহিলেন,—একটা মোটা টাকাই তোমার জন্তে রেখেছি । ইচ্ছে করলে তুমি অনায়াসে বিলেত চলে' যেতে পারো ।

—ধন্যবাদ ।

মানব চেয়ার ছাড়িয়া উঠিয়া দাঁড়াইল ।

সতীশবাবু বিস্মিত হইয়া কহিলেন,—উঠ'ছ কি এখুনি ?

—এ-বাড়িতে থাকবার আর আমার কী দরকার থাকতে পারে ?

—সে কী কথা ! সতীশবাবুও উঠিয়া দাঁড়াইলেন : এ-বাড়ি ছেড়ে তুমি চলে' যাচ্ছ নাকি ? কোথায় ?

—দেখি আপনার কথামতো নিজের পায়ে দাঁড়িয়ে মানুষ হ'তে পারি কি না ।

—না, না, ছেলেমান্‌সি কোরো না, বোসো । বলিয়া সতীশবাবু তাহাকে হাতে ধরিয়া চেয়ারে বসাইয়া দিলেন । তাহার পাশে আরেক-খানা চেয়ারে বসিয়া কহিলেন,—অভিমান করবার কিছুই নেই । আমি তোমাকে বঞ্চিত করলে এই অভিমান হয় ত' সাজ্ত । ভেতরে-ভেতরে যে কোনো পরিবর্তন হয়েছে এ-কথা আমি বাইরে থেকে বুঝতেই দেব না ।

প্রথম প্রেম

—তাই ত' কোণের ঘরে আমার জায়গা হয়েছে ; মা সটান আমাকে রাস্তা দেখিয়ে দিয়েছেন ।

প্রবোধ দিবার সুরে সতীশবাবু কহিলেন,—তাতে কি ! তুমি অল্প কোথাও রুম্‌স্‌ নিয়ে থাক, কিম্বা বি. এ. পাশের মোহ যদি কাটিয়ে উঠতে পারো ত' টমাস্‌ কুক্‌ কিম্বা য়ামেরিকান্‌ এক্সপ্রেস্‌এ গিয়ে বুক করে' এসো ।

—সবই সম্ভব হ'ত, যদি আমার কোনো অধিকার আছে বলে' অনুভব করতাম । ফাঁকা স্নেহের উপর আমার আর বিশ্বাস নেই ।

—বলো কি, মানু ? এতোগুলি বৎসর ধরে' কি তুমি এই শিখলে ?

—আর এতোগুলি বৎসর পরে ছোট একটা শিশুর স্থান করে' দিতে আমাকেই পথে বেরুতে হ'বে—এই কি আমি ভেবেছিলাম কোনোদিন ?

—কিন্তু তুমি ত' জানো—আইনে তুমি আমার উত্তরাধিকারী নও । তবুও তোমাকে যে আমি অর্থের অভাব কোনোদিন বোধ করতে দেব না বলে' প্রতিজ্ঞা করছি—

—তার জন্তে আপনাকে ধন্যবাদ ।

মানব আবার উঠিল ।

—তুমি যাচ্ছ কোথায় ?

মানব বিমর্ষমুখে হাসি আনিয়া কহিল,—যেখান থেকে এ-বাড়িতে এসেছিলাম ।

খুব বড়ো রকম ব্যর্থতা আসিয়া মানুষের জীবনকে যখন গ্রাস করে, তখন সে হাসিমুখে মনে-মনে বলে : এ যে ঘটবে তা আমি বহু আগে থেকেই জানতাম । মানবের মুখে সেই অসহায় হাসি ।

সতীশবাবু ব্যস্ত হইয়া উঠিলেন : না, না, আমার এ-ঘর তোমাকে

প্রথম প্রেম

ছেড়ে দিচ্ছি। আমিই না-হয় কোণের ঘরে গিয়ে থাকবো। তুমি যাবে কী? ছি! যাবার জায়গা কোথায়?

মান হাসিয়া মানব কহিল,—আমার বাবাও একদিন এমনি নিরুদ্দেশ-যাত্রায় বেরিয়ে পড়েছিলেন। সেই সুর আমার রক্তে বাজছে।

—তা বাজুক। তুমি বোস। কালু! ঠাকুরকে শিগুগির বল্ গে—দাদাবাবুর খাবার এখানে পাঠিয়ে দেবে।

—আমার মা-ও কোথায় কোন্ দিকে চলে' গেছেন কেউ বলতে পারে না।

সতীশবাবু হঠাৎ কেমন চঞ্চল হইয়া উঠিলেন: তোমার মা'র চলে' যাবার দিনে তোমাকে আমার হাতে দিয়ে বলে' যায় তোমাকে যেন মানুষ করে' তুলি। তোমার মা'র সেই কথা আমি চিরদিন মনে রেখেছি।

—বহু ধন্যবাদ। কিন্তু আমাকেও মা'র সঙ্গে পথে বা'র করে' দিলেন না কেন?

—তোমার মা-ই তোমাকে নিতে চাইলো না।

—এ-সংসারে আমার যদি জায়গা হ'লো, মা'রও কি হ'তো না?

—তোমার মা জোর করে'ই চলে' গেলো। কিন্তু সে-কথা থাক।

সতীশবাবু অন্তমনস্কের মত পাইচারি করিতে লাগিলেন।

—আমিও তেমনি জোর করে'ই চলে যাই।

—কিন্তু আজই যেতে হ'বে এমন কোনো প্রতিজ্ঞা আছে? আজ রাতটা জিরোও, কাল ভেবে ঠিক করা যাবে—দেখি কী করতে পারি।

—ভেবে ঠিক করবার কিছুই নেই এতে।

মানব দরজার দিকে মুখ করিয়া ঘুরিয়া গেল।

প্রথম প্রেম

সতীশবাবু বাধা দিয়া কহিলেন,—এ তুমি অত্যন্ত বাড়াবাড়ি করছ।

—এতে আমার-আপনার কোনোই হাত নেই। এ একদিন হ'তোই। এ না হ'য়ে যায় না। সত্যিকারের বাঁচবার পক্ষে এই ক্ষতির মূল্য অনেকখানি।

সিঁড়িতে কাহার জুতার শব্দ হইতেছে।

সশরীরে অনুপমাই হাজির হইলেন। তাঁহাকে দেখিয়া সতীশবাবুর মুখ চূণ হইয়া গেল।

অনুপমা মাতৃহের স্বাদ পাইয়া যেন বাঘিনী হইয়া উঠিয়াছেন। তিনি যে বেশ শুকাইয়াছেন তাহা তাঁহার গলাটা দেখিলেই ধরা পড়ে। তিনি গলাটা কিঞ্চিৎ দুলাইয়া কহিলেন,—কী এমন ঘর খারাপ হয়েছে শুনি?

—না, না—সতীশবাবু মাথা নাড়িয়া বলিলেন,—মানুষ আজ আমার বিছানায় শোবে। কাল একটা বন্দোবস্ত করা যাবে যা-হোক।

—আবার কী বন্দোবস্ত!

—হ্যাঁ। সে একটা হ'বে ঠিক। এখনো ওর খাওয়া হয় নি। ঠাকুর খাবার দিয়ে যাচ্ছে না কেন? যতো কুঁড়ের খাড়ি।

—কেন, উনি নিচে নেমে খেয়ে আসতে পারেন না, না ওঁর সম্মানে বাধে?

মানব হাসিয়া কহিল,—খেতেই আমার সম্মানে বাধছে, মা।

অল্প দিকে মুখ ফিরাইয়া গলার স্বরটাকে ঈষৎ চাপিয়া অনুপমা কহিলেন,—সেই হিসেবে এতো দিনে ত' তবে কম সম্মান খোয়ানো হয় নি দেখছি। তার পর মুখ ঘুরাইয়া স্পষ্ট স্বরে কহিলেন,—সোজা কথা বাপু, তোমার পিছনে আর রাশি-রাশি টাকা উড়োনো চলবে না।

প্রথম প্রেম

মানব নির্মিষ্টের মত কহিল,—সোজা কথাটা আমি আরো সোজা করে' দিয়ে যাচ্ছি। তোমার ভাবনা নেই।

মানবকে সিঁড়ির দিকে পা বাড়াইতে দেখিয়া অনুপমা কহিলেন,—কিন্তু চারটি না খেয়ে এখুনিই বেরিয়ে যেতে হ'বে এমন কথা ত' তোমাকে কেউ বলে নি।

—সোজা করে' এমন-কথা কেউ বলবার আগেই ত' চলে' যাওয়া উচিত।

সতীশবাবু বিরক্ত হইয়া কহিলেন,—তোমার স্বভাবের এ-দোষ আমি চিরদিনই লক্ষ্য করছি মানুষ, একবার যা তোমার মাথায় আসে, কিছুতেই তুমি তা ছাড়তে পারো না।

মানব তবুও বশ না মানিয়া সোজা নামিয়া যাইবার উদ্যোগ করিতেছে দেখিয়া অনুপমা মুখভঙ্গি করিয়া কহিলেন,—তুমিই ত' নাই দিয়ে-দিয়ে মেজাজখানা গুঁর এমনি নবাবী করে' তুলেছ।

মানব কয়েক ধাপ নামিয়া আসিয়াছে।

সতীশবাবু প্রায় ছুটিয়া আসিয়া মাঝপথে তাহাকে ধরিয়া ফেলিলেন। তাহার একখানি হাত মুঠার মাঝে তুলিয়া লইয়া কহিলেন,—তোমার গাঁ যখন ছাড়বে না, তখন কী আর আমি করতে পারি? কোথায় যাচ্ছ জানি না, তবু কিছু তোমাকে আমি দিয়ে দিচ্ছি। বলিয়া তাহার বুক-পকেটে এক তাড়া নোটই গুঁজিয়া দিলেন হয় ত' : ছেলেমান্‌সি করো না। এ তোমাকে রাখতেই হ'বে। তা ছাড়া—সতীশবাবু অনুপমাকে একটু লক্ষ্য করিয়া গলা নামাইয়া কহিলেন,—বিলেত যাবার প্রস্তাব কিন্তু open রইলো। বুদ্ধিমানের মতো তাই ভেসে পড়ে। টাকার দরকার হ'লে আমার কাছে আসতে আপত্তি কোরো না। সতীশবাবু মানবের

প্রথম প্রেম

সঙ্গে-সঙ্গে আরো দুই ধাপ নিচে নামিলেন : খুব একটা অসুবিধেয় পড়ে এ আমি চাইনে। যাও, দিন কয়েক কোথাও ঘুরে এসো। আবার এসো একদিন—

মানব ফিরিয়া দাঁড়াইয়া সতীশবাবুকে নিঃশব্দে প্রণাম করিয়াই তন্নতন্ন করিয়া নামিয়া গেল। সতীশবাবু কাঠের রেলিঙ ধরিয়া টাল্ সাম্লাইলেন। তাঁহার সঙ্গে আরো দুইটা জরুরি কথা কহিবার জন্য অনুপমা রহিয়া গেলেন।

দোতলার বারান্দায় পড়িয়াই প্রথমে মিলির ঘর। এই ঘরে গিয়া দাঁড়াইতেই মিলি অন্ধকারের গভীর সাস্থনার মতো চারিদিক হইতে তাহাকে আচ্ছন্ন করিয়া ধরিল।

সে জীবনে এত বেশি লাভ করিয়াছে যে এই সামান্য ক্ষতিতে তাহার কী এমন আসে যায়! মেঘনার পারে সেই কলা-গাছের বেড়া-দেওয়া পাতার কুঁড়ে-ঘরটি তাহার চোখে আঁকা আছে। সেই ধূ-ধূ মাঠের সমুদ্রে পাল-তোলা জাহাজের মতো নোয়াখালির সেই বাড়িটা—যে-বাড়িতে আগে মা থাকিতেন, যে-বাড়িতে এখন মিলি আছে।

ঘর হইতে বারান্দায় বাহির হইয়া আসিতেই পাশের ঘরের দরজার কাছে সেই গ্যাংলো-ইণ্ডিয়ান মেয়েটির সঙ্গে দেখা। দুই বাহুর মধ্যে এক প্যাকেট ফ্ল্যানেলের তলায় হুটপুট একটি শিশু—সোডার বোতলের মুখের মতো বোঁজানো মুঠি তুলিয়া আলো দেখিয়া খেলা করিতেছে। এই মাত্র কাদিতেছিল, নার্সের বাহুর আশ্রয় পাইয়া খুসির তাহার শেষ নাই। ময়দার পাকানো ড্যালার মতো ফুলো-ফুলো গাল, গালের চাপে নাকটা কোথায় ডুবিয়া আছে, আঙুলের ছোট-ছোট নখগুলি নতুন আলপিনের মাথার মত ঝকঝক করিতেছে।

প্রথম প্রেম

সিঁড়িতে আবার কাহার জুতার শব্দ ।

ফিরিঙ্গি মেয়েটির দিকে বন্ধুর মত চাহিয়া মানব কহিল,—গুড্-বাই ।

মেয়েটি কিছু উত্তর না-দিয়া বকের ছেলোটাকে নিচু হইয়া পর্য্যবেক্ষণ করিতে লাগিল ।

ছেলেটা যেন পিঠালির পুতুল । ডুমো-ডুমো গাল দুইটা টিপিয়া ছেলোটাকে একটু আদর করিবার জন্য সে হাত বাড়াইল, অমনি হাত তুলিয়া হাঁ-হাঁ করিতে-করিতে অনুপমা ছুটিয়া আসিলেন । মুখে তাঁহার হিন্দি-মেশানো বাঙালি বুলি : কেন তুমি ঠাণ্ডায় ওকে নিয়ে এসেছ ? শিগ্গির নিয়ে যাও ভেতরে ।

মানব স্তম্ভিত হইয়া দাঁড়াইয়া রহিল ।

অনুপমা ছেলেকে নার্সের কোল হইতে তাড়াতাড়ি ছিনাইয়া লইয়া মানবের নাগালের বাহিরে ঘরের মধ্যে অনেক দূর চলিয়া গেলেন । চোখে তাঁহার সেই বাধিনীর দৃষ্টি । মানব যেন হাত বাড়াইয়া আরেকটু হইলেই শিশুটার গলা টিপিয়া ধরিয়া শেষ করিয়া দিয়াছিল ! চলানি মেয়ে আলাপ জমাইতে চং করিয়া একেবারে ছেলে কোলে করিয়া আসিয়াছে । ভাগ্যিস্ সে ঠিক সময়ে আসিয়া পড়িয়াছিল । আর এক মিনিট পরে হইলেই—ভাবিতে অনুপমার সারা গায়ে কাঁটা দিয়া উঠে ।

মানব সামান্য একটু হাসিয়া সিঁড়ি দিয়া আশু-আশু নামিতে লাগিল ।

অনুপমা কী করিয়া এমন কুৎসিত ভাবে বদলাইয়া গেলেন মানব ভাবিয়া থৈ পায় না । নারী-চরিত্রে এই উৎকট স্বার্থপরতার চেহারা সে ইহার আগে কোনো দিন দেখে নাই, বোধকরি ভাবিতেও পারে না ।

প্রথম প্রেম

ইহারই পাশে অপরাঞ্জিতা ফুলের মত মিলির মুখখানি মনে করিয়া সে নিজেকে একটু পবিত্র বোধ করিল।

অনুপমা তখনো কী-সব অনর্গল বকিয়া চলিয়াছে। গলানো সিনে। মানব নিচে নামিয়া আসিল। নিচের তলায় অনেক সব অনাহুত অতিথি শিকড় গাড়িয়া বসিয়া দিনে-রাত্রে রস শোষণ করিতেছে। তাহাদের বেশির ভাগই অনুপমার বাপের বাড়ির সম্পর্কিত। কোনোদিন তাহাদের দিকে মানব মুখ তুলিয়া তাকায় নাই; আজ যাইবার আগে তাহাদের দেখিতে ইচ্ছা করিল। শিগ্গিরই যে তাহাদেরো উপর গৃহ-ত্যাগের নোটিশ জারি হইবে এ-খবর হয় ত' তাহারা এখনো পায় নাই। হয় ত' তাহা নয়; তাহারা ত' আর মানবের মতো অংশের টুকরা লইয়া কামড়া-কামড়ি করিতে আসিত না। তবু কোথায় যেন মানবের সঙ্গে তাহাদের মিল ধরা পড়িয়াছে। সে-ও ত' নিচেই নামিয়া আসিল।

একটা ঘরে সে ঢুকিয়া পড়িল। দড়ির একটা খাটির উপর কঞ্চল পাড়িয়া হরিহর একপেট খাইয়া চিৎ হইয়া পরম আরামে পান চিবাইতেছে আর পা দুলাইতেছে। মানবকে ঢুকিতে দেখিয়া সে ধড়মড় করিয়া উঠিয়া বসিল। মানব একটা কিছু হুকুম করিলেই সে পরম আপ্যায়িত হইবে এমনি ভঙ্গিতে সকাতরে সে কহিল,—আমাকে কিছু বলবেন?

মানব ফিরিয়া ঘাইতে-ঘাইতে কহিল,—না, তোমরা কী করছ এমনি দেখতে এসেছিলাম।

ভাগ্যিস হরিহর এখন তামাক সাজাইয়া বসে নাই।

মানবের স্পষ্ট মনে পড়ে এই হরিহরকে একদিন সে মোটর-বাইকের কাদা ধুইতে বলিয়াছিল—হরিহর দুই-পাটি দাঁত বাহির করিয়া তখনই

প্রথম প্রেম

কোমরে কাপড় কাছিয়া বালুতি করিয়া জল তুলিয়া আনিয়াছিল। আজ হরিহরের বিছানা ভাগ করিয়া অনায়াসে সে তাহার পাশে বসিতে পারিত।

কিন্তু সহানুভূতি কুড়াইবার এই উদ্ভৃতি তাহাকে শোভা পায় না।

নিচে মোটর-বাইকটার সঙ্গে তাহার দেখা হইল—তাহার 'ট্রায়াম্ফ'। ছাণ্ডল্টা ধরিয়া বন্ধুর হাতের মত এক সবল ঝাঁকানি দিয়া সে বাহির হইয়া পড়িল।

গ্যারেজটা তাল্লা-দেওয়া। কাল সকালে আসিয়া মির্জা দরজা খুলিবে। সেই গাড়ি করিয়া ফিরিঙ্গি-মেয়েটা হয় ত' ছেলে কোলে নিয়া রোজ হাওয়া খাইয়া আসিতেছে।

পেছন থেকে নিতাই ডাক দিল: বাবু চলে' যাচ্ছেন নাকি? ঠাকুর যে আপনার খাবার নিয়ে ঘুরছে। এখন বেরুলে সব জুড়িয়ে যাবে যে।

মানব ডাক শুনিয়া ফিরিল। পকেট হইতে খুচরা একটা টাকা বাহির করিয়া নিতাইর দিকে ছুঁড়িয়া দিয়া কহিল,—এই নে।

এখনো নবাবি তাহার বোলো আনা। ফুটপাতে খানিকক্ষণ দাঁড়াইতেই একটা ট্যাক্সি মিলিয়া গেল। বুক-পকেটটা ফাঁক করিয়া তাহার ক্ষীতির একটা পরিমাপ করিয়া সে ট্যাক্সিতে চাপিয়া বসিল।

কোথায় যাইবে জানিবার জন্ত ড্রাইভার ঘাড় ফিরাইল।

সিটটাতে নিজেকে আরো ছড়াইয়া দিয়া মানব কহিল,—জানি না।

এমন যাত্রীকে অবশেষে কোথায় লইয়া যাইতে হয় ড্রাইভার জানিত।

মনে-মনে তন্ন-তন্ন করিয়া খুঁজিয়াও মানব কোনো জায়গার হৃদিস্ পাইল না। সে-জন্ত তাহার ব্যস্ততা নাই। যেখানে হয়, সেখানেই সে থাকিবে। যদি পুলিশ আপত্তি না করে সারা-রাত্রি ট্যাক্সিতেই, যদি আপত্তি করে, সুখকন্ঠলশয়নে। ফুটপাতে, নর্দমায়,—যেখানে খুসি। এই অনিশ্চিততার সঙ্গে নিজেকে সে এক মুহূর্তেই চমৎকার ধাপ্ খাওয়াইয়াছে।

শ্রান্তিতে গা ছাড়িয়া দিয়াছে—মূর্চ্ছিত চোখে ঠাণ্ডা জলের বাপ্টার মতো হাওয়া আসিয়া বিঁধিতেছে। ধূ-ধূ মাঠের উপরে সেই বাড়ি, মেঘনার নীলচে জল, মিলির মুখ,—সব চোখের সমুখ দিয়া ভাসিয়া চলিয়াছে।

অনেক পথ ঘুরিয়া ট্যাক্সিটা যেখানে থামিল তাহারি গায়ে ইম্পিরিয়্যান্ রেষ্টোর্যান্ট্। হোটেলটা দেখিয়া মানবের কি-একটা কথা চট্ করিয়া মনে পড়িয়া গেল। ক্ষুধাও তাহার পাইয়াছে—কিছু খাইয়া লইতে-লইতে বরং কিছু একটা ঠিক করা যাইবে। ট্যাক্সিটাকে ভাড়া চুকাইয়া বিদায় করিয়া দিল।

বয়্কে ‘এক পেগ্ জনি-ওয়াকার অউর এক প্লেট্ ফাউল কাট্লেট্’

প্রথম প্রেম

আনিতে বলিয়া মানব ঘাড়ের ঘাম মুছিল। এই ঠাণ্ডায় গায়ে ঘাম দিয়াছে। নিরুৎসাহ হইবার কী আছে? এখনি চান্দা হইয়া উঠিল বলিয়া।

বয়স্ মদের সঙ্গে সোডা মিশাইল। সেই রঙিন মদের দিকে চাহিয়া মানবের ঠোঁটের প্রান্তে একটু হাসি দেখা দিল। তার চোখের সামনে মিলির হাসিটি যেন টল্‌টল্‌ করিতেছে। জীবনে এই দ্রব্য সে কোনো দিন ছোঁয় নাই; ইহারই জন্ত বাবা মাকে পথের ধারে ফেলিয়া গিয়াছেন—সেই স্মৃতি সর্বদা তাহার মনে আতঙ্কের সৃষ্টি করিত। আজো ভয় ভয় গ্লাসটার দিকে চাহিয়া তাহার ভয় করিতে লাগিল—ইহাতে চুমুক দিলেই যেন মিলিও মা'র মতো অদৃশ্য হইয়া যাইবে। তাড়াতাড়ি গ্লাসটাকে সে দূরে সরাইয়া রাখিল। কার্টনেট সাবাড় করিয়া হোটেলের বাহিরে আসিয়া দেখিল রাস্তার লোক-চলাচল কমিয়া আসিয়াছে। সাড়ে-ন'টার 'শো' এই ভাঙিবে।

চৌরঙ্গির দিকে সে হাঁটিতে শুরু করিল। কী তাহার দুঃখ যাহা ভুলিবার জন্ত অবশেষে সে মদের শরণ নিতে গিয়াছিল! পৃথিবীতে সেই ত' পূর্ণতম—সে ভালবাসিয়াছে ও ভালবাসা পাইয়াছে। মদের উগ্রতায় মিলির স্নিগ্ধ স্মৃতিটিকে সে বিবর্ণ করিয়া তোলে নাই—ঈশ্বরকে প্রণাম! তিনি যে ঘরের বদলে পথের সাথী দিলেন মানব ইহার বদলে স্বয়ং ঈশ্বরকেও চায় না।

আমহাষ্ট' স্ট্রিটে বিজনদের মেস্‌এ যাইবার জন্ত সে একটা বাস্‌ লইল। মেস্‌এর দরজা বন্ধ। অনেক ধাক্কাধাক্কির পরেও কেহ দরজা খোলে না। ডাকাডাকিতেও সাড়া নাই। বাকি রাত্রিটা কোথায় কাটানো যায় ইহাই ভাবিয়া মানব হাঁপাইয়া উঠিল। এমন সময় মেস্‌এর দরজায়

প্রথম প্রেম

মশরীরে বিজনই আসিয়া হাজির—বন্ধু-বান্ধব লইয়া পাস্-এ থিয়েটার দেখিয়া ফিরিতেছে।

মানবের চেহারা ও পোষাক দেখিয়া বিজন অবাক হইয়া গেল : তুমি এতো রাতে—এইখানে ?

বিজনের হাত ধরিয়া মানব কহিল,—তোমার সঙ্গে আমার ভীষণ দরকার আছে। না পেয়ে আরেকটু হ'লে আমি ত' চলে' যাচ্ছিলাম। ভাগ্যিস্ দেখা হ'য়ে গেলো।

তাহার সঙ্গে মানবের কী দরকার, বিজন সাত-পাঁচ কিছু ভাবিয়া পাইল না। মানব অন্ধের কাছে সাহায্য-প্রার্থী, এই অপমান সে সহিল কী করিয়া ? ভিড় হইতে একটু সরাইয়া নিয়া বিজন কহিল,—কী দরকার ?

—বিশেষ কিছু নয়, আজ রাতে তোমার এখানে একটু শুতে পাবো ?

—স্বচ্ছন্দে। কিন্তু বাড়ি না গিয়ে আমার মেস্-এ—নোংরা বিছানায় !

—বাড়িতে আর জায়গা নেই।

কথা শুনিয়া বিজন বিস্ময়ের একটা অক্ষুট শব্দ করিয়া উঠিতেই মানব হাসিয়া উঠিল। কহিল,—একটি শিশু এসে আমাকে স্থানচ্যুত করেছে। বুঝতে পার্ছ না হাঁদারাম ? মিসেস্ অনুপমা চাটুজে কায়ক্লেশে একটি পুত্র প্রসব করেছেন। অতএব—

বিজন তাহার হাতটা আঁকড়িয়া ধরিয়া কহিল,—বলো কি ?

মানব স্মিতহাস্তে কহিল,—এর চেয়ে বেশি নির্বিকার হ'য়ে কী করে' বলা যায় ? আমার চেহারা দেখে কি সত্যিই মনে হয় যে আমার কিছু একটা হয়েছে ? জীবনে অনেক যে বেশি লাভ করবে তাকেই অনেক বেশি ক্ষতি স্বীকার করতে হয়।

প্রথম প্রেম

ইহার মধ্যে অন্তান্ত বন্ধুরা কোশলে মেস্‌এর দরজা খোলাইয়াছে। বাড়িটার ঐ পাশ দিয়া গিয়া জান্নাতে হাত বাড়াইয়া অমুকুল-বাবুর মশারির দড়িটা বারকতক নাড়িলেই এই অসাধ্য-সাধন ঘটে। তিনি তড়াক করিয়া লাফাইয়া উঠেন। জান্না বন্ধ করিলেও নিস্তার নাই। রাস্তায় টিন্ আছে। মেস্‌এর রামেন্দু থিয়েটারের টিকিট-চেক করে বলিয়া অনায়াসেই অনেককে ঢুকাইয়া দিতে পারে—সেই খাতিরেই অমুকুলবাবু এই অত্যাচার সহ করেন।

রামেন্দু ডাকিল : আসুন, বিজনবাবু। খুলেছে।

বিজন কহিল,—থাক খোলা। আমরা এইখানেই আছি। আমি বন্ধ করবো। তার পর মানবের দিকে চাহিয়া : তারপর কী হ'বে ?

মানব সহজ স্বরে কহিল,—কী আবার হ'বে ! একটু অসুবিধে পড়বো। তেমন অসুবিধে পৃথিবীতে কার নেই ? কিন্তু সেই কথা আমি ভাবছি না।

—তবে কী ?

—আমার বোধকরি জর এসে গেলো।

—তাই নাকি ? মানবের কপালে হাত রাখিয়া : সত্যিই ত'। চলে এসো ভেতরে।

—তোমার বিছানায় জায়গা হ'বে ত' ?

—আগে হ'ত না বটে, আজ হ'বে। বাইরে আর দাঁড়ায় না।

অন্ধকার সিঁড়ি দিয়া দুই জনে উপরের ঘরে উঠিয়া আসিল। চার-কোণে চারটে খাট পাতা—চারজনের একটা করিয়া কেরাসিন-কাঠের টেবিল। ঘরটা জাঁতিয়া আছে। দুই দিকে লম্বা দুইটা দড়ি খাটানো—তাহাতে কাপড়-জামা গাঁদি করা। চৌকি চারটার মধ্যে গুটি-গুটি

প্রথম প্রেম

ইটিবার মত একটুখানি জায়গা—দরজার কাছে সামান্য যে একটুখানি জায়গা আছে তাহাতে খবরের কাগজ পাতিয়া থিয়েটার-ফেরৎ লোকগুলি খাইতে বসিয়া গেছে। উপরের ঘরে তাহাদের জন্ত ভাত-চাপা ছিল।

রামেন্দু বলিল,—বসে' পড়ুন, বিজন বাবু।

এঁটো-কাঁটার পাশ কাটাইয়া দুই জনে কোনো রকমে ভিতরে ঢুকিল। 'সিট'টা দেখাইয়া দিয়া বিজন কহিল,—শুয়ে পড়ো। আর কথা নেই। শুতে তোমার কষ্ট হ'বে—এমন কথা আজ আর নাই বল্লাম।

মানব তখনই শুইয়া পড়িল। কহিল,—একটা কন্দল-টন্দল থাকে, গায়ে চাপিয়ে দাও শিগ্গির।

তিন জনের গায়ে দিবার যাহা কিছু ছিল মানবের গায়ের উপর স্তূপীকৃত হইতে লাগিল। কাঁপুনিটা কিছু থামিয়াছে।

তক্তপোষের উপর একপাশে বসিয়া স্বগতোক্তির মত বিজন কহিল,—
কী হ'বে ?

মানব চোখ চাহিল : কিসের কী হ'বে ? আমার অসুখের ? এর আগে বিছানায় শুয়ে কোনোদিন রোগ ভোগ করেছি বলে' মনে পড়ে না। কিন্তু তার জন্তে তোমার চিন্তা করতে হ'বে না।

—সে-জন্তে চিন্তা করছি নাকি ?

—তবে কী জন্তে ? এর পর আমার কী হ'বে তাই ভাবছ ? তার চেয়ে খেয়ে নিলে কাজ দেবে।

বিজন কহিল,—তুমি কি ও-বাড়ি আর ফিরে যাবে না ?

মান হাঙ্গিয়া মানব কহিল,—তোমার কী মনে হয় ?

—তবে কী করবে ?

—তবু ত' এবার কিছু একটা করবার কথা মনে হচ্ছে। এতোদিন

প্রথম প্রেম

সবই যেন তৈরি ছিলো—এবার আমার তৈরি করবার পালা। কিন্তু এখন আর নয়, আরেক সময় সব তোমাকে বলবো।

জরের ঘোরে চোখ বুঁজিয়া মানব দেখিতে পাইল সে যেন মেঘনার উপরে নৌকা করিয়া চলিয়াছে। হঠাৎ মেঘনা আরব্যসাগর ও নৌকাটা প্রকাণ্ড একটা জাহাজ হইয়া উঠিল। নৌকায় মিলি এতক্ষণ তার পাশে ছিল, জাহাজের ভিড়ে তাহাকে আর এখন খুঁজিয়া পাওয়া যাইতেছে না। সে তলাইয়া গেল নাকি? মানব কি তবে মিলিকে ফেলিয়া একলাই চলিয়াছে?

মানব ভারি হাতেই পড়িল। সকাল বেলায় দিকে ছাড়িয়া এগারোটা বাজিতেই অর ফের উঠিতে থাকে। আজ এগারো দিন।

কলাই-করা বাটিতে ঠাকুর কতগুলি চাকা-চাকা বালি দিয়া গিয়াছে। একচুমুকে পরম তৃপ্তিতে মানব তাহা খাইয়া ফেলিল।

বিজন কহিল,—কিসের তোমার আপত্তি? একটা খবর পাঠাই?

—না, না—মানব ব্যস্ত হইয়া উঠিল : শুধু-শুধু তাকে ব্যস্ত করা। ভাবনা ছাড়া কিছুই সে করতে পারবে না, আর করতে পারবে না ভেবে ভাবনাও তার বাড়তে থাকবে। তা ছাড়া এখন হয় ত' সে দেওঘরে। কিন্তু আমার একখানাও চিঠি না পেয়ে সে কী ভাবছে!

—আমি তার কথা বলছি নে। বিজন কহিল,—সতীশবাবুকে খবর দিতে বলছি।

—কোনো দরকার নেই। কিছুই ত' অভাব দেখছি না। এমন সেবা—টাকাও এখন সব শেষ হয় নি।

—কিন্তু অসুখটা আর কয়েক দিন চললে ত' আর এ দিগে চলবে না।

—যার কিছুই নেই অসুখ হ'লে তার যা ব্যবস্থা হয়, আমাদের তাই হ'বে। না চললে কোনো হাঁসপাতালে দিগে এসো।

—সে-কথা কে বলছে? কিন্তু যিনি বিপদে সাহায্য করবেন বলে' প্রতিশ্রুতি দিগেছেন তাঁকে খবর দিতে দোষ কি?

—তুমি যদি কোনো বড়লোকের বাড়ি গিয়ে হাত পাত', সে ঘটটা দোষ, এ তাই। ভিক্ষা আর আমি করতে পারবো না। মরে' গেলেও না।

—এ তোমার বাড়াবাড়ি।

প্রথম প্রেম

—সব-তাতেই আমার একটা বাড়াবাড়ি চাই। আতিশয্য না হ'লে আমি বাঁচতে পারি না।

—কিন্তু একটু যদি চালাক হ'তে তা হ'লে এই দুর্দশায় পড়তে না।

—অর্থাৎ না উড়িয়ে যদি কিছু হাতাতাম। সে-সঙ্কীর্ণতা আমার ছিলো না। নিজের বিজ্ঞাপন দিতে আজো আমার ভালো লাগে, বিজু।

—কিন্তু এই যুগে আতিশয্য বা আদর্শ—যাই বলো—বিড়ম্বনা। ভাবের চেয়ে বুদ্ধি বড়ো। ভালো হ'য়ে উঠে টোল-খাওয়া বুদ্ধিটা পিটিয়ে সোজা করে' নাও। এখনো সময় আছে।

—যথা ?

—বুড়োকে জপিয়ে মোটা একটা টাকা নিজের য্যাকাউন্টে ট্রান্সফার করে' সোজা বিলেত চলে' যাও। বুড়ো যখন রাজিই, তখন তুমি পেছিয়ে থাকছ কেন ?

—যেতে হ'লে আমি নিজেই পথ করতে পারবো। এই পথ করবার স্বাধীনতা পেয়েছি এইটেই আমার সব চেয়ে বড়ো লাভ।

—এইটেই তোমার রুগ্ন মনের চরম বিকার। বিয়েতে পণ, আর বিলেত যাবার সুরবিধে পেনে বিলেত—প্রত্যেক ইয়ং-ম্যান্‌এর এই কাম্য হওয়া উচিত—যদি সে মানুষ হ'তে চায়। তারপর বিলেত থেকে একবার ঘুরে আসতে পারলে কনেরাও পিল্পিল্প করে' আসতে থাকবে—নইলে তোমার মিলিও দেখবে কোন্ দিন মিলিয়ে গেছেন।

মানব ম্লান একটু হাসিল। মি আর লি—এই দুইটি পাথায় ভর করিয়া একটি অল্পভূতি সমস্ত আকাশ দেখিতে-দেখিতে আচ্ছন্ন করিয়া ফেলিল। বিজন মিলিকে দেখে নাই, তাহার সঙ্গে কথা কহে নাই—

প্রথম প্রেম

তাই সে তাহাকেও সমস্ত নারীজাতির সঙ্গে এক পঙ্ক্তিতে মিলাইয়
অমুদার মন্তব্য করিল। সে ত' জানে না—মানব যাহাকে ভালবাসিয়াছে
—সে আলাদা, সে একান্ত বিশেষ, সে একাকী। সে মানবের নিজের
সৃষ্টি—কবির কবিতার মত !

দুই সপ্তাহ পরে জরটা ছাড়িয়া গেল।

পরদিন কোন রকমে সে রাস্তার দিকের বারান্দায় আসিয়া হাজির
হইল। বিজন তাড়াতাড়ি একটা লোহার চেয়ার আগাইয়া দিল।
কহিল,—কি পথ্য করবে জেনে আসতে যাচ্ছি।

—এ আবার জানতে যাবে কি ? হু' মুঠো ভাত খাবো।

—তাই বই কি। তার পর আবার চিং হ'য়ে পড়ে।

মানবের সঙ্গে নূতন করিয়া আজ পৃথিবীর পরিচয় ঘটিল। সে এত
দিন সকলের থেকে দূরে সরিয়া ছিল, আজ জনতার মাঝে তাহার
স্থান—নিপীড়িতের সঙ্গে তার বন্ধুতা, দুঃখের সে পতাকাবাহী। নিজের
চারিদিকে সে যেন একটা অবাধ বিস্তার অমুভব করিতেছে—নিজেকে
প্রসারিত করিবার প্রেরণা। এমন দিন তাহার জীবনে যে আসিবে ইহা
সে জানিত ; তাই আঘাতও যেমন অপ্রত্যাশিত নয়, রোমাঞ্চও তেমনি
ক্ষণস্থায়ী।

তবু তাহার মিলি আছে, অস্ত্রের যাহা নাই,—জীবনে এইটুকু তার
আভিজাত্য।

মেঘনার পারে কলাগাছের বেড়া-ঘেরা সেই ঘর তাহার দিকে
নির্নিমেষ চোখে চাহিয়া থাকে। সে চাষ করিবে আর মিলি নিড়াইবে
মাটি।

প্রথম প্রেম

বিজন ফিরিয়া আসিয়া কহিল,—পথ্যগুলো আজকে একটু প্রমোদান্ পেয়েছে। পাঁউরুটির শাঁস আর দুধ—

—যথেষ্ট। সবাই মিলে অত্যাচারী হ'য়ে উঠলে আমি পারবো কী করে' ? কই আমায় এক দিনে চাক্রা করে' দেবে—আমি হাওয়া বদলাতে দেওঘর যাবো—তা না, আমাকে খালি বিছানায় শুইয়ে রাখবার ষড়যন্ত্র !

—দেওঘর যাবে না কি ? গিয়ে তাকে বলবে—দাও ঘর !

বিজন হাসিয়া উঠিল। তারপর টিপ্পনি কাটিয়া কহিল,—প্রবল জ্বরের সময় পুরুষের প্রবল হাতের সেবা পেলে চলে' যায়, কিন্তু কন্ড্যালাসেণ্ট্ অবস্থায় কোমল হস্তের পরশ চাই। এই ত' দিব্যি তুমি চালাক হ'য়ে উঠছ।

—উঠছি না কি ?

—তবে বেশি চালাক হ'তে গিয়ে যেন বিয়ে করে' বসো না।

না, মিলির কথামত উপন্যাসের প্রথম পরিচ্ছেদ সে দীর্ঘতর করিয়া তুলিবে। মিলির অন্য নূতন করিয়া সে নিজেকে উদ্ভাটিত করিবে। আগে সে ছিল নিতান্ত পরাধীন, এই দৈন্তের মহিমায় এখন সে বেশি উজ্জল !

মানব কহিল,—কিন্তু টাকা-পয়সা সব ফুরিয়ে গেলো, বিজু।

মানবের মুখে কথাটা কেমন অদ্ভুত শোনায়।

—সতীশবাবুর কাছ থেকে ভর্তুকি করে' আনলেই হয়।

সেই কথা কানে না তুলিয়া মানব বলিল,—দেওঘরে নিশ্চয়ই এখন শীত পড়ে' গেছে। কিছু জামা-কাপড়ও কিনতে হবে। শেষ কালে খার্ড-ক্লাশের ভাড়া কুলুমে হয়। কতো ভাড়া জানো ? এতোদিন. ত'

প্রথম প্রেম

তোমার জিনিস-পত্র দিয়ে স্বচ্ছন্দে চালিয়ে দিলাম। কিন্তু নিজে ত' একটা পথ দেখতে হ'বে।

—এখন দয়া করে' বিছানায় শুয়ে-শুয়েই পথ দেখ।

মানব বিছানায় আসিয়া শুইল।

পথ বাহিয়া অগণিত মানুষের মিছিল চলিয়াছে। তাহাদের পায়ের সঙ্গে মানবও মনে-মনে পা মিলাইয়া চলিতে লাগিল।

দিল্লি-এক্সপ্রেস্‌এ দেওঘর সে যাইতেছে বটে, কিন্তু মানবের কেবলই মনে হইতেছে, সে—কি না সেই নাম—নোয়াখালি চলিয়াছে। সেখানকার জীবনের প্রশান্ত নিস্তরতার সঙ্গে মিলির কোথায় একটি মিল আছে—ছবিতে বিশেষ একটি রঙের সঙ্গে বিশেষ একটি রঙের অপূর্ব মিলের মতো। সেইখানেই সে থাকিবে—পশ্চিমে ধানের ক্ষেত, দক্ষিণে নরম চর, পূবে সহরের দিকে রাস্তার একটি ক্ষীণ সূচনা। সেইখানে সে ঠিক যে কী করিবে এখন তাহা ভাবিয়া পায় না—ভাবিবার দরকারো নাই।

নিজের ভিটে ছাড়িয়া সে কোথায় কোন্ পরের বাড়িতে গিয়া ছিটকাইয়া পড়িয়াছিল; সেই বাড়িতেও তাহার স্থান হইল না—তাহারই নিজের বাড়ি আবার চারিদিকের সবগুলি জানালা মেলিয়া দিয়া তাহাকে ডাকিতেছে। সমস্ত ব্যাপারটায় সে এখন অত্যন্ত মজা পাইতেছে।

চলিয়াছে খার্ড-ক্লাশে। সঙ্গে সতরঞ্চি ও কসলে জড়ানো দুইটা বালিশ ও একটা টাইম্-টেবল। চলিবার সময় সঙ্গে টাইম্-টেবল রাখাটা তার একটা ফ্যাসান্ ছিল—মিলুয়া যাইতে হইলেও তাহা হাতছাড়া হইত না। পুরোনো দিনের সেই অভ্যাসটি এখনো রহিয়া গেছে।

দেওঘরে এই সে প্রথম চলিয়াছে। কোথায় গিয়া উঠিবে ঠিক নাই। মিলিদের বাড়ি খুঁজিয়া না পাইলে ধর্মশালায় রাতটা কোনো রকমে কাটানো যাইবে হয় ত'। 'রোহিণী'র দিকে সোজা দক্ষিণে যে রাস্তা চলিয়া গিয়াছে তাহারই গায়ে তাহার ছোট-কাকার বাড়ি—মিলি তাহাকে এই কথাটুকু শুধু বলিয়া দিয়াছিল। এই সম্পর্কে ভাঙা-ভাঙা আরো দুয়েকটা কী কথা বলিয়াছিল মানব তাহাতে কান দেয় নাই। কিন্তু

প্রথম প্রেম

তাহার ছোট-কাকা কী করেন, কী বা তাঁহার নাম, ‘রোহিণী’ই বা কোথায় কে থবর রাখে ।

বৈগুনাথধামে গাড়ি পৌঁছিল প্রায় সন্ধ্যায় ।

হয় ত’ মিলি সঙ্গীর অভাবে একা-একা ষ্টেশনেই বেড়াইতে আসিয়াছে । নূতন কোন-কোন যাত্রী আসিল বা পরিচিত কেহ আসিল কি না ষ্টেশনে আসিয়া তাহার খোঁজ নিতে মিলির ভালো লাগা উচিত । তাহা ছাড়া তাহার যে-কোনো দিনেই আসিবার কথা ছিল ।

ব্যাপারটা খুব সহজ হইল না । ষ্টেশনেরই কাছে ধর্মশালা একটা আছে বটে, কিন্তু তাহার ভিতরের চেহারা দেখিয়া মানবের সমস্ত কবিত্ব শুকাইয়া গেল । কিন্তু তাহা ছাড়া গতিই বা কোথায় ? ফির্তি ট্রেন ?—তার পর ?

উপরের তলাটা বোঝাই—নিচের তলায় রাস্তার উল্টা দিকে একখানা ঘর জুটিল । এই সব খেলো বিলাসিতা লইয়া মানবের আর স্পৃহা নাই ; মিলির দেখা পাইলেই সে বাঁচে । ঘরটা খোলা রাখিয়াই সে বাহির হইয়া যাইতেছিল ; দারোয়ান বলিল,—একটা তাল লাগিয়ে যান্ ।

মানব কহিল,—একখানা কম্বল মাত্র আছে । কেউ নেবে না ।

—না, না, ঘরটাও বেহাত হ’য়ে যেতে পারে । এ-সময় ভারি ভিড় ।

—আচ্ছা, একটা কিনে নিয়ে আসছি । ততোক্ষণ তুমি একটু চোখ রাখো—

রাস্তায় পড়িয়াই একজন ভদ্রলোককে মানব জিজ্ঞাসা করিল,—
‘রোহিণী’ কোথায় বলতে পারেন ?

প্রথম প্রেম

প্রশ্ন শুনিয়া ভদ্রলোক স্তম্ভিত হইয়া দাঁড়াইলেন। কহিলেন,—
রোহিণী? সে ত' বন্ধিমবাবুর বইয়ে।

যাহাকে জিজ্ঞাসা করে কেহই ঠিক করিয়া বলিতে পারে না। যিনি মন্দিরের চূড়ার দিকে হাত দেখান, তাঁহারই সঙ্গী হাত দেখান উন্টা দিকে। দেখিতে-দেখিতে রাত হইয়া আসিবে। মনে পড়িল কাল কলিকাতায় সে চাঁদ দেখিয়াছে। কথাটা মনে করিয়া সে একটু খুসি হইল। আরো খানিকটা খোঁজা যাইবে। জ্যোৎস্না পাইয়া সবাই হয় ত' এখুনি ঘর নিবে না। চাই কি, চোখের সামনে পথেরই উপর তাহার সঙ্গ দেখা হইয়া যাইবে।

আবোল-তাবোল হাঁটিতে লাগিল। বাঁ-দিকের রাস্তাটায় শাদা পাথরের কুচো ছড়ানো আছে—অতএব ঐ পথে রোহিণী, কিম্বা ঐ উঁচু বাঁধটার পারে নির্জন মাঠের মধ্যে ঐ যে একখানি বাড়ি দেখা যায় কে জানে তাহারই এক কোঠায় মিলি এখন হাতীর দাঁতের চিকুনি দিয়া চুল আঁচড়াইতেছে না।

সোজা চলিতে-চলিতে মানব হঠাৎ থামিয়া পড়িল। তিন দিকে তিনটা রাস্তা। কোন্টা সুন্দর বা মিলির পক্ষে বেড়াইবার উপযুক্ত মনে-মনে তাহাই সে বাছিতে লাগিল। হঠাৎ চোখে-পড়িল রাস্তার ধারে একটা পোষ্টে লেখা আছে—টু রোহিণী।

বাঁয়ের রাস্তা।

রাস্তা যেমন ফুরায় না—বাড়িও তেমনি মাত্র একখানা নয়। কোনো বাড়িই মানবের মনের মতো হয় না। এইবার সোজা সে রাস্তাটায় টঁহল দিয়া আশুক, ফিরিবার সময় একটা-একটা করিয়া বাড়িগুলিতে ঢুকিয়া-ঢুকিয়া সে জিজ্ঞাসা করিবে—হ্যাঁ, কী-ই বা জিজ্ঞাসা

প্রথম প্রেম

করিবে? গৃহস্বামীর নাম পর্য্যন্ত জানে না। জিজ্ঞাসা করিবে মিলির ছোট-কাকা এখানে থাকেন? রোগা শরীরে মার সে সহ্য করিতে পারিবে না।

নিজের মনে হাসিয়া সে আস্তে-আস্তে হাঁটিতে লাগিল। এখানে দস্তুরমতো শীত। কঞ্চলটা গায়ে দিয়া বাহির হইলেই হইত। সম্যাসী সাজিবার আর বাকি কী! যাই হোক, ফিরিবার পথে স্বয়ং মিলিরই সঙ্গে দেখা হইবে—ততক্ষণে তাহার বেড়ানো শেষ হইয়া গেছে। তাই সামনে আগাইবার সময় বারে-বারে সে পেছন ফিরিয়া দেখিতে লাগিল সত্য-সত্যই মিলি কোনো বাড়িতে ঢুকিয়া পড়িল কি না।

এটা কা'র বাড়ি? মানব খামিয়া পড়িল। কাহাকে জিজ্ঞাসা করিবে? কী-ই বা দরকার—সামনে গিয়া সোজা মিলি বলিয়া ডাকিলেই—ব্যস্। তাহার পর হাত ধরাধরি করিয়া—রাস্তাটা ত' নির্জনই আছে—দুইজনে দক্ষিণে আরো খানিকটা বেড়াইয়া আসিবে,—কিন্মা ঐ যে ধোঁয়ার কুণ্ডলী পাকাইয়া পাহাড় একটা গুম্ হইয়া পড়িয়া আছে—সেখানে। আজই অবশ্য তাহার দুঃখের কথা বলা হইবে না। তাহার দুঃখের কথা! মানব নিজের মনেই হাসিল।

সে স্পষ্ট মিলির গলা শুনিল,—কি-একটা কথায় সে আর কাহার সঙ্গে একত্রে হাসিয়া উঠিল। হ্যাঁ, ঐ বাড়িটাতেই। কিন্তু কাহাকেও জিজ্ঞাসা করিয়া গৃহস্বামীর নামটা জানিতে পারিলেই সে কিছু চায় না। ষাক্, একটা লোক হাতে একটা টর্চ লইয়া সাইক্লো করিয়া এই দিকে আসিতেছে। লোকটা কাছে আসিয়া পড়িতেই মানব জিজ্ঞাসা করিল,—ওটা কা'র বাড়ি বলতে পারেন? এই যে সামনে বড়ো বাড়িটা।

প্রথম প্রেম

—ডাক-বাংলো ! হ্যাঁ, এইবার মানবের মনে পড়িতেছে। মিলি স্পষ্ট বলিয়া দিয়াছিল ডাক-বাংলোর পাশেই তাহার ছোট-কাকার বাসা। তবে,—ঐ বাড়িটা। মানব বিশেষ খুসি হইতে পারিল না। ছোট একতলা বাড়ি—সামনে বাগান নাই একটুও, ছাতে বাঁশ খাটাইয়া দড়িতে কখন কাপড় শুকাইতে দেওয়া হইয়াছে—রাত্রিও ঘরে নিবার নাম নাই। চারিদিকে কেমন যেন অপরিচ্ছন্নতা। মিলিকে এই বাড়িতে মানাইবে না।

তবুও সে সেই দিকেই পা চালাইল। বারান্দায় একটা চেয়ারে বসিয়া ওয়াল-ল্যাম্পের আলোতে একজন ভদ্রলোক মুখ ঢাকিয়া খবরের কাগজ পড়িতেছেন। মানব সিঁড়ির কাছে আসিতেই ভদ্রলোক জুতার শব্দে মুখ তুলিয়া কহিলেন,—কে ?

মানব থম্কিয়া গেল। মুখ দিয়া বাহির হইল : আমি।

চেয়ারে সোজা হইয়া বসিয়া ভদ্রলোক কহিলেন,—কী চান ?

এক পা সিঁড়িতে এক পা মাটিতে—মানব বলিল,—মিলি এখানে আছে ?

—মিলি ? কে মিলি ? ভালো নাম কী ?

ভদ্রলোক তাহার মুখে উত্তর না পাইয়া আবার কহিলেন,—ভালো নাম জানেন না ? কয় বছরের খুকি ?

—ঠিক খুকি কি ?

—আপনিই বলতে পারবেন। মেয়ে কার ? কোথায় আছে ?

—মেয়ে নোয়াখালির হীরালালবাবুর। এখানে আছে কি না—
তাই ত' জিগ্গেস্ করছি।

—এমনি জিগ্গেস্ করতে-করতে কদুর যাবেন ?

প্রথম প্রথম

মানবও ঠেস্ দিয়া উত্তর দিল : এখানে ওর দেখা পেয়ে গেলে আর যাবো কেন ? এখানেই থেকে যাবো ।

—বটে ? ভদ্রলোক চেয়ারে নড়িয়া বসিলেন : আপনি আছেন কোথায় ?

—ধরুন না, আপাততো এখানে এসেই উঠছি ।

—আপনার নাম ?

—তাতে আপনার কোনো ইন্টারেস্ট নেই । মিলি যদি এখানে থাকে ও এখন বাড়িতে থাকে, দয়া করে' তাকে একটবার ডেকে দিন ।

মানবের আপাদমস্তক পর্যবেক্ষণ করিয়া একটু শ্লেষের সুরে ভদ্রলোক কহিলেন,—আপনার সঙ্গে মিলি না ফিলির কোনো আত্মীয়তা আছে ?

—আছে বৈ কি ।

—কী আত্মীয়তা ?

—সে-কথা আপনাকে বুঝিয়ে বলতে পারবো না । বললেই বা আপনি বুঝবেন কেন ?

—ও একই কথা । ভদ্রলোক কহিলেন,—কদিনের আলাপ ?

—অতো কথা জানবার আপনার কী দরকার ? মানব এইবার দস্তুরমতো চটিতেছে : মিলি যদি এইখানে থাকে ত' ডেকে দিন । আমার কাজ আছে । আপনার সঙ্গে অনর্থক বক্তব্য সময় নেই ।

—নেই নাকি ? Sorry, আমি তা জান্তাম না । নমস্কার । ভদ্রলোক হাত তুলিলেন ।

—মিলি তবে এইখানে নেই ?

প্রথম প্রেম

—আমি তা বলেছি? আপনার সময় না থাকলে কী করা যেতে পারে বলুন। সময় যদি থাকে ত' রাস্তায় পাইচারি করতে থাকুন, দেখা হ'য়ে যেতে পারে। এখনো বেড়িয়ে সে ফেরে নি।

—তা হ'লে এই বাড়িতেই সে আছে? কবে এসেছে? কোথায় গেছে বেড়াতে?

—অতো কথা জানুবারই বা আপনার কী দরকার? আপনার সঙ্গে অনর্থক বকবার আমার সময় নেই। বলিয়া ভদ্রলোক কাগজ তুলিয়া ফের মুখ ঢাকিলেন।

ত্রিকূট হইতে মিলিরা সন্ধ্যার খানিক পরেই বাড়ি ফিরিয়াছে। বাড়ি আসিয়াই হাত-পা ছড়াইয়া সটান্ বিছানায়। কাকিমা আবার চা খাইতে ডাকিতেছেন—মিলির এ তৃতীয় কাপ্।

সুবিনয় ঘরে ঢুকিয়া কহিল,—আমার বোধকরি সপ্ততিতম।

মিলি আড়মোড়া ভাঙিয়া উঠিয়া বসিল। আড়মোড়া ভাঙিতে-ভাঙিতে : আমার যা ব্যথা করছে, কাকিমা। জ্বরে না পড়ি। পা দুটোয় ত' ফ্ল্যানেল জড়াতে হ'বে। হাতের তানু দুটো ছড়ে' গিয়ে কিছু আর নেই। ঈষৎ কান্নার সুরে : আমার কী হ'বে ?

কাকিমা গম্ভীর হইয়া কহিলেন,—কী আবার ! ঘুম।

চায়ে চুমুক দিয়া সুবিনয় কহিল,—আমাদের সঙ্গে বাঁধা সিঁড়ি ধরে' সোজা নেমে এলেই পারতেন। মিছিমিছি ঘুর-পথে বাহাদুরি করতে গিয়ে কী লাভ হ'লো ?

—যে-পথই নিজে বেছে নিই না কেন, অন্তের চোখে ত' তা ঘুর-পথ বলে'ই মনে হ'বে।

—কিন্তু লাভ হ'লো কী ? জখম হ'য়ে আইডিন্ লাগানো।

—অন্তের চোখে ত' জখমটাই বড়ো বলে' মনে হ'বে। কিন্তু বিপদের মুখে একা যাওয়াটা ত' আর দেখবেন না।

সুবিনয় হাসিয়া কহিল,—মেয়েরা একা যখন এমনি একটা কিছু অসমসাহসিক কাজ করবার জন্ত এগোয় তখন শেষও হয় এমনি প্রহসনে।

কাকিমা বাধা দিয়া কহিলেন,—খবরদার, আর তর্ক নয়। শুনে-শুনে কান দুটো আমার ঝালাপালা হ'য়ে গেলো।

সুবিনয় কহিল,—আর মাত্র দু' চুমুক, দিদি। চা কুরিয়ে গেলে

প্রথম প্রেম

তর্কও জুড়িয়ে যাবে। মেয়েদের সঙ্গে তর্ক আবার কতক্ষণ করতে হয় ?

মিলি ভুরু কুঁচকাইয়া কহিল,—মেয়েদের নিন্দে করাটা বুঝি আজকালকার ছেলেদের ফ্যাসান্ ?

—এবং,—সুবিনয় বিনীত হইয়াই কহিল,—নিন্দেটাও আজকালকার মেয়েদেরই। এবং নিন্দে শুনে দুঃখিত হওয়াটাও মেয়েলি।

মিলির কাকিমা অর্থাৎ সুবিনয়ের দিদি সুরমা কহিলেন,—আমি কিন্তু চা আর করে' দিতে পারবো না। তোর দু' চুমুক—

—এই শেষ হ'লো। কিন্তু উনি যখন সত্যিই অমন গম্ভীর হ'য়ে গেলেন তখন আমরা পৃষ্ঠপ্রদর্শন করা উচিত। অর্থাৎ—

—অর্থাৎ তোরও পিঠটা ছড়ে' গেছে।

—কী করে' বুঝলে বলো ত' ? আশ্চর্য্য।

—গেছে ত' ? দিদি হাসিয়া উঠিলেন।

মিলিও হাসিল।

—তবে ভালো করে'ই হান্নন। বলিয়া সুবিনয় গা থেকে র্যাপারটা খুলিয়া ফেলিয়া ঘুরিয়া দাঁড়াইল। সিন্ধের জামাটা মেরুদণ্ডের কাছে সোজা ছিঁড়িয়া দুই দিকে আলাদা হইয়া গেছে।

ঠিক এমনি সময় এদিকে ছোটকাকার পায়ের শব্দ আসিতেছে। সুবিনয় র্যাপারটা তাড়াতাড়ি গায়ে টানিয়া কহিল,—আমি পালাই। মেয়েদের সঙ্গে আলাপ করতে দেখলেই জামাইবাবুর গৌফজোড়া ঘনিষে ওঠে।

সুরমা হাসিতেই সুবিনয় কহিল,—গৌরবে 'মেয়েদের'।

ছোটকাকা ভেতরে আসিয়াই মিলিকে কহিলেন,—তোকে কে যেন ডাকতে এসেছিলো—

প্রথম প্রথম

মিলি লাফাইয়া উঠিল : বাইরে দাঁড়িয়ে আছে ? ভেতরে আসতে বলো ।

—ভেতরে আসতে বলবো কী ! ছোটকাকা একটা চোখকে ঝুঁষৎ টারা করিয়া कहিলেন ; তার পর রুক্ষস্বরে : তাকে আমি ভাগিয়ে দিয়েছি ।

সুরমা আশ্চর্য হইয়া कहিলেন,—ভদ্রলোককে তুমি ভাগিয়ে দিলে ? বলো কী ?

—ভদ্রলোক না আর কিছু ! একমাথা চুল, গায়ে করে' রাস্তার সমস্ত ধুলো তুলে এনেছে । জেলের ছাড়া-পাওয়া কয়েদির মতো চেহারা । নাম জিগগেস করলুম, নাম বলবেন না ; মিলির সঙ্গে কোথায় তার পরিচয় কোনো-কিছুর হিসেব নেই । আর কী সব ত্যাড়া কথা ! মুখের ওপর যেন জোরে একটা টিল্ ছুঁড়ে মারলো : মিলি এখানে আছে ? আমি বলে' সিম্পলি চলে' যেতে বললাম, অল্প লোক হ'লে ঘাড় ধরে' বিদেয় করতে ।

—ইঃ ? সুরমা ঘাড় বাঁকাইয়া कहিলেন,—ঘাড় ধরতেন ! উল্টে তোমাকেই মারতো ঘুসি ।

—এই রোগা জির্জিরে চেহারা । নরেশবাবু আঙুলটা বার কয়েক নাড়িলেন : কতোদিন যেন খেতে পায় নি । গা থেকে খোঁটাই একটা গন্ধ বেরচ্ছে ।

মিলি এতক্ষণ নিশ্বাস বন্ধ করিয়া শুনিতেছিল । এইবার নিশ্বাস ফেলিয়া সে বাঁচিল । এমন বর্ণনার সঙ্গে সে কাহাকেও মিলাইতে পারিল না—আর কেই বা আছে । রোগা জির্জিরে—সারা গায়ে ধূলা—মানব যে আসিয়া ফিরিয়া যায় নাই ইহাতেই সে বাঁচিয়াছে ।

প্রথম প্রেম

সুরমা কহিলেন,—চিনিম্ নাকি এমন কাউকে ?

আরেকবার নিজের মনের মধ্যে দৃষ্টি ডুবাইয়া মিলি কহিল,—
ককখনো না ।

নরেশবাবু বলিলেন,—যার-তার সঙ্গেই বন্ধুতা পাতিয়ে বসিম্ নাকি ?

—বা, কা'র আবার বন্ধু হ'লাম ?

সুবিনয় টিপ্পনি না কাটিয়া পারিল না : কলেজের বাস্এ যেতে দেখে থাকবে । এইখানে একটু য্যাড্ভেঞ্চার করতে এসেছিলো । আপনার শরীরে কুলুবে না বুঝলে আমাকেও ত' ডাক্তে পারতেন ।

সুবিনয়ের কথায় বিরক্ত হইলেও মিলিকে সায় দিতে হইল : কে না কে, কোথেকে এসেছে । অমন লোকের সঙ্গে আলাপ করতে যাবো কেন ?

—কোন্ দুঃখে ? সুবিনয়ই কথা কহিল,—আমার সঙ্গে মোলাকাৎ করিয়ে দিলে পারতেন ।

সুরমা কহিলেন,—তা হ'লে আমরা একটা ডুয়েন্ দেখতে পেতাম ।

—যাও, যাও । বাজে বকো না । নরেশবাবু সুবিনয়ের দিকে তীক্ষ্ণ চোখে চাহিলেন : তোমার দুম্কাই যাওয়া কী হ'লো ? ছুটি আর কদিন ?

—এই রে । মাথা চুল্কাইতে-চুল্কাইতে সুবিনয় কহিল,—কোর্ট খুলতে এখনো দু'চার দিন বাকি আছে । দুম্কা কাল যাবো ভাবছি ।

—ভাবছি নয় । কালই চলে' যাও ।

সুরমা হাসিয়া কহিলেন,—তুমি হাকিমকে হুকুম করছ কী ?

—না, না, এখনো হুজুর হ'তে পারিনি দিদি, মাত্র ট্রেজারিতে বসে' ছুটো দস্তখৎ করে'ই খালাম ।

প্রথম প্রেম

নরেশবাবু কহিলেন,—রাত্রে দুম্কার বাসু পাওয়া যায় ?

—ওকে আজই তাড়াচ্ছ কী ! সুরমা কহিলেন,—দেখছ না ও খাচ্ছে শুনে আরেক জন আগেই অদৃশ্য হয়েছে ।

—কী বলো যা তা । মিলি কোথায় গেলো ? মিলি !

বারান্দা হইতে জবাব আসিল : এই যে ।

রাস্তায় কাহাকেও দেখা গেল না । কে আসিয়াছিল ? কে আসিতে পারে ?

কলিকাতায় গিয়া অবধি একখানিও চিঠি লেখে নাই । একখানি চিঠি পাইবার আশায় মনে-মনে সে অবহেলিতা পল্লী-স্ত্রীর মত গুমরিয়া মরিতেছিল । রাজধানীর বিপুল অরণ্য-মন্মথের মাঝে তাহার এই ক্ষীণ নিখাসটি আর শোনা যায় নাই ।

অগিমাদের সেই সতর্ক-বাণীই তাহাকে বারে-বারে শাসাইতেছিল ।

কিন্তু তাহাকে মিলি বলিয়া পরিচয় দিয়াছে ! তাহার নাম মিলি—
এ আর কে জানে, কার কাছ থেকে শুনিয়াছে—

রোগা জিহ্বাজিরে চেহারা । এক গা ধূলো । চেহারা ঠিক ছেল-
ফেরৎ কয়েদির মত ।

হয় ত' নিজে না আসিয়া তাহার খোঁজ নিতে আর-কাহাকেও পাঠাইয়া দিয়া থাকিবে । অসীম দয়া । বেশ হইয়াছে, ফিরিয়া গিয়াছে ।
নিজে যখন আসিতেই পারিল না, তখন দূত পাঠাইবার কী হইয়াছিল !

দেওঘরে আসিয়াও মিলির শাস্তি নাই । যে তাহাকে ভুলিয়াছে,
সেও তাহাকে স্বচ্ছন্দে ভুলিয়া যাইতে দিবে—তাহারই চিঠি লিখিবার
এমন কী দায় পড়িয়াছে ! তাহাকে যদি সে না চায়, তাহারই বা গলায়
ভাতের গ্রাস ঠেকিয়া থাকিবে নাকি ? এই মনে করিয়াই সে

প্রথম প্রেম

শোভা-দিকে তাহাদের হস্টেলে একটা সিট রাখিতে লিখিয়া দিয়াছে ।
এতদিন অনর্থক সময় কাটাইয়াছে ভাবিয়া অতি দুঃখে সে দেওঘরে
আসিয়াই তাহার পাঠ্যপুস্তক খুলিয়া বসিয়াছিল ।

কিন্তু উৎপাত জুটিল সুবিনয় । ব্যাগি প্যাণ্টালুন্ আর ফেন্ট্
হাটের আলায় অস্থির । জামাটা কখনই অতখানি ছিঁড়ে নাই, বাকিটা
সে হাত দিয়া ছিঁড়িয়াছে । সস্তা একটু বাহাদুরি করিতে মাত্র । তাহার
বড়লোকির মাঝে কোথায় একটা উৎকট নির্লজ্জতা আছে, ঐশ্বর্য্য নাই ।
সুবিনয়কে সে দু' চক্ষে দেখিতে পারে না । কাকিমার ভাই ও নেহাৎ
বি, সি, এস্‌এ ফাৰ্ষ্ট্ হইয়া নূতন ডেপুটি হইয়াছে বলিয়া যা-একটু সমিহ
করিতে হয় ।

কে যে আসিয়াছিল শুইয়া-শুইয়া তাহাই ভাবিতে লাগিল । ঘুমের
মধ্যে তাহার কোনো কূল-কিনারা পাওয়া গেল না ।

কাকিমা ভোরে উঠিয়া তাহাকে ঠেলিতে লাগিল : কালী-মন্দির দেখে
আসি চল ।

এত সকালেই কাকিমার ভক্তি উথলিয়া উঠিতে দেখিয়া মিলি বিশেষ
ভরসা পাইল না । তবু চোখে-মুখে জল দিয়া শাড়িটা তাড়াতাড়ি
বদলাইয়া লইল ।

যা কথা—সঙ্গে সেই সুবিনয় জুটিয়াছে ।

নরেশবাবু মশারি থেকে মুখ বাড়াইয়া বলিলেন,—তোমরা একেবারে
ধম্ম দেখালে । খুঁটি-ছাড়া পেয়ে খুব ল্যাজ তুলেছ দেখছি ।

সবাই ভয়ে নিঃশব্দে একটু হাসিয়া গুটি-গুটি বাহির হইয়া গেল ।

সুবিনয় কহিল,—তোমরা স্বাধীন হ'তে গিয়ে একেবারে টেকা দিলে

প্রথম প্রেম

যা-হোক । এমন অল্জ্যাস্ত বাবা বৈষ্ণনাথ থাকতে কোথাকার কে-না-কোন্ কালী দেখতে ছুটেছ ।

সুরমা মিলির কনুইয়ে একটা ঠেলা দিয়া কহিলেন,—লেগে যাবি নাকি তর্ক করতে ?

সুবিনয় হাসিয়া কহিল,—এক পেয়লা চা-ও উদরস্থ হয় নি যে ।

একটিও কথা না কহিয়া মিলি হাঁটিতে থাকে । ছড়ি দিয়া সুবিনয় অগত্যা ধানের শীষগুলিকে মারিতে-মারিতে অগ্রসর হয় ।

ফিরিবার সময় মিলি সবাইর আগে-আগে । পিঠের আঁচলটা নৌকার পালের মতো ফুলিয়া উঠিয়াছে ।

সুরমা ডাকিলেন,—আস্তু মিলি ।

সুবিনয় টিপ্পনি কাটিবেই : গিয়েই একেবারে গরম জল চাপিয়ে দিন্ ।

রাস্তার উপর মিলি যেন কাহাকে দেখিয়াছে । সেও তাহাকে দেখিবার জন্ত থামিয়া আছে । না, মানব নয় । পিছনটা দেখিয়া তাহাই মনে হইতেছিল বটে ।

কিন্তু লোকটা যে তাহারই দিকে আগাইয়া আসিতেছে ।

মানবই ত' । এ কী চেহারা !

কাকিমা ও তাহার উপযুক্ত ভ্রাতা তখনো কিছু পিছে ।

মিলি আঁকু করিয়া হটিয়া গেল : এ তোমার কী চেহারা হ'য়ে গেছে ?

অত্যন্ত স্বাভাবিক ও সহজ স্বরে মানব কহিল,—খুব অসুখ করেছিলো ।

মানবের দিকে ভালো করিয়া তাকানো যায় না : কিন্তু এ কী পোষাক ?

মানবের ঠোঁটে একটুখানি শুকনো হাসি ভাসিয়া উঠিল : সে প্রকাণ্ড ইতিহাস । তুমি আমার সঙ্গে এই দিকে একটু আসবে ?

প্রথম প্রেম

মিলি যেন অপ্রস্তুত হইয়াছে এমনি করিয়া কহিল,—কিন্তু আমার সঙ্গে যে কাকিমা আছেন। শুধু কাকিমা নয়—মানব চাহিয়া দেখিল—আরেকজন।

মিলির কথা তখনো শেষ হয় নাই: তুমি আছো কোথায়? এখানে ভালো হোটেল আছে ত'?

—জানি না। আছি ধর্মশালায়।

—ধর্মশালায় কেন?

—সেই কথাই ত' বলবো। চলো না একটু।

—তুমিই বুঝি কাল আমাকে খুঁজতে গিয়েছিলে?

—হ্যাঁ। রাত্রে তুমি কতোক্ষণ পর্যন্ত বেড়াও?

—না, কাল ত' আমি বাড়িতেই ছিলাম। কাকা ভীষণ কড়া—আচ্ছা, তুমি এক কাজ করো। কাল দুপুরে এসো, এই একটায়—ঐ জসিড়ির রাস্তার মোড়ে। চেন ত' ? কালকেই সব কথা হ'বে। কাকিমারা এসে পড়লেন। এখন বেশ ভালো আছ ত' ?

'কাকিমারা এসে পড়লেন'—ইঙ্গিতটা মানব বুঝিয়াছে। তবু কাল-ও একবার সে আসিবে।

মানব মাঠ দিয়া নামিয়া গেল।

সুবিনয় টিপ্পনি কাটিবেই: আপনার বন্ধুর সঙ্গে রাস্তায়ই দেখা হ'য়ে গেলো যা হোক। বন্ধুর অধ্যবসায় আছে।

মিলি তাহার কথায় জলিয়া উঠিল: আমার আবার বন্ধু কে। নন্দন-পাহাড়ের রাস্তা জানতে চাইলো, দেখিয়ে দিলাম।

'সুবিনয় হাসিয়া কহিল,—হ্যাঁ, ঐ মাঠ দিয়েও যাওয়া যায় বটে।

মিলি পা টিপিয়া-টিপিয়া নরেশবাবুর ঘর পার হইল। রাস্তায় নামিয়া কোনো দিকে আর দৃকপাত নাই।

কাকিমাকে সে বলিয়া আসিয়াছে বটে যে বীণাপাণিদের বাড়ি সে বেড়াইতে চলিল। বীণা তাহার কলেজের চেনা—এই পাড়াতেই থাকে, দুই পা আগে। এও সে বলিয়াছিল যে বীণাদের সঙ্গে সে ‘তপোবন’ দেখিয়া আসিবে, ফিরিতে রাত হইলে যেন চাকরদের হাতে লণ্ঠন দিয়া এখানে-সেখানে খুঁজিতে না পাঠায়। কাকিমা বলিলেন : না, না, চারটের আগেই ফিরে আসিস্ যেন। বিকেলে উনি সবাইকে নিয়ে ‘রিখিয়া’ বেড়াতে যাবেন বলেছেন, তখন তোকে না পেলে চটে’-মটে’ কাঁই হ’য়ে যাবেন। দেখিস্।

এখন না-জানি ক’টা? সুবিনয় যে লুইস্ট খেলিতে আসিয়া ফিরিয়া যাইবে ইহাতে সে ভারি আরাম পাইল।

কাল তাহার সঙ্গে ভাল করিয়া কথা বলা পর্য্যন্ত হয় নাই। ধর্মশালার আসিয়া উঠিয়াছে। চুলগুলি না-হয় অসুখের জন্য ছোট করিয়া ছাঁটা, কিন্তু তাই বলিয়া জামা-কাপড়ে অসম্ভব ময়লা লাগিয়া থাকিবে! এই বোধহয় একরকম ফ্যাসান্। কে জানে?

রোহিণীর রাস্তা যেখানে ট্রেনের লাইন্ কাটিয়া গিয়াছে—তারই ধারে মানব মিলির প্রতীক্ষা করিতেছিল। মানব লাইনের দিকে মুখ করিয়া দাঁড়াইয়া আছে—মিলি আসিতেছে পিছনে। কাছাকাছি আসিতেই পদক্ষেপগুলি মিলি ছোট ও মন্থর করিয়া ফেলিল। একেবারে মানবের গা ঘেসিয়া দাঁড়াইয়া কহিল,—কালকে আমার ওপর চটোনি ত’?

সেই মিলি! আজো কি না তাহার গা ঘেসিয়া দাঁড়ায়।

প্রথম প্রেম

মানবের যেন কিছুই হয় নাই, সেই আগের মতই হাসিয়া বলে:
চটেছি আজকে। কতোক্ষণ আমাকে দাঁড় করিয়ে রেখেছ জানো?

—কিন্তু কী করে? আসি বলো? যে কড়া পাহারা। আমাকে
আবার চারটের আগেই ফিরতে হ'বে। এখন ক'টা? আন্দাজ?

—হু'টো হ'বে।

—কী রোদ! কোথাও যাই চলো।

মানব কহিল,—চলো দারোয়া নদীর কাছে। জসিডি যাবার
ব্রিজের ওপর।

—উৎকট কবিত্ব। ধুলো উড়িয়ে মোটর ছুটেছে ট্রেনের সঙ্গে পালা
দিয়ে। তার চেয়ে একটা ট্যান্ডি নাও। মন্দিরের দিকে খানিকটা
এগোলেই মিলে যাবে'খন। চলো, রিখিয়া ঘুরে আসি।

—কিন্তু পয়সা কই?

অবাক হইয়া মিলি মানবের মুখের দিকে তাকাইয়া রহিল।

মানব হাসিয়া কহিল,—ফিরে যাবার মাত্র ট্রেন-ভাড়া আছে।
বিশ্বাস করবার কথা নয়, কিন্তু পয়সা কোথেকে পাবো বলো।

—জানি না। ট্যান্ডি একটা জোগাড় করো শিগ্গির।

—তা হ'লে পা চালিয়ে একটু হাঁটো। ঐ চুড়ো দেখা যাচ্ছে মন্দিরেয়।
অতোদূর অবিশি হাঁটতে হ'বে না। আমার মুখের দিকে তাকিয়ে
কী দেখছ?

মিলি নিঃশব্দে হাঁটিতে লাগিল।

মানব কহিল,—কথা কইছ না কেন?

—একটা খবর পর্য্যন্ত দিলে না! অসুখ করলো বলে'ই ত' বেশি
করে' খবর দেওয়া উচিত ছিলো। কিন্তু এ তোমার কী দুর্দশা হয়েছে?

প্রথম প্রেম

—বলছি ।

কতদূর আসিতেই খালি একটা ট্যান্ডি মিলিল ।

মিলি পা-দানিতে পা রাখিয়া কুঁজো হইয়া গাড়িতে উঠিতে-উঠিতে কহিল,—রিখিয়া চলো । চারটের আগেই রোহিণীর রাস্তায় নামিয়ে দেবে আমাদের ।

অর্থাৎ মিলিই ভাড়া দিবে । সে-ই কর্তা ।

আঁকা-বাঁকা রাস্তা—খানিকটা সমতল হইয়াই উৎরাই ; তারপর রাস্তা আবার খাড়া উঠিয়া গিয়াছে । ধূ-ধূ করে মাঠ—ঘাসের রঙ প্রায় হন্দে, মাটির রঙ প্রায় লাল । গাড়ির সঙ্গে-সঙ্গে ত্রিকুটও সমানে চলিয়াছে ।

মানবের হাঁটুর উপর আলগোছে বাঁ-হাতখানি তুলিয়া দিয়া মিলি কহিল,—তারপর ?

সেই হাতের উপর হাত রাখিয়া মানব শুকনো গলায় কহিল,—তারপর যা হ'বার তাই হয়েছে—হবছ । তোমাকে একদিন বলেছিলাম না যে আমি পৃথিবীতে কিছু একটা করতে এসেছি, প্রাণ ভরে' অহঙ্কার করবার মতো ? মনে আছে ?

মিলি কিছু বুদ্ধিতে পারিল না ।

—এতো দিন পরে সেই সুযোগ বুদ্ধি এলো । আমার দুই হাতে আজ অজস্র স্বাধীনতা ।

মিলি সামান্য একটু সরিয়া বসিয়া কহিল,—ঘটা না করে' যদি বলো ত' বুঝতে পারি ।

হাতের উপর চাপ দিয়া মানব কহিল,—না, ফেনিয়ে বলবার কথাও তেমন নয় । জলের মতো সোজা । তোমার মাসিমা এতোদিন বাদে

প্রথম প্রেম

অকারণে—ঠিক অকারণে নয়—পুত্রবতী হয়েছেন। এবং কাজে-কাজেই—

মিলির মুখ হইতে খসিয়া পড়িল : কাজে-কাজেই—

—আমি বিতাড়িত হয়েছি।

মিলি পাথর হইয়া গেল। এবং মিলি কী বলে তাহাই শুনিবার জন্ত মানব তাহার মুখের দিকে চাহিয়া রহিল। সে-মুখ দেখিতে-দেখিতে নিবিয়া যাইতেছে।

—বলো কি ? মেসোমশায় তোমাকে তাড়িয়ে দিয়েছেন ?

—না, দয়া বা কর্তব্য—যাই হোক, তিনি আমাকে ধরে' রাখতে চেয়েছিলেন, কিন্তু আর আমি ধরা দেব কেন ? ছাড়া যদি পেলাম-ই—

—আর মাসিমা ?

—ঠাঁকে আমি দোষ দিতে পারি না, মিলি। তিনি আমাকে রাস্তা দেখতে বললেন। মিথ্যে অভিমান করছি না, কিন্তু এর পর কে কবে মখমলের বিছানায় চুপ করে' শুয়ে থাকতে পারতো ?

মিলির মুখ এখনো শুকাইয়া আছে। ব্যাকুল হইয়া জিজ্ঞাসা করিল,—এখন কী হ'বে ?

—কী আবার হ'বে। মানব দুই হাত বাড়াইয়া মিলিকে গায়ের উপর টানিয়া আনিল : তুমিই ত' আমার আছো।

হাওয়ার মুখে শীতের পাতার মত মিলি নিজেকে ছাড়িয়া দিল। তাহার স্পর্শের অতলস্পর্শ সমুদ্রে মানব স্নান করিতেছে।

তাহার আবার দুঃখ ! সে কি না এই দুঃখ ভুলিতে সেইদিন টেবিলের উপর মদের গ্লাস সাজাইয়া বসিয়াছিল ! সেই কথা মনে করিয়া এখন তাহার হাসিতে ইচ্ছা করিতেছে।

প্রথম প্রেম

মানবের কাঁধের উপর মাথাটা ভালো করিয়া বসাইয়া মিলি কহিল,—
‘আমি হ’লে কিন্তু কিছুতেই চলে’ আসতাম না। জোর করে’
ছিনিয়ে নিতাম।

—কী আর পেতাম বলো—কতোটুকু? তার চেয়ে এ কতো বেশি
পেয়েছি।

—ছাই পেয়েছ। একহাঁটু ধুলো আর একগাল দাড়ি। বলিয়া
মিলি পরম স্নেহে মানবের গালে একটু হাত বুলাইয়া কহিল,—দাড়ি
কামাবারো তোমার পয়সা জোটে না নাকি? ট্যান্ডিটাও দেখছি
তোমারই মতো উড়ে চলেছে। এই, আস্তে চলো।

মিলি আবহাওয়াকে তরল করিতে চায়।

—এই সুর আমার উত্তরাধিকার-স্বত্রে পাওয়া, মিলি। মানব
মিলির মুখের উপর মুইয়া পড়িয়া কহিল,—পৃথিবী আমার করতলে।

মিলির চোখের মণি দুইটি যে কত কালো মানব আবার—
আরেকবার দেখিল। চোখ দুইটি তুলিয়া মিলি কহিল,—আমি কি
তোমার পৃথিবী নাকি?

—তুমি তার চেয়েও বড়ো—তুমি আমার উঠোন। মেঘনার পারে
সেই যে ঘর দেখেছিলে মনে পড়ে?

মিলি নিজেকে একটু আনুগা করিয়া নিয়া কহিল,—সত্যি, তোমার
আর ইউরোপ যাওয়া হ’লো না তা হ’লে।

—কেন হ’বে না? যাবো বৈ কি।

—মনে-মনে?

—না। পয়সা হ’লে। সে-পয়সা আমি নিজেই রোজগার করবো।

চিবুকটা গলার দিকে সামান্য বুলাইয়া দিয়া মিলি কহিল,—পয়সা

প্রথম প্রেম

হ'লে ! কথাটা পাছে তাচ্ছিল্যের মতো শোনায় মিলি আবার মানবের স্পর্শের মাঝে ডুবিয়া গিয়া কহিল,—কোথায় এখন থাকবে ?

মানব কহিল,—এতোদিন ত' এক বন্ধুর মেস্‌এই ছিলাম । আমার অসুখে তার বেশ খরচ হ'য়ে গেলো । এবার গিয়ে অন্য মেস্‌ দেখতে হ'বে ।

—আমারো আর ও-বাড়িতে থাকা চলবে না । শোভা-দিদের হস্টেলে একটা সিট রাখতে লিখে দিয়েছি ।

মানব তাহাকে আরো কাছে আকর্ষণ করিয়া কহিল,—তুমি ও-বাড়িতে থাকবে না কেন ?

অস্ফুট স্বরে মিলি কহিল,—তুমি নেই বলে' ।

কিন্তু হস্টেলেও ত' মানব থাকিবে না,—তাহা ছাড়া মানবের থাকানা-থাকার খবর পাইবার আগেই ত' সে শোভা-দিদের হস্টেলে সিট রাখিতে লিখিয়া দিয়াছে । কিন্তু, এ কি তর্ক বা জেরা করিবার সময় ?

মানব তাহাকে আগের চেয়েও আরো কাছে টানিয়া লইল । আর একটি মাত্র সূতারও ব্যবধান নাই । তবু আরো কাছে । অজস্র বর্ষার মতো মিলি নিজেকে ঢালিয়া দিয়াছে । মিলির সম্পর্কে তাহার অব্যাহত মুক্তি,—আবার ইচ্ছা করিলেই অব্যাহত বিরহ !

মিলির মুখ সে আশ্তে তুলিয়া ধরিল । ওড়া-পাখির ঝাঁকানো দুই ডানার মত ভুরুর নিচে কালো দুইটি তারা—ভোর বেলায় তারা—কাঁপিতে-কাঁপিতে নিবিয়া গেল । নিমীলিত-চক্ষু মুখখানিতে বিষাদের গোখুলি নামিয়াছে । অত্যন্ত ভয়ে-ভয়ে, কুণ্ঠিত-ওষ্ঠে, মন্দিরের দেবতা ছুঁইবার মতো নিঃশব্দে—মানব মুখ নামাইয়া আনিল । সেই নিমীলিত-

প্রথম প্রেম

চক্ষু মুখে কোথাও এতটুকু প্রশ্ন নাই, বাধা নাই,—মমতায় ঠাণ্ডা, মমণ মুখ, প্রতীক্ষায় গলিয়া পড়িতেছে ।

মুখ আরো নামাইয়া আনিল ।

মিলির দুই পাটি দাঁত হঠাৎ ঝিলিক্ দিয়া উঠিল । কোণের দিকের সেই উদ্ধত দাঁতটি উত্তীর্ণ হইয়া ঠোট প্রসারিত হইল । তারপরেই সমর্পণের সেই কোমল ভঙ্গিটি তাহার রহিল না । চিবুকে ছোট একটি টোল্ ফেলিয়া মিলি কহিল,—এমন তোমার কী দৈন্যদশা হয়েছে যে দাড়ি পর্যন্ত কামাতে পারো নি । তারপরে পিঠ টান্ করিয়া বসিয়া : ও ! এই বুঝি রিখিয়ার বাড়ি শুরু হ'ল ? বা, বেশ জায়গা ত' !

কেহ খানিকক্ষণ আর কোনো কথা কহিল না । ড্রাইভারের কথায় হুঁস্ হইল । ড্রাইভার কহিল,—আর রাস্তা নেই ।

—তবে ফেরো । মিলি মানবের বাঁ-মণিবন্ধটা উল্টাইয়া ধরিয়া কহিল,—তোমার ঘড়ি কোথায় ?

—অসুখের সময় ঘড়িটা বেচতে হয়েছে ।

চুলটা হাত-প্যাচ করিয়া বাঁধিতে-বাঁধিতে মিলি বলিল,—ক'টা এখন হ'লো ? আমাকে চারটের আগে ফিরতেই হ'বে কিন্তু । বলিয়া সে আবার মানবের বুকের ডান-পাশে হেলান্ দিয়া বসিল ।

গাড়ি এইবার আরো জোরে ছুটিল । কাদের আরেকটা ট্যান্ডি ধূলা উড়াইয়া সামনে চলিয়াছে । ধূলায় চোখ-মুখ বন্ধ হইয়া আসে । মিলি মানবের বুকের মধ্যে নিজের শাড়ির আঁচলে মুখ ঢাকিয়া বলিয়া উঠিল : কী ধূলা !

কিন্তু আগের গাড়িটাকে কিছুতেই অতিক্রম করা যায় না ।

নম্বর দেখিয়া এই ড্রাইভার আগের গাড়ির ড্রাইভারকে নিশ্চয়

প্রথম প্রেম

চিনিয়াছে। সে পেছন হুঁতে বলিয়া উঠিল : এই তেওয়ারি, বিকেলে
তোমার গাড়ির দরকার হ'বে। পুরান্দা থেকে কিরায় চায়েছে তিন
গাড়ি। সেই যমুনাবোর পেরিয়ে—

খবরটা শুনিবার জন্ত আগের গাড়ির ড্রাইভার ক্লাচ টিপিল।
তাহাকে ধরিয় ফেলিয়া পাশাপাশি ঘাইতে-ঘাইতে এই ড্রাইভার কহিল,
—সেই যে পুরান্দায় নতুন ডাক্তারবাবু—

তার পরেই : ছত্তোর তোমার পুরান্দা ! বলিয়া মিলিদের গাড়ি
নক্ষত্রবেগে বাহির হইয়া গেল। তেওয়ারি এখন প্রাণ ভরিয়া ধূলা
খাক।

মিলি খিল-খিল করিয়া হাসিয়া উঠিল। দুই হাতে তালি দিয়া
বলিল,—চালাও। এবং পেছনের গাড়ির কী দুর্দশা হইল দেখিবার জন্ত
—ছডের ও-পাশের ফাঁক দিয়া মুখ বাড়াইয়া আবার তাহার হাসি।

ধূলা যখন আর নাই, তখন বুকে মুখ গুঁজিবার কারণও কিছু
থাকিতে পারে না।

পথ-ও ফুরাইয়া আসিতেছে। মানব কহিল,—এই, আস্তে।

মিলি কহিল,—তুমি না খুব স্পীডের ভক্ত ?

—আর না। অস্তত এখন না। পথটুকু ভোগ করতে চাই।

—গতির মাঝেই ত' পথকে ভোগ করা। কখন যে তুমি কী বলো
তার ঠিক নেই। তোমার মোটর-বাইকটাও রেখে এসেছ ?

—সব।

কথাটা মিলির লাগিল। আবার মানবের গা ঘেসিয়া আসিল।
কহিল,—তোমার এখন তবে কী করে' চলবে ?

মানব দীপ্ত হুঁয়া উঠিল : খুব চলবে। সে-জন্তে কিছু ভাবি নে।

প্রথম প্রেম

—পয়সা পাবে কোথায় ?

—মাটি খুঁড়ে পয়সা আনবো ।

—কিন্তু তোমার পড়াশুনো এইখানে খতম ?

—না, না, পড়া ছাড়বো কী ! যে করে' হোক বি. এ-টা পাশ করতেই হ'বে ।

—কিন্তু খরচ চালাবে কোথেকে ? বাসা-ভাড়া, কলেজের মাইনে—

—তা ঠিক চলে' যাবে । কিছু ভাবনা নেই ।

—ঠিক চলে' যাবে না । তবু তুমি কী ভাবছ শুনি ? আমাকে না বললে আর কে আছে ?

—একটা টিউসানি জুটিয়ে নিতে পারবো হয় ত' । কিম্বা অন্য কোনো কাজ ।

—শেষকালে ছেলে পড়াবে তুমি ?

মানব হাসিয়া কহিল,—এমন কোনো কথা নেই । মেয়েও পড়াতে পারি ।

—বেশ ত', আমাকেই পড়াও না ।

মিলিকে দুই হাতে ঘন করিয়া কাছে আনিয়া মানব বলিল,—তোমাকে পড়াবো ? মাসে কতো করে' দেবে ?

মিলি আবার মানবের বুকে মুখ উপুড় করিয়া রাখিল ।

নিশ্বাস ফেলিবার সঙ্গে-সঙ্গে পথ ফুরাইয়া আসিতেছে । তাহার চুলে হাত বুলাইতে-বুলাইতে মানব কহিল,—এখনি বাড়ি ফিরে যেতে হ'বে, মিলি ? বাড়ি গিয়ে কী করবে ?

মুখ না তুলিয়াই মিলি কহিল,—সত্যি বাড়ি ফিরে যেতে ইচ্ছে করছে না ।

প্রথম প্রেম

ধনতা কমাঁইয়া আনিয়া মানব বলিল,—এক কাজ করি এসো ।

মুখ তুলিয়া মিলি বলিল,—কি ?

—চলো, এখন হয় তু' একটা ট্রেন আছে । আমরা কল্কাতায় চলে' যাই ।

মিলি চোখ বড়ো করিয়া কহিল,—ওরে বাবা, ছোট-কাকা তা হ'লে আর আস্ত রাখবে না ।

অবশ্য মিলিকে মানব কলিকাতায় কোথায়ই বা লইয়া যাইত ! সেই কথা হইতেছে না । দুইজনে এক সঙ্গে কোথায়ই বা উঠিবে ! তবু—
আবার চুপচাপ ।

গাড়ি 'বেলা'র রাস্তা ধরিয়াছে ।

মিলি কহিল,—আর দেঁরি নেই । এসে পড়লাম ।

—এখনি না-ই বা গেলে ।

—বিশেষ কাজ ছিলো । আচ্ছা চলো জসিডি । মিলি গন্তীর হইয়া কহিল,—অতি-উৎসাহে পড়াশুনো যেন ছেড়ে দিয়ো না । পরীক্ষাটা দিয়ে—না পড়লেও পাস্ তুমি করবেই—আমাদের নোয়াখালির বাড়িতে গিয়ে থেকে । যতো দিন না অন্য কিছু সুবিধে হয় ।

মানব অন্তমনে কহিল,—আমাদেরই বাড়ি বটে ।

—নিশ্চয় । ঐ জায়গাটা আমার কিন্তু ভারি ভালো লাগে । অবিশ্রি তুমি যতো দিন ছিলে ততোদিন—টিকাটুলিতেও আমাদের একটা বাড়ি আছে বটে, কিন্তু ওর মতো নয় । থাকতে পারবে ত' সেখানে ?

মানব হাসিয়া কহিল,—অতি-উৎসাহে । ঐখানেই তোমাকে নিয়ে 'সেটল্' করে' যাবো ।

—কিন্তু ও-বাড়িতে ত' তুমি ভূত দেখ ।

প্রথম প্রেম

—আর দেখবো না ।

—কিন্তু চেহারাটা যদি তুমি না বদলাও, আমিই হয় ত' ভূত দেখবো । তোমার কিছুতেই বিশ্বাস নেই, দু'দিন থেকেই হয় ত' জর-জারি করে' পালাবে ।

—এবার তোমাকেও সঙ্গে নিয়ে যাবো ।

—বিলেত অবধি ?

মানবের মুখে কথা জুয়াইল না ।

আবার যে তাহারা সহরে আসিয়া পড়িয়াছে কাহাকেও বলিয়া দিতে হইবে না, কারণ মিলি বলিল,—ছাড়ো । ঐ আমাদের বাড়ির রাস্তা । এবার ডাইনে বেঁকে জসিডি ।

কত দূর যাইতেই মিলি বলিল,—ঐ তোমার সাধের দারোয়া নদী । রোদ্দুরে ত্রিজ্‌এর ওপর খানিকক্ষণ বস্লেই হয়েছিলো আর-কি ।

ক্ষীণ নিশ্বাসের মতো নদীটি বালির উপর দিয়া তির্-তির্ করিয়া বহিতেছে । রোদে জরির সরু পাড়ের মতো ঝিল্মিল্ করিতেছে ।

পথ-ঘাট আবার নির্জন ।

মানব মিলির হাত নিজের হাতের মধ্যে টানিয়া লইয়া কহিল,—
আমার সঙ্গে তুমি গরিব হ'য়ে যেতে পারবে ?

মিলি চক্ষু তুলিয়া কহিল,—তোমার সঙ্গে না থাকতে পারলেই ত' গরিব হ'য়ে যাবো । পরে আবার কাছে সরিয়া আসিয়া : শরীরটাকে নষ্ট করো না । কল্‌কাতায় আমার সঙ্গে—রোজ না পারো, হপ্তায় এক দিন অন্তত দেখা করো । শোভা-দিদের হস্টেলেই খোঁজ করো আগে ।

মানব কহিল,—বাড়ি ফিরতে এখনো দেরি আছে—ও-সব জরুরি কথা পরে বল্লেও চলবে ।

প্রথম প্রেম

মিলি হাসিয়া কহিল,—আচ্ছা, বাজে কথাই বলো না-হয় ।

—এতোকণ ধরে' বাজে কথাই বলছিলাম না কি ?

মিলি চুপ করিয়া রহিল।

দেখিতে-দেখিতে জসিডি আসিয়া গেল। ট্যান্ডিতেই আবার ফিরিতে হইবে ।

মানব কহিল,—ট্যান্ডিটা এখানে ছেড়ে দাও । ট্রেন একটা তৈরি দেখা যাচ্ছে । ওটাতেই ফিরি এসো ।

মিলি টান্ হইয়া বসিয়া কহিল,—ওরে বাবা । ওটা ছাড়তে ছাড়তে বাড়ি গিয়ে এক পেয়লা চা খেয়ে নিতে পারবো । চারটে বেজে কখন ভূত হ'য়ে গেছে ।

মানব কহিল,—তুমি কবে কল্‌কাতা ফিরবে ?

—চার-পাঁচ দিনের মধ্যেই হয় ত' । এখনো ঠিক করিনি । জানতে পাবে নিশ্চয়ই । তুমি ত' আজই যাচ্ছ ।

—হ্যাঁ ।

—কোথায় গিয়ে থাকো আমাকে জানিয়ো কিন্তু ।

—নিশ্চয়ই ।

—গরিব করে' রেখো না যেন । বলিয়া তরলকণ্ঠে মিলি হাসিয়া উঠিল ।

—কিন্তু সত্যিই বড়লোক হ'বো কবে ?

—উপন্যাসের প্রথম চ্যাপ্টারটা আরো একটু দীর্ঘ হ'বে দেখছি ।

মানব কহিল,—তা হোক ।

রোহিণীর রাস্তা আসিয়া গেল । এবারো ডাইনে । না, এইখানেই নামিয়া পড়া ভালো । বাকি রাস্তাটুকু পায়ে গেলেই বীণাপাণিদের বাড়ি থেকে ফেরা হইবে ।

প্রথম প্রেম

দুই জনেই নামিল। ব্লাউজের ভেতর থেকে মিলি নরম তুকতুকে শাদা চামড়ার ছোট একটি মনি-ব্যাগ বাহির করিল। হাতের ঘামে সামান্য একটু ময়লা হইয়াছে। ভাড়া চুকাইয়া দিবার আগে মিলি কহিল,—তোমাকে ধর্মশালায় পৌঁছে দেবে নাকি ?

—দরকার নেই। আমাকে তুমি কী পেলো !

—তোমার শরীর খারাপ বলে' বলছি। তার পর ট্যান্সিটা উধাও হইলে : আচ্ছা, এইবার যাই। না, না, তোমাকে কষ্ট করে' আর আসতে হ'বে না। একাই যেতে পারবো এটুকু, যেমন একাই এসেছিলাম। আমার ছোট-কাকা বিশেষ ভালো লোক নয়। কাল ত' দেখতেই পেলো। আচ্ছা।

শোভনাদের হস্টেলে মানব খোঁজ নিতে গিয়াছিল, কিন্তু মিলি সতীশবাবুদের বাড়িতেই • উঠিয়াছে। মাসিমার কাছে কথাটা সে পাড়িতেই পারে নাই—গ্যাংলো-ইণ্ডিয়ান মেয়েটির সঙ্গে তার বেশ ভাব। নিতাই তার ডাকে তটস্থ।

পড়িতে-পড়িতে হঠাৎ উঠিয়া দোলনায় খোকাটার সঙ্গে খানিক আলাপ করিয়া আসে।

এই বাড়ি থেকে মানব একেবারে মুছিয়া গেছে, সেই নাম মিলিও মুখে আনিতে ভয় পায়। সেই নাম শুনিলে সমস্ত দেয়ালগুলি পর্যন্ত প্রতিবাদ করিয়া উঠিবে। মোটর-সাইক্লটার দামে গ্যাংলো-ইণ্ডিয়ান মেয়েটির দুয়েকটা সস্তা সখ্ মিটিয়াছে—আজকাল ক্রাইজ্‌লার্‌এ করিয়া সেই বেড়ায়, রিপন্‌ স্ট্রিটের পুরোনো বন্ধুদের সঙ্গে হলা করিয়া একটু কিছু খাইয়া আসে—মাঝে মাঝে মিলিকেও সঙ্গে ডাকে—যেদিন তার বন্ধুদের সঙ্গে ‘গ্যাপয়েন্টমেন্ট’ থাকে না! মিলি বলে : থ্যাঙ্ক্‌স্‌।

কিন্তু কোন্‌ ঠিকানায় আছে একটু খবর দিতে কী হইয়াছিল!

ওদিকে সুবিনয় সর্দারি করিয়া কৃষ্ণনগর হইতে—ছুটির পর সেখানেই সে বদলি হইয়াছে—চিঠি লিখিয়াছে যে এই উইক্‌-এণ্ড-এ সে কলিকাতা আসিবে। পারিলে প্রত্যহই সে আসুক না; কিন্তু চিঠি লিখিয়া জানাইবার যেন কী কারণ মিলির আর অজানা নাই। মিলি সেই দুই দিন কোথায় পলাইয়া বাঁচিবে ভাবিয়া পায় না।

অথচ চিঠি না লিখিয়া অনায়াসে সে চলিয়া আসিতে পারিত। রাস্তা ত’ আর সতীশবাবুর সম্পত্তি নয়; আর সিঁড়ি দিয়া সোজা নামিয়া আসিবার স্বাধীনতাও মিলি কাহারো কাছে বন্ধক রাখে নাই।

প্রথম প্রেম

এই বাজে ছেলেমানুষি করিয়া কী-এমন লাভ হইল ! হয় ত' সামান্য একটা চাকুরির চেষ্টায় একহাঁটু ধূলা লইয়া রাস্তায়-রাস্তায় ফ্যা-ফ্যা করিতেছে। নিশ্চিত হইয়া আয়নায় সে নিজের মুখ দেখিলে পারে ! ডান-পাশের ঐ কোণের ঘরটায় থাকিলে জাত যাইত নাকি ? বেশ ত', মিলিই না-হয় তাহার সঙ্গে ঘর বদল করিয়া নিত। তাহাতে কাহার কী রাজ্যপতন হইত ! মানুষে রাগিলে মুখে অমন অনেক কথাই আসিয়া পড়ে, তাহার জ্ঞান এতটুকু ক্ষমা নাই ! মালকৌচা মারিয়া তখুনি বাহির হইয়া পড়িতে হইবে ! অথচ টাই বাঁধিয়া সোজা সে বিলেত চলিয়া যাইতে পারিত। সতীশবাবু তাহার জ্ঞান বাস্তব খোলা রাখিয়াছিলেন। এখনো, চাবি তাহার হাতেই আছে। অথচ সে এই পাড়া মাড়াইবে না, একগাল দাড়ি নিয়া রাস্তায়-রাস্তায় টো টো করিবে। একখানা চিঠি লিখিবার পর্য্যন্ত নাম নাই। চিঠি লিখিল কি না সুবিনয়। না, মানবকে লইয়া মিলি আর পারে না।

যা পাওয়া যায়, তা-ই সই। এত মুগুর ভাঁজিয়াও এই বুদ্ধিটুকু তার খুলিল না ! পরে বুঝিবে। একদিন যদি ফের সতীশবাবুর কাছে আসিয়া কাঁদ-কাঁদ মুখে হাত না পাতে, ত' কী বলিয়াছি।

মিলি অগত্যা বই নিয়া পড়িতে বসে।

তারপর একদিন চিঠি আসিল :

থাকে হোগলকুঁড়ের এক মেস্‌এ, বড়বাজারের এক কাটরায় একটি মাড়োয়ারি-ছেলেকে রোজ সকালে দুই ঘণ্টা করিয়া পড়ায়। পায় পনেরো। সন্ধ্যায় আরেকটিকে জোগাড় করিতে পারিলেই তাহার স্বচ্ছন্দে চলিয়া যাইবে।

প্রথম প্রেম

আরো লিখিয়াছে : বেশ আছি, মিলি,—অপূর্ব সুখে । এবার মনে হচ্ছে সত্যি আমি মানুষ হ'তে পারবো । মানুষ হওয়া কাকে যে বলে বোধহয় এতোদিনে বুঝলাম । বাধা কাকে বলে তা-ও বুঝলাম । এতোদিনে । তোমার^১ অনিচ্ছা বা অনাদরের বাধা নয়, উত্তাল জীবন-সমুদ্রের বাধা । চোখ দিয়ে কাণ্ড আসছে, তবু যুদ্ধ করতে যে কী সুখ পাচ্ছি কী করে' তোমাকে বোঝাব ?

তারপরে কানে-কানে বলার মতই লিখিয়াছে : কবে তোমাকে দেখব বলো ?

মিলির কলমের মুখটা ভোঁতা—অত-শত কবিত্ব আসে না । ভাল আছে শুনিয়া সে খুসি হইল । এখন ক্রমে-ক্রমে মানুষ হইতেছে—এটা একটা সুখবর । দেওঘরে যে-অবস্থায় তাহাকে দেখিয়াছিল সেটা মানুষের পূর্বপুরুষের চেহারা ।

পরে মুখোমুখি বসিয়া বলার মতই লিখিয়াছে : যে-কোনোদিন সোজা এ বাড়ির দোতলায় উঠে এলেই আমার দেখা পাবে । কলেজ থেকে এসে কোথাও আর বেরই না ।

মানব আবার চিঠি লিখিল :

বিকালেও টিউমানি একটা জোগাড় করিয়াছে বটে, কিন্তু মাহিনা দিতে চায় নগদ দশটাকা মাত্র । তাহাই সে চোখ বুজিয়া লইয়া ফেলিবে । আরো একটার ফিকিরে সে আছে । পরীক্ষাও আসিয়া পড়িল । মিলি যদি তাহাকে কয়েকখানা রুমাল সেলাই করিয়া দিতে পারে ত' ভালো হয় ।

তার পরে :

প্রথম প্রেম

ও-বাড়ির ছায়াও আমি মাড়াতে চাই না। যা ছেড়েছি, তা ছেড়েছি। এমন করে' নিজেকে না-ঠকাতোও পারতাম, তা বুঝি, কিন্তু এই ফাল্গুনে আমার মাত্র কুড়ি-বছর পূর্ণ হ'বে। নিজেকে এখনো আমি দিগ্বিজয়ী ও দুর্দর্ষ বলে' অনুভব করি—আমার হ'য়ে তুমিও এ-তেজ অনুভব কোরো।

পরের প্যারায় :

একদিন কার্জন-পার্কে বা টালিগঞ্জের পুলের ধারে—যেখানে তোমার খুসি—বেড়াতে-বেড়াতে চলে' এসো না। কতোদিন দেখিনি।

দেখে নাই—এখানে আসিলেই ত' হয়। এই সব গোয়ারতুমির কোনো ভদ্র অর্থ থাকিতে পারে না। ঐ-সব লম্বা-চওড়া কথা শুনিতেই খুব ভালো, দেখিতে অত্যন্ত কদাকার।

রুমাল উপহার দিলে নাকি বন্ধুতার অবসান হয়—এমন একটা কুসংস্কার ছাত্রীমহলে প্রচলিত আছে। থাকুক, মিলি তা বিশ্বাস করে না। রুমাল না হয় সে ডাকেই পাঠাইয়া দিবে।

তার পরে দূরে সরিয়া বসিয়া :

বলেছি ত' কলেজ থেকে এসে কোথাও আর বেরই না। কা'র সঙ্গেই বা তোমার সাধের কার্জন-পার্কে যাবো ? কে নিয়ে যাবে ? সেটা মনে রাখো ?

শেষকালে স্বর নামাইয়া :

একজামিন্ কাছে এসে পড়েছে—ভালো করে' পড়া। একলাফেই পোরিয়ে যাবে বলে' খুব বেশি আলসেমি করো না। কলেজ বদলে ত' টেপ্ট্-এর হাত থেকে ছাড়া পেয়েছ—এখন আর একটু চালাকি করে' মেসোমশায়ের কাছ থেকে 'ফি'-র টাকাটা আদায় করে' নিলেই ত' হয়। কুড়ি বছর বলে' কুড়ি বছর !

প্রথম প্রথম

মানব কয়েক দিন আর চিঠি লিখিল না।

মিলিও রাগ করিতে জানে। দুপুর বেলা কলেজ হইতে আসিয়া লংক্লথের রুমালে সূঁচ-সুতা দিয়া সে চিঠি লিখিতে বসে।

পরীক্ষার দিন তিনেক আগে একটা সাবানের বাস্কেটের মধ্যে প্যাক-করা রুমালগুলি পাইয়া মানব অকুটা আর কিছুতেই মিলাইতে পারিল না!

পরীক্ষা দিয়া ফিরিতে ফিরিতে সন্ধ্যা হইয়া যায়। আজ শেষ হইল।

রামপদ তাহার একতলা বাড়ির সিমেন্ট-করা রোয়াকটুকুতে দাঁড়াইয়া বিড়ি টানিতেছিল, মানবকে দেখিয়া বলিয়া উঠিল : কেমন হ'লো আজ ?

মানব হাসিয়া কহিল,—মন্দ নয়।

—পাস্ ত' নিশ্চয়ই করবেন, কি বলুন।

—তার জন্তে ভাবনা নেই। ভাবনা হচ্ছে পরে।

—যা বলেছেন। রামপদ রোয়াক থেকে নামিয়া আসিল : চাকরির যে বাজার। চাকরি করবো না বলে' শ্রামপুকুরে এক দোকান খুললাম—কিন্তু যে দিন-কাল, খদ্দেরই জুটলো না। গেলো উঠে। পরে, বাঙালির সেই চাকরি—অভয়পদে দে মা স্থান!

মানব তাহার সঙ্গে দুই পা চলিতে-চলিতে কহিল,—তবু ভাগ্যি যে পেয়ে'গেছেন।

—বেঁচে গেছি। তা আর বলতে। নইলে সপরিবারে উপোস করে' মরতে হ'ত।

—যদি পারেন, আপনাদের আপিসেই কোথাও আমাকে ঢুকিয়ে দেবেন।

প্রথম প্রেম

কাঁধে হাত রাখিয়া রামপদ কহিল,—আমার সাধ্য কী ভাই।
য্যাং-ব্যাংই তলিয়ে যান্, এ ত' নেহাং ধল্‌সে। আপনার ত' একটা
মাত্র পেট—কিসের কী! মা-বাপ ত' কবেই সাফ হয়েছেন শুন্‌লাম—
ভাই-বোনও কাঁধে নেই। বেঁচে গেছেন মশাই। পায়ের ওপর পা তুলে
দিয়ে বসে' থাকুন। আপনার আবার ভাবনা কী।

একটু থামিয়া রামপদ আবার বলিতে লাগিল : খবরদার, বিয়ে
করবেন না যেন। ওর মতো ঝগাট আর কিচ্ছু হ'তে পারে না।
পদে-পদে গেরো—মরবার পর্য্যন্ত স্বাধীনতা নেই। এই দিব্যি আছেন।

—দিব্যি আছি, না ?

—দিব্যি নয় ? আপনিই বলুন না। কার কী তোয়াক্কা রাখেন !
যার কেউ নেই, তার এমন সস্তা সহরে ভদ্রতারো দরকার হয় না।
রামপদ হঠাৎ ফিরিয়া কহিল,—চলুন আমার বাড়ি, একজামিন দিয়ে
রোজ-রোজ শুকনো মুখে মেস্‌এ ফেরেন এ আর আমি দেখতে পারি
না। কী-বা এখন দিতে পারবে জানি না, তবু আসুন আপনি।

মানব আপত্তি করিতে লাগিল : শুকনো মুখ মানে পরীক্ষা ভীষণ
খারাপ দিয়েছি।

—এবং পরীক্ষা খারাপ দিলেই ত' বেশি করে' খিদে পায়।
আসুন, আসুন—কথাটা যখন একবার ঠাইক্ করেছে, আর আমি
ছাড়ছি নে।

রোয়াকটুকু পার হইয়া ভিতরে চলিয়া আসিতে হইল। রামপদ
কিছুতেই হাত ছাড়িবে না। এইটাই তাহার শুইবার ঘর—পায়ার
তলায় ইট দিয়া তক্তপোষটাকে প্রায় খাটে প্রমোশান্ দিয়াছে—ঘর-ঝাঁট,
বিছানা-পাতা সব কখন্ চুকিয়া গিয়াছে—মেঝে-দেয়াল মোমের মত

প্রথম প্রেম

পরিষ্কার। সমস্তটি ঘর জুড়িয়া কাহার দুইটি কুশলী ও কল্যাণকর হাতের স্পর্শ যেন স্পর্শেরই মতো অনুভব করা যায়।

বিছানাটা দেখাইয়া দিয়া রামপদ কহিল,—বসুন।

মানব একটু দ্বিধা করিয়া কহিল,—বরং বাস্কাটা নামিয়ে ঐ টুলটা টেনে নিচ্ছি।

—না, না, আরাম করে' বসুন। টায়ার্ড হ'য়ে এসেছেন।

ভিতরের দিকে জাপানি কাপড়ের পর্দা ঝুলিতেছে; তাহা সরাইয়া রামপদ ভিতরে অদৃশ্য হইল। সে এখনি হয় ত' আর-কাহাকে অযথা বিড়ম্বিত করিয়া তুলিবে।

পর্দাটা সঙ্কুচিত হইতেই মানবের চোখও ভিতরে চলিয়া গিয়াছিল। কাছেই নিচের উঠোনটুকুর এক কোণে একটি মেয়ে কি-একটা শক্ত জিনিসের সাহায্যে বসিয়া-বসিয়া কয়লা ভাঙিতেছে। রামপদ তাহারই কাছে আসিয়া দাঁড়াইতে মেয়েটি যে কে, বুঝিতে দেরি হইল না। পর্দাটা ছলিয়া এ-দিকে সরিয়া না আসিলে মেয়েটির মুখ সে স্পষ্ট দেখিতে পারিত। কিন্তু না দেখিলেও দেখার আর কিছু বাকি নাই।

কুলুঙ্গিতে ছোট একটি সিঁড়রের কোঁটা, দু'চারটি চুলের কাঁটা, একটুখানি কালো তেল-কুচুচে ফিতা কুণ্ডলী পাকাইয়া আছে— উম্মনে আগুন দিয়া এইবার তাহার চুল বাঁধিবার কথা। দেয়ালে কাঠের একটি ব্র্যাকেট—তাহাতে রামপদেরো কি-কি সব টাঙানো আছে, আর আছে তাহার গা ধুইয়া পরিবার শাড়িটি, কুঁচাইয়া, পাকাইয়া অনর্থক তাহাকে একটি অশোভন মর্যাদা দিবার চেষ্টা। পেরেকের বিদ্ধ হইয়া মাটির দুইটি পরী ফুলের মালা হাতে লইয়া দেয়ালে

প্রথম প্রথম

উড়িয়া চলিয়াছে—এবং উহাদের মধ্যখানে কালীর একখানি ফটো ও তাহারই নিচে মাটির একটি চিংড়ি মাছ হাওয়ায় শুঁড় নাড়িতেছে।

রামপদ আরেকটু গল্প করিয়া গেল : বাড়ি-ভাড়া গুনিয়া কিছু আর থাকে না, মাঝে পাটিসান দিয়া অল্প ভাড়াটে যারা আছে তারা সব সময়েই একটা-না-একটা কিছু নিয়া মারামারি হৈ-চৈ করিতেছে—ভালো ও সস্তা বাড়ি পাওয়াই দুষ্কর।

মেয়েটি মোমাছির মতো বাস্ত, হাওয়ার মত ছুটোছুটি করিয়া রান্নাঘর আর উঠোন, উঠোন আর বারান্দা করিতেছে।

নিভুল সঙ্কেত পাইয়া রামপদ উঠিয়া গেল।

পর্দার বাহিরে সামান্য একটু দূরে স্বামী-স্ত্রীতে বচসা হইতেছে। কথাগুলি কানে না গেলেও মানব স্পষ্ট বুদ্ধিতে পারিল যে রামপদের ইচ্ছা তাহার স্ত্রী-ই খাবারের থালা নিয়া অতিথির সম্মুখে উপস্থিত হয়—রামপদ ও-বাড়ি হইতে টুল্ একটা আনিয়া দিতেছে—ঘরের ওটা বড়ো নিচু। মেয়েটি কিছুতেই রাজি হয় না, সে যত আপত্তি করে, তার চেয়ে বেশি হাসে, এবং অলক্ষিতেই আবার কখন বড়ো করিয়া ঘোমটা টানিয়া দেয়।

রামপদ আগেই টুল্ পৌঁছাইয়া দিয়াছে।

ভিতরে গিয়া দেখিল খাবারের থালাটা মাটিতে রাখিয়া তিনি দস্তুরমতো একটি বোঁচকা হইতেছেন।

গরিব কেমানির এতখানি বদান্যতা দেখিয়া মানব অবাক হইয়া গেল।

বাঁ-হাতে জলের গ্লাস ও ডান-হাতে খাবারের থালা—নজরে পড়িবার আর কিছুই ছিল না। সেই দুই হাত টুলের সমীপবর্তী হইতেই চোখে পড়িল একগাছি করিয়া শাঁখার চুড়ি, আর দুইগাছি

প্রথম প্রেম

করিয়া সোনার। কানে লাল পাথরের দুইটি ছল—বেশি দূর ঝুলিয়া পড়ে নাই—চুলের আড়াল থেকে টিক্-টিক্ করিতেছে।

খালা-গাস রাখিয়াই পলাইয়া যাইতেছিল, মানবের মুখ থেকে খসিয়া পড়িল : তুমি আশা, না ?

দেখিতে-দেখিতে ভোজবাজি। বোঁচকা থেকে বাহির হইল পদ্ম। কোথায় বা ঘোমটা, কোথায় বা কী ! আশা হাসিয়া ফেলিল। ঘর-দোর দেয়াল-মেঝে নূতন তাসের মত ঝকঝক করিতেছে।

—ও ! আপনি নাকি ? আশা মুইয়া পড়িয়া মানবকে প্রণাম করিয়া ফেলিল।

তক্তপোষের তলায়-পা দুইটা চালান্ করিয়া দিয়াও মানবের পরিচয় নাই।

বেচারি রামপদ ত' প্রায় পথে বসিয়াছে। আহত হরিণের দৃষ্টির মত অসহায় চোখে সে তাকাইয়া রহিল।

আশা কহিতেছে : এতো সামনে থাকেন, অথচ একটিবার এসে গৌজ নেন্ না।

মানব বলিল : কী করে' জান্‌বো তুমি এতো কাছে আছো। অদৃষ্ট নিতান্ত ভালো বলে' তোমার দেখা পেলাম।

আরো তাহার কত-কি বলিয়া যাইত নিশ্চয়। রামপদ মাঝে পড়িয়া প্রশ্ন করিল,—আপনারা দু'জনে দু'জনকে অনেক আগে থেকেই চিন্তেন বুঝি ?

—ও, হ্যাঁ। অনেক আগে থেকে। সেই ছেলেবেলায়। মানব চাহিয়া দেখিল রামপদের মুখ ক্রমশ শুকাইয়া আসিতেছে : আপনি জান্তেন না বুঝি ? ও সুধীরের বোন্—আমারো ছোট বোন সেই

প্রথম প্রেম

স্বপ্নে। অনেকদিন থেকে জানি। ওর মা ত' আমারো মা। মা ভালো আছেন ?

আশা কহিল,—আছেন এক-রকম। সেই ভিটেটুকু না বেচলে এমন সোনার চাঁদ ভগ্নীপতি কী করে' পেতেন বলুন। বলিয়া আশা স্বামীর দিকে চাহিয়া চোখে এক ঝিলিক মারিল।

রামপদর মন দিনের আলোর মত হালকা হইয়া উঠিল ঘা-হোক। হাসিয়া কহিল,—নূতন অতিথিকে শালা বলে' পরিচিত করে' কি খুব বেশি সম্মান দেখালে ?

মানব জিজ্ঞাসা করিল : সুধীর ? সুধীর এখন কোথায় ?

—চাটগাঁয় পটিয়া বলে' এক গ্রাম আছে, সেই গ্রামে মাষ্টারি করছেন। মা-ও সেইখানে। আপনার জানাশুনো ভালো মেয়ে আছে ত' বলুন, মা দাদার বিয়ে দেবেন।

রামপদ কহিল,—ওঁর ভাবনা কে ভাবে তার ঠিক নেই, তোমার দাদার জন্তে ওঁর ঘুম হচ্ছে না।

—ওঁর আবার ভাবনা কী। ভাত না ছড়াতেই কাকের ভিড়।

মানব কহিল,—পৃথিবীতে একটিমাত্র ভালো মেয়ের খোঁজ জান্তাম—

—কী হ'লো ?

—তাকে রামপদবাবুই নিয়ে নিলেন। কিন্তু এতো সব আমি খেতে পারবো না, আশা।

—খেতে পারবেন না মানে ? এ ত' খেতে হ'বেই, রাত্রেও এখানে থাকেন। উন্ন ধরাতে হ'বে। তুমি আলোগুলো জালাও না।

খানিকক্ষণের জন্ত মানব অন্ধকারে একা বসিয়া রহিল। এবং অন্ধকারে মিলি ছাড়া আর কোনো কিছুই তাহার মনে আসিল না।

প্রথম প্রেম

মিলির আঁচল ধরিয়া আসিল সবুজ মেঘনা নদী, আর নদী যেখানে আসিয়া শেষ হইল সেখানে ছিটে বেড়া দিয়ে ঘেরা খড়ের একটি ছোট ঘর—নিষ্কর করতলের স্বতো ছোট উঠোন; বেশ ত', হইলই বা না-হয় এমনি পার্টিসান্-দেওয়া ভাড়াটে বাড়ি। কালীর ফোটে না টাঙাইয়া মিলি না-হয় বিলিতি মেমসাহেবের চেহারা-ওলা ক্যালেক্টার ঝুলাইবে।

আশার মত সে কি একটি দুঃখের সঙ্গিনী পায় না ?

তবু কেবলি তাহার মনে হইতে লাগিল মিলিকে হয় ত' এইখানে মানাইবে না।

আচ্ছা, তাহাকেও কি এইখানে মানায় ?

না, খুস্তি-বেলুন্ ছাড়িয়া ষ্টিয়ারিঙ-হইল্ ধরিলেই কি আশার পক্ষে নিতান্ত বেমানান্ হইত ?

মিলির চোখেও দুঃখ-দহনের ফুলিঙ্গ সে দেখিয়াছে। কিন্তু পৃথিবীতে দুঃখটাই কি বড়ো ? সেই কি জীবনের শেষ আশ্রয় ? সে এমন-কি অসীম বিস্তীর্ণ জলধি যাহাকে অতিক্রম করা যাইবে না ?

লগ্নন লইয়া আসিয়া রামপদ সমস্ত স্বপ্ন নষ্ট করিয়া দিল। কহিল,—
চলুন, দেশবন্ধু-পার্কে একটু ঘুরে আসি। আর किसের তোয়াক্কা ?

শশব্যস্তে আশার প্রবেশ : হ্যাঁ, ঔঁকে আবার টানা হচ্ছে কেন ?
তুমি বাজারটা একবার ঘুরে এসো। অতিথির কাছে শুধু-খালাটা ধরে' দি আর-কি। কিছু মাংস, ডিম, বিস্কুট—আপনার কল্যাণে কিছু চপ্ আজ রেঁধে ফেলি। দেখি পারি কি না।

মানব কহিল,—আমিও যাই ঔঁর সঙ্গে।

রামপদ আশাকে যে কতো ভালোবাসে মানবের বুদ্ধিতে আর

প্রথম প্রেম

বাকি রহিল না। আপত্তি করিল রামপদই : না, না, আপনি বসুন। বিছানায় গা ঢেলে দিয়ে খানিক রেষ্ঠ নিন্। আশা, এঁর সঙ্গে খানিক গল্প করো। ঘোমটা টেনে দাদার সামনে কনে বউটি হ'য়ে ঘুপ্টি মেরে বসে' থেকে না।

মাংসের জায়গা লইয়া রামপদ বিড়ি ফুঁকিতে-ফুঁকিতে বাহির হইয়া গেল।

আশা বলিল,—ভালো হ'য়ে উঠে বসুন। তার চেয়ে আশুন আমার সঙ্গে কলতলায়—হাত-মুখ ধুয়ে ঠাণ্ডা হোন। পরে জলখাবারটা খেয়ে নেবেন। কিম্বা, জল এখানেই এনে দেব ?

—আমি অত্যন্ত ঠাণ্ডা হ'য়ে আছি। আমার জন্তে ব্যস্ত হ'য়ো না। কিছু এতো-সব খেয়ে রাত্রে যে আর কিছুই খেতে পারবো না।

আশা মানবের সমস্ত কথা-ই জানে—জানিতে কাহারই বা এখনো বাকি আছে ? তবু সে তার কাছ দিয়াও ঘেসে না। খুঁটিনাটি এটা-ওটা কথা পাড়ে। অথচ মানবকে কত সহজে তাহার অপমান করা উচিত ছিলো !

রামপদকে সে এত ভালোবাসে যে সে-কথা সে একদম ভুলিয়া গিয়াছে। স্বামীকে যে পাইয়াছে তাহাতেই সে পরিপূর্ণ। আর কিছুই সে চাহিতে জানে না, জানিতে চাহে না।

তাই তাহার যত কথা :

এই এখানে দুটো পুঁইর চারা লাগিয়েছি। আপিস্ থেকে এসে যে একটু মাটি কুপিয়ে দুটো ফুল-গাছ লাগাবে তার নাম নেই। কুঁড়েমিতে লাটসাহেব। বিড়ির পেছনে মাসে দু'-ডজন দেশলাই লাগাবে। ভালো-ভালো জামা-কাপড় সব বিড়ির আগুনে ছাঁদা হ'য়ে গেলো।

প্রথম প্রেম

না, না, ঝি রাখবার কী হ'য়েছে? দু'টি মাত্র তু' থালা-বাটি—আমি
ও-পাতেই বসে' পড়ি। কোনো কোনোদিন সাহেবিয়ানা করে' বসি—
একটেবিলে নয়, একপাতে। আমার মাছ-টাছ সব কেড়ে-কুড়ে
খেয়ে ফেলে। আমুন না আমার সঙ্গে রান্নাঘরে। ভাত এতোকণে
টগ্‌বগ্‌ করছে। বেজায় ধোঁয়া কিন্তু। দেখবেন। পিঁড়েটা টেনে
দিচ্ছি। জামাটা—যাক, পারি না আপনাদের নিয়ে।

মিলির সঙ্গে তারপর আরো দুই দিন না তিন দিন দেখা হইয়াছিল।

মেস্‌এর বিছানায় শুইয়া-শুইয়া ঘুমাইবার আগে মানব তাহাই ভাবিতে বসে।

একদিন দুই-নম্বর বাস্‌এ : মিলি বলিল, ধরিত্রীর জন্মদিনে সে হরীতকী-বাগানের হস্টেলে চলিয়াছে। মেঝেতে সে আল্পনা দিবে। পরীক্ষা মানব ভালই দিয়াছে নিশ্চয়, শরীরও বেশ ভালই মনে হইতেছে। সতীশবাবু—তাহার মেসোমশায়ের ব্লাড্-প্রেসার বাড়িয়াছে। মাসখানেক হইল নিতাই নাই—বাড়ি যাইবার নাম করিয়া উধাও।

—আচ্ছা। এইখানে নাম্বো। তুমি বুঝি আরো দূরে। বাঁধকে।
আরেক দিন মার্কেটের পথে :

ফুলের দোকানের কাছে দোকানদার-বন্ধুর সঙ্গে মানব দাঁড়াইয়া কী গল্প করিতেছিল। এখন আর সে বুড়ি ভরিয়া দূরে থাক, বাটন-হোল্‌এর জন্ত পর্য্যন্ত একটা ফুল কিনে না কেন, দোকানদারের এই ছিল অভিযোগ। ফুলের চেয়ে অণু-কিছুর প্রয়োজন যে কত প্রত্যক্ষ ও পরিচিত তাহা কথায় বুঝাইয়া দিবার আগে চোখের সামনে মিলির আবির্ভাব। খামিতে-না-খামিতেই এক ঝাপ্টা জলো হাওয়ার মতো সে উড়িয়া গেল।

মানব ডাকিল : মিলি।

মিলি দাঁড়াইবে কি দাঁড়াইবে না ভাবিবার আগেই মানব পাশে আসিয়া পড়িয়াছে। দোকানদার কোঁতুলনী হইয়া চাহিয়া রহিল। এই ফুলে তাহাকে কেমন দেখাইবে ?

মিলি এখন ভারি ব্যস্ত। হস্টেলের মেয়েরা মিলিয়া ‘রক্তকরবী’

প্রথম প্রথম

করিতেছে। ইউনিভার্সিটি ইনষ্টিটিউটে গ্রে হইবে। দস্তুরমতো টিকিট করিয়া। পুরুষদের দেখানো হইবে—দস্তুরমতো দেখানো হইবে। মিলিরা তেমন ছিঁচকাঁদুনে নয়, পুতু-পুতু করিয়া তাহারা অভিনয় করে না। যার খুসি সে আসিয়া দেখিয়া যাক, পয়সা খরচ করিয়া। মনে যা আসে তাই লিখিয়া সাপ্তাহিকে-মাসিকে সমালোচনা করুক। একটাকা লোয়েষ্ট্। মানব সেই আগের ঠিকানায়ই আছে ত' ? খামে পুরিয়া মিলি তাহাকে না-হয় ড্রেস-সার্কলের একখানা পাশ্ পাঠাইয়া দিবে। সে যেন আসে।

—নাকে-মুখে পথ পাচ্ছি না। রিহার্সেলই দেব, না, মেলা-ই জিনিস-পত্তর কিন্বো—তা কে দেখে ? আর এ সব মেয়ে—যতো সব ইল্শে-গুঁড়ি, ছুঁতে না ছুঁতে মিলিয়ে যায়। তুমি আমার সঙ্গে কোথায় আসছ ? পেছনে আমার এক দঙ্গল সেনানী, না ফেউ। এই উষা, এই মাসি, হাঁটতে পারিস্ না ?

পিছনে বাহিনী আসিতেছে। তাহারা এত পিছে পড়িয়া আছে কেন ? অর্থাৎ মিলি তাহাদের ফেলিয়া বোঁ করিয়া এতটা আগাইয়া আসিল কেন ? ফুলের দোকানের কাছে তবে কি তাহাকে দেখিতে পাইয়াছিল ? তাহাকে এড়াইয়া যাইতে, না, আগাইয়া আসিয়া তাহার সঙ্গে নিভুতে একটু কথা কহিতে ?

—কাজ সব ভাগ করে' দিলাম, তবু কারুর গা দেখি না। কাজেও ওদের নবাবি। আমি শুধু খেটে মরি। তুমি চাকরি-বাকরি কিছু পেলে ? এই বুলা, হস্টেলে তোরা দু'বেলা সাবু খাস্ নাকি ? না, এখনো টিউসানিই করছ ? রট্। তুমি যেয়ো কিন্তু—তারিখ পরে কাগজে দেওয়া হ'বে। আচ্ছা। চিয়্যারিয়ো !

প্রথম প্রেম

এই দুই দিন হইল। আরেক দিন গেল কোথায়? মানব চোখ বুজিয়া স্বতির গহন অন্ধকারের সমুদ্রে তলাইয়া-তলাইয়া তাহা ভুলিতে পারে না।

বা রে, সেই দিন—এতক্ষণে তাহার মনে পড়িয়াছে—সেই দিন তাহার কোলের উপর মুখ খুঁজিয়া সে ঘন-ঘন নিশ্বাস ফেলিতেছিল। সেই স্পর্শের গন্ধ তাহার সারা গায়ে এখনো লাগিয়া আছে। সে না-জানি তখন কী করিতেছিল, কী ভাবিতেছিল, কী-কথা বলিতে গিয়াও বলিতে পারিতেছিল না।

যাঃ, সে ত' দেওঘরে—রিখিয়া যাইবার পথে। এখানে কোথায়?
না, তিন দিন নয়।

আজ মনে পড়ে রিখিয়া যাইবার পথে স্পর্শের সেই উদ্দাম ঝড়ে দৃষ্টি ছিল কুণ্ঠিত, ব্যবহার কৃত্রিম। মিলির সেই অজস্র সমর্পণের অন্তরালে প্রকাশের কী দীনতা! তাহার চেয়ে মেঘনার উপরে চাঁদপুরের ষ্টিমারে মানব যখন তাহাকে বুকের কাছে টানিয়া আনিবার জন্ত চেষ্টা করিতেছিল মিলির তখনকার মৃদু-মৃদু বাধার মধ্যে গাঢ় একটি আন্তরিকতা ছিল। সেই রূপণতার মধ্যে কতো বড়ো ঐশ্বর্য্য!

দলছাড়া একাকী একটা গাঙশালিকের মতো মানব মেঘনার উপরে সেই ষ্টিমারটা খুঁজিয়া বেড়ায়।

না, মাত্র একটি দিন।

তারপর আসিল সময়ের স্রোত।

সূঁচের মতো তীক্ষ্ণ ও সোজা, রাত্রির মতো ক্লান্ত ও কঠিন।

প্রথম প্রেম

ঘোড়দৌড়ের ঘোড়ার মতো ছুটিয়া চলিয়াছে, কিন্তু যে-ঘোড়া তুমি ধরিয়াছ সে আর আসিয়া পৌঁছায় না।

মেঘনা কবে শুকাইয়া গেল, ষ্টিমার উঠিয়া গিয়াছে, নোয়াখালির সেই বাড়িটা নদীর তলায় ভাঙিয়া-চুরিয়া ছত্রখান্।

খালি মাটি আর মাটি।

মাটি খুঁড়িয়া সে পয়সা আনিবে বলিয়াছিল। বলিতে ভালো লাগিয়াছিল বলিয়াই বলিয়াছিল। তেমনি কত কথা মিলিরো বলিতে ভালো লাগিয়াছে।

সময়-সমুদ্রে কোটি-কোটি তরণী। পাশাপাশি আসিতে-আসিতে কোথায় কে পিছাইয়া পড়িল। কে কাহার জন্ত দাঁড়ায়—সময়ের সমুদ্রে সময় কোথায়?

মার্চেন্ট্ আফিসে সামান্য এক কেরানিগরি পাইয়া মানব রাজপদে প্রতিষ্ঠিত হইল। কাল তাহাকে গিয়া জয়েন্ করিতে হইবে।

এই উপলক্ষে বেনেপুকুরের মেস্‌এর বাসিন্দারা আজ বিকেলে একটা বায়স্কোপ দেখিয়া হৈ-চৈ করিবার জন্ত মাতামাতি করিতেছে। মানবের গলা সবাইর উপরে। গিরিজা টাকা লইয়া কখন টিকিট কিনিতে চলিয়া গিয়াছে, সে আসিলেই সকলে মিলিয়া বাস্ ধরিবে। ফিষ্টেরও একটা ছোট-খাটো ফিরিস্তি তৈরি হইয়াছে—বৈজনাথবাবুর উপরেই সব জোগাড় করিবার ভার।

মাথা ধুইয়া বাঁ-হাতে প্রজাপতি-তোলা ছোট আয়না লইয়া মানব চুল আঁচড়াইতেছিল।

প্রথম প্রেম

লোক্যান্ ডাক এমন সময়েই আসে। নিচে হইতে বিকাশ একটা খাম হাতে করিয়া হাজির।

বিক্ষুব্ধ জনতাকে সম্বোধন করিয়া বিকাশ বলিল,—কারো সর্বনাশ, কারো বা পোষ মাস। কেউ খায় পিঠে, কেউ খায় পি-ঠে! আমাদের ভাগ্যে জুতোর একটা সুখতলাও জোটে না, আর (মানবের দিকে খাম-শুকু হাত বাড়াইয়া) ওর ভাগ্যে কি না দিস্তে খানেক লুচি। মানুষের ভাগ্য যখন আসে, কপাল ফুঁড়ে আসে। চাকরি পেতে-না-পেতেই বিয়ের নেমস্তন্ন।

খবরটা বিশদ করিয়া জানিবার জন্য সবাই হাঁ-হাঁ করিয়া উঠিল।

মানব সমানে চুল আঁচড়াইয়া চলিয়াছে।

চিঠিটা আসিয়াছে বুক-পোটে—মোড়কটা খোলা। বিকাশ চিঠিটা খুলিয়া বলিল,—নেমস্তন্ন কন্যাপক্ষের। অতএব সুবিধের নয়। বরপক্ষ থেকে হ'লে বরং দু' দু'বার মারতে পারতিস্।

—তাই সই। বলিয়া সত্যোন্ চিঠিটা বিকাশের হাত হইতে ছোঁ মারিয়া কাড়িয়া নিয়া পড়িতে লাগিল :

—আগামী ২৭শে বৈশাখ বৃহস্পতিবার আমার প্রথমা কন্যা শ্রীমতী মঞ্জরী দেবীর সহিত—

মানব এতক্ষণ এই খবরটারই প্রতীক্ষা করিতেছিল। সাম্ভাতিক তাহার উইল্-ফোর্স। সে দস্তুরমতো থট-রিডিং করিয়া পরসা রোজগার করিতে পারে।

—শ্রীমান ব্রজবল্লভ বন্দ্যোপাধ্যায় বাবাজীবনের সহিত...

—বাবাজীবন! প্রমথ একেবারে হাসিয়া খুন।

বিকাশ বলিল,—যাই বলো, চমৎকার ইনিশিয়াল্ নামটার। বি. বি. বি।

প্রথম প্রেম

আয়নায় মুখ দেখিয়া মানব দিব্যি টেরি বাগাইতেছে। মুখে তাহার কোনো পরিবর্তন ঘটে নাই ত' ? হাতটা কাঁপিতেছে নাকি ? পাগল ! নিজের মনে নিজেই সে একটু হাসিল। 'যাই বলো' কথাটা মিলি প্রায়ই বলিত বোধ হয়।

কিছুই হয় নাই এমনি পরিষ্কার নিরুদ্দিগ্ন কণ্ঠে মানব বলিল,—
তারিখটা কবে বললে ?

—এই ত' সামনের বেস্পতিবার।

মানব মনে-মনে হিসাব করিয়া বলিল,—তা হ'লে মোটে চার দিন আছে। এখন থেকেই জোলাপ্ নিতে শুরু করি, কি বলিস্ বিকাশ ?

বিকাশ হাসিয়া বলিল,—এখন থেকেই নয় বাপু। কাল তোমার নতুন আপিস্।

ভালো কথা মনে করাইয়া দিয়াছে। তবু মানব আম্বতা-আম্বতা করিয়া জিজ্ঞাসা করিল—নিচে কার নাম ? হীরালাল মুখুজ্জের ?

চিঠিতে চোখ বুলাইয়া সত্যেন্ কহিল,—হ্যাঁ, শ্রীহীরালাল মুখো-পাধ্যায়। বাড়ির ঠিকানা রসা রোড্ সাউথ্। দেখিস্ ঠিকানাটা হারিয়ে যায় না যেন। বলিয়া চিঠিটা খামে মুড়িয়া তাকের উপর রাখিয়া সে একটা বই চাপা দিল।

সন্দেহের আর কিছু বাকি ছিল নাকি ? কাঁটায়-কাঁটায় ঘড়ি মিলিয়াছে। দেওঘর থেকে আসিয়া মিলির ভালো নাম কবে সে মুখস্ত করিয়া রাখিয়াছিল।

মানবের চুল আঁচড়ানো আর শেষ হয় না।

কতগুলি কথা তাহার চর্ট করিয়া মনে পড়িয়া গেল—হীরালালবাবু আসিয়াছেন, পিসিমা আসিয়াছেন, এয়ার-গান্টা সঙ্গে লইয়া গোরাও

প্রথম প্রেম

নিশ্চয় আসিয়াছে। তাহার কাঠের বাস্তের তাহার সেই মিউজিয়ম্‌টা পিসিমা কিছুতেই আনিতে দেন নাই। আর কে-কে আসিয়াছে মানব তাহাদের কাহাকেও চিনে না। খুব ভিড়—দারুণ গোলমাল। হরিহর ফুড্‌ক্-ফুড্‌ক্‌ করিয়া তামাক টানিতেছে। সেই য্যাংলো-ইণ্ডিয়ান্‌ মেয়েটি এখন আর নাই, কবে চলিয়া গিয়াছে না-জানি। সতীশবাবু তেতলা হইতে নিশ্চয় এত দিনে নিচে নামিয়াছেন। তাঁহার ব্লাড্-প্রেসার এখন অনেকটা ভালো। কিন্তু সুবিনয় কি আসে নাই? কি-জানি তাহার নাম? ব্রজবল্লভ! ব্রজবল্লভ দীর্ঘজীবী হোন্‌।

হুড়্‌মুড়্‌ করিয়া গিরিজা আসিয়া হাজির।

তাহাকে দেখিয়া বিকাশ জোর-গলায় সম্বন্ধনা করিল: এই যে গিরিজাগোবিন্দ গুহ। জি. জি. জি। শিবাশ্তে আসন্‌ পস্থানঃ?

গিরিজা ব্যস্ত হইয়া বলিল,—চলো, চলো, সাড়ে-পাঁচটা বেজে গেছে।

প্রমথ ব্র্যাকেট্‌ হইতে সার্টটা কাঁধে ফেলিয়া বলিল,—আমরা ত' কখন থেকে রেডি হ'য়ে আছি। মানববাবুরই হয় নি।

বিকাশ বলিল,—ওরে, আজকেই নেমস্তন্ন নয়। চারদিন বাদে। এখন থেকেই চুলের কস্মরৎ করতে হ'বে না।

তাকের উপর আয়না-চিরুনি রাখিয়া মানব কহিল,—বা, আমরা ত' কখন হ'য়ে গেছে, চলো।

দল বাঁধিয়া সবাই একটা চলন্ত বাস্‌ আক্রমণ করিল।

দুই ধারে বাড়ি আর দোকান—কেনাবেচা, দরদস্তুর, কোলাহল।

তবু কোন্‌ নদীর জলে এখন সূর্যাস্ত হইতেছে। কোথায় কোন্‌ কুটিরে মাটির একটি বাতি জ্বলিল।

বাড়ি-ঘর-দোর লোকে গিস্‌গিস্‌ করিতেছে। ব্যাপারীরা নানারকম

প্রথম প্রেম

হিসাবের ফর্দ আনিতেছে—হীরালালবাবুর ঐ সব দিকে পাকা নজর। তার পর সেই গুঁফো কাকাটি আছেন। বিবাহ করিয়া মিলি খারাপ হইয়া যাইবে বলিয়া দুইটা ধমক দিয়া না বসিলেই ভালো। সে যে-ঘরে শুইত সেইখানে খোকা দোলনায় ছলিতেছে—তাহাকে ঘিরিয়া মাতৃ-মোভিনীদের ভিড় লাগিয়াছে। পাছে কেহ আদর করিয়া গাল টিপিয়া দেয়—সেই ভয়ে মিসেস্ অনুপমা চাটুজে সতর্ক চোখে কাছে-কাছে ফিরিতেছেন। মিলি যে-ঘরে শুইত সেইখানে পাটি বিছাইয়া ফরাস্ পড়িবে—সেই ঘরেই হয় ত’—ইস্, লোকটা আরেকটু হইলে চাপা পড়িয়াছিল! ড্রাইভারটা ওস্তাদ।

বায়স্কোপের প্রথম ঘণ্টা দিয়াছে। মানব হঠাৎ উঠিয়া পড়িল। বলিল,—বাইরে থেকে আসি একটু।

—কিছু পান নিয়ে আসিস্ অমনি।

মানবের আর দেখা নাই। ছবি শুরু হইয়া গেল।

ফাঁকায় আসিয়া সে বাঁচিয়াছে। আর তার ভয় করিতেছে না।

কি করিবে—এমন দিনে মানুষে কী করে—কিছুই বুঝিতে না পারিয়া সে গাড়ি-মোটর বাঁচাইয়া আন্তে-আন্তে ইম্পিরিয়াল্ রেষ্ঠোর্যাণ্টে আসিয়া ঢুকিল।

খালি একটা টেবিলের কাছে চেয়ার আগাইয়া বসিয়া সে অর্ডার দিল : এক পেগ হইস্কি অউর এক প্লেট্ ফাউল্-কাট্লেট্।

আরো অনেকে মদ খাইতেছে। অকারণে। অভ্যাঙ্গে পরিশ্রান্ত হইয়া। হয় ত’ আর কোনো কাজ নাই বলিয়া।

মদ খাইবে মনে করিয়া হঠাৎ সে গস্তীর হইয়া পড়িল। ভাবিল : এই দুঃখ মিলি ভাগ্যিস্ পায় নাই। সে কখনই ইহার মর্যাদা রাখিতে

প্রথম প্রেম

পারিত না। সে যে নারী। নারী বলিয়াই বিধাতা তাহাকে মায়ী করিয়া এই দুঃখ দেন নাই। এই দুঃখকে প্রসন্নচিত্তে জীবনে স্বীকার করিয়া লইবার মত চরিত্রের উদারতা ও বলিষ্ঠতা তাহার ছিল না।

আচার্য্যের চণ্ডে এই কথা কয়টি মনে-মনে আওড়াইয়া সে হাসিল।

এবং বয়্ যখন মদ আনিয়া রাখিল তখন আরেকটু হইলে জোরেই সে হাসিয়া উঠিয়াছিল।

মিলির ভালোবাসার মতই সোডার চঞ্চলতা ধীরে-ধীরে মিলাইয়া গেলে মানব গ্লাসটা দূরে সরাইয়া রাখিল। তাহার এমন-কী দুঃখ যাহা ভুলিতে সে এত কষ্টের পয়সা দিয়া মদ কিনিয়া বসিয়াছে। সে মদ খাইয়া তাহার এই চমৎকার অস্তিত্ববোধকে ঘুম পাড়াইয়া রাখিবে নাকি ?

ফাউন্-কাট্লেটটা চিবাইতে-চিবাইতে হঠাৎ তাহার মনে পড়িয়া গেল—কাল তাহার নতুন চাকরিতে জয়েন্ করিতে হইবে।

অমনি তড়াক্ করিয়া চেয়ার ছাড়িয়া সে লাফাইয়া উঠিল। পকেটে পয়সা এখনো কিছু আছে বটে,—ফিটন্ একটা অনায়াসে নেওয়া বাইতে পারে—কিন্তু চোরঙ্গিতে কিছুক্ষণ না বেড়াইলে—অনেকটা না হাঁটিলে সে স্পষ্ট বুঝিবে না জীবনে সে আজ কতো বড়ো মুক্তি লাভ করিয়াছে !

মুক্তি—পদ্মপালবিধবস্ত মাঠের নিঃশব্দতা নয়।

মুক্তি—তাহার জীবনের শেষ আভিজাত্যটুকুও মিলাইয়া গেল।

যাক্, আজ রাত্রে তাহার গভীর ঘুম হইবে। পরীক্ষা দিবার পর এত শান্তিতে কোনোদিন সে আর ঘুমায় নাই।

মানবকে আমরা এইখানে ছাড়িয়া দিয়াছিলাম

প্রথম প্রেম

তবে এইটুকু মাত্র খবর রাখি যে সে এখনো বেনেপুকুরের মেস্ হইতে ডবলিউ. ডবলিউ. রিচার্ডসের আফিসে নিয়মিত দশটা-পাঁচটা করে। গত সনে তার তিন টাকা মাহিনা বাড়িয়াছে।

আর এইটুকু জানি যে সময়-সমুদ্রের উত্তাল ঢেউ—ফেনিল লেলিহান তার ক্ষুধা।

আরো এইটুকু জানি—কানে-কানে বলিয়া রাখি—হিসাবের খসড়া করিতে-করিতে রাজ্যের-চিঠি-পত্র লিখিতে আঙুলগুলি যখন বাঁকিয়া-চুরিয়া ভাঙিয়া আসে, তখন মাঝে-মাঝে তাহার মনে হয় হাত পাতিলেই ত' সে অনায়াসে সতীশবাবুর কাছ থেকে কিছু পাইতে পারিত!

আর, রাতে কখনো-কখনো যখন তার সহজে ঘুম আসে না, তখন ভাবে—রিখিয়া ঘাইবার পথে, ট্যান্ডিতে—এমন নিরালায়—এত কাছে পাইয়াও মিলিকে সে সম্মানে ফিরিতে দিয়াছিল কেন?

শেষ

— श्रीमती अर्चना देवी
२४१२: कनक दीर्घाच्छीरे—
बिलासपुर

२२. ४. ७७

